

TÜRK TARİHİ VE COĞRAFYASI

7
8



TÜRK TARİH KURUMU
KÜTÜPANESİ

KAYIT No. 11317

YER No. A 8459

A

8459

مجمع مؤلفي
مجمع مؤلفي



مفصل

قاموس فلسفه

قاموس عمومی نك يالكز اصطلاحات فلسفیه

قسمی شاملدر

ORG

مؤلفی

رضا نوری



مطبعة عامره — استانبول

۱۳۳۰

11317
A/8459



بعض ایضاحات

بچن سنه ظرفنده معارف ناظری شکری بک افندی طرفندن اتخاذ اولونان مصیب برقرار اوزرینه (اصطلاحات علمیه انجمنی) نامیه بر هیئت مخصوصه تشکلی اتمش و دارالفنون کتبخانه سنده ایفای وظیفه به باشلامشدی؛ نته کیم حالا وظیفه سنه غیرتله دوام ایتکده در.

مملکتیزک اکثر متخصصین علوم و صنایعندن مرکب بولونان بوهیئت علمیه نکه حیثیت خدمتی و وظیفه سی، السنه مترقیه ده جاری و مستعمل اولان بر جوق تعییرات علمیه و کلمات اصطلاحیه نکه، کندی لسانمزده مقابللری بولوب تعین ایتک و بناء علیه مضبوط و مدون بر (قاموس اصطلاحات) وجوده کتیرمکدر.

واقعا بویله بر نیت مستحسنه، معارف نظارتنده، چوقدنبری طوغمش و حتی ناظر سابق امراء افندی مرحوم، اوتنه دنبری بر (محیط المعارف) وجوده کتیرمک ایچون صرف ماحصل ایتمشدی. فقط بر قاموس اصطلاحات یاییله مامسنه سبب ده مرحوم محترمک، تک باشنه بویله بر ایشی باشاراییلمک خصوصنده کی امل و همتی وهله شایان تحسین اولان غیرتی ایدی. بوکون محققدرکه بویله بر اثری تک برکشی وجوده کتیره مز. علومک آنجق زمانمزده کورولن درجه ترقیسی و ساحة معلوماتده - اوترقی سببیله - بالضروره حاصل اولان تقسیم اعمال ملاحظه اولونورده تعین ایدن شعبات علمیه نکه، یالکیز جدول اسامیسی کوز اوکنه کتیریلیرسه، در حال آکلاشیلیرکه بوکهمکشان معلومات الک بویوک قفالرک بیله حوصله احاطه سنه صیغه میه جق درجه ده واسع بر عالم معنادر؛ حتی اجمالاً بیله احاطه اولونه ماز. بناء علیه هر برینک فهرست اصطلاحاتی آیری آیری بر رلسان بیان تشکیل ایدر و اوا اصطلاحاتک متضمن بولوندوغی مسائل حقده بر کشینک صلاحیتله بیان رأی ایتسی ممکن دکدر. باشقه یرلردن ترجمه و التقاط صورتیله دخی اولماز؛ چونکه بوکبی شیلری ترجمه ایده بیلمک یالکیز بر لسانی عادتاً بیلمکله میسر دکدر.

113/4
A/8459

اوعلمی لایقہ بیلمی وهر برینک لسان مخصوصی ده اویله بیلمی! حالوکه، ایشته بو، بر آدم ایچون ممکن اوله میه جق موفقیتلر دندر .

معارف ناظر حاضری بک افدینک موفقیتی، بوحقیقه قناعت ایدوب تقسیم اعماله لزوم کورمش اولماسنده در . ارباب صلاحیتک آنجق مهمات مشترک سیه وجوده کله بیه جک اولان بویه بر اثر، بوشرطه تمامی رعایتله میدان چیقایلیر .

ملکیتک تمدن وترقیسندمه معارفک نه قدر متنوع عوامل مؤثره احضار ایده بیه جکنی بحق تقدیر ایدن هرکس - امینم که - بو تشبیهی کال شکران ایله قارشیلایه جقدر . هله بوندن الک زیاده مستفید اوله جق کیمسه لر؛ بالخاصه منتسین علومدر؛ طلبه افندیلردر . نته کیم بو کتاب، اونلرک تربیه فکریه سنه خدمت ایده بیلیمک ایچون وجوده کتیرلمشدر .

شبهه یوقدرکه اصطلاحات معینه دن محروم قالان لسانلر ایله نشر علوم وتعمیم معارف برمشکل ایشدر؛ نانکور بر غیرتدر . حتی - هر هانکی بر لسانده اولورسه اولسون - برچوق اصطلاحات بولونسه ده، معانی معینه یه محصص اولماسه، اویله بر لسانک، نشر معارف نامنه تشویش افکاردن باشقه بر خدمتی اوله ماز؛ بناء علیه ضرری فائده سنه غالب کلیر . بو ادا مک حقی اولوب اولمادیغنی آکلامق ایستینلر، شوفقیر مطبوعاتمزدده، اوچ درت سنه دنبری فلسفه و علم نامنه یازیلان مقالاتک - قیمت و حیثیت ذاتیه سنی بر اقوبده - طوغروجه و صریح بر معنا افاده ایدوب ایده مدیکنی تحقیق ایله ملی درلر .

لکن ای دوشونولورسه تبیین وتحقق ایدرکه شمعی یه قدر بزم ملکتمزدده افکار فلسفیه وحقایق علمیه نک - لزومی قدر! - انتشار وتعمیم ایده مه مش اولماسی، کندی استعداد سز لغمزدن دکل، بلکه لسان علمی مزک - مع التأسف - اوزون مدت اهمال ایدلمش بولونماسندندر . معلومات نظریه وحقایق مجرد ایله آز چوق الفت واستیناس ایتمش اولان ذوات نادره نک بیه بر عقیده فلسفیه اوزرنده تألیف افکار ایده مه مه لری - اسباب سائرده دن قطع نظر - برچوق اصطلاحات مهمه یه باشقه باشقه معاویرمکده اولدقلرندندر . حالوکه

اصطلاحات علوم، حد ذاتنده، جامع الکلم در؛ اول امرده جزئی بر معنا فرقی حین مباحثه ده بویوک بر مبادیت افکاره سبب محض اوله بیلیر؛ وزاویه اختلاف کیندجه آچیلیر .

مختلف مختلف منابع اجنبیه دن علی العجله النقاط معلومات ایتک صورتیه تلقی ایدیلن افکار متفرقه یی - صرف شخصی بر نقطه نظر توفیقاً - قناعت ذاتیه یه اویدورمق؛ . . . یعنی بوسبوتون غریب بر شکل ایله مال ایدینک؛ . . . بر تعیر اصطلاحی یی - عاجل ومبرم بر لزوم اوزرینه - لسانمزه نقل ایدرکن عندی وکینی بر تقدیر کوره مختلف مختلف کلمه لرله ترجمه وادا ایلک؛ . . . اسلافک عینی موضعه ده، عینی معنا ایچون قوللانمش اولدقلری کلمات معتبره دن غافل بولونمق کی - غیر مقبول - بعض ضرورتک محظور لری ده نظر تأمله آلینیرسه، لسان علمی مزده و - طولانیسیله - افکار ومعلوماتمزدده کورولس قارغاشه لغک باشلیجه اسبابی تعیین ایدلمش اولور . معلومات صحیحه نک بودرجه قحطنه نسبتله افکارک بوقدر پڑمرده ومشوش اولماسی حقیقتاً شایان تأسفسدر .

بو اطراد سز لفسک، متخصصین علومه بلکه اوقدر ضرری یوقدر؛ چونکه بر متخصص کندی صلاحیت علمیه سی دائره سنده موضوع بحث اولان بر مسئله نک حیثیت اصلیه سنی بیلیر؛ بیلدیکی ایچون، - قصورلی وپوروزلی تعیرات آلتنده کیزله نن معانی یی استخراج ایتکده دخی اوقدر کوچلک چکمز . فقط، علمه هنوز انتساب ایدن کنجدر ایچون بو ترتیب سزلکدن مضر برشی یوقدر . طلبه افندیلرک مکتبلرده عینی سیاق و اصول اوزره تعلیم و تربیه کورمه لری - ایشته بو حکمته مبنی - مطلوب وملتزم برغایه اجتماعیه در . بوتون عالم مدنیتده، معتبر ومسلم بعض حقایق صریحه ومعلومات یقینه واردرکه اونلر انسانیتک سرمایه عرفانی وافراد بشرک مال مشترکی در . جماعات مختلفه ده تربیه لی آدملرک جمله سنک مجله اعتقاداتی تشکیل ایدن او معلومات مسلمیه یی، طلبه افندیلر مکتبده (اجمالاً) اوکره نیرلر . چونکه بونلرک آنجق پک آزی بدیهیاتدندر؛ پک چوغی استدلال ونظر وهله تجربه ایله منکشف اوله بیه جکی ایچون، تعلیم وتعلمه محتاجدر .

ایشته بوساحه معلوماته تشنت اعتقاد و تردد افکار اولماق اولادر . اساسا مکاتب عمومیه دن بکله نیلن تربیه اجتماعیه نك برنجی شرطی بودر . اک بویوک فائده سی دخی بودر ! تربیه اجتماعیه تعبیرینک ذاتاً متضمن بولوندوغی بوشرطه فضله اهمیت ویرله سنده باشلیجه ایکی سبب معقول واردر . شبهه یوق که تربیه دن مقصد اولا ، جریان حیاتی برمبدأ قویمه توفیقاً تنظیم ایده بیلیمک ایچون لابد اولان دستورالعملی بولمق و قطعاً تعیین ایتمکدر . بودستور همه حال عموماً مقبول و مسلم بولونان احکام و مبادی اساسیه یه مستند اولمق کرکدر . باشقه درلو اوله ماز ؛ چونکه هر بریمز ، عضویت اجتماعیه نك برجزه فردی ، بر حجره سی یز و روابط مختلفه و مناسبات متقابله ایله یکدیگر مزه باغلی یز . معاملات مزده ملاحظاتمزدده متقابلاً علاقه دارز . اوندن صوکره عینی فطرته یز ؛ طبعاً عینی صورتده یارادلمشز . ایشته آرده حد مشترک اولان حقایق مسلمه نه ایسه دستورلریمز انجق اونلرک شکل افاده سی اوله بیلیر . اوزاقدن یاقیندن منافع انسانیته تعلق بولونان مسائل مهمه ده معارضه افکار وقوعه کلنجه یه او دستورلر ، — طرفینجه مصدق و مسلم — برر حجت مشترکه حیثیتله قائم بولونور . خلاصه هر آلیش ویریشده ، هر معامله ده تنظیم امور ایچون ، نصل بر معیار معتبر ، الزم ایسه ، مناسبات فکریه ده دخی — حق و باطلی تفریق ایدوب — الدانماق وهله اکلاشه بیلیمک ایچون بر قسطاس قویم ایستر . فوضا حالنده ، بوامیه نك تحقیقنه امکان یوقدر ؛ چونکه بویله بر حالده هر کسک معیاری کندی نظر اعتباریدر ؛ اوده کیفی اولور ؛ هیچ اولمازسه عندی اولمقدن قورتوله ماز . حالبوکه تربیه اجتماعیه نك غایه مترقبه سی امر معاشده تألیف منافع ایسه ، طرز تفکرده نه توحید نظردر . ذاتاً علم بشرک متواطی ، یعنی وحدت نظره متماثل اولدوغی ، ترقیات ایله ثابتدر . کشفیات واقعه ، فرضیات متخالفه آرده سنده دائماً ائتلاف نقطه لری بولمش و نهایت ، جزئیات متشکته یی برکلی عمومی تحت درج ایدرک ، معلومات متفرقه یی ضبط وربطه آلمشدر . مکتبلرده اوقونان کتابلر ، تاریخ ترقیات فکریه نك مضبطه لریدر . بونلر اثبات ایدیورکه هر کسک عینی شکل و صورت اوزره بیلیمه سی ایجاب ایدن

بعض معلومات مؤسسه وارکه سائرلرینک اساسلریدر . بونلری هر کس بیلیمه لیدر . چونکه کندی حسابنه دوشونمک و حقیقته اصابت ایتمک هر کسک کاری دکدر . هله بومعلومات اساسیه خارچنده دوشونه بیلیمک ، کیمسه نك حدی دکدر . ذهن بشر او حدود اساسیه خارجه چیقماز . بونلرک اصطلاحاتی نه دن معین اولماسین ؟!.. بزبوخصوصه حالا غریب بروصعیتده یز : صانکه کندی سکسی اولمایوبده هر درلو آچیه رواج ویرن ابتدائی و بدوی برملکت حالده یز .

ایشته معارف نظارتنک همت واقعه سی اولا بونقطه مهمه یه معطوف ، و صوکرده بوغایه اجتماعیه نك تأمین تحقنه مصروف بولونمشدر .

بنم ، ارباب مراقه و علی الخصوص طلبه افندیله تقدیم ایتدیکم بواثر ، عمومی (قاموس اصطلاحات) ک یالکز ایلك قسمی تشکیل ایدن (فلسفه تعبیراتی) حقنده تعریفات مفصله یی شاملدر . ناظر بک افدینک قدر شناسانه تشویقاتی سایه سنده ، بواثر ، همان بر قاچ آی ظرفنده وجوده کتیرلمش اولدی . او تشویق اولماسهیدی ، بیلیم ، بن بویله بر کتاب ایچون اوغراشیرمی ایدم ؟!.. بوفعالیت مشمره یه ، او قدر شناسلق سبب اولدوغی ایچون ، بن ، بوراده عهده مه ترتب ایدن وظیفه تشکری علناً ایفاییدیورم . شو قاموس فلسفی نك ترتیبه کلنجه ، بعضی ایضاحات ویرملی یم که ، اونک تألیفی اوغورنده معروض قالدیغ مشکلاتک ماهیت و انواعه داتر بر فکر بچمل ویرمش اوله یم ؛ هیچ اولمازسه اثرک تقایص طبعیه و ضروریه سنه قارشی ، کندی معذور کوستره بیله جک بروسيله مقبوله عرض ایده بیلیمش اوله یم .

انجمنمزده بر لام الف ویا خود بر ترکیب مسئله سی ایچون تحدت ایدن مشکلات عارضیه دن بحث ایتمک ایسته میورم . شو مقدمه نك نهایته طوغرو بومسئله لر ایچون البت بر ایکی سوز سویلیه جکم ؛ فقط شمذیلک اصطلاحاتی ترجمه ویا ایجاد ایتمکده معروض قالدیغمز حقیقی و ضروری مشکلاته داتر بر فکر ویرمک ایستیورم .

اولا ، عصرلردنبری فلسفه و علمی اهل ایتمش اولمقلممز ، مشکلاتک

بر بویوک قسمی تشکیل ایدیور . بر ملت ، ملکاتنک هانکی قسمی زیاده استعمال ایدرسه او قابلیاتی ایکاله سعی ایتیش اولور ؛ طبیعی درکه لسانی دخی او وجهله اعمال ایدیلیر ، اوکا کوره یوغورولور و او شکل اوزره هررض کال ایدر . بزدهده اویله اولمش !.. لسان ادبی ، خیلی مکمل بر مرتبه یه کلش اولدینی حالده لسان علمی و فلسفی مز ، سلطان سایان قانونی دورینه نسبتله فقیر ، هم پک فقیردر . حالبوکه پارلاق و سورکلی بر مدنیت فکریه وجوده کتیرمش اولان عربلرک لسانی اولاصطلاحات فلسفیه و علمیه سیله جالب نظردر . طبیعی درکه بز او خزانه مدینتدن اصطلاحات لازمی آریوب آله جفر ، ذاتاً دأب قدیمز بودر . اوندن صوکره بواحتیاجزی تطمین ایده بیله جک یکانه لسانده اودر . فقط بو خصوصدهده مشکلات متعدده باش کوستریور . اویله مشکلات که ، بویله بر تجربه یه کیریشمه دیکه ماهیتی اکلاشیله ماز .

بونلرک بر قسمه - تاریخی - نامنی ویره جکم ، چونکه حقیقتاً بونلر ، ترقیات فکریه ایل ، تقدیرات بشریه یه عارض اولان تبدلات ضروریه دن عبارتدر . غالباً ، زمان ایل و واقع اولان کشفیات ، حادثات حقنده کی اعتقادات مؤسسه یی ، حتی معتبر اولان نقض نظری یواش یواش تعدیل ایدیور و فقط کلمات والفاظ او نسبتده چاپوق تغیراته مستعد و معروض اوله مادیی ایچون ، عینی گله یی دونکی معناسیله تلقی ایتک یا کلش ، هم بعضاً فنا بریا کلش اولویور . بوکا بر مثال ویرهیم :

بوکون فرضا (Sens commun) تعیری اوروپا آثار فلسفیه سنده و (حس مشترک) تعیری ده اسکی مؤلفات شرقیه ده کورن برکیمسه بوایکی ترکیبی یکریکرینک عینی اولوق اوزره تلقی ایدر . وهیچ بر شبهه بیله محل کورمز . حالبوکه اسکیلرک تقدیرینه کوره (حس مشترک) بوسوتون باشقه برشیدر . باطل بر فرضیه یه یسوقولوزیه یه مستند بر معنادر . بوکونکی (Sens commun) تعیرینه کلنجه حکمای اسلامک (عقل سلیم و طبع مستقیم) دیدکلری شیدر . کذلک ، هرکسک پک ایی بیلدیک (عقل) کله سی ، اسکی کتابلرده کورولورسه ، بوکونکی معناسیله (Intelligence)

تعبری نیک مقابل معادلی ظن اولونورده دکلدر . آرسطونک (Intellect) دیدیک جومر مفروضدرکه باطل بر فرضیه محصولی اولدوغنده ذره قدر شبهه قالمشدر . [حکمای اسلامییه فلسفه یی عربجه یه نقل ایدرکن بوکا عقل ، و (Intellect) دیشلر] حالبوکه بزم لسانمزده (Intellect) ایل (Intelligence) ک بو مهم فرقنی کوستره جک بر کله ، حالا یوقدر . بونکله برابر ، (Intellect) تعیری بر فرضیه باطله و متروکه یه عائد ، کهنه برکله اصطلاحیه در ؛ دیه قالدیروب آتامیز : پک بویوک بر حیثیت تاریخیه سی واردر . ایکی بیک سنه انسانیت منوره او فرضیه نیک اسیری قالمش و بوتون عرفان اونک حکمنه رام اولمشدر . اونک تاریخی و ماهیت معناسی بیلمله یی زکه عینی خطایه بردها دوشمیه لم و خصوصیه اسکی فلسفه ایل زمانمز فلسفه سنک بویله مهم بر مسئله یسوقولوزیه ده نه صورتله وهانکی نقطه ده اختلاف اوزره بولوندوغنی اکلاشیله لم .

بونک کی ده بر چوق مجبوریتلر وارکه عینی گله یی باشقه باشقه تعیرلرله ادا ایتمکده کی معذرتی تفسیر ایدر . مثلاً (Idée) هرکسک پک ایی بیلدیک برکله در ، و لسان عادی ده فکر دیمکدر . لسان یونانیده قالب و صورت معنانه کلن اصلی «ایدوس» εἶδος «ایدو» εἶδος در . حیثیت تاریخیه سنه باقیلیرسه ، تصوفده (اعیان ثابته و صور علمیه) ، تاریخ فلسفه ده (مثل فلاطونیه) ، فلسفه ده (ماهیات) دیه ترجمه اولومش و اویله جه معروف قالمشدر . بوتون بوشیلر تحقیق اولونمده دن برکله اصطلاحیه یی ترجمه یه قالدیشمق - اونک ایچون - طوغرو اولماز ؛ بزم اسکی فلسفه کتابلرنده (مبدأ فیاض) تعیر شاعرانه سنی ایلک دفعه کورن آدم ، بو ترکیبک (Moteur immobile) دیمک اولدوغنی ، ذکاسیله کشف ایده مز . بطالمیوسک مشهور فلکیات سیستمی بیلمه ینلرده ، اسکی علم هیئتده (Moteur immobile) ک ، (فلک اطلس) اولدوغنی - علم جفرله بیله - استخراج ایده مز . تاریخ فلسفه یی بیلمله یی ، هم ایی بیلمله یی که کلمات اصطلاحیه نیک دونکی و بوکونکی قیمتلرینی حقیقه تقدیر ایدرک ترجمه لرنده موفقیت ممکن اولسون .

حتی، بعض اصطلاحات مهمه وارد در که باشلی باشنه برمسلك فلسفینک اسمی در. (Réalisme) تعیری کبی!.. حالبوکه بوکله، افلاطونک مذهب مخصوصنه نسبتله ملاحظه اولونورسه، بوکونکی استعمالنه کوزه معتبر اولان معناسنک تمامیه ضدینی افاده ایدر. یعنی-بوکون ظن اولونه بیله جکی کبی - حقیقیون دکل، خیالیون فلسفه سی دیمک اولور. مع مافیه بوکله، بوکون، بلکه هر زماندن زیاده زیاترد معروف بر تعیر اصطلاحی اولدوغی ایچون، اونی قطعاً ده کیشدیره مه یز؛ امالده ایدمه یز! ینه عینی سببله در که بر طرفدن افلاطون فلسفه سنه نسبتله نه دیمک اولدوغی تحقیقه مجبورز؛ دیگر طرفدن ده زمانز لسان فلسفینسده اونک هانکی مسلك مخصوصه اشارت ایتدیکنی بیلمک وظیفه مزدرد. بونک ایچون ده تاریخه مراجعت ایتک و اونک اخطاراتنه اهمیت ویرمک لازم کلیر. یوقسه معلوما تمز هر ج و مرج اولور، ایچندن چیقامایز.

انجق بو تحقیقاته کیریشدکن صوکره اکلاشیلیر که: تاریخی معناسیله (Réalisme)، (ماهیات ذهنیه) نك استقلال وجودینه قائل اولان افلاطونک، بومذهب فلسفی سنه ویرلش براسم مخصوصدر. بوکونکی معناسیله تلقی اولوندوغی تقدیرده دخی: (عالم خارجی نك استقلال وجودینه و حقیقت ذاتیه سنه) اینانان فیلسوفلرک بومسلكنی اخطار ایدر برکله اصطلاحیه در. اینم که مسلکدن اولمایان کیمسه لر، بوکله نك معنای تاریخیسنی و حیثیت حاضره سنی تبیین ایتک ایچون کوستردیکمز بو تقیدات محافظه کارانه بی (فضوللق)، و یاخود (عقلاللق) اولق اوزره تلقی ایدرلر؛ و: [مادام که بر طرفدن (Réalisme)، دیگر طرفدن ده (Idéalisme) کی ایکی مشهور و معتبر تبیر وارمش، و مادام که افلاطونک مسلکی- هر نه ایسه؟! - برنوع ایده آلیزم دیمک اولویورمش، او حالده یکدیگریله طابان طابانه ضد اولان شو ایکی مسلکک ماهیتی افهام و اعلام ایتک ایچون عینی تعیری قوللانوبده ایکسنه بردن (Réalisme) دیهرک اشویش ذهن و تغلیط معنا ایتک مناسبستز لکنه نه لزوم وار؟ نه مجبوریت وار؟... برینی، برینه؛ دیگرینی ده دیگرینه تخصیصاً تعیین ایتک ایله ایش بیتر!..] دیه اعتراضه

حاضر لانیلر. فقط بز، پک چوق امثالنی کوردو کمز بو درلو اعتراضلردن انجق ایکی شی اکلارز: اولاً معترضک، مسلکه بیکانه بولوندوغنی، ثانیاً قیصه دوشوندوکنی سه زینیرز، و بناء علیه، ینه اوکله لری قوللانیدیغمز کی قوللانمقده دوام ایدرز. بیلیرز که:

افلاطون وامثالی اولان متفکرین، ماهیت مجردی (حقیقت محضه) اولق اوزره تلقی ایدر؛ و بو تلقی، بزم اعتقاد مزجه باطل اولسه بیله افلاطونک کندی نقطه نظر نجه حق در. (بم نظر مده حقیقت ماهیات در. اصل، مادی شیلر خیال باطلدر!) دهین بر فیلسوف، حقیقی انجق بو صورتله تلقی ایدیور؛ دیمکدر. ایسته دیکی کبی تلقی ایتکده ده مختاردر. بو طرز تلقیسی ایله، بوسیاق نظری ایله مسلک عمومینی آره سنده تناقض اولمادجه اوکا برشی دهیه مه یز!... خلاصه، (مذهبنه؟!؟!) قاریشه میز!... نته کیم: (حقیقت مستقله انجق ماده در!) دهین بر ماتریالیست دخی عینی صورتله و عینی سببله حقیقت دعواسنده بولونه بیلیر؛ مذهبنه حر در. یالکز، اولسه اولسه، هر برندن - شو دعوالرینی تحکیم ایچون - دلائل مقنعه طلب ایتکده ده بزم حقمز واردر. بومسئله لر تجربه فوقده بولوندوغی ایچون هر ایکسی ده عینی قوتده دلیللر ابراز ایده بیلیرلر، و بناء علیه هر ایکسی ده: (حقیقت، بم دیدیکم کبی در!) دیهرک ادعاسنده مصرانه دوام ایده بیلیر. بو خصوصده هیچ بر مذهب صلاحیت مستقله ویرله مشدر.

او حالده، افلاطون، کندینی - ینه کندی اعتقاد نجه!.. - (Réaliste) بیلمکده حق اولدوغی کبی، زمانز لسان فلسفینی دخی - کندی سیاق نظرینه تبعاً - انجق شو، و یاخود بو مسلکه (Réaliste) اسمی ویرمکده محن و مختاردر. اگر فلسفه مباحثی و مسالکنی حقیقه تبع ایدوب اوکر نك ایستیورسه ق بزم برنجی وظیفه مز، بوکبی کله لرك دونکی معناسی ایله بوکونکی طرز تلقیسنی تدقیق و بر بردن تمیز ایتکدر. فقط تاریخ ترقیات فکریه ده بر موجودیت کوسترمش و عصر لرجه یاشامش بر تعیر مهمی فضولی اوله رق ده کیشدیره مه یز؛ او، درت حرفلک کله نك آلتنده قوجه بر صفحه مدنیه نك عوامل مهمه سندن بری کیزلیدر.

لكن بو محافظه كار لغمزاك بر مهم سببي دها واردر : (Réalisme)
تعيرى ، يالكز اساتذۀ يونانيه و فلسفۀ متقدمه ايله علاقه دار دكلدر ، قرون
وسطانك (سقولاستيق Scholastique) فلسفه سيله ده صيقي صيقي به مر بو طدره .
بو نقطه يي ده تنوير ايتملى يم ؛ موضوع بحثمز ايچون پك كوزل بر مثال
تشكيل ايدر .

معلومدر كه فلسفه عالمده قرون جديده نك مظفر فاتحلىرى اولان
(بهى قن Bacon) و (ده قارت Descartes) هكلنجيه قدر اذهان متفكرينه
حاكم اولان استادلر ، بالخاصه افلاطون ايله آرسطو ايدى .

قرون وسطى عرفانى ، تعليمات دينيه نك كلياً نفوذينه تابع ، و قطعياً
احكام و نصوص كنيسايه نك حقيقتنه قانع اولمقله برابر ، بوايكي داهى يونانى نك
فسون تأثيرندن ده قورتوله مدينى ايچون ، خرسيتيانلغك تعليماتى دائره سنده
ينه يونان فلسفه سى يايغمه چاليشيور ؛ و اوفلسفه نك باشليجه مباحثى ، آغزنده
چيكنه يوب طور و يوردى . يكي بر فكر ابداع ايتك قابليتندن اولاممنوع
وصوكره بوسبوتون محروم قالان ذهنلرك بو وضع غريب ايله ، اسكى فكرلرى
چيكنه يوب ، كه و يش كتي رمه سى ، نتيجه ده غريب برخليطۀ اعتقاديه به وجود
ويرمشدى كه (سقولاستيق) ديه تاريخ مدنيتده معروف و مشهور اولان
(ضالات عجيبه) ، ايشته بودر .

او وقتلر ، اذهان متفكرينى اشغال ايدن باشليجه مسئله لر دن برى دخى
(جنس) ، (نوع) كې كليات مجرده نك ، مستقل بوجود ذاتى سى اولوب
اولماديغنى تحقيق ايتك ايدى . واسطۀ تحقيق ده انجق بحث وجدل ايدى .
تاريخ فلسفه ده (Les universaux) نامنه معروف اولان دعوا ،
طاقيله ، ايشته بو مسئله به متفرع بحثلردر كه بزده (صورت جنسيه و نوعيه)
مباحثى شكلنده جلوه كوستر مشدر . انسانه نسبتله انسانيت ، بياض بر شيئ
نسبتله بياضلىق كې كلات مجرده ني ده (كليات معقوله) جنسندن اوله رق تلقى به
مجبوريت الويرديكي ايچون اونلرك ده بالذات موجود اولوب اولماديغنى ، عيني
صورتله موضوع بحث و وسيله مناقشه اولمشدى . بزده بونلره (معقولات ثانيه)
ديرلردى . بونلر هپ افلاطونى لك ايله مشائى لك غوغالى ايدى .

مزاج فلسفيلرى اعتباريله يكديكري نه ضد تجليات داهيانه كوسترن افلاطون
ايله آرسطونك فلسفه لرى دخى - طبعى دركه - يكديكري نه ضدايكي مسلك -
اوزمانلر - اك كوزل ومله اك مكمل نمونه لرى ايدى . بو استادلرك تأثيرى ،
حس اولوندوغندن پك زياده و بك دريندى . خصوصيت مزاجك طرز
تفلسفه بويوك بردخلى واردر ؛ اونك ايچوندر كه فلسفه شخصى در ، و بو
نقطۀ نظر دن اونی صنعته بكمزه تنلر ، بوسبوتون حقسز دكللردر .

ايشته بو خصوصيت مزاج سببيله ايدى كه (سنت اوغوستن St-Augustin) ،
(سن طومادا كن St-Thomas d'Aquin) ، (سنت آنسلم St-Anselme)
وامشلى كې - قرون وسطا خرسيتيان عالملك - اك بويوك الهپون حكما سى ،
بو مسئله حقنده بهمه حال بر فكر مخصوص بيان ايتك مجبوريتندن قورتوله -
مامشردى ؛ و طبعى دركه بونلرك هر برى هر شيدن زياده كسدى مزاجك
تمايلاتنه منقاد اوله رق بر فكر بيان ايتمشدى . بو متفكرينك بر قسمى :
(كليات ديديكمز معقولات ، باشلى باشنه موجود حقيقتلردر !) دستورينى
ايلرى سورمش ؛ ديكر بر قسمى ده اولكيلره تماماً معارض اوله رق : (كليات ،
انجق صنوف و مقولات اشيا نك اسملريدر ؛ اونلرك حيثيت مستقله لرى يوقدر .)
ديه ادعا ايدى يوردى . برنجى لر ، كليات معقوله نك حقيقت مستقله سنى ادعا
ايتدكلرى ايچون (Réalistes) نامنى آلمشلردى كه اساساً افلاطونك تأثيرينه
مغلوب اولانلر ، ايشته بونلردر . ايكنجى لر ، بودعوانك باطل اولدوغنى
بيان ايدوب كلياتى صنوف حادثاتك (اسم جامع Nom collectif) لرى
عد ايتدكلرى ايچون (Nominalistes) نامنى طاقمشلردى كه بونلر دخى
آرسطونك تأثيرندن قورتوله مايانلردر . ذات مسئله بهكلنجيه ، التى يوز سنه
موضوع بحث اولدى ؛ مدهش مناقشاته سبيت و يردى وينه حالى اوزره
براقلىد قالىد ايدى . حتى (Réaliste) ، (Nominaliste) تعبيرلرى
او قدر بويوك براهيت كسب ايتدى كه عادتاً بر معيار مخصوص اولمق حيثيتنى
قازاندى . قرون وسطا فيلسوفلرينك آرسطويه مى ، يوقسه افلاطونهمى
منسوب اولدوغنى در حال كلامق ايچون (Universeaux) مسئله سى حقنده
نه حكم ويردكلرينه باقيلردى چونكه بو مسئله به دائر فكرينى بيان ايتمين

فیلسوف یوقدی . بوکون بیله بوایکی کله ، معتبر بر معیاردر . مثلاً زمانمزه
اک بویوک فیلسوفلرندن (جون ستوئرت میل John Stuart Mill) و
پروفیسور (آکساندر بهین Prof. Alexander Bain) یازدقلری منطق
کتابلرنده اسلاف حکمای بونقطه نظردهن محاکمه ایدرلر وقرون وسطانک
اک بویوک خطای فلسفیی (بر کله مجردنک بهمه حال خارجهده مستقلاً
موجود بر شیه دلالت ایتهمسی حقنده کی اعتقاد) یعنی (Réalisme) اعتقادی
اولدوغی ایچون ، زمانمزه منقدینی ، اسلافدن برینک ، اول (Réaliste)
اولوب اولمادیغه باقارلر وحقلریده واردر ؛ زیرا زمانمزه او اعتقادک باطل
اولدوغی کوسترمش و (Nominaliste) لره حق ویرمشد .

شیمدی ، تاریخ مدنیتده بودرجه کسب اهمیت ایتمش ، بودرجه ولوله یی
موجب اولمش بر تعیری نصل اولورده ، فهرست اصطلاحاتمزدن آه بیلیرز ؟ ..
نصل سیله بیلیرز ؟ .. سیله مه نجه ، نه اولدوغی لایقوله اکلامغه مجبورز . زیرا
بوکله لره آلتنده یاتان مسئله او قدر مهمدر ؛ او قدر مهمدرکه بوکون قرون
وسطانک آلتی یوز سنه بومناقشات بیوده ایله وقت کچیرمش اولماسی ،
اودور حکمانک یالکیز لافزنلکینه ، زوزکلکینه عطف ایدنلر و اوزمانک
حکمتی استخفاف ایله یئلر ، چوق دفعه لر عینی خطایه دوشوبورلرده فقط
بیلیمورلر . مثلاً زمانمزه علوم اجتماعیه مناقشاتنده (اشخاص منفرد) یی
حکمدن اسقاط ایدوبده جماعته بر شخصیت مستقله ویرنلر ؛ (فرد یوقدر
جماعت واردر !) ده یئلر ، افرادک مرتب بر هیئت مجموعه سندن عبارت
اولان جماعتی بر (Entité عین ثابت) ظن ایدیورلر ؛ صوکره سقولاستیق
معناسیله (Réalisme) خطاسنه دوشدکلرندن کلیاً غافل بولونقلری
ایچون قرون وسطی ایله استخفاف ایدیورلرکه حقلری یوقدر . کندی
تجربه مله تحقیق ایتمش اولدوغم بوحالت غفلت ، اوروپانک سوسیالیزمه میال
اولان ک چوق مؤلفیندهده کورلمکدهدر . بوده اثبات ایدیورکه ، اک
اسکی واک مهم خطالرمز ، نکس ایدن خسته لقلر کی در ؛ هم تقدیر مزمن
ایسه لر او قدر قولای نکس ایدرلر و پک اهمیتسز وسیله لرله نکس ایده بیلیرلر .
ایشته (Réalisme) خطاسی ، بویله پک مزمن اولانلردن بریدر . اوندن

توقی ایده بیلیمک ایچون بهمه حال بوتعیرک حیات تاریخیه سنی بیلیمه لی یز ؛ نصل
و نیچون بویله مختلف و ضد معنایه موضوع اولدوغی لایقوله اکلامالی یز .
اکلامیغمز کی قالدیره مه یز ؛ چونکه تاریخیه حق ویریرز . مثلاً بکا : (Réalisme)
نهر ؛ دیه صورولسه ، بوسؤاله قطعی جواب ویرمزدن اول : (هانکی
ره آلیزمی صورویورسک ؟ .. یونان قدیمه منسوب ایسه شو دیمکدر . قرون
وسطایه عاند ایسه بودیمکدر . زمانمزه لسان فلسفه سندهده بوکا دیرلر !) دیرم .
مع مافیه بوقدرلهده بوکله نک حسابی بیتیرمش اولما یز . چونکه (نهسته تیق)
بختنده دخی (Réalisme) ک بر خصوصی معناسی واردرکه فلسفه عمومیه
ایله علاقه دار بولونمقله برابرینه خصوصی و معین در . مثلاً ، صنعت تصویر
ورسمده طبعی همان عیناً ادا ایتک معرفتی درکه آثار صنعتده خیله نک دخل
و تأثیرینی ارجاع ایتک و مشاهدیه دها زیاده اهمیت ویرمکله اوله بیلیر .
الی آخره ! ... بوبحث ایچونده بوقدر تفصیلات یتر .

بعضاده پک معروف یرکله یی بر فیلسوف بوسوتون باشقه بر معنا ایله
تلقی ایدر ؛ حتی جمهور متفکرین عندنده مقبول و معتبر اولان معناسی
اصطلاحیسنی اهامل ویا تبدیل ایدرک ، لغت معناسیله اوکله یی قوللانیر ،
واونکله یکی ومهم فکرلر بیان ایده بیله جک قدر بویوک بر فیلسوف ایسه ،
افکار جدیده سی اکثریتله مقبول اوله رقی اوکله یه یکی بر حیثیت معاویره بیلیر .
برچوق کثیرلر ارتق او تعیر معروفی یکی معناسی ایله قوللانمغه باشلار .
بوده موجب تشویشدر و امثالی چوقدر . بونلریده خودبخود ده کیشدبره مه یز
وعینی کله نک مثلاً (قانت) لساننده شو معنایه و دیگر بر فرقه متفکرین
لساننده بومعنایه دلالت ایتدیکنی ایجه اوکره نوب آکلامغه مجبورز . فرضاً
(Esthétique) ده نیلیدیکی زمان بوراده هر کس اونی بیلیر و (حکمت
بدایع ، فلسفه صنعت) معناسیله تلقی ایدرکه طوغرودر . فقط بو تعیرک
برباشقه معناسی اولدوغی بیلنلر ، مطلقاً زمانمزه تاریخ فلسفه سنی لایقوله تتبع
ایتمش اولانلردر . زیرا (قانت Kant) اوله بوکله یی (فلسفه حسیه
Sensualisme) (*) معناسنده ، یعنی بوسوتون باشقه حیثیتله قوللانمش ویر
(*) دها طوغروسی فلسفه ده (مبحث محسوسات) بانه بواسمی ویرمشد .
اسکی فلسفه لر میاننده افلاطون و توابعدن ماعداسی ، علی العموم (حسن beauté)

چوق متفكرين معاصرین دخی بو استاده اتباعاً عینی معنا ایله او تعیری استعمال ایتشلردر . مثلاً ، (Avenarius) کبی !.. بناءً علیه ، بوصورت استعمالی ده دیگری قدر فلسفه ده معتبردر .

کله نك اصل یونانی سی اولان (αἰσθῆσις) لفظنك معناسی (طویغو، حس) دیمك اولدوغنه نظراً (قانت Kant) بولفظی لغت معناسیله تلیقی ایتیش واولیله قولانمش در . نته کیم (شوپنهاوهر Schopenhauer) لساننده (Volonté) ارادت دیمك دكل ، (قوت) دیمكدر . (هربرت سبنسر Herbert Spencer) ایله (اوغوست قونت Auguste Comte) وبونك شاکردی (لیتره Littré) نك و (بهین Bain) ك اوزون اوزادی یه مناقشاتنه سبب ، (Général) و (Abstrait) تعیرلرینه آز چوق فرقلی معنار ویرمه لری اولشدر . الی آخره !..

شو برقاچ مثال ده پاك چوق امثالنی تردیف ایده بیلیردم؛ فقط صانیرم که بعض وجوه ایله معذرتی تسلیم ایتدیرمه بیلیمك ایچون - ارباب انصاف نظرنده - بوقدری کفایت ایدر .

ایکنجی قسم مشکلات، صرف بنیه لسانه عائد اولان خصوصاته عطف اولونه بیلیر : معلومدرکه ترکیه مز . (بنیه تشکلی یعنی عضوی) اعتباریله ، ایکنجی درجه ده اولان لسانلردندر . بونلره (Langues agglutinantes) السنه التصاقیه دیرلر . بودرلو لسانلرک باشلیجه صفت کاشفیه سی و محظوری ، کله لرك باش طرفنه (ادوات داخله Préfixes) آله ماملری ویکي یکی کلمات مرکبه وجوده کتیره مه ملریدر . حالبوکه اروپا السنه متمدنه سی بوقابلیتی چوقدن احراز ایتشلردر . فرنکجه ده (anti ، re ، dé ، im ، in) ،

مسئله سنی صرف (حسی sensuel) بر نقطه نظرندن تلیقی ایتشلردی ؛ بوسباق نظر ده ا زیاده مرغوب و مشهور اولمش بولوندوغی ایچون (حکمت بدایع) دیدیکمز شعبه فلسفیه یه (هسته ییکی) ده نیلیمش و بو تعیر ، حکم ایلشدی . بوقسه اصلاً معناسی بنه (ادراکات حواسه عائد) فلسفه دیمكدرکه قانتك بوسوزدن تلیقی ایتیش اولدوغی فکر ومعناده بودر . بناءً علیه کله یی ، قانت ینه اسکی معناسیله قولانمش ، فقط فلسفه صنعتیه تخصیص ایتیه لرك (مبحث معرفت épistémologie) ده (مدرکات حواس) دائره سنی قاپلایه جق قدر تشمیل ایتشدر .

con ، supra ، méta ، hypo ، ortho ، hyper ، ultra ، aper ، super) ودها بوکبی بر چوق ادواتی بر کله نك باش طرفنه ویدالامقله بر دكل ، بر سلسله اصطلاحات یاییله بیلیر ؛ و آمریقاده ، فرانسه ده ، انکلتزده آیری آیری چالیشان علمانك ، عینی معنا ایچون وضع ایتدیکری اصطلاحات ، عینی شکلده اولور . چونکه ماده اصلیه سی روجه ولایتجه دن آلیئر ، ادوات ایسه هب معلوم اولان شیلردر مثلاً : (concept-ion) ده کی (ception) ماده اصلیه سی یونانجه (σκηπω) کله سندن آلتشدرکه (نظر) دیمكدر . بونك باش طرفنه (aper) ، (ré) ، (dé) ادواتی یاپشدرلینی کبی (aperception) ، (réception) ، (déception) اولور و هر بری بر باشقه معنای معین افاده ایدر . ایسترسه کز برده (hyper) کتیررسکز (hyperception) دیه بر اصطلاح ایجاد ایده بیلیرسکز ؛ شو شرط ایلکه بو معنایه دلالت ایده بیله جك بر کیفیت حقیقیه کوستره بیله سکز ! بزده بومکن دكل !.. هم کلات اصطلاحیه مزی عربجه دن آلدیغمز حالده ده یاپه میورز ؛ فضله اوله رق هر برینی باشقه باشقه صلاردن مشتق کلمات ایله ترجمه ایدیورز . (thèse مدعا) ، (antithèse نقیض مدعا) ، (parenthèse معترضه ؛ ؟) ، (hypothèse فرضیه) ، (synthèse ترکیب) دییورز . فرنکجه ده کلمات اصطلاحیه برعائله ، حتی برقیله تشکیل ایدر .. بزده سرسری افراد کی قالیور .

اصلنی عربجه دن آلدیغمز حالده نه دن بویله اوله میور ؟... عربجه رنجی درجه ده مکمل السنه متمدنه دندر . فقط (آری arienne) لسانلرک (ادوات داخله) ایله یاپدینی معرفتی ، عرب و علی العموم (سامی sémitique) لسانلر ، (تعديلات داخله modification interne) یاخود تعریب و صیغه ایله یاییورلر ؛ یعنی ماده اصلیه نك حرکاتی تغییر ایله و علی الخصوص بابلرک اشکالی و بناسیله یاییورلر . (کبر) بویوکلک ؛ (تکبیر - جناب حقه مخصوص اولمق اوزره - بویوتمک) ؛ (مکابره ، سفسطه و مغالطه ایتک) اولویور ؛ حالبوکه جمله سی ده عینی ثلاثی ماده دن مشتقدر . بوسبیله درکه عینی ثلاثی بی هر بابنه نقل ایدوبده یکی کله دخی ایجاد ایده میورز . انفعال بابندن و (کبر) ثلاثی سندن

(انكبار) ديه ميورز. انفعال بابنك بناسني و (كبر) مصدريك ذاتاً (متعدى)
اولماديعني تحقيق ايدنجه آ كلايورز كه بو ثلاثي نك انفعال بابنه نقلي اساساً بيهوده
اولوردي .

بوحالات، لسانك بنيه اصلیه سندن ایلری کلیور و صرف (سامی) لسانلره مخصوصدر. (آری) جنس سندن اولان فارسی، تماماً انکلیزجه یه بکزر. (آمدن = کلمک)؛ (بر آمدن = یوقاری کلمک یعنی نشوونما ایتک)؛ (هم بر آمدن = قارما قاریشیق اولمق) کبی که بوراده بر مصدرک ایکی ادا ت داخله بیله آلدینی واوکا کوره معانی معینه اکتساب ایتدیکی کورولور.

ترجحه مركز بودرلو ترتيباته قابليت يوق ؛ و بوتون توراني لسانلر بويله ،
و بودرجه ده در . طبيعي دركه بوندن طولايي اصطلاح انجمنی اعضاسی مسئول
و معاتب اوله ماز .

بزه، انجمنزده بوتعیراتی تعین و بعضیلریخیده وضع اید بیلیمک ایچون
یک چوق چالیشدق؛ و بو زحمتی - بالخاصه - تورکلره خدمت اوغورنده
اختیار ایتدک. زیرا عربلرک و یاخود اوروپالیلرک بزه احتیاجی یوقدر. فقط
تعیراتک همان جمله سنی ینه عربلرکدن آلدق؛ چونکه بومجبوریتدن قورتولمق
امکانی یوقدی.

بوحراکتمز ، کندی انجمنزده بیله بعض رفقای محترمه جه موجب تنقید و وسیله مناقشه اولدی . بزی لسان عربی دن استمداءه مجبور ایدن ضرورات علمیه و فکریه دن بوسبوتون نی خبر اولان اکثریت قارئین آره سنده ، شویا پدیغمز ، بلکه دها زیاده شدتله تعریضاتی دعوت ایده بیلیر . بونی بویله دوشومکده معذورم ؛ حتی حقلیم . اونک ایچون ، تعریضات ممکنه یه شیمدیدن سد چکمک وهوسکار تنقید اولانلری آزیجق انصافه دعوت ایده بیلیمک امیدینه قابیله رق (ترجمه - عربجه) مسئله می حقنده برایکی سوز سویلوب ایضاحات لازمه می اکمال ایتمک ایسترم .

توركلك حسياتي تخيه ؛ توركلك حيثيتي اعلا ؛ توركلك عنغياتي احياه
الحاصل توركلكي وتوركلري هر وجهله تجيل وحمايه ايتمه چاليشمق جمله مزك
وظيفه حيتي در . ممكن اولدوغني يرلرده ، ممكن اولدوغني شيلرده وممكن

اولدوغی قدر بووظیفه حیتی، بن، کمال خلوص ایله ایفادن کری طورمادم.
هنوز مملکت مزده بویه بر جریان یوق ایکن، حتی ملیتورلنک شمه سی
یوق ایکن - بوندن اون بش سنه اول - هرکسه قارشى بوحسیات ملیه یی
مدافعه ایتدم؛ بوکون شدله تورکلکه طرفدار اولان دوستلرمک انفاذ الکلم
اولانلری او وقت بکا معارض ایدی. مطبوعاتک قیوداتی میدانده در!
بناء علیه کیمسه ادعا ایده مزکه بن تورکلکی و تورکجه یی ترویج ایتمک ایسته ينلره
قارشى بروضعیت آله بیله جک فطرت ونیتده اوله ییم!.. شعر ملی ده تورکلکک
اک صمیمی روحی، اک اصیل حسیاتی سوبلتمک طرفدار ییم؛ چونکه
ممکندر ولازمدر. فقط اصطلاح بختده بو ممکن دکدر و اوقدرده لازم
دکدر. بر کلمه اصطلاحیه ترکجه اولقله همان آکلاشیلماز. آکلایانلر،
اونی تورکجه اولدوغی ایچون آکلمازلر؛ او اصطلاحک علاقدار بولوندوغی
مسالکه، علمه ویا صنعته منسوب اولدقلری ایچون آکلارلر. انجمن مزده
بو دعوا یی بالتجربه و بالفعل اثبات ایتدمدی. (طوبارلاق ده لیکی)
و (زه وله) نک نه دیمک اولدوغی صوردم؛ بیلن اولمدی ایدی! حالبوکه
بوکلمات اصطلاحیه خالص تورکجه در. کذلک جو جوقلرک وضع ایتمش
اولدقلری او یون اصطلاحاتندن (موم - دیرک) و (چورچوب) ترکیلری
دخی تماماً تورکجه در. لکن استانبولده طوغمش ویا خود چو جوقلغی استانبولده
کچیرمش اولمایان تورکلر، بوکله لرک نه دیمک اولدوغی - معنای لغوی لری
دلائیله - کشف ایده مزلر. بونک نامعدود امثالی وار؛ و بونلردن ماعدا
رچوق کلمات اصطلاحیه ده وارکه اصلاً هیچ تورکجه اولمادقلری حالده
اربابی اونلری پک اغلابیلیر؛ چونکه (لسان مسلک) عناصرندن اولمشدر.
(جیواطه)، (پارا که طا) و یوزلرجه امثالی کی!..

اوحالده دعواء، يك نظرده ظن اولوندوغی قدر جدی دكل!.. بوكون
مملكتمزده هر كسك قوللاندینی لسانی تحلیل ایدرسك سرمایه کلماتده یوزده
یتیشی نك اجنبی الاصل اولدوغی تین ایدر . (صندالیه) ، (قاناپه) ، (پرده) ،
(خالی) ، (چارشاف) ، (فراجه) ، (بوتین) ، (لاستیک) ودها يك چوقلری کبی
هر کسجه ، هر کون زبازرد اولان کلمه لرك حالا تور کجه می بولونوب ترویج

ایدیه‌ها می‌شود، (وجدان اجتماعی)، (تکامل اخلاقی)، (تردی معنوی)، (وجود مطلق) که ترکیبات غامضه‌ای بزرگ، صرفاً تورکجه مقابل‌ترین ایسته‌مک، یا شاقادر، یا خود محالی ایسته‌مکدر. بالطبع انجمن‌زده آچیدن آچینه بویه بر تکلیف قارشینده بولونماق. چونکه تورک لسانلرنده بو کلمه‌لرک هیچ برینه تصادف ایتمک ممکن دکلدرد.

سبیده معلوم، حتی مشهوردر:

بوتون حیات تاریخیه‌سنده، بوتون موجودیت اجتماعی‌سنده جنکاور. لکدن بویوک برخصلت کوسترمه‌مش، ظفردن بویوک برذوق طویماش اولان تورک ملتی، نشئه جهانگیری ایله فتوحات پشده قوشمقدن فارغ اوله‌مامش که - سورکلی برصورتده یعنی عصرلرجه متادیاً - علم و فلسفه‌ایله اوغراشمغه وقت بوله‌بیلش اولسون! بوسبیلهدر که ویک طبیعی‌در که خالص تورک لسانی فلسفه و علم افاده‌سنه قابل اوله‌جق بر درجه کماله ایزمه‌مش!... آت صیرتسندن اینوب رحله و دستگاه باشنه اوطوره‌رق چالیشماقچه، بو، اوله‌مازدی.

بالآخره، یعنی ساحه فتوحاتی توسیع ایدوبده مدنی ملتلرک حدودینه وارنجه، تورکر اسلام ایله مشرف اولمش؛ ولسان دین و مدنیت اولان عربجه‌نک - بالضروره - نفوذ معنویسنه طوتولمش و آرتق اوندن قورتوله‌مامش. عربجه ذاتاً مکمل وزنکین برلسان علمی و فلسفی اولدوغی و بویوک بردفینه عرفانه مالک بولوندوغی ایچون فلسفه و علومه مستعد اولان تورکر، اثرلرینی هپ اولسان ایله یازمشلردر که بوده طبیعی و ضروری‌در. مدنیت مکرره و معنویه؛ تربیه دینی و اجتماعی؛ تربیه علمی هپ عربجه اولونجه، کتبخانه‌لرده کی آثار دخی عربجه اولونجه، برتورک - ولوکه فارابی کی داهی بر فیلسوف نحریر اولسون! - بوتون بو عواملک تأثیراتندن کنندینی قورتاروبده، صرفاً تورکجه اولمق اوزره، یکی برلسان فلسفی ایجاد ایتمک قالدیشمه‌مازدی. قالدیشمه‌ده برشی یاپامازدی؛ چونکه عصرلرجه دوام ایدن پارلاق برمدنیتک اثر فیضی، بر آدم دکل، بیک آدم وجوده کتیره‌مز. بوکا احتمال یوقدر.

فقط برشی ده‌ا واردی: اووقت (ناسیونالیزم) حسی، هیچ بریرده آدم عقلی بلیرمه‌مشدی. اوحس، انجق زمانمز مدینتنده برعامل، بلکه مهم برعامل سیاسی اولمشدر. قرون وسطاده کرک شرق، کرک غرب عالمده جامعه دینی، جامعه ملیه‌دن پک چوق قوتلی ایدی. اوایل اولونجه، محتاج اولدوغی اصطلاحاتی، کنندی لسان مادر زادنده بوله‌مایان و اساساً مدرسه‌ده هرب لسانیه تربیه فکریه آلمش ولان برتورک عالمی، پک طبیعی اوله‌رق کنندی لسانی اهل و عربجه‌نی ترجیح ایدرک استادلرینه امتثال ایدردی. اونک ایچوندر که دنیا‌ده صرفاً تورکجه اوله‌رق بر فلسفه، بر هندسه کتابی یازلاماشدر. حالبوکه فلسفه و علومه خدمت ایتمش حتی شرف و یرمش بر چوق تورکر واردرد.

اوروپاده‌ده بویه اولمشدی: قرون وسطاده هر فیلسوف، هر عالم، اثرینی لایتینجه یازاردی. حتی قرون وسطایه قدر کیتمه حاجت یوق. مشهور نیوتن، قرون جدیدنک اک بویوک عالمی صاییلدینی حالد و انکلیز اولدوغی حالد آثار علمییه‌سنی لایتینجه یازمشدر. فضلانک هپسی بویه حرکت ایتمشدر؛ چونکه لسان مدنیت و دین - اوروپالیر ایچون - لایتینجه‌در. حالا بوکون دارالفنونلرک پک چوغنده (تیه‌زه) لر لایتینجه یازیلیر.

دیمک اولویور که بو کیفیت، صرفاً بزه مخصوص بر غربیه ضلالت دکلدرد. بالعکس بر حادثه طبیعی‌در. بر حقیقت تاریخی‌در. توران عرقه منسوب اولان تورک ملتی یکیدن حیات تاریخیسنی یا شامغه باشلاسه و ماضی‌ده تأثیراته منقاد اولمقدن قورتوله‌مادینی عوامل مدنی و شرائط سیاسی و اجتماعی داتره‌سند ترقی ایتسه‌یدی ینه بو حاله کلیر و بونتیجه‌یه پیوسته اولوب قالیردی. تاریخنده اولمش اولان شیلر، انجق او شرائط تاریخیه داتره‌سند (اولاغان) شیلردر. بزه، مهم بر حقیقت تاریخیه‌نک بوکون دستورینی بیلورز؛ (مدنیتی، هیچ بر قوت مادیه نه‌مز!) یوکسک بر درجه‌مدنیت ایریشه‌بیامش بر ملت، ضعفه دوچار اولور؛ قوای حیاتیه‌سنی اسراف ایله افنا ایتمش بولونه‌بیلیر؛ تردی ایده‌بیلیر. بو حاله کنج و توانا بر ملتک یومروغنه طایانه‌ماز؛ جزئی بر صدمه ایله بیقیلیر، بلکه بردها قالدیه‌ماز. فقط اونک بر مدنیتی، بر معنویت.

وارد. کندیسنی بر حله ده دویرن ملتی، اومدیتی ایله اجیر ایدر؛ او مغویتی ایله اسپرایدر. اوکاء، کندی دینی، لسانی، آدابی، اصول معیشتی، ذوقی، اعتیاداتی، عرفاتی قبول ایتدیریر. هر زمان، بو، بویله اوله کیشدر. برکت ویرسین که بویله اوله کیشدر، و حال احتضاره دوشن برملت متردیه نک تیرمه و زبون آلارندن، مشعله مدینت، دهاکنج و دینچ آلره انتقال ایتش وانجق بوسایه ده سونمه مشدر.

بویله اولماسهیدی، هرملت یکی باشند و کندی کندینه تمدن و ترقیه مجبور قالسهیدی، دهائی اولمازدی: برعصرده وجوده کله بیلمش اولان فیض مدینت و اثر عمران، یکریمی عصرده تحقق ایده مزدی.

[اگر عثمانی تورکبری وقتنده یتیشوبده قوی بردولت اسلامیه تأسیس ایتسهیدی، خلافت و مدینت اسلامیه مقرض اولوردی!]

بو حقیقت تاریخیه ایسه، بزی یالکز معذور کوسرتمکله قالماز. ادعایه تمامیه حق ویریر. چونکه مدینت معناسنده، فلسفه و علومده داخلدر. فلسفه و علوم ایسه کندی اصطلاحاتی ده شاملدر.

تحقیقات کوستریور که اسلاف کرامت اولان عثمانی علماسی ده اصطلاحاتی عربجه دن لسانمه نقل ایتمکله عهدله رینه ترتب ایدن خدمتی - قدرتاری یتدیکی قدر - ایفا ایتملر.

آرتق برمدیتی - همان اولدوغی کی - طاقیله قبول ایتدکن صوکره بر ترکیب اضافیده داخل اولان حرف تعریفی مسئله یامق، صحیحاً جدی برایش دکلدرد. بوراده فیلسوف مشهور (لایب نیچ Leibnitz) ک تئیهنی خاطرلامالی؛ زمانک بالجه علومنی احاطه ایده بیلمش اولان بوفیلسوف:

[پوریتن puritain طاورانه جقسق، (یعنی فرط تعصبه تصفیه طرفدار لغتی کوده جکسه!) بونی لسان بحثنده یاماملی؛!] (*) دیور!

[*] Leibnitz دنیانک ابویوک فیلسوفلر نندرد. برنجی درجه ده ریاضی و حقوق شناس و عالم کلام اولان بو آلمان، مشهور (نیوتن Newton) ک معاصر ایدی. حساب تمامی و تفاضلی ایجاد ایتکده (نیوتن) ه مشارکدر. (سر ویلیام هاملتن) مابعد الطبیعیات درسارنده المان فیلسوفنک بوسوزلرینی نقل ایتشدر. معلومدر که (puritain) لر

(لایب نیچ) ک بو حقی سوزلرینی اصطلاح و لسان بحثنده استشهاداً نقل و ذکر ایدن فیلسوف معاصر، (سر ویلیام هاملتن Sir William Hamilton) یحیی صدندده اولدوغیز بومسئله نی حل ایدیور و اصطلاح وضعه مجبور اولانلره بردستور عمل کوستریور:

(قواعد لسانییه قارشی مجبور بولوندوغیز رعایتی یاممال ایتک فلسفه و علم کلام علماسنه دوشمز!) دیهرک، لسانک حسن محافظه ایدله سی حقنده رعایتی الزم اولان شرطلردن کیمسه نی استثنا ایتمه مکله برابر، ضرورات فکریه و علمیه نی ده جداً نظر دفته آله رق:

(فقط، بر فیلسوف تحلیلالات خصوصیه سنی و اوندن استنتاج ایله دیکی بعض افکار دقیقه نی حقیله ادا ایده بیلیمک ایچون فضولی برکله ویا براسلوب بیان ایجاد ایدرسه، آئی بیلیمکی درکه بویله برحق و صلاحیت مقدوح و شبهلی کورولش و هر طرفدن تسلیم اولونما مشدر. او حالده بویله برحق استعماله قالدیشیرسه لسانک قواعدینه رعایتدن استکاف ایتمه نک موجب اوله جنی مسئولیتدن کندی قورتاره بیلیمک ایچون - ایجاد و وضع ایتدیکی کله اصطلاحیه حقنده - آچقندن آچیغه بر سبب ضرورت کوستروب اونی مدافعه یه مقتدر اوله بیلیمکی در.) یعنی صرف کیفی اوله رق کله ایجاد ایدله مز. دیمک ایستیور. طوغر و در. فقط بز بویله کیفی معامله لره دهاشدته علیهداری یز. لفظ و معنائک اهمیت اعتباریله تقدمنه دأرده پک کوزل سوبلیور و سوزلری دستور اوله بیلیر:

(بر تعبیرک معناسنی کله نک طرز تلفظنه فدا ایتک، (فکر) ی طور ادایه تابع طوتمق ضلالت صریحه در.) دیور که انجمنم زده (ترکیب) مسئله سی ایچون واجب الامثال بر قانون اولمالی در. [**]

خرستیانلق دینی صفوت اصلیه سنه ارجاع غیرتیه فوق العاده بر تعصب اظهار ایتملردی. (لایب نیچ)، تصفیه طرفدارلغنه ایهام ایچون کنایه طریقله بوفره نک اسمنی ذکر ایدیور: (It is not in language, that we ought to play the puritain.)

[**] (It would be absurd to sacrifice meaning, to it's mode of utterance; to make thought subordinate to it's expression.)

مابعد الطبیعیات درساری. ج ۲ (۲) Lectures on Methaphysics. V. II.

بوتون شو ویردیکم ایضاحات، آز چوق طوغرو ایسه، احواله :

[اصطلاحات تورکجه اولمی در ...]

دعواسی، نهیه منجر اولور؟.. مادام که بومعالری ادا ایده جک خالص تورکجه کله من یوقدر، اویله اولونجه، اولسه اولسه - تورک صرفه توفیقاً ترکیب یایمق تمی سنه تنزل ایدر !.. نصل که اویله ده اولمشدر. بوکون جدی دوشونور برکیمسه یوقدر که کلمات اصطلاحیه نک ساده تورکجه اوله رق تعیینی قولای برایش ظن ایده ییلسین !..

ترکیله کلنجه، بوزولماسی ممکن و محظورات معانی دن سالم اولانلری بوزمغه چالشدق. یعنی بوخصوصده بر تجربه یایمش اولدق !.. فقط بیلم ایکی رکنی دخی عربی الاصل اولان وساده تورکجه ده مقابلری بولونه میان بر ترکیبی قیرمقله تورکجه لشدیرمش اولدقی ؟.. یالکز شونی آئی بیلورم که تجربه واقعه من، بعض ترکیلرک بوزوله مایه جغنی کرکی کبی حس ایتدیردی. مثلاً : فرنکجه ده (l'être absolu) و (nécessité évidente) ترکیلرینه تماماً مقابل وهروجهله معادل اولمق اوزره بزم اسلافک آئارنده (وجود مطلق) و (لزوم بین) کبی مشهور ومهم ایکی ترکیب وار وتعبیرات اصطلاحیه دن اولمشدر. بونلردن ایسنی بوله مایز. شمدی، بونلری بوزوبده : (مطلق وجود)، (بین لزوم) دیمکه تورکجه لشدیره ییلسه یدک بوقدر زحمتیز بر ایشده دوست خاطری صایمقدن قولای برشی اولمازدی. لکن آئی اولمادیغنی بز، پک ای آکلادیغمز کبی هرکس ده تسلیم ایتدی. اولدوغی کبی براقدق. چونکه ایلك وظیفه من ایسته دیکمز کبی ترکیب یایمق دکل، آدم عقللی اصطلاح بولمق در. لسان علم وفلسفه یی اعمال ایتمزسه ک، مدنیت حاضره نک کمالات معنویه سنی الی الابد تورک ذهن اجتماعیسنه بیکانه براقش اوله جغز، بکی بر فکر نقل ایده میه جکز. تورککه قارشى بوندن بویوک جاییت اولماز. بز بو جهت مهمه یی دوشونویورز. [انکلیز، المان، فرانسز ما کنه لرینی حسب الضروره پک اعلا قولانیورز استفاده ایدیورزده، ینه عینی ضرورته عرب کله لرینی قولانجه نه دن کنه ایشله مش اولویورز ؟..] دیه دوشونولسه

جواب ویریه مزدی. خصوصاً بولکله لری، بوثروت بیانی تملک ایتک ایچون پاره دخی ویرمیورز.

خلاصه کرک انجمنمزدده چالیشیرکن، کرکسه، او طه مده بوکتابی تألیف ایدرکن توزکره وتورککه خدمت ایچون اوغراشدیغنی بردقیقه خاطرمدن چیقارمادم وبوصیمی حسک کوکله الهام ایلدیکی غیرت وفکر مه بخش ایتدیکی نشئه ایله چالیشدم. بونی بوتون خلوص قلمله سویلیورم. ایشته، آنجق بر مثال اولسون ومشکلات معروضه حقده، ارباب مراقه بر فکر ویرم ییلسین دیه سردایتدیکم شوتفصیلاتی، نظر دفته آله رق اوکا کورم دوشونمه لرینی قارئیدن رجا ایدرم. شونی ده اخطاره مجبورم که بواصطلاحات، انجمنده اتفاق ویا اکثریت آرا ایله تعیین اولونمشدر. اگر بنده بر صلاحیت مطلقه اولسه یدی وبوصلاحیتی - غریب اوله رق - هرکس تسلیم ایتسه یدی، بن بولکاتک بر قسمی بیلدیکم وبکنندیکم کبی وضع وتعیین ایدردم. اونک ایچون در که منقدر لایله بر چوق نقطه لرده برلشه ییلم. اونی ده کیمسه اونو تامامی که انجمن، علمده صلاحیت مطلقه ادعا سنده بولونما مشدر؛ وبولونه مازدی؛ چونکه ترقی وتبدل، مدینتک قانون اساسی سیدر. البت بواصطلاحات دخی ایلریده آز چوق دیکشه جکدر. وافکار ومعلوماتمzk ماهیتی تبدل ایتدیکی نسبتده ده کیشمه لیدر.

بن، یالکز تعریفات تفصیلیه دن مستولم؛ چونکه اولتعریفات تماماً بنمدر. حتی اوقدر که، فلسفه لساننده بر مسئله غامضه نک ماهیتی ویا خود بر مسلک مخصوصک باشدیجه شمائل امتیازیخی اخطار ایده جک قدر مهم اولان بعض تعریفات حقده کال دقت وتقید ایله تفصیلات ویردم؛ وعلی الخصوص یالکز طلبه اقتدیله دکل، بومسئله لره بوسبوتون بیکانه اولانلره بیه - بوتعییراتک متضمن اولدوغی - معانی دقیقه یی، بر چوق علائق وروابطیه آ کلاته ییلمک غیرتی مقصد ایدندم. بونکله برابر لسان فلسفییه یاقیشان اسلوب مخصوصی ده محافظه ایتکه چالیشدم. اوسبیلهدر که مثلاً : (mysticisme)، (coufisme)، (panthéisme)، (antinomie)، (subjectivisme)، (intuitionisme)، (représentationisme)،

(objectivisme) ودها بر چوق امشالی کبی کله لر حقنده ویردیکم تفصیلات، کرك فرانسز وکرك انکلیز آنسیقلوبه دیلرنده یوقدر؛ اولسه بيله بویه دکلدرد. چونکه ابویوک اثرلر اولدجه معلوماتلی آدملا ایچون یاپیلمشدر. بناء علیه مسائل فلسفیه یی، نه سیاق نظرله تاقی ونه صورتله عرض ایتش اولدوغنی آکلامق کوچ برشی دکلدرد. عینی کله ایچون باشقه قاموسلره دخی مراجعت ایتک ايله کیفیت تین ایدر.

واقعا ک معتبر مأخذلردن استعانه واستفاده ایتدم؛ فقط شرق طائفه خزینه عرفانسه پک قیمتی هدیه لر بخش ایدن حکمای اسلامی ده اهل ايله مدم. بالعکس فلسفه شرقیه واسلامیه عائد تبعاتمدن، یکریمی سنه دنبری طویلامش اولدوغم نوطلری، بوکون بوقاموسی وجوده کتیره بیلیمک اوغورنده خرج ایده بیلدیکم ایچون، تام محله صرف ایتش اولدم. بوندن فرضا یدی عصر اول کلش براسلام حکیمی ايله بوکون ابویوک اوروپا فیلسوفلردن برینک عینی مسئله ده عیناً بیان ملاحظه ایتش بولوندوقلرینی، چوق یرده صراحتاً کوستردم. ظن ایدرم که بوقاموس، فلسفه مراقیلرینی — بر مدت ایچون اولسون — اغنا ایده بیلیر؛ صوکره — انشالله — دها مکملنی تألیف ایده بيله جک ارباب استعداد یتیشیر.

بو کتاب، ارباب مراقه وخصوصاً طلبه افندیله بر خدمت ایده بیلیرسه، امیدایتدیکم مکافاته نائل اولمش اولورم.

بوتون اصطلاحات فلسفیه بوقدر جقدن عبارت دکلدرد؛ فقط آنجق تحصیل تالی احتیاجاتی نظر دقته آلمغه مجبور بولوندوغمز ایچون بوقدرینی کافی ووافی کوردیم.

رضا نوفیس

و خصوصاً برفضل حقیقی اوله بیلیر؛ زیرا صغراسی، نتیجه سندن زیاده محتمل بر کیفیت بیان ایدیورسه البته دهها قیسه بریولدن اثبات اولونه بیلدیکی ایچوندور. او حالده صغرائی هر هانکی بروجله اثبات ایتکه چالشمق ایجاب ایدر؛ و تقدیرده نتیجه کنیدلکندن ثابت اولمش اولور. فرضاً شومالمزده فضیلتك حقیقه قابل تعلیم اولدوغی اثبات اولونجه نتیجه قطعاً طوغرودر.

قیاسده عمده اولان مقدمات، مسلماتدن بولونماقجه بوگونکی اصول فلسفه نظرندده بوتون مدعای قیاس شبه درکسینه اینر. زیرا نتیجهك تحقیق مقدمات قیاسك صحیح و مسلم اولسیله مشروطدر. ایشه بوسبیلهدرکه (تجربه)، زمانمزده معیار حقیقت عد ایدلمشدر.

قیاس شبه اکثر سائر قیاسات ایچون مقدمات تشکیل ایده بیلیر. بونوع قیاسی اولارسطو منطقك Premières analytiques (عربجه ترجمه سی تحلیل القیاس اسمیه معروفدر) قسمنده ذکر و تعریف ایلشدر.

Aberration

Aberration ضلالت

Abirring	آلماجه سی
Aberration	انگلیزجه سی
Aberrazione	ایتالیانجه سی

ضلالت، یوانی شاشیروب اوتیه برییه طولاشمق و غائب اولمق معناسنه موضوعدر. (Aberration) دخی تماماً اومعنادهدر. لاتینجه (Aberratio) مصدرندن مشتقدور و یان چیزمك، انحراف ایتك دیمك دخی اولور. بو تعبیر مباحت دینهده کچرسه، اووقت، (مذهب خیف یعنی طوغری یول) دن صاپان واکری یوله کیدن اعتقاد، دیمك اولورکه، بزده (رفض) لفظك معنای لغویسیده بودر؛ یعنی طوغری یولی براقوب اگری کیتك دیمکدر و (رافضی، رافضیک) تعبیرلری اوندن مشتقدور. حکمت طبعیهده (تکدر) یعنی بولانمق، بولانیق اولمق معناسنه کلیر و (مبحث ضیا) اصطلاحاتنددر. برعدسهدن مرور ایدرکن، ضیای بیضانك انحلالی و او بیاض ضیای ترکیب ایدن شعاعات مختلفهك (زاویه

(A) حرفی، (ادات نفی Préfixe négatif) اوله رق کلمات اصطلاحیهك اوکنه وضع اولنور. و تقدیرده اونی علی الاکثر (لا) ایله ترجمه وادا ایدرز. (Moral اخلاقی)، (Amoral لا اخلاقی) کبی (غیر) ایله ترجمه ایدلدیکی یرلر واردور: (غیر مطرد Anormal) تعبیرنده اولدینی کبی. (منطق صوری Logique formelle) لساننده (قضیه موجبه کلیه (Universelle affirmative) یه اشارتدر. بزده بونك اشارتی «م» در. «A» حرفی بوندن باشقه مبدأ اتحادی کوسترمك ایچوندده قولالانیلیر. $A = A$ دیرلر.

جودت پاشا مرحوم «معیار سداد» نده بومبدئی (واقع واقعدر) دییه کوستریور. بوراده کی مساوات، معادلات ریاضیه یی دکل مساوات منطقیه یی یعنی عینیتی، اتحادی کوسترر.

Abduction قیاس شبه

Abduction

بوبرنوع قیاسدرکه کبراسی (یقینی Certain)، صغراسی ایسه آنجق محتملدر؛ یعنی برحکم احتمالی نی ناطقدور. بناء علیه بوسورتله و بومقدماتدن ترتب ایدن بر قیاس آنجق صغرایه مساوی برحکم احتمالی نی ناطق بر نتیجه ویره بیلیر. یعنی بویله بر نتیجه، برحکم قطعی افاده ایتمز. مع مافیه بوقیاس، حکماً احتمالات دائره سنی اشماق شرطیله بر قیمت نسبیه یی حائردر. مثلاً: [قابل تعلیم اولان هر شی علم نوعنددر؛ فضیلت قابل تعلیمدر کبی کورونویور. بناء علیه فضیلتك علم نوعندن برشی اولسی محتملدر.] کبی.

بومثالده کبرانك مفاد حکمی شبهه کورتورمز. قابل تعلیم اولان هر شی البته علم نوعنددر؛ لکن فضیلتك قابل تعلیم اولسی آنجق محتمل بر کیفیتدر. زیرا فضائل موهوبهك وجودی دلائل قطعیله ایله هنوز رد اولونه مامشدر. فضله اوله رق فضیلتك قابل تعلیم اولوب اولماسی کیفیتیهده قطعی بر صورتده حل اولونماش بر مسئله اولدوغندن، چوق صو کورتورور بر بحث تشکیل ایده بیلیر. اولسه اولسه فضیلتك قابل تعلیم اولماسی محتمل اوله بیلیر. او حالده نتیجهك حکمی ده دائره احتمالاتی آشه ماز. بونوع قیاسك بعض احوال

رقصارنده کی) فرق سببیه مختلف درجه لوده انکساری طولایسیله حصوله کلیر بر حادته در . (قاموس اصطلاحاتک ریاضی قسمنه باقیکنز .)

اعضای آلیه دن برینک وظیفه معینه سنی ایفایه مانع اولان تشوش دخی ضلالدر : ضلال رؤیت (Aberration de la vue) ، برغریزه نك ضلالی (Aberration d'un instinct) کی .

بو تعبیر برده طبابتده مستعملدر . (Aberration mentale) اصطلاحدر و (ضلال ذهنی) دیمکدر . اسباب موجب سی ، شکل خصوصیتی نظر دقه آلنیه رق علی الاطلاق اختلال عقلیه بو اسم ویریلیر . ساده تورکجه ده قوللانیلان تعبیر دخی تماماً عینی معناده در . (عقلنی غائب ایتمک ، صاپیتقم) دیرزکه ضلال عقلی دیمک ایستدیکمز آکلاشیلیر ، و تعبیرک معنای تشبیه پسندده مختلف لسانلرک متحدالرأی اولدوغنی کورولور .

(تفصیلات ایچون قاموس اصطلاحاتک طب وفنون طبعیه قسمنه باقیکنز .)

Abnégation

فراغت Abnégation

Entsagung	آلمانجه سی
Self-denial, Abnegation	انگلزجه سی
Abnegazione	ایتالیانجه سی

بو کلمه نك معنای لغویسی (Négation) دن کلیر و کندی منفعتنی انکار ایتمک معناسنه وارد اولور . نته کیم انگلیزجه سی دهاوا نحددر : (Self-denial) کندی انکار دیمکدرکه منفعت ذاتیه نی نظر اعتباره آلمیه رق حرکت ایتمک تقدیرنده در . بز ، بوکا فراغت دییورز ؛ فقط موضع استعمالنی حقیله تعیین ایتمک ایچون اولا شونقطه مهمه نی اخطاره لزوم وارددرکه ، بوکله صرف (اخلاقی Moral) بر تعبیردر ، و منحصرأ منفعت ذاتیه ایله علاقه داردر . بناء علیه (فلان آدم شو تشبشدن ویا بوایشدن فراغت ایتدی ؛ چونکه یوزده ایکیدن فضله کار کتیر میورمش !) دیدیکمز زمان ، بوراده کی فراغت کلمه سنی (Abnégation) ایله ترجمه ایده مه یز . بالعکس بو موضعه قوللانیلان فراغت لفظی مقابل فرانسویسی اولان کلمه نك تماماً ضدیدر . کذلک ، بزه حکمت و اخلاق صوفیه دن میراث قالان فراغت معناسنده اویماز (قید

ماسوادن فارغ اولق) جمله سنده منظور اولان معنای فراغت کی که ، (ترک دنیا) دیمک تقدیرنده در . بونک کی ، (فراغ بال) ترکیبده کی فراغ کلمه سنی ده (Abnégation) ایله ترجمه ایده مه یز . فراغ بال (Quiétude, tranquillité) معناسنده در . فرانسزجه ده بو کلمه دن بوکون منضم اولان معنای باشقه سنک منفعتی ایچون ، بالا راده فدا کارلق ایتمکدر . بناء علیه اصطلاحات اخلاقیه دندر . مثلاً : (Patriotisme veut dire abnégation et sacrifice) جمله سنی : (حمیت ، فدا کارلق واستحقار منفعت دیمکدر) دیه ترجمه ایده بیلیرز . هر حالده فراغت ایله ده بو معنا ادا ایدیله بیلیر ؛ لکن بوکلمه نك مواضع مخصوصه یه کوره افهام ایده بیلدیکی معنای آره سنده کی فرقی — یوقاریده عرض اولوندوغنی وجهله — نظر دقه آلمق شرطدر .

استغراق ، (ترک) نصوفیه Absorption

Vertiefung	آلمانجه سی
Absorption	انگلزجه سی
Assorbimento	ایتالیانجه سی

لاتینجه (Ab-sorbere) نهمک دیمکدر . اصطلاحده بوکلمه علم تربیه ده و حکمت صوفیه ده برر معنای مخصوص اوزره قوللانیلیر ؛ تربیه بخشده : (ذهن ، اولانجه دقتنی طویلا یوبده تحقیقی مطلوب و ملتزم اولان برشی اوزرنده تکالف) ایدرسه ، اوحالته استغراق ده نیلیر . کویا نظر دقت بوتون موجودات سائرده دن قطع علاقه ایدرک یالکز حلی مطلوب و یا خود تحقیقی ملتزم اولان مسئله نك ایچنه طالمش واونده غرق اولمش اولویور . ذاتاً لسانمزده بو حالت اوزره بولونان برآمده طالعین دیرزکه بر دوشونجه اونک بوتون نظر دقتنی جلب و جذب ایتمشدر ؛ اوقدرکه آرتق کوزینک اوکنده طوران شیرلی کوره مز ؛ یا خود آرا راده بوله ماز ؛ چونکه نظر دقتی اولانجه شدتی ایله باشقه بر نقطه یه یعنی دوشونجه سنه معطوفدر و برشی آرایشی صرف میخانیککی در . کوزسز بر (منساق Automate) (بوسوزه باقیکنز !) کی حرکت ایدر . صانکه او دوشونجه سی بوتون نظر دقتی نهمش ، مص ایتمشدر . ایشته ، رومالیر ، سیراکوزا شهرینی استیلا ایتدکری زمان

Absorption

(سیرا کوزالی آرشیمد Archimède de Syracuse) ی بو حال استغراقده بولملاردی .

بومهندس شهر ، یره قوم سرمش ، اوزرینه اشکال هندسیه رسم ایتش ؛ دعوا حل ایتکله مشغول بولونیورمش . لکن اوقدر استغراق حالده ایتش که ، علم وهنری سایه سنده اودرجه مهارتله مدافعه ایدم بیلدیکی وطنی - عظیم بر محاربه دن صوکره - رومالیر ضبط و محله لرینه استیلا ایتملرده طویماش . نهایت اوزرینه هجوم ایدن عسکرلری ده کورمیه رک : (اشکال هندسیه می بوزماییکز !) دیمش و کنیسی نولدورمشلر .

ایشته استغرافک - بوشایان تأسف تاریخی مثالی - اک کوزل نمونه سیدر . علم تربیه ده بو استغراقه قابلیت نظر دفته آلتیر بر مسئله در . زیرا هر کس ، کنیسی اونوته جق ندر ، نظر دقتی بر مسئله عطف ایدم . آلمان فلاسفه اخیره سندن مشهور (هربارت Herbart) ، (Absorption) ی (Réflexion) (مقابلی Opposé) اوله رق تلقی ایدیور . استغراقی روحک (Inspiration) ی ، یعنی تکائی ، ایچنه چکیلیمه سی کی قبول ایدیور . بو حالده روح ، یکی بر تجربه یاپارکن ، یکی بر شیئه حصر دقت ایلرکن موقتاً کندنن کچمش اولویور . کنیسی اونوتمله افکارینک طبیعی اولان ترتیب عادیسی ده موقتاً اونوتویور ؛ و او حیرتبخش اولان حادثه جدیدنک تماماً مجذوبی اولویور . (Réflexion تأمل) بوندن صوکره کلیورکه بو آرتق تمامیه (مشعور Conscient) بر (ادراک دقیق Aperception) در . آکلاشیلیورکه ، بوراده هربارت (Inspiration) و (Expiration) تعییرلری (قبض و بسط) معناسنده قوللانمشدر . کویا روح استغراق حالده تکائف ایدرک بر نقطه اوزرینه طولانیور ، صوکرده سلسله افکار ایله منبسط اولوب یاییلیور و آچیلیورمش کی دوشونویور . روحک بو ایکی وضعیتی آکلامق امر تربیه ده یک مهم بر کیفیتدر . مربی اوکا کوره چوجو غک استعداداتی تربیه ایدر .

بو تعییرک تصوفده معناسی ، همان همان (وجد Extase) ایله بر کی در . ذاتاً محررات صوفیه ده همان دائماً بو ایکی کله یکدیگر بنه عطف تفسیر صورتیه

وارد اوله کلمشدر : (وجد و استغراق) ده نیلیر . (تفصیلات ایچون Panthéisme ، Extase ، Aïdéisme سوزلرینه باقیکنز !) (Absorption) حکمت طبیعیده و علوم حیاتیه ده دخی تعییرات مشهوره دندر حکمتده امتصاص ضیا بجئی مهمدر ؛ ضدی (Émission) در . تفصیلات ایچون قاموس اصطلاحاتک حکمت قسمنه مراجعت ایدیکنز .

Abstinence

امساك Abstinenca

Enthaltung المانجه سی

Abstinenz ایतालانجه سی

انکلیزجه سی فرانسه زجه سی کیدر

لاتینجه (Abstineo) و یونانجه (Απέχουα) ، برشیدن اوزاق طور مق معناسنه کلیر . اصطلاحده پرهیزکارلق و امساك دیمکدر . فلسفه عملیه ده اکثر یا زبازرد اولان تعییرات اصطلاحیه دندر . علی الخصوص (حکمت صوفیه Çoufisme) ده و حکمت دینه (Philosophie religieuse) ده (زهد piété) ایله صیقی صیقی به علاقه سی واردر . بو تقدیرجه امساك انجق بر مقصد دینی و اخلاقی اوغورنده (یمک ، ایچمک و نکاح کی) ضرورات طبیعی دن اولان احتیاجات غریزه دن کنیسی محروم ایتک ایچون بالارادت نفسنه تحکم ایلکدر . بناء علیه حوایج ضروریه و مشتهیات طبیعی دن بالارادت محروم اولمق و برغایه دینه و اخلاقیه اوغورنده بو محرومیه قاتلان بیلیمک (امساك) در . امساکی امر ویا توصیه ایدن : فلسفیانه (رواقیه Stoicisme) ، ادیان منزله ده دخی (خریستیانلق Christianisme) در ؛ فقط (رواقیه) ایله دین نصرانیتمک امساکی توصیه ایتسنده کرک اسباب و مبادی ، کرکسه مقاصد و غایات بوسبوتون باشقه ، حتی بر برینه ضدر . (رواقیه) مذهب فلسفی سی امساکی توصیه ایتکله روح بشری حوایج طبیعییه قارشی مستغنی و محیطی ایچنده مستقل بولوندورمق و نفس انسانیه یی ، کنیسی کنیینه مالک بر درجه کمال و حریته ایصال ایتک ایستیوردی . انسانک عزت نفسی و شخصیت معنویه سی ابراز ایدن حسیاتی ، صوکره درجه ده تمیه و تهییج ایدیوردی .

رواقیوندن مشهور (Epictète) ، فلسفه امساك دستورینی
ایکی کله ایله بیان ایتیش ، و : (ἀνέχου καὶ ἀπέχου) یعنی تحمل ایله
وامساك ایت !) دیمشدی . حالبوکه خرسیانیانك توصیه ایتدیکی امساكدن
مقصد، تذلیل نفس و خشوع اولدوغی ایچون تمامیله رواقیه مبداءك ضدیدر.
خرستیانلق معصیت اولی، یعنی (زله ادم le péché Original) سببیله
انسانی بدایتاً آثم فرض ایدیور و حتی، هنوز طوغان و کناه ایشله مکه وقت
بوله میان معصوملری بیله - اجدادینك و علی الخصوص ابوالبشرک خطای
واقعندن طولای - ذاتاً کناهکار عد ایدیور ؛ و بناء علیه آخرتده بویوک
بر عذابه مستحق اولماسی و اجدادندن موروث اولان کناهلردن ممکن
اولدوغی قدر تنزیه نفس ایده بیلمه سی ایچون - اول امرده بودنی دنیاده -
تذلل ایتمه سنی، خوار و حقیر اولمه سنی ، لئانئذ شهوانیه دن و حتی احتیاجات
ضروریه دن بیله امساك ایدرك یا شاماسنی امر ایلور . عالم آخرته معصوم
اوله رق طوغمق ایچون ، بوراده ، بودنیساده نفی وجود ایتك ، کندیخی
عذابه صوقق لازم اولدوغنی بیلدیریور . ایشته (زهد) ك توصیه ایتدیکی
امساك بودرلور . (Ascétisme و Stoicisme سوزلرینه باقینکز) .

مع مافیه (بوددیزم Bouddhisme) و (براهانیزم Brahmanisme)
مذهبلرنده بو (زهد) و اونك لازمه اخلاقیه سی اولان بوامساك حدینی
آشمش و طاقت بشریه نك تحمل ایده میه جکی بر درجه اذیته واردیرلشدرد .
کندیخی بر آغاج دالنه باش اشاغی آصمق و آیلرجه اویله آچ و صوسز صاللانوب
طورمق ؛ وجودینه یوزلرجه چیویلر میخلامق و اونلرله برابر دیکنلر
اوزرنده یاتمق ؛ کندیخی اوموزلرینه قدر طور اراغه کومدوروب بر سنه ،
اویله جه آچ و صوسز طورمق ، هند فقیرلرینك خارق العاده و طاقت بشریه
فوقنده درجه امساك لرینی کوستریر (Fakirisme) دیدکری ایشته امساك
بودرجه سیدرکه (بدنه اذیت Mortification de la chair) اونك بریحی
شرطیدر . زیر (فقیریزم) اعتقادنجه حیات ، بر (درکه هبوط Déchéance) ،
جماعت بشریه (سجن روح) در ؛ یعنی روحك جهنمی در . طبیعت و هله
بدن انسان ، روحك اك بویوك دشمنی و ضدیدر . چونکه روح ، نورانی

و بسیط بر جوهر مجرددر ؛ جسم ایسه ظلمانی و عناصردن مرکب بر خلیطه
مزخرفه در . بناء علیه اونی تعذیب و افنا ایتلی که روح مسعود اولسون .
بزم تصوفده بوفکر و اعتقاد وارددر . تحقیقات ایله ثابت اولمشدرکه بزه بو
عقیده ، طوغر و دن طوغری به هنددن دکل ، (نوفلاطونیه Neoplatonisme) دن
انتقال ایتمشدر . (بوسوزه باقینکز .) عالم اسلامك البویوك شاعر صوفی سی
(مولانا جلال الدین رومی) نك (مثنوی) سندده بو اعتقاد تمامیله بسط
اولونمش و بالخاصه بر حکایه ده (مرض موت) خلاصکار روح اولمق اوزره
تعریف ایدلشدرد . بو تعریفه کوره ، و هر شینك کندی اصلنه مشتاق اولماسی
حکمتنه نظرآ ، خسته لق دیدیکمز حالت غیر طبیعیه ، عناصر بدنك کندی
اصللرینه رجوعی ایچون فرط اشتیاقندن ایلری کلیرمش . بر خیال باطل بر
اثر شعبده اولان بومستعار ، بوموقت حیاتمز ، ظلمانی الاصل اولان عناصر
مادیه نك ترکی ایله قورولان (نفس تن) ده (مرغ روح) ی حبس ایدیورمش .
روحك اصلی ده صرف الهی اولدوغی ایچون اودخی ، محبس جسمانیسندن
بر آن اول آزاد اولوب (روح کلی) یه قاووشمق و اوندده محو و مستهلک اولمق
اشتیاقیله دائماً چیریشیورمش ، که بو چیرینه میه سی (عشق حقیقی) نشئه سی در .
روح کلی یه قاووشمه سی و اوندده محو و نابود اولماسی ده (قنای الله) در .
هند اسان تصوفده (نیروانا Nirwânâ) بودر .

مرض موت ، و بالجمله امراض ، وجود مزك عناصر مادیه سنی یکدیگرندن
آیروب (ترکیب جسمانیت) نی بوزمغه و بناء علیه روحه محبس عذاب
اولان بو (تن قفسی) نی قیرمغه چالیشدیخی ایچون لایموت و الهی الاصل اولان
مرغ روحك آزاد اولماسنه خدمت ایدیور . بناء علیه خسته لق و ثلوم بر
فلاکت دکل ، بالعکس بروسیله سعادتدر . حتی اوندن توقی ایتك شویله
طورسون ، خسته لق ، کندیلکندن کگذدن اول اونی دعوت ایتلی و بدنی
تعذیب و تخریب ایتکه چالیشمالی در که ایشته (ریاضت) دیدکری ده بودر .
بو اعتقادك اك قیصه یولدن (فقیریزم) ضالانته پیوسته اوله جفنده ده شبه
یوقدر . بودوشونوش ، هنده منسوب اولمق حیثیتله پك اسکی در . فقط
اونی بر عقیده فلسفیه شکیلنه قویوبده مدافعه ایدنلر بالخاصه نوفلاطونی لر

اولشدر . علی الخصوص (یامبلیکوس Jamblicus) در . سوریه‌لی اولان بومشهور آدم ، عصرنده ال بویوک عزیزلردن صاییلردی و فوق‌العاده بر حرمته مظهریت قازانمشدی . خاتقاه آچش وبرچوق مریدلر یتشدیرمشدی . اکثریا وجد و حال اوزره بولونوردی . [ثولمک (حیات جاودانی) یه نائل اولقدر . وجد انسانده حس و شعوردن فارغ اولان بدن موقتاً ثولمش دیمکدر بوصورتله آزاد اولان روح ، وجود مطلق ایله برآن تماس ایدیور؛ نامتناهی‌نی ادراک ایتک سعادتنه مظهر اولویور . بو ، آنجق (جمال‌حقدن برغمزه) در . وصال حقیقی و اندی ثولوم ایله ممکندر خسته‌لقلر ثولومی دعوت و دم وصالی تعجیل و تسهیل ایدر : اونک ایچون خسته‌لق ، فلاکت دکل سعادتر .] دیه تعلیمات مخصوصه‌ده بولونوردی .

نوفلاطونی‌لرک ، ال بویوک و حقیقتاً داهی فیلسوفی (پلوتینوس Plotinus) — که زماننک افلاطونی ایدی ! — تماماً بو اعتقاده بولونویوردی . حال احتضارنده کندیسنی زیارته کلش اولان اودا واحباسی : (نصل‌سک ؟) دیه حال و خاطر صورقلری زمان : [ایچمده‌کی الهی‌الاصل اولان جوهری آزاد ایتک ایچون اوغراشیورم !] دیه‌رک کال سکینتله جواب ویرمش و مرغ روحی قفس تندن قورتارمغه چالیشدیغنی اکلاتیق ایسته‌مشدر .

بوفکرلر عیناً بزم صوفیه‌ده واردر . حتی وجد و استغراق ، هرشیدن فراغت‌ایله ممکن اولدوغی ایچون ثولومدن اول‌ثولمکدر . حیات جاودانی بودر .

حیات جاودانی ، شیخ کاملدن سؤال ایتدم :

(ثولومدن اول‌ثولمکدر !) ده‌یجه انتقال ایتدم .

بی‌تی بومعنایه ترجمان اولور .

امساک ، ریاضتک اساسی‌در . افراطی (فقیربزم) درکه‌سنه واریر . نصل برملاحظه فلسفیه ایله واردیغنی‌ده یوقاریده عرض ایتدم .

شرق و حتی مملکتتمز بوفکرلرک تأثیرندن بوسبوتون قورتوله‌مامشدر . (تن‌قفسی) تشبیهی ، تصوف فلسفه‌سندن لایقيله خبردار اولمایان خلق آراسنده بیله مشهور اولشدر . شعرای متأخریندن سامی پاشا ، نامق کمال

بک ، رجائی زاده اکرم بک ودها بک چوق محررین بو ترکیب صوفی‌نی استعاره اوله‌رق قوللانمشلردر .

زمانمز فلسفه‌سی حیاتی تعذیب ویا تحقیر ایتکی برضالات مدهشه‌اولق اوزره تلقی ایتدیکنندن فلسفه صوفیه‌نک بو تعلیماتی اخلاق اجتماعیه‌جه بک مضر برعامل معنوی اولق اوزره تلقی ایدر . حالبوکه معاصریندن بعض آوروپا حکمای صوفیه‌سی عینی عیننه (پلوتینوس) ک سوزلریخی تکرار ایدیورلر . مثلاً آلمان حکیم صوفیسی Novalis . — که دوستلری کندیسنی اعزّه خرسیتیانیه‌دن عد ایتکه قدر وارمشلردر — تماماً بوفکر و اعتقاده طرفدار اولمش و : [حیات ، روحک برخسته‌لغی‌در . احتراضاتک تهییج ایتدیکی برفعالیتدر . ثولمک بوتون بو خسته‌لقلردن آزاد اولق و ارتق انسانلغک شروط مقیده‌سندن قورتولقدر .] دیمشدر که یوقاریده بسط ایتدیکم عقیده‌نک عیناً دستور افاده‌سیدر .

بناءً علیه اوروپاده دخی و بوکون بیله بویله صوفیه اعتقادنده بولونان متفکرلر واردر . فقط اندر نادراتدندر . بوعقیده خلقه سرایت ایتمه‌مشدر . خلق ، (غوغای حیات و یاشامقله نجات) ، فلسفه‌سنه طرفداردر .

بوتون بوتقصیلاتدن شوکیفته استدلال اولونملی‌درکه بوکون ینه زمانمز فلسفه‌سنده (امساک) بر شرط مهمدر ؛ فقط صرف اخلاقی معناسیله تلقی اولونمقده‌در ؛ و ینه حیاتی حسن محافظه مقصدیله توصیه اولونور . مثلاً [سفاهت و ایچکی و ذوقپرستک ، حیاتی قیصالتیر و وجودی برآن اول تخریب ایدر ؛ اونک ایچون بو طرز معیشتدن توقی ایتمه‌لی و بوشیلردن امساک‌ایله‌لی !] ده‌نیلیر . زمانمز ، عقیده امساک بیله چوق یاشامق و بختیار یاشامق ایچون توصیه ایدر . بناءً علیه بولفظک معنای تاریخیسی‌ایله بوکونکی معنای اخلاقیسی تماماً ضددر . تفصیلات ایچون (صوفیه Çoufisme و Néoplatonisme) سوزلریته باقیکنز .

Abstrus

مغلر Abstrus

هردرلو مسائل حقنده وصف اوله‌رق تطبیق ایدیله‌بیلیر بر تعیردر . مسئله ، کرفت و مشوش اولورده عناصر اساسیه‌سی آره‌سنده‌کی روابط

فولایقله تعیین ایدیه مزده اومستله نك وضعیت طبیعی سی بر چوق سبیلردن و (مثلاً سائر مسائل ایله من جهة علاقه و مشابهنیدن) طولانی تقدیر و تحدید اولونه مازسه اونلره (مسائل مغلقه) دیرلرکه اکثریا بسیط اولمایوب مسائل غیر متجانسه خلیطه سی اولدقلری - تحلیلی بر تحقیقدن صوکره - اکلاشیلیر، و بومغلقیتدن ناشی اکثریا یا کلش حکملر و یریه رك خطا وقوعه کلیر .

فقرانه ارادت Aboulie

Aboulie-

آلمانجه سی Abulie, willenlosigkeit

انگلزجه سی Aboulia

ایتالیانجه سی Abulia

بو تعبیر یونانجه دن آئمشدر . (Boulaouai) ایسته مك معناسنه در . باشده کی (a) دخی ادات نفی در . بناء علیه (ایسته یه مه مك) دیمك اولور . اصطلاحده (فقدان ارادات) معناسنه تخصیص ایدلمشدر . بو برمرض مخصوص اولمقدن زیاده ، (نوراسته نیا Neurasthénie) ، (اختناق رحم) و (تجنن) کبی امراض عصبیه و روحیه ایله برابر وقوعه کلن (حالات مرضیه) دندر .

فقدان ارادت ایکی حال اوزره مشاهده اولونور . بریسی حرکت عارض اولان ارادتسزك (aboulie motrice) ، دیگر یه ده صرف (عقلی aboulie intellectuelle) اولان ارادتسزك در . برنجیسنه مبتلا اولان کیسه هیچ بر علامت (فلج paralysie) عرض ایتدیکی حالد قیملدانه - بیلیمك ایچون ، جمله عضلیه سی تحریك ایده جك قدر ارادتی قالمامشدر . کندی کندینه ییه مز ، ایچه مز ، البسه سی کییه مز . حالبوکه یاشامق ایچون بو حرکتلری اجرا یه مجبور بولندیغنی تعقل و ملاحظه ایده مز دکدر . مع مافییه بوسبوتون قابلیت حرکتدن محروم دکدر . ماکنه کبی حرکت ایده بیلیر ؛ یعنی بر (منساق automate) درکه سنه دوشمشدر . لکن ارادی اولان حرکاتک هیچ بر دورلوسنه مقتدر اوله ماز . اکلاشیلورکه (تثبث initiative) قدرتندن کلیاً محرومدر .

عقلی اولان صورتنه ککنجه ، بو ارادتسزك بر شیئه توجه دقت ایده مه مك قابلیتسزلكی ایله تجلی ایدر . بو حالد انسان ، دقت ایچون جبر نفس ایده مز ؛ شدتله متأذی اولور . مثلاً بو حاله کرفتار اولانلر بر کتاب اوقویه بیلیرلر ؛ حتی جهراً اوقویه بیلیرلر ؛ فقط سلسله افکاری ضبط و تعقیب ایچون لابد اولان دقتک فقدانندن ناشی اوقودقلرندن برشی اکلایه مازلر . اونك ایچون آمستردام اطباسندن (گوژ Guge) ، بو حاله (aproxie) تمیزی تر جیح ایتمشدرکه یونانجه معنای لغویسی دقته قابلیتسزك دیمکدر . اطبا بو تجلیات مرضیه یی جمله عصبیه مرکزیه نك ضعفه و قوای مغویه نك انحلاله اسناد ایدیورلر . بو فرضیه طوغر و کورونور زیرا ارادی حرکتلرک ناظمی دماغدر .

بوندن باشقه برده (Aboulie Systématisée) ده نیلن بر حال وارددرکه یالکز بر صنف افعاله معطوفدر ؛ فقدانک ایکنجی بر نوعی ده افعاله تناقض فکرینك افراطه وارماسندن عبارتدرکه بوکاده (Aboulie de résistance) دینیور .

Absence

Absence

غیبت

Zerstreuung آلمانجه سی

Absent mindedness انگلزجه سی

Distrazione ایتالیانجه سی

(حضور présence) ك ضدیدر . یوقلق ، بر شئیك اساساً اولماسی در ، حالبوکه (غیبت) وار اولان بر شئیك ، بر مدت ، و انجق بر مدت غیر معینه ظرفنده یوق اولماسی در . موجود اولان بر شئیك بوسبوتون یوق اولماسنه (قنا anéantissement) دیرلر . بناء علیه بو تعبیر ، (عدم صرف pur néant) ایله (قنا) آره سنده بر معنا افاده ایدر . مثلاً (غیبت شعور absence de conscience) دیدیکمز زمان ، شعور و حس اولو موجود ایکن ، زائل و غائب اولش معناسی اکلاشیلیر . و (absence du sens moral) دیدیکمز تقدیرده (حس اخلاقی نك) یعنی خیر و شر و مشروع ، غیر مشروع بیننی تمیزه خادم اولان حس مخصوصك غیبت

و زوالی مراد ایده‌رز. فیلسوف مشهور (به قن Bacon) ك (table d'absence) سی ایچون (table) سوزینه مراجعت ایدیکز .
غیبت ، پسیقولوژی یعنی علم النفس تعبیرنجه ، ظروف و احواله
مطابقتده بر نقصان سبيله محسوس اولان موقت و درین برذهن طالعینلغه
دیرلر .

L'absolu مطلق

Das absolute	آلمانیجه
The absolute	انگلیزجه
L'assoluto	ایتالیانجه

L'absolu

بو کله ، لاتینجه نك (ab+solvere) لغتدن آئمشدر . علائقدن
چوزولمك ، روابطنی غائب اتمك معناسنه کیر . بیزانس فیلسوفلرینك
(Tò απόλυτον) دیدکلری بودر . لاتینجه سی (absolutum) اولدوغنه
نظراً یونانی دن مقتبس بولوندوغی آشکاردر . معنای اصلاحیسنه کلنجه :
هردرلو قیود و شروطدن ، هر نوع اضافات و مناسباتدن آزاده اولان شی
دیمکدر . اصطلاحده مقابلی (اضافی Relatif) در . (بوکله یه باقیکز .)
عربجهده (اطلاق) ، حیوانك دیزکینی آلوب صالمق دیمکدر .

لسان فلسفهده اوتهدنبری زیاده بر اهمیتله قوللانیله کلن بو کله ،
(وجود l'être) و کیفیاتی حقنده وصف اوله رق ایراد اولونور . فقط
هیچ بر کیفیت معینه اشارت ایده مز . ایده بیلسهیدی ، کندی مضمون
مخصوصنی نقض ایتش اولوردی . حتی کیفیاته وصف اولق اوزره تردیف
ایدلدیکی زمان دخی ، لسان فلسفهده معتبر ولان معناسنی ضایع ایتش اولور .
مثلاً (عدالت مطلقه) ، (حسن مطلق) ، (وزن مطلق) دهنلیدیکی زمان .
بو ترکیلرده صفت حیثیتله داخل بولونان (مطلق) کله سی ینه اضافی بر
معنا افاده ایدر . او معنا نه قدر کلی و عمومی اولسهده و یا خود موجودات
مجردیه مختص بولونسهده بالخاصه فلسفهده (وجود مطلق
l'être absolu) دهنلیدیکی زمان ، (بذاته ولذاته en soi et par soi)

قائم و دائم بر (وارلق) مراد اولونور . یعنی (هر درلو شکل و صورتدن
عری و هر نوع شرط و کیفیتدن بری بر وارلق ، بر (وجود صرف)
دیمك اولور . حکمای اسلام بوکا (مصدر البحت) دخی دیمشلردرکه (وجود
صرف = یالکز وارلق) معناسنه موضوعدر و بو تعبیر آثار اسلافده پك
مشهوردر . تعریفنده (الوجود بماهو موجود ؛ ای ، من حیث هو هو ؛
غیر مقید بشی) دیمشلرکه ارسطونك (Tò ὄν ᾧ ὄντα) تعبیرینك ترجمه سیدر .
(مبدأ وحدت principe du monisme) اساسنه موضوع اولان
فلسفه لرك جمله سنده مابعد الطبیعیاتك اساسی و اك مهم مسئله سی (وجود
مطلق) ك نه اولدوغنی بیلمك ، اونك (حقیقت ذاتیه) سنه عارف و واقف
اولقدر . تصوف ده ایسه (وصال communion) دخی اك بویوك مقصد
و املدر . (تصوف mysticisme, çoufisme, théosophie) سوز -
لرینه باقیکز .

وجود مطلق تعبیری بر چوق سؤ تفهیماته سببیت ویرمشدر ؛ زیرا
بونك بر معناسی ده (تام accompli) و (مکمل parfait) دیمکدر . او
تقدیرده (ارسطو) نك (Tò ὄλον) و (Tò τέλειον) تعبیرلرینك تام
ترجمه سی اولور . (سرویلیام هاملتن) و (جون ستونه ت میل) بوتعبیرك
بالجمله معانی معتبره سنی تحقیق و تعمیق ایتمشلردر . بناء علیه بوکون معنا
فرقلرنده ده زیاده صراحت واردر . او سبيله درکه زمانمز فلسفه سنده بو
کله نك معنای اصطلاحیسی باشلیجه ایکی درلو تلقی اولونویور .

اولا ، (وجود مطلق) باشقه برشيله مناسبات و علائقی اولیان (وارلق)
دیمك اولیور . بویله تلقی اولوندوغنه کوره وجود مطلق ، (علت اولی
cause première) (بوتعبیره باقیکز ! [اوله ماز ؛ واوله مامق لازمکیر .
زیرا (علت اولی) بهمه حال بر (معلول effet) ایستر .

برشیتك علت اوله بیلمه سی دیگر برشیته علاقه سیله تصور اولونه بیلیر ؛
یعنی دیگر برشیتك ده او علت ایله معلول اوله بیلمه سنه متوقفدر . علت ایله
معلول آره سنده (لازم - ملزوم) قیلندن بر مناسبت واردرکه بوکا فرانسز
لساننده (rapport de nécessité) ، عربجهده (تلازم) دیرلر . ایکی

شئك ، ذهنده بربرخی استلزام ایتمه سنی ایما و بیان ایچون وضع اولونمش بر گله در . [association, nécessité سوزلرینه باقیکنز !] اویله که بویله برنسبتله یکدیگرینه مربوط اولان شیلرک بری دوشونمک، دیگرینی درحال و بهمه حال خاطره احضار ایدر . بو بر اضافت لازمه درکه علی العموم (نسبت تضایف rapport de correlative) تعبیله دخی یاد اولتور . [correlation سوزینه باقیکنز !]

اوحالده (وجود مطلق) اولدوغی ادا اولونان بر وارلغک ، (علیت علاقہ سی rapport de causalité) ایله دیگر برشیته نسبت و مربوطیتی ، تعبیله معنای حقیقیسی ایله متناقض دوشر بر تصوردر . بناء علیه (وجود مطلق) ک (علت اولی) اولماسی رد ایدنلر ، انجق بو نقطه نظرده وانجق بوسبیلده رد ایتشلردر که بوضورتله رد ایتک او وجودی انکار ایتش اولق صایلماز . وجود مطلقک ، هر درلو روابط و اضافلردن بری اولما-نی شرط اصلی اوله رق قبول ایدن حکما ، بالضروره بو تعیری (وجود یکانه) ، (وجود واحد) اوله رق تلقی به مجبور بولونمشلردر . بوتون (moniste) لرک طرز محاکمه سی ، اونه دنبری بودر .

متقدمین یونانیهدن (پارمنیدیس Parménides) ایله متأخریندن (سپینوزا Spinoza) بوفکرده ایدیلر . نته کیم ، (وحدت وجود) طرفداری اولان سوفیه دخی عینی فکرده در . چونکه (تصوف) نظرده دخی وجود حقیقی ، آنجق وجود مطلقدر و او ده یکانه وارلقدر . تصوفده (التوحید ، سقاط الاضافات) بومعایه اشارتدر .

ایشته بویله عالم هستی ده (تک بر وارلق) تصور ایتک ، حقیقه قابل ادراک اوله مادیغی ایچون ، بو وجود مطلق تصویری باطلی بدیهی کورنلر اولمشدر . محاکمه لرده بونیجه به پیوسته اولانلرک بر قسمی : [وجود مطلق ناقابل تصوردر] دیمشلر که بونلره (اضافیه relativistes) تسمیه اولونوبور . دیگر بر قسمی ده وجود مطلق بر خیال محال اوله رق تلقی ایدوب انکار ایتش و صرف حادثات ایله اکتفا ایتکی معقول کورمشدر . بونلره ده (شأنیه Phénoménistes) دیرلر . [بو تعبیله باقیکنز !]

علم ، یعنی بیلکی دخی بیلن نفس ایله بیلین شی آراسنده بر مناسبت ، بر اضافت اوله جنی ایچون (وجود مطلق لایعرف inconnaissable در) ؛ زیرا اونکله عقلمز آراسنده بر رابطه علمیه اولسه یدی ، او دخی معلومات اضافیه مزک دائره احاطه سنه داخل اوله جفتدن (وجود مطلق) اوله مازدی . ایشته بورادنده آکلاشیلیور که بو تعبیله تعریف فلسفی سی و مضمونک صورت تلقیسی ، ذهنلری (لادریه agnosticisme) حدودینه - بالمجوریه - سوق ایتشدز . بوکون (اضافیت علم بشر relativité de la connaissance humaine) حقیقتی قبول ایدن فلسفه لرک و فیلسوفلرک - بلا استثنا - جمله سی ده (مابعد الطبیعات métaphysique) بحثده (لادریه) اعتقادنده درلر . هپسی ده حقیقت اشیانک ، یعنی وجود مطلقک ممنوع الادراک اولدوغی تسلیم و ادا ایتکده متفق الزایدلر . الهیون و متشرعون ده بوزمرده داخلدر . ذاتاً کتاب کریمده (لیس کمله شی = اوکا بکزر برشی یوقدر !) بیورلمش و (تعالی شانه عما یصفون) ودها بر جوق آیات جلیله بومعنای مؤید بولونمشدر . اونک ایچوندر که حکمای اسلام (تفکروا فی آلاء الله ولا تفکروا فی ذات الله = اللهم نعمتلی حقنده دوشونوکنز، ذاتی حقنده دوشونمه ییکنز !) تنبیهی اوزره صادر اولان قول پیغمبری بی دائماً نظر دفته آملش و (ذات مطلقه) دن بحث ایتکی (کستاخلق) و (ترک ادب) عد ایتشلردر .

فلسفه بالضروره بوندن بحث ایده بیله دیکی قدر ایدر . چونکه (ontologie مبحث وجود) ک باشلیجه موضوعی واک مهم مسئله سی اودر . فقط فلسفه نک بو مسئله حقنده بوتون ملاحظاتی - آز جوق معقول - بر فرضیه اولق در که سندن قورتوله ماز .

زمانمزک اک بویوک تحریرلرندن و فیلسوفلرندن متوفی (سر ویلیام هاملتن Sir W. Hamilton) بو مطلق تعبیله ارسطونک تلقی ایتدیکی معنا ایله قبول ایدیور . بوفیلسوفک اعتقادنجه دخی (مطلق) ، تام ، مکمل و قصورسز دیمکدر . ایکنجی معناسیده - اولجه ایضاح اولوندوغی اوزره -

هر درلو علائقن آزادہ بر وارلق دیمکدر . (هاملتن) ، (نامتناهی l'infini) ایله بوتعیر اره سنده بر مهم فرق تعین ایدیور که نامتناهی بخشنده ایضاح اولونمشدر . حالبوکه (دکارت Descartes) واوندن صوکره کلن فیلسوفر بو فرق ادراک ایتمه مشلردی .

بومسئله لرده هان تمامیه هاملتنه اقتدا ایتش اولان (هربرت سپنسر H. Spencer) دخی بر (وجود مطلق) قبول ایدیور و (اضافت علم بشر) ادعا سنده بولوندوغی حالده ، وجود مطلق (علت اولی) اولق اوزره دخی تالق ایلور . تعریفنه کلنجه : [علت اولی ، هر وجهله کامل ، کللی و تام اوللی در ، وکندی ذاتنده بالجله قوا و قابلیاتی شامل ومتضمن بولونمالی در . بناء علیه هر درلو قوانینک مافوقنده وماوراسنده اعتقاد ایدملی در . خلاصه تعیر معروفی اوزره (مطلق) اولمالی در .] دیور . بزم حکمای صوفیه نک تعریفی ده بونک عینی در ؛ محی الدین عربی نک فصوصنی شرح ایدن عبدالله بوسنوی مرحوم ، او کتابک برنجی جلدنده : [حق ، اطلاق ذاتی سی و غیب هویت ولاتعینی اعتباریه احدیت ذاتیه و وحدت حقیقه سنده ، وصف ولعندن ، اسم و رسم و حکمدن منزهدر . هیچ بروصف ایله اونک اوزرینه حکم اولونماز :] دیور که هر کسجه مقبول واک مشهور اولان تعریف در . بوتعریفات مشهوره و معتبره ده اساسی اولان فکردن آریلیه رق ، مطلق تعیرینک معناسنده بعض تعدیلات اجرا ایدنلر اولمشدر ؛ لکن بوفرقلرک اهمیت یوقدر .

(مطلق) تعیری اک زیاده مابعدالطبیعاتده ، اولانجه اهمیتنی کوستریر . حتی اسلافک اعتقادینه و قبولنه کوره مابعدالطبیعاتک (مبحث وجود ontologie) قسمنک باشلیجه موضوع بحثی (وجود مطلق) در .

لسان عادیده (مطلقاً و مطلقیت اوزره) ده نیلدمی ؟ . . . موضوع بحث اولان بر شینک سائر شیلردن قطع نظرله منحصر آتلق ایدلش اولدوغنی اشرا ب ایدر .

علوم مختصه ده دخی بوتعیر ، مقابلی اولان (اضافی) کله سیله برابر

قولالانلیر . مثلاً : (وزن مطلق) ، (وزن اضافی) کی . فقط بوراده مطلق تعیرینک معناسی ، فلسفه ده کی مضمونه توافق ایتز . چونکه حکمت طبیعه ده منظور اولان هر کیفیت کی وزن مطلق دخی بر نوع وزن اضافیدر . بناءً علیه علوم ده مطلق تعیری ده نسبی در . یعنی مطلق دکدر .

کائناتده بر مبدأ وحدت آرایان فیلسوفرک جمله سی ، [ایستر طبیعیوندن ، ایستره صوفیون فرقه سندن اولسون] فلسفه یی ، مابعدالطبیعیاته ارجاع ایدرلر . مابعدالطبیعیاتک باشلیجه موضوعی و غایه سی ده [وجود مطلق طبیعت ذاتیه سنی کشف و تعقل ایده بیلیمک در] دیرلر . بوکا تحقیقات تجربیه ایله حساً موفق اولق احتمالی اولمادیکی کی ، (ذات مطلقه) نک کنه حقیقتی عقل ایله ده آکلامق امکان خارچنده بولوندوغی ایچون (مطلقیون les absolutistes) دائماً (اسباب علم les moyens de connaissance) دن (حدس intuition) اهمیت ویرمشلردر . زیرا وجود مطلق حقنده بر علم یقین تحصیلندن (حس sens) و (عقل intelligence) بزئ مایوس بر اقبجه وسائط علمدن انجق اوچنجیسی اولان (ضمیر conscience) . مراجعت ایتک ضروریدر . فقط حقیقت مطاقه مسئله سنده بالکزالهامات وجدانییه مفتقر و منتظر بولونمق ، اربابی طوغرودن طوغریه تصوفه کوتورور و صوفیه نک (کشف ضمیر) دیدیکی اصول تحقیق دخی ، ایشته بو (intuition) در . شاعر صوفی فیضی هندیکنک شو بیتی ، بو اصول ایچون موجز و مکمل بر تعریف ناطقدر .

درکشف حقایق سبق آموز ضمیریم ؛
ترتیب دلیل حکمارا نشناسیم .

یعنی : [حقایق کشف ایتکده بز کندی ضمیر مزدن درس آلمشدر . فیلسوفرک (ترتیب دلیل) اصولی بیلیمیز . طانیماز] دعواسندن مرادی ، [حس و عقلک دلالتنه اقتدا ایدن حکما کی حرکت ایتمه یز ، بز حقیقتی (کشف ضمیر) ایله بولورز و بیلیرز .] دیمکدر . بوتون صوفیه نک اصولی — فی الحقیقه — بودر . مع مافیه هیچ تصوفله مناسبتی اولمایان ، حتی تصوفدن

اجتناب ایدن معاصر فیلسوفلردن بر چوق متفکرین وجود مطلق بختنده حسك شهادتندن و عقلك حکمندن اشتباه ایتکله، (کشف ضمیر) ه اینامقده مضطر قالمشلردر. مثلاً وجود مطلقك یعنی اللهك عقل و حس ایله بیلنمه جکنه قانع اولان (ویکتور قوزن Victor Cousin)، کشف ضمیر ایله بولونه جغنی و بیلنه جکنی ادعا ایتشدر. بوکا قارشى معاصرى (سرویایام هاملتن Sir W. Hamilton) معارضه ایده ركه (ذات الهیه) نك وجداناً دخى منکشف اوله میه جغنی - بردعوا صورتنده - ایلری سورمش و (قوزن) ی ردآ تنقید ایتشدر. بو بحث فلاسفه اسلامیه و متصوفه و آلهیون آره سنده اوزون اوزادییه مناقشات شدیدیه سبیت ویرمش اولدیفی کبی، اهل سنت ایله معتزله آره سنده غایت عنیف مجادله لره میدان آچشدر.

(وجود مطلق) تعبیرینه بدل بر چوق تعبیرات قولانله ركه باقیلسه، اونى منفی بر صورتده تعریف ایتك غیرتندن طوغمش کله لردر. (سپینوزا Spinoza)، (جوهر Substance) دییور. (هغل Hegel)، (روح esprit) دییور. (هاملتن)، (غیر مشروط وجود l'Inconditionné) دییور. الی اخره!... نوفلاطونیلردن (پلوتینوس Plotinus) (روح عالم) دیر ایدی. نته کیم بزم صوفیه، (نقطه الغیب)، (حقیقه الحقایق)، (کنز مخفی)، (سرالاسرار) الی اخره!... دیمشیلردی که هپسیده (وجود مطلق) دیمکدر.

مطلقیت اداره Absolutisme

Absolutismus	آلمانجه
Absolutism	انگلیزجه
Assolutismo	ایتالیانجه

حکمت سیاسیه ده (absolutisme) اوله بر شکل ادارهیه ده نبرکه تدویر و نمشیت امورده هیچ بر شرطه رعایت ایتمز؛ حقوق امته ایستدیکی کبی تصرف ایلر. هیچ بر اعتراض، هیچ بر قید قبول ایتمز. خلاصه،

کینی بر اداره مستبده درکه بوکا (اداره مطلقه) دیرلر. ضدی - علی العموم - اداره مشروطه در. قرون اولاده بوتون حکومت عظیمه بو شکل اوزره مؤسس ایدی. یالکز یونان قدیم مدینتی و رومانك امپراطورلقدن اولکی جالی مستنادر. دور اخیر مدینتك بر مهم علامت فارقه سی ده شکل اداره ده واقع اولان تبدل مشروطیت پرورانه درکه نیجه نیجه انقلابات خطیره سایه سنده و عصرلر سورن بر مجاهده متادیه ایله ممکن اوله بیلمشدر. بو انقلاب عظیمك تحقیقی تسهیل و تأمین ایدن عوامل مهمه یی تدقیق ایتك تاریخ مدینتی - باشلیجه شروط و مؤثراتیله - تتبع ایتك دیمك اولور. بو نقطه نظرندن تکامل مدینتی تتبع و تدقیق ایدن بر صنف حکما و علما واردر. بونلر ادعا ایدیور که امر حکومتده اسکی شکل اداره نك تبدلی، کینی ویا تصادفی اولماشدر؛ ضروری اوله رق وقوعه کیشدر. دور انتباهك، دور اصلاحاتك و علی الخصوص علوم حقیقه دائره سنده واقع اولان ترقیاتك بو خصوصده چوق دخلی ابلمشدر. زیرا ترقیات علمیه، ذهن بشری عنعنات قدیمه و عقاید باطله بویوندور و غندن اطلاق ایتدکدن ماعداء، تطبیقات صنایعیه جه بر چوق انکشافاته دخی سبب محض اولویور. طبیعی درکه بو سائقه ایله مدینت مادیه الك اول تکمل ایتکه باشلیور. عینی زمانده احتیاجات دخی آرتیور. مالزمه حیاتییه یی ترتیب واحضار ایده بیلک اوغورنده میلیونلرجه انسانلر منحصر آ بر خدمت اجتماعیه وقف نفس و صرف عمر ایدوب کچینیورلر؛ فابریقه لر، بانکلر، شمندوفرلر، جماعتلر، قومپانیلر - حسب الضروره - تشکل ایدیور. دیمك که بو سایه ده (صنوف اجتماعیه classes sociales) تولد ایدیور و حیات عمومیه نك دوام و بقاسی ایچون الك ابتدائی فقط الك مهم والک مبرم وظیفه یی درعه ده ایتدیکندن طولانی، او صنفلر حیثتاً بویوک بر اهمیت قازانیور. بوکون مدنی بر مملکت، عمله، قومیسوئنجی، بویوک، کوچوک تجار، طبیب، اجزاجی، آووقات ودها بوکبی صنوفك خدمتندن مستغنی اوله رق یاشایه ماز. ایشته حیات اجتماعیه نك ادامه سنده پك مهم بر خدمتله مکلف اولان و جمهورنامی (یعنی اکثریت خلقی) تشکیل ایدن بو صنوف اجتماعیه - کندی آغیرلنی ایله، کندی قوتیله

Absolutisme

— بر حیثیت قازانه رق، حقوق سیاسیه یه ده نائل اولویور که (ده موقراسی) نك
مبدأی بودر وزمین استنادی ده اکثریتی تشکیل ایدن (صنوف مرتبه) نك
منافع حیاتیه سیدر . بونلرك حقوق طبیعی و اجتماعی سی ، اداره مستبده نك
معاملات کیفیه سنه قارشى طوره بیله جك قدر قوت و حیثیت کسب ایدنجه
مطلقیت اداره بقا بوله میور . فقط شوراسی شایان دقتدر که یالکز آمال
خیالپرورانه وهیجان حسیات ایله بو حیثیت اکتساب ایدیله میور . بر مملکتده
جدا صنایع و تجارت ایلر یله مش بولونمالی و اکثریت خلق امر معیشتده
کسب استقلال ایدیه بیله جك درجه سعادت مظهر اوله بیللمه لی در که تشبثات
احرارانه سنده موفق اوله بیلدین ؛ یوقسه هراختلال بر انقلاب حقیقی تأمین
ایده مز ! . حکومتك معاونت و حمایت محتاج اولیه رق کندی نه مه کی ایله
کچینوب یاشایه بیللمی در . بر ملت انجق او زمان مطلقیت اداره یه قارشى
قویه بیلیر . ایشته پك مهم اولان بوشرط معاشی ، حکمای حقوقیون کال
جدیتله نظر دقه آله رق بر دستور اولق اوزره عرض ایتش و (بر ملتده
جمهور ناس ، معیشتجه مستقل اولمازسه ، ملت ، اداره حر اوله ماز) دیمشدر .
اگر بودستور طوغرو ایسه ، تکاملات صناعیه نك وانکشافات تجاریه نك ،
استیصال و تأمین حریتده نه بویوک بر رول اوینادینی ، صراحتاً تعین
ایدیور ، دیمکدر . حکمت سیاسیه ده معارضه نيزك اك بویوک فیلسوفلرندن
اولان (سرهنری مین Sir Henri Maine) ، بومسئله اجتماعی نی لایقيله
تتبع ایتش وده مین خلاصه عرض ایتدیکم نظریه نی هرکسه - اك اول -
او بیلدیر مشدر . بر چوق متفکرین وهله فیلسوف مشهور (هربرت سپنسر
H. Spencer) بونظریه نی تماماً قبول ایتش و (سوسیولوژی) و حکمت
حقوقه دائر وجوده کتیردیکی آثار معتبره سنده (سرهنری مین) ك نظریه سنندن
ذره قدر آیرلمه رق بر چوق امثله تاریخیه ، وقوعات سیاسیه وحادثات
اجتماعیه ایله بو حقیقتی تأیید و تحکیم ایلشدر .

(سرهنری مین) ، جماعات بشریه ده (حال حرب état de guerre) ك
معیشت ، اخلاق و تشکیلات سیاسیه و اجتماعیه اك بویوک بر تأثیر اجرا
ایتدیکنی نظر دقه عرض ایدیور که بو کیفیت بوتون علمای اجتماعیون

عندنده مصدقدر : حتی (اقوام متفرقه نی) آتش وده میر ایله par le fer
et par le feu) یوغوروب اونلرك خلیطه سنندن بویوک ملتلی وجوده
کتیرن عامل اجتماعی ، سورکلی محاربات قدیمه در ؛ [دیورلر . میلادعیسادن
تقریباً بش عصر اول کلن (هراقلیت Héraclites) دخی بوفکرده ایدی .
و (حرب وضدیت هر شینك بابایی در) دیمکدن مرادی ، بوتون موجودات
عالمده حتی جماداتده بیله بر کشکش دائمی اولدوغنی و معنای حیاتك ده
بوندن عبارت بولندوغنی اکلاقم ایدی . (داروین) بونك فلسفه سنی تأسیس
ایتشد . (سرهنری مین) جماعات انسانیه ده معیشت اجتماعی نی ایکی صورت
اساسیه اوزره کورویور وهر برینه بر اصطلاح وضع ایدیور که تعمیم ایتشد .
برینه (régime militariste) ، دیکرینه (régime industrialiste)
دیور . بومدق ، ادعا ایدیور که دولت و بوتون وجود امت ، تهلیکه اضمحلاله
معروض قالیرسه ، قوی دشمنلرك تجاوزات استیلا جویانه سنه قارشى ، افراد
امت حقوق سیاسیه سنی ، و حتی حقوق اجتماعی سنی بوسبوتون ضایع ایدر ؛
حقوق طبیعی سنك بر قسمندن بیله موقتاً محروم اوله بیلیر . محاربه ده تأمین
موفقیت ایچون لابداولان (مرکزیت اداره Centralisation du pouvoir)
کرکی کبی تأسس ایلر . بالطبع حریت قالماز . سپنسر (عدالت Justice)
نام کتابنده ادعا ایدیور که بو کبی تهلیکه فوق العاده هنکامنده ، هر شیدن
اول وجود جماعتی ثلومدن قورتارمق اك محق اندیشه واک مبرم بر وظیفه
اولدوغنی ایچون ، مرکزیت اداره - موقتاً - مشروع عد ایدلمی در . اویله
زمانلرده ملت یکپاره اولمالی در . بالعکس غائله حرب بر طرف اولونجه ،
صلح ، طبیعتی ایله حریت و سعادت اعاده ایدر . چونکه زیاده سیله مصر فلی
اولان (régime militariste) چوق مدت دوام ایده مز ؛ زیرا اومصر فی
فیض صنعت و برکت تجارت تأمین و تضمین ایده بیلیر . بناء علیه صنعت ، تجارت
و زراعت کبی - صلح و صلاح حاله و حریت محتاج اولان - معاملات
اجتماعیه نك پك اوزون بر مدت عاطل و مضمحل قالماسی ممکن دکدر .
حیات اجتماعی نك باشلیجه شروطی حتی منابع فیض وقوتی بونلر در . حیات
شخصیه ده دوران ، ضعیف ودم ، فقیر اولونجه ، قدرت عضلیه و عصیه نصل

مضمحل اولویورسه ، حیات اجتماعی همچون ده حقیقت عینله اویله در . اومابع قوت توکته نجه ، اردولر یاشایه ماز . ایشته بوسبیلهدرکه صلح ایله برابر لوازم و شرائط مدنیت دخی کلیر . تجارت و صنایع عالنده یکیدن فعالیت باشلار و حقوق و حیثیت افراد بالضروره ، مظهر رعایت اولور . صنوف اجتماعی یکیدن وظیفه سنه صاریلیر . تشکیلاتی اکیال ایدر ؛ قوت قازانیر، حریتی اعاده ایدر و هر درلو معاملات کیفیه و اداره مستبدیه قارشی قویه بیلیر . ایشته (سرهنری مهین) ک و اوکا تماماً تابع اولان (سپنسر) ک بو خصوصده اساس اعتقادی بودر ؛ و بو اعتقاد اکثریت حکما طرفندن تصویب و قبول اولونمشدر . تاریخ مدنیت اثبات ایدیورکه بوتون ترقیات فکریه و مدنیه اوزون مدت دوام ایدن صلح دورلرینک محصول سعادتیه دره . (حکومت مستبدیه اداره سنده انکشافات مدنیه اولامشدر) ده نیلمیور . بالعکس اولدوغنه پک پارلاق مثاللر وار . هله صنایع نفیسه ، استبداد زمانلره بلکه ده موقراسی دورلرنده کی درجه سندن ده زیاد ترقی و تعالی ایتمشدر . (یالکز یونان قدیمی استثنای ایتلیر) ؛ فقط شوراسی محققدرکه حکومت مستبدیه زماننده دخی انکشافات مدنیه و ترقیات فکریه دائماً صلح زمانلرینه مصادفدر . خصوصاً بویوک فتوحاتی تعقیب ایدن (مدیدصلح دورلری) پک پارلاق در . بوفیضی (*impérialisme*) عطف ایدنلر خطا ایدیورلر چونکه اصل سببی صلح و استراحت و برکتدر . فتوحاتک غنائمی ایکنجی درجه ده قایلر و بلکه ضایعات حربی تلافی ایده مز .

ایشته (*industrialisme*) ک مطلقیت و مشروطیت اداره ایله مناسبتی بودر . ادوار قدیمه ده عموماً حکمفرما اولان شکل اداره بو (*industrialisme*) ک ترقیسی ، تعممی و تحکمی سایه سنده ده کیشیه بیلمشدر . (فلسفه قیم (*la philosophie des valeurs*) (بو تعبیره باقیکنز) ده نیلان سیاق نظرک کاشفی (آوه ناریوس *Avenarius*) ، تکامل مدنیته بویوک برول اوینایان اختلالات اجتماعی، آمال انسانیه ایله احتیاجات حیاتک موازنه سزلکنه عطفاً تعریف ایدیورکه یوقاریده بسط اولونان ملاحظات فلسفیه ایله بو تعریفک علاقیمی واردر . محققدرکه ترقیات مدنیه احتیاجاتی آرتدیریور

و شبه یوقدرکه اکثریت ناس غوغای معیشتده احتیاجات مبرمه سنی بیله تأمین ایده میور . حالبوکه آمالک وجدانلرده تولدی نه شرائط اجتماعی به ، نه حیثیه ، نه ده ثروته ، نه ده مرتبه شخصیه به باقیور . هر کسده و علی الخصوص چوق شیلردن محروم اولان اکثریت ناسده ده از یاده ودها شدتله حاصل اولویور . آوه ناریوسه کوره اختلاللر بوموازنه سزلکنک صارصینتی لریدر ؛ انقلابلر دخی اوصارصینتی لر نتیجه سنده کتله اجتماعی نک آلدینی یکی (موازنه وضعیتی) در .

Absolutisme

Absolutisme

Aesthetisher absolutismus	المانجه
Aesthetic abso'utism	انگلیزجه
Absolutismo Estetico.	ایتالیانجه

حکمت بدایع ، یعنی فلسفه صنعتده مطلقیت طرفدارانی بر عقیده مخصوصه اوزره تجلی ایدر . صنایع نفیسه ده (حسن) بحثک ، اک مهم واک اساسی مسئله فلسفیه بی تشکیل ایتدیکی معلومدر . شیمدی شو (حسن) دیدیکمز کیفیتک بر ماهیت مستقله اوله رق قبول ایدلسی و کندی کندینه قائم بر موجودیت مطلقه کبی تلقی اولونماسی ، (نهسته نیقده مطلقیت طرفدارانی) در . شواعتبار ایله حسن ، هر درلو شکل و صورتندن و کسوت مادیتدن عاری بر وارلق کبی تاقی ایدلش اولویور ، و عالنده کوزللیکی ادراک و حس ایده بیله جک بر فرد آفریده اولمادیفی فرض ایدلسه بیله (حسن) دیدیکمز بر حال و کیفیتک کندی کندینه و باشلی باشنه موجود بولونماسی لازمکه چکنه اعتقاد ایدیور ، دیمکدر . بونک صندی دخی (*relativisme*) یعنی (اضافیت حسن) طرفدارانی در . بو ایکنجی مذهب بدییی به کوره ، حسن دیدیکمز کیفیت محسوسه صرف (انفسی *subjectif*) بر ماهیتی حائر در ؛ و بناء علیه انحق بزم کبی قابل حس و ادراک اولانلرک کندی نفسلرنده حصوله کلن بر حالت روحیه درکه بعض اشایی خارجیه نک تأثیریه متحدث اولور و احتمالک رنگ و شکل و آهنگک حواسمز اوزرینه اجرا ایتدیکی بر تأثیر مخصوصه پیدای شعور ایدیشمز بزه بویله بر حس و یریور . بو اعتقاد

کوره ، مستقلاً موجود و بزم حسن و اعتقاد من خارجنده (حسن) نامنه
بروجود مطلق یوقدر و اوله ماز .

ایشته بوده اضافیت حسن طرفدار لرینک خلاصه اعتقادیدر . بودعوالر
یا لکنز صنایع نفیسه موضوعاته منحصر دکدر . حکمت اخلاق و حکمت
حقوق ده دخی مطلقیت و اضافیت طرفدارانی واردر ؛ و دعوالرینک شکلی
اساساً بردر . مثلاً اخلاق نامنه مطلق و مستقل بر حقیقت واری ؟ .. یا خود
خیر محض ، شر محض نامنه مستقلاً موجود بر شیلر واری ؟ .. عدالت
مطلقه واری ؟ .. یوقسه بوتون بو کیفیات ، معاملات بین البشریه دن طوغمش
نسبی قاعده لرك و رابطه لرك برر دستور مجردی اولمقدن عبارت می در ؟ .. کبی
مسائل ده اخلاقی ، عدالتی ، خیر و شری موجودات مستقله دن و یا خود
حقایق مجرد و ذاتیه دن عد ایتک (absolutisme) اولور . عکسنه اعتقاد
ایتک (relativisme) اولور . (absolu éthique) تعبیرینه باقیکنز ..
مشهور افلاطون کرك حسن ، کرکسه عدالت و خیر بختنده مطلقیت
طرفداری ایدی . حتی بو وادیده مطلقیت فلسفه سنک موجدی صایلیر .
بونقطه نظر دن افلاطونک مذهبیه (حقیقیه réalisme) ده نیلمشدر که معنای
تاریخیسی کله نك بو کونکی صورت تلقیسنه اویماز و تماماً ضد بر مضمون اخطار
ایدر . زیرا افلاطون بر (حسن مطلق) ، بر (عدالت مطلقه) ، بر (انسانیت
مطلقه) قبول ایدردی و ماهیات معقوله دن عبارت اولان بوشیلری حقیقه
و مستقلاً موجود ظن ایدردی . اونک ایچون بو اعتقادده (réalisme)
ده نیلمشدی . (بو کله یه مراجعت اولونه) .

Absolu (éthique) — فیلسوف هربرت سنسرك قولاندیغی بر
ترکیدر که مشهور اولمشدر . بو متفکرک بو تعبیردن مرادی ، اک عمومی
و نظری اولان (دستور اخلاقی) ایدی . زمان و مکانه ، احوال و ظروفه ،
تربیه و درجه مدنیته ، تشکیلات اجتماعی ودها بر چوق شروط خصوصیه یه
کوره اعتقادات و معاملات اخلاقیه ده اختلافات کورولویور که طبیعی در .
شوحاله نظراً بو خصوصیات ایله تعین و تجلی ایدن اخلاق انسانیه نك هیچ
بری ، عموم انسانیت ایچون (دستور العمل) اوله ماز . زیرا اخلاق خصوصیه نك

جمله سی ده اضافی در و بعض اعراض و اغراض ایله معلل در . بناء علیه بوتون
شو اخلاق مختلفه یی یکدیگرینه قیاساً مطالعه و تتبع ایتک و جمله سنده مضمون
و مکمون اولان حقیقت اساسیه یی کشف ایتک صورتیه بر دستور عمومی
بولمالی در که — لاعلی التعین — هر زمان و هر مکان ایچون ، هر ملت و هر فرد
ایچون بر مبدأ قویم و بر دستور العمل اوله بیلسین ! ایسته بودستوره و اونک
متضمن اولدوغی عقیده اساسیه یه سنسرك (absolute ethics) اخلاق مطلقه)
دیور و اونی (قسطاس خیر و شر critérium du bien et du mal)
اولمق اوزره تلقی ایلور . [اخلاقیون بو دستور به باقهرق اصلاح مغنیاته
چالیشه جقلری کبی واضع قانون دخی بودستورک مقتضای حکمندن قطعاً
آرلماق اوزره حرکت ایده جکدر ؛ و ایتلیدر !] دیور ؛ حاصلی ، کلاسیلیور که
سنسرك (général abstrait, idéal) بر دستور حقدنه مطلق تعبیری —
فکر بجه یا کلش اوله رق — قولانمشدر . علوم لساننده (رزن مطلق) ، (صفر
مطلق) تعبیرلرنده کی (مطلق) کله لرینک معناسی ینه اضافیدر . سنسرك دخی
او کله یی بویه قولانمشدر . (اخلاق معاملات ناسدن طوغمش : طاقم قواعد
معاشرتدر) ده ین سنسرك ، اخلاق مطلقه یی باشقه درلو اکلاویه مازدی . بناء علیه
کله یی فلسفی دکل علمی معناسیله قولانمشدر دیملی ز . او وقت یا کلش اولماز .
بوفیلسوفه کوره (اخلاق مطلقه) دستوری مکمل بر جماعت مخیله نك
معاملاتنده کشف ایده بیلیر . بویه بر جماعتک معیشت و معاملات عمومیه سنده
ایکی کینیت مهمه منظور اوله بیلیر ؛ اولاً : اویه بر جماعت کامله ده (خود
کامانه égoïste) اغراض ایله (دیگر کامانه altruiste) مقاصد آره سنده کی
ضدیت و نزاع تماماً بر طرف اولمش بولونملی در . اویه تضاد بولونماملی در .
ثانیاً هر درلو حرکت ، المدن آزاده بر ذوق تأمین ایده بیلملی در . (انسانی
ملك ، جهانی جنت) تصور ایتدکجه بویه مسموده ، غیف و کامل بر جماعت
بولونه میه جغنی سنسرك هر کسدن انی بیلیر . (الحاله هده اویه بر جمعیت واردر
ودنیانك فلان طرفنده در !) دیمک ایسته میور . اخلاق مسئله لرنده خط
حرکت می توجیه ایده بیلیمک ایچون بر (غایه خیالیه) بر (دستور مجرد)
کوسترمک ایستیور و بویکی شرطی ، اودستورک ارکان اصلیه سندن اولمق

اوزره عرض ایدیور. اخلاقیون، حقوقیون بویکی شرطی نظر دقه آلوب
هر زمان ایچون معیار اتخاذ ایتلیدر. دیور.

Absolu (idéisme) فیلسوف مشهور (بارکلی Berkeley) ک
مذهب فلسفی سنه ویرلش بر اسمدر. (تفصیلات ایچون idéisme)
سوزینه باقیکنز.

Abstraction تجریم ایتک Abstrait مجرد Abstraire تجریم ایتک Abstratcion

المانجه سی
انکلیزجه سی
ایتالیانجه سی
Abstrakt, Abgezogen.
Abstract,
Abstratto.

(Abstraction) لاتینجه (abs trahere) دن آلمش برکله در. معنای
لغویسی (چکوب آلق) (آیرمق) در. اصطلاح معنای کلنجه: برشیک
بعض اوصاف و کیفیاتی ذهناً آیروب مستقلاً ملاحظه ویا مطالعه ایتک،
اوصاف و کیفیات مذکوریه تجرید ایتکدر. بولکله نك معنای برقاچ درلو
تعریف ایدلمش ایسه ده تعریفات ممکنه نك جمله سنده ده اساس عینی عملیه
ذهنیه در؛ یعنی حقیقت حالده بر (کل مجموعی) تشکیل ایدن و بناء علیه
یکدیگرندن بالفعل انفکا کی ممکن اوله میان اوصاف و کیفیاتی و یا خود جواهر
واصرای بر بردن ذهناً آیروب ملاحظه ایتکدر. اکلاشیلیور که تجرید،
برشیی، بر حادته طبیعییه حقیقه و بالفعل عناصر اصلیه سنه تقسیم ایتک دکل،
اوشی ویا او حادته حقه حاصل ایتش بولوند و غمز (فکر معضل
idée complexe) ی ذهناً ارکانه آیرمقدر. یعنی فعلاً اشیایی دکل،
ذهناً مفهومات (notions) ی تحلیل ایدوب ارکانندن یالکنز برینی ویا
بر قسمی نظر اعتباره آلمقدر.

کارگاه طبیعته وقوعه کلن هر حادته باشلی باشنه بر (کل مجموعی un
tout compact) تشکیل ایدر بر (وقعه مشخصه un fait concret) در.
اوصاف و کیفیاتی مستقلاً مشاهده ایتک ممکن دکلدر. حتی بعض کیفیات
وارد در که اونلرک بر جواهر مادیدن مستقل اوله رق وجودی تصور بیله

اولونه ماز. نته کیم ماده نك بعض کیفیات اصلیه دن مستغنی اوله بیلیمسی دخی
تعقل ایدیله منر. مثلاً عالم حقیقته ماده نك مکندن، حرکتک کنلده دن،
شکلک جوهر دن، قوتک ماده دن انفکا کی کورولمش برشی اولمدینی کی تعقل
اولونه بیلیر بر شی ده دکلدر. ماده یی دوشونورکن ابعادی دوشونومه مک
اوله ماز. ابعادی ده مکانسز تعقل ایتک قابل اوله ماز. ثقلت و مقاومت
و حرکت بر ماده یی تعلق ایتدکجه قابل تصور دکلدر. حکمای اسلامک
و علی الخصوص منطقیونک تعیرنجه - ماده نك تصور ماهیتده بو عناصر
فکریه نك جمله سی ده داخلدر؛ واونلر یکدیگرندن غیر قابل انفکا کدر.
(تداعی association یه باقیکنز) مع مافیه حقیقت حالده غایت معضل، یعنی
روابط و علائقی اعتباریه غایت گرفت اولان حادئات طبیعییه تدقیق امرنده بر
سهولت اولق ایچون (شبکه حادئات Plexus des phénomènes) ده عینی
جنس دن اولان کیفیاتی - سائرلرندن قطع نظرله - تتبع ایتک ممکندر
واصولدندر.

(موضوعات علوم objets des sciences) ده اختصاص و تمایز و تدقیق
حادثانده (تقسیم اعمال division de travail)، ذاتاً بویوزدن وقوعه
ککش و بوتجرید سایه سنده در که معلومات بشر تنوع و ترقی ایتشدر. (تصنیف
علومه باقیکنز.)

سقوچیا فلاسفه مشهوره سنندن (دوگال استیوارت Dugald Stewart)
تجریدی بو نقطه نظر دن تلقی ایتش و تعریفده (تجرید، موضوع مطالعه منری
بسیطلشدیرمک ایچون یابدیغمز بر عملیه ذهنیه در که بزه معروض اولان
مرکباتی تحلیلدن عبارت قالیر) دیمشدر. تجریدک اک بسیط و فقط اک کنیش
معنای صحیحاً بودر؛ و تدقیقات علمییه ده باشلی باشنه بر (اصول méthode)
واسع تشکیل ایدر. مثلاً هندسه، کائنات ماده یی ده یالکنز (حیز étendue)
کیفیتی، (و خاصیات مکانیه propriétés spatiales) دن صاییلان اشکالی
و اونلر آره سننده کی نسب مختلفه یی بالخاصه موضوع بحث ایدینمش
و (جوهریت و مادیت substantialité, matérialité) مسئله لرندن صرف
نظر ایتشدر. کذلک (خاصیات تالیه propriétés secondaires) یی ده

قطعاً افعال ایشدر . اوسپله در که مثلا بر مثلثک ویا بر کره نك تحتەدن ویا ده میردن اولوب اولماسی مثبته ویا کروپته قطعاً تعلق ایدر بر مسئله اولدینی کی ، قیرمزی ویا بیاض اولماسنك ده اوشکللرک ماهیتله اصله علاقەسی یوقدر . حتی بوسبوتون ماده دن مجرد بر جسم تعلیمی اولسی اشکال مذکورە نك نسب ذاتیه سی ، قیمت و مساحه سی تعیین ایچون مرجعدر . کذلک فن ماکنه ، کتله ، ماده یی بر نقطه ریاضیه منجر قیلهرق یالکزر حرکتی هردلو اشکال و تبدلاتیله تدقیق و تتبع ایتکی موضوع بحث ایشدر . نته کیم حساب ، منحصرأ کمیات عددیه یی وارە لرندە کی نسب مختلفه یی تدقیق ایلر . حکمت ، حادثات طبیعیه ده یالکزر (تجلیات قوا manifestations de l'énergie) یی کیمیا ، انحلالات و ترکیبات ماده ده (نسبت عنصریه rapport des éléments) یی و مرکباتک یالکزر کیمیا نقطه نظرندن اوصاف مخصوصه سی تحقیق ایلر . الی آخره !.. حالوکه علومک بویله جنس جنس آیروب موضوع بحث ایتدیکي حادثات ، عالم حقیقده اوپله آیری آیری وقوعه کلیر و مستقلأ قائم اولور کیفیاتدن دکدر ؛ یکپاره در . بز اولری آیری آیری تالق ایدیورز دیمکدر .

فی الحقیقه تجرید ، ذهنزک ، دها طوغروسی آلات ادرا کمزک قابلیات طبیعیه سنددر . بزم ایچون برنجی درجه ده (وسائط علم moyens de connaissance) دن معدود اولان (حواس les sens) حقنده فیلسوف (لارومی کیر Laromiguière) (تجرید ماکنه سی) تعبیر تشبیه یی قوللانمشدر ؛ بوبرتشیه شاعرانه اولمقدن زیاده بر حقیقت صریحه در . زیرا حواسمزدن هربری کائنات خارجه ده انجق بر جنسدن اولان (سلسله حادثات chaîne de phénomènes) ی ادراک ایدە بیلیور . ذاتاً اوصورتله تگون وتعضو ایش ، اوقابلیتله وجود بولمشدر . (حاسه لامسه le tact) انجق (کیفیات ملموسه propriétés tactiles) و (حروریه calorifiques) یی احساس ایدیور . (باصره la vue) انجق (مبصرات sensations visuelles) ی ادراک ایدیور . (شامه sens olfactif) قوقولردن نفسمزی خبردار ایلور . الی آخره !.. حالوکه بو (مدرکات perceptions) ی یکدیگرینه

ارجاع ایتک احتمالی یوقدر . انسان ، کوزیله ایشیده مز ؛ قولاغی واسطه سیله ده قوقوطویه مز ، لذت آله ماز . قوقو دخی زنکه ، زنک ده صدایه هیچ بروجله بکزه مز . اکثریا تداعی سبیله بری دیکرینی اخطار ایدرسه ده ، طبیعه ینه آیری آیری کیفیتلردر . فقط بویله آیری آیری شیلر اولمالری (حد ذاتنده en soi) موجودات مستقله دن اولدقاری ایچون دکل در ؛ حواسمزک او حادثاتی آیری آیری یعنی تجریداً تلقی ایش اولمالرنددر . یوقسه بو (خاصیات جنسیه propriétés génériques) یی عالم خارجی ده مستقلأ کوروب تحقیق ایدە مه یز . دیمک اولویور که نفس الامرده برکل مجموعی تشکیل ایدن (عالم حقیقی le monde réel) ده حواسمز صحیحاً (خاصیات محسوسه propriétés sensibles) یی جنسلرینه کوره تجریداً ادراک وتلقی ایدیور . صوکره (مدرکه entendement) و (عاقله raison) مز ، او کیفیاتی ذهنزده (ترکیب synthétiser) ایدرک — خارجه ده (مشخص concret) برشینک وجودینه اینانق ایچون وجدانمز بر (اطمئنان conviction) الهام ایدیور .

بویله اولونجه تجرید ، اک طبیعی واک اساسی قابلیاتمزددر . (نظریه علم théorie de la connaissance) بحثنده برنجی درجه ده اهمیتی حازر اولان بومسئله یی ، آلمان فلاسفه معاصریندن مشهور (آدولف لانکه A.Lange) (تاریخ فلسفه ماده) نام کتابنک ایکنجی جلدنده کمال دقت وجدیت ایله مطالعه ایش و حواسمزک حادثات طبیعیه یی تجریداً تلقی و ادراک ایتیه سی کیفیتنه اسناد محاکمه ایدرک ، کائنات حقنده کی معلوما تمزک صرف نظری و تصویری اولسی لازمکله چکنی شدتله ادعا ایشدر . (استحضاریه représentationisme . باقیکزر .)

بونقطه نظرندن باقیدینی تقدیرده ، یعنی بوتون مدرکات حسیه مزک و بناءً علیه معلوما تمزک بالطبع (انفسی subjectif) اولدوغنی قبوله مجبوریت الوردیکی تقدیرده اشیائی آیری و کیفیاتی آیری شیلر مشکی دوشونمک البته طوغرو اوله ماز . چونکه (اشیا) دیدیکمز (موجودات متشخصه êtres concrets) دخی بو (سیاق نظر manière de voir) ه کوره

ماهيات معقوله دن عبارت قالير. ايشته بويله طوغرو دوشون (فلسفه انفسيه phil. subjective) طرفدارلری (تجريد) تعبيرينك اسكى تعريفنى براز تعديله مجبور اولمشلر؛ و: (مضمحل اولمادجه عناصرينه تفريقى ممكن اوله مایان بر ماهيتى ذهنأ پارچه لایوب عناصرينه آيرمق، تجريد ايتمكدرد) ديمشلر. بر مثال عادى ايله بومعنايى تصريح ايدلم كه حقیله اكلا شيلمادق بر نقطه سى قالماسين چونكه پك مهمدر. بز، ادراك ايد بيلديكمز هر شيشى حواسمك بزه عرض ايتديكى صورت اوزره بيله بيلورز. حد ذاتنده، نفس الامرده اوشيك نصل اولدوغنى قطعاً بيله مديكمز كې، باشقه قابليات ايله متمایز مخلوقات نظرند عینى شيشك نصل اولمى، نصل كورو مومسى لازمكه چكنه دائره اصلا معلوما تمز اولمق ممكن دكلدر. علممز اضافيدر. (اضافيت علم relativité de la connaissance باقكنز) بناء عليه (حقيقت اشيا la réalité des choses) يه دكل، انجق كیفیات اشيايه مطلع اوله بيلورز ديمكدر. احوالده بزم نظر مزده هر وجود مشخص، معقول بر ماهيتدن عبارت قالير. مثلاً (ماده matière) وفرضا كتاب ديدكمز زمان، كتله ايله مكان، ثقلت، ابعاد ثلثه، شكل، رنگ ودها بوكې خاصيات محسوسه نك هيئت مجموعه سنى، هپ بردن مراد ايتش اولورز كه بو علممز اوماده، او كتاب حقنده حاصل ايتش اولدوغمز بر فكر معضلدر. ايشته بوكا اصطلاحده (مفهوم notion) (بوكله به باقكنز!) ديرلر. بوفكرى مضمحل ايتدكجه او ماده نك خاصيات اصلیه سنى يكديكرندن آيره مایز. فی الحقیقه ده مین سويله نلديكى كې مكندن منز، ابعاد ثلثه دن مستغنى، شكل ورنكدن معرا بر كتاب تصور اولونه ماز. اويله بر ماده دوشونوله مز. ايشته بومفهوم مركبك يالكز بر عنصرى، مثلاً يالكز شكلنى، ياخود ثقلتى، ياخود كتله سنى ويا رنگنى آريجه مطالعه ويا ملاحظه ايدرسكه او عنصرى ماهيت كليه سندن تجريد ايتش اولورز. (حادثات مشخصه phénomènes concrets) يي بويله عناصرينه آيره رق انجق بر جنسندن اولان كیفیاتى موضوع بحث ایدن علومه - بوسيله - (علوم مجردة sciences abstraites) ده نیلمشدر. مثلاً (رياضيات les mathématiques) بوقيلدندر. كورولويور كه (تجريد)، اساساً (تحليل) دن باشقه

برشى دكلدر. اوندن طولاني اولسه كر كدر كه علوم مجرد نك (اصول méthode) ى اساساً (تحليلي analytique) در. بر چوق فيلسوفلر وعلی الخصوص (هربرت سبنسر) بو ادعاده در. علوم مجردده (تركيب synthèse) اصولده قولالينلير ايسه ده اساس دكلدر؛ سبنسرك ادعاسنجه انجق (vérification) ايچون، اصول تركيبه يه مراجعت اولونور. مع مافيه رياضيات عاليه ده تركيب واردرد. (méthode سوزينه باقكنز.) بعض متفكرلر (تجريد) ايله (حل و تفريق dissociation) آره سنده برفرق مهم كورولورلر كه شاين قيدرد. (بركل مجموعى) اوله رق موجوديتى ادراك اولونان بر شيشك مثلاً بر ميوه نك كندينه مخصوص شكلنى، رنگى، رايحه سى، طعمى واردرد. بو اوصافك هيئت مجموعه سى اوميوه نك مفهومى تشكيل ايدر؛ و بومفهوم ذهنده استحضار اولونجه اوميوه خاطره كلير. شمدى بز بو اوصافى آيرى آيرى دوشونه بيليرز. بوكا بعض متفكرلر تجريد ديمورلر. حل و تفريق ديورلر. فقط مختلف رنگلرك خصوصيتندن قطع نظر، يالكز على العموم (رنگ) كيفيتنى، ياخود على العموم شكل ويا رايحه كيفياتنى تصور ايدرسكه، بو تصور مز، بوسوتون مبهم ونامعين بر (فكرت مجردة idée abstraite) اولور. ايشته اصل تجريد بوايكنجى عمليه ذهنيه در كه ايكنجى درجه ده بر تجريد ديمكدر و بونك محصولى انجق (جنسى générique) بر فكر عمومى ويرير. چونكه شومئالمزده لاعلى التعيين (رنگ)، نه قيرمزى، نه صارى، نه ماوى، نه ده سياهدر. على العموم (لون) ديمكدر. بو تقسيمه طرفدار اولانلر برنجى عمليه ذهنيه ايله ايكنجى سنى آره سنده اهميتلى برفرق كوستريورلر، وديورلر كه (برنجى سنده، بر مفهومى عناصرينه تفريق ايتش اولويورز و نتيجه ده اوصاف اشيايى آيرى آيرى دوشونمش اولويورز. فقط اوصاف مذكوره يي بالتجربه تحقيق ايتك هنوز ممكندر. قيرمزى، صارى، ماوى رنگلرى بالتجربه تحقيق ايدر كورورز و يكديكرندن تفريق ايله بيليرز. كذلك مثلى، مربعى، دائره يي ده كوره بيليرز، چيزه بيليرز و بر بردن تفريق ايد بيليرز. بونلر هپ قابل ادراك و تقلدرد. لكن ايكنجى عمليه ذهنيه، اوصاف مذكوره نك خصوصيتنى ده

مضمحل ایدیور. و نتیجه ده غایت مهم بر فکر و ریور که نه بالتجربه تحقق ایده بیلیر، نه ده بر خیال ایله ذهنده صورت بوله بیلیر؛ مثلاً: علی الاطلاق (رنك)، (شكل)، (قو قو) کبی. زیرا اوصاف خصوصیه ایله معین اولمادجه نه بررنك، نه برشكل، نه ده بر رايحه حس ویا تصور اولونه بیلیر.

ایشته اصل تجرید، بوکبی افکار مجرده یه پیوسته اولان عملیه ذهنیه در. دیورلر. بو فرق مهم (عمومی général) ایله (مجرد) تعیرلرینك معالرنجه تشوشی موجب اولمش و هر مجرد اولان فکر، بر فکر عمومی میدر دکیدر؟ سؤالی غایت جدی مباحثاته میدان آچمشدر. (عمومی général) ه باق) (تصنيف علوم classification des sciences) بحثنده فیاسوفلرك تألیف فکر و نظر ایده مهملرینه باشلیجه بر سببده تجریدك بوایکنجهی معناسیله تلقی ایدلمه سی اولمشدر. (تصنيف علومه باق.)

انسانلرده بر قابلیت طبعیه اولان تجرید، حسدن صوکره باشلار و بناءً علیه ادراکدن صوکره کلیر. اولاً برشیلر حس ایتمی که اولنرك صوکره بعضیسنی، بعضیسندن آیرمق ممکن اولسون. (تعمیم généralisation) و (استدلال raisonnement) تجریددن صوکره باشلار. عملیه تجریده حافظه نك ده بویوك بر رولی اولدوغی محققدر. لسانك تجرید امرنده زیاده سیله دخلی اولدوغی ادعا ایدنلر بوسبوتون حقسنر دکلدرلر. فقط اك طوغروسی بو خصوصده کی خدمت مهمه سنه حصر نظر ایتمکدر. تجرید خصوصنده دكل، مجردات فکریه بی کمال صراحتله ضبط و قید و تعیین و تفریق خصوصنده لسانك پك بویوك و مستثنا بر خدمتی محققدر. لسانده فی الحقیقه پك چوق کلمات مجرد و وارد و بونلرك عددی مدنیت فکریه نسبتنده آرتار. تجریده و مجرداتده مراتب و درجات وارد. بر فکر دیکرنندن آز چوق مجرد اوله بیلیر.

مجردات فکریه یه، حقیقته وجود ویرمك، پك بویوك بر خطادر. تاریخ فلسفه همان بوجنسدن اولان خطیئاتك فهرست عمومیسیدر ده نیلسه مبالغه اوله ماز. بونك اك مهم مثالی افلاطونك، (ماهياتی) موجودات مستقله دن و (اعیان ثابته) دن عد ایتمه سی؛ قرون وسطی فلسفه سنك

قابلیات ذهنیه یی، (ملکات facultés) نامیله تشخیص ایدرك مستقل موجود وارلقلر کبی تلقی ایدلمه سی؛ اسکی حکمای اطبانك اخلاط و کیفیات اربعیه وجود و یروب صوغوغی، صیجانگی، رطوبت و یبوستی باشلی باشنه مستقل بر موجود خارجی ظن ایتمه سی کبی مشهور و تاریخی یا کلشقلردر. بو خطادن دقتله توفی ایدلمیدر.

لسانده (اسم مجرد Nom abstrait) تمیری وارد؛ انسانه نسبتله انسانیت کبی. قیرمزیه نسبتله قیرمزلیق، سرت برشیته نسبتله سرتلك کبی که بر طاقم کیفیاته آیریمجه شخصیت ویرمك دیمکدر. حسابده (اعداد مجرد)، موضوعی تعیین اولونماش بولونان عددلره دیرلر. یدی، طوقوز کبی. یدی غروش، طوقوز کنتی ده نیلیرسه (غیر مجرد) اولور.

In abstracto

بالتجرب، تجریداً مجرداً In abstracto

(۱) روبا لسانلرنده هب بولایینجه شکلی معتبردر.)

بو تعیر (in re) یعنی حقیقته و (in concreto) یعنی مشخص اوله رق) تعیرلرینه مقابل قوللانیلیر. بزده حکمای اسلام (نفس الامرده) ترکیبی همان دائماً (in re) لفظنه معادل اوله رق قوللانه کلشقلردر. (باسره) تعیری ده چوق کچر و بر شیئی هیئت مجموعه سیله و بالجمله روابط و علائقیله نظر اعتباره آلمق معناسنه کلیر که بوده تماماً (in concreto) معادلی در. (in abstracto تجریداً) بر محاکمه یوروتمك، - اصطلاح فلسفه ده، - بعض مبادی مفروضه و یا مسلمه دن بر طاقم نتیجه لر استخراج ایتمك و نتایج مذکورده نك نفس الامرده تحقق ایدوب ایده میه چکنه تقید ایله مه مکدر. حتی اونتاایج منطقاً صحیح و سالم اولسه بیله کائناتده تحقق ایتیه بیلیر. چونکه محاکمه مجرده ذه، بر چوق جزئیات اموردن صرف نظر ایتمش اوله جفی ایچون حسابیه آلمیان او جزئیات، قیاسدن استخراج ایدیلن نتیجه نك تحقنه حائل و مانع اوله بیله چك عوارض مخصوصه بی تشکیل ایدر. البته طبیعته وقوعه ککن حادثات، جزئیاتی اعتباریه تجربه مرکز احاطه ایده میه چکی درجه ده نامعدود و نامحصور و محاکمه مرکز تقدیر ایله میه چکی قدرده غامض و معضلدر.

بودرلو محاکمه لرك الك بارز خطا لرینی مثال اوله رق سقولا ستیق فلسفه سنك تعلیاتنده کوره بیلیرز . فقط لاعلی التعیین بر نمونه عرض ایدیم :
[ا کمل اشکال ، شکل دائره ویدر ؛ حرکت دائره ویه دخی حرکاتک
اک مکمل صورتی در ؛ اجرام سماویه اجسام مکمل در . بناء علیه بونلرک
حرکاتی ده دائره وی اولق لازمکیر .]

ایشده تاریخ علمده پک مشهور اولان بوقیاس یا کلش بر محاکمه
مجرده نك انی بر نمونه سیدر . بوراده اولامقدمات مسلم دکدر . چونکه
اشکالک اک مکملی دائره اولدوغنه دائر بر دلیل قطعی یوقدر . کذلک اجرام
سماویه نك، منحصر آ سماوی اولمزدن ناشی، مکملیتی ادا ایتک بر (دعوی
مجرد) در . بومقدماتدن چیقاریلان نتیجه ایسه عالم حقیقی ده قطعاً تحقق
ایده مه مش و بالعکس هیچ بر محرکک تام بر دائره اولدوغی کوروله مشدر .
اکلاشیلیورکه اجرامک تعین محرکنده برنجی درجه ده تأثیر اجرا ایدن
جاذبه قانونلری قطعاً نظر اعتباره آلمیه رق ده ها طوغروسی بیلمیه رک
محاکمه یوروتولش یعنی اوکی عوامل مهمه کلیاً اهاال ویا تجرید ایدلشددر .
بومقدمات، حقیقته مقرون اولمادینی ایچون چیقاریلان نتیجه دخی وقوع
حاله موافق دوشمه مشدر .

لسان عایدیه قوللانیلان (ادعای مجرد) تعبیری (In abstracto)
دیدیکمز طرز محاکمه یه توافقی ایدر ؛ چونکه نفس الامرده تحقق ایدوب
ایده میه جکی نظر اعتباره آلمیه رق یوروتولش عندی بر دعوا دیمک اولور .
مع مافی بوطر زده اجرا اولونان محاکماتک مطلقاً یا کلش اولماسی لازمکله
چکنه حکم ایدلمه ملی در . ریاضیاتده و حکمت طبعیه ده بوتون قانونلر بویله
تجریدی بر محاکمه نك نتیجه سی در . ذاتاً قانون [ایکی حادثه آره سنده واقع
برنسبت ثابت] دیمک اولدوغنه نظراً انجق مجرد بر حقیقت نسبی نك دستور
افاده سی اوله بیلیر . بناء علیه جزئیات اموردن صرف نظر ایدر و عوارض مختلفه
و ممکنه یی حساب آلاز . مثلاً معروف اولان قانون مخصوصی موجبنه ، ضیاء
قطعاً خط مستقیم اوزره هر طرفه انتشار ایدر . فقط حقیقت حالده ، ضیاء نك کامل
بر خط مستقیم اوزره انتشاری تحقیق اولونه بیلمش بر کیفیت دکدر . بوکاده سبب

اوقانونک نظری و مجرد اولماسیدر : منبع ضیا اوله رق بر نقطه غیر مادیه قبول
ایتمه سی و هیچ بر درلو (اعوجاجاته perturbations) سببیت ویرمیه جک
قدر (متجانس homogène) بر (محیط milieu) تصور ایلده سی ، الحاصل
عوارض ممکنه نك کافه سی حسابدن خارج طوته رق بعض مقدمات بسیطه
ومفروضه اوزرینه محاکمه یوروتومه سیدر . بناء علیه بوطر ز محاکمه دخی
مقدمات مفروضه و مجرد اوزرینه مستنددر ؛ قانون نامنه عمومی و ثابت
برنسبت تعینی مطلوب اولدوغی ایچون ، اونی عوارض ممکنه دن بالکلیه تجرید
ایتمک شرط اعظم در . فقط بوقانون همه حال بر محاکمه تجریدی محصولی اولقله
برابر اوتیه کی یا کلش دکدر . (قانون lois) باقیکنز .

عباره آره سنده (abstraction faite de) جمله سنه تصادف ایدلیدی
تقدیرده (دن قطع نظر) دیه ترجمه اولونملی در .

Abstraites - concrètes (sciences)

علوم مجردة مشخصه

تصنيف علوم بحثه مراجعت ایدیکز .

منع Absurde

Absurde

لاتینجه (ab surdum) دن کلشدر . عقلک صاغیر طاوران دینی یعنی
تعقل ایدمه مدیکی شی دیمکدر . یونانی جه اصلی (ἀλογον) غیر قابل تعقل در .
(ἀπορον) دخی ده نیر ایدی که (نامحل) ، یعنی (عقلده یری یوق)
دیمکدر . بزده بوکا (مستحیل) و (ممنوع) دیمشدر وایکنجی تعبیر ده ها
مشهوردر . فلاسفه اسلام امتناع کیفیتتی ایکی صورت اوزره تلقی ایتمش ،
وبرینه (امتناع عادی) دیکرینه (امتناع عقلی) دیمشدر . ایشه (absurde)
اصل عقلاً ممنوع اولان شیدر . عادتاً ممنوع اولان شیلره فره نکجه ده
(impossible) غیر ممکن (تعبیری ترجیح اولونه کلشدر که بز اصل
مستحیل دیرز . بوفرکک بویوک اهمیت و ایدر . زیرا بوکون بالفعل و بالتجربه
ممکن اوله میان برشی ، مطلقاً عقلاً ده ممنوع اولق لازمکمز . انجق شو
کوردو کمز و تحقیق ایتدیکمز شرائط طبعیه دائره سنده وقوعه کله میور

دیمکدر؛ یعنی اوشینک وقوعی احتمالی، او شرطلرک وجودی ایله غیر قابل توفیق بر کیفیت تشکیل ایدیور دیمکدر. یوقسه حدذاتنده ناقابل تعقل اولیه بیلیر. شو تقدیر کوره بوسبوتون باشقه شرطلر تحتده، اوکیفیتک احتمال وقوعی عقل تصور ایده مز دیمک چیقماز. مثلاً جیوه دیدیکمز ماده نك بالجله مرکباتی انسجه عضویه یی تخریب ایدر. بناءً علیه بالفعل احتمالی یوقدرکه بر انسان ویاخود هر هانکی بوجود عضوی بودرلو مرکبات ایله تغذی ایده بیلسین؛ حتی جزئی بر مقدارینی تناول ایتسین ده بهمه حال تلف اولماسین!!.. کیفیت تجربه ثابتدر وبرتک استنامی کورلمه مشدر بناءً علیه حیات عضویه یی بوماده لرله توفیق وادامه ایتک ممکن دکلدرد؛ دیمکده حقمز واردرد. فقط بوکیفیت حد ذاتنده ممتعاندن ده دکلدرد. چونکه بنیه عضویت باشقه درلو ترتب ایتش بولونسه یدی و فرضاً جیوه دیدیکمز ماده، کلس وپوتاس کی انسجه عضویه نك عناصر لازمه سندن اولسه یدی، او وقت، جیوه مرکباتی، عضوی تخریب و حیاتی افنا ایتدکن ماعداء، ادامه حیات ایچون لازم بر غذا اولوردی. کذلک، کونش اطرافنده شرفدن غریبه حرکت ایدن کره ارضک، عکسنه حرکت ایده بیلیمسی ممکن دکلدرد، مع مافیه عقل بویه بر حرکتی تصور ایده بیلیمکدن عاجز اولمادیغی ایچون، بوکا (ممتع) ده یه میز. حد ذاتنده تعقل اولونه ماز بر حرکت دکلدرد. فقط (درد ضلعی مثلث)، ممتع در؛ زیرا مثلث انجق اوچ ضلعی بر شکل هندسیدن عبارت اوله بیله جکی ایچون، درد ضلعی اوله بیلیمسی شکلک ماهیت ذاتیه سیله متناقض و بناءً علیه ممتع التعقل در. ذهن بویه برشیئی قطعاً ادراک ایده مز. نته کیم ابعاد نلکدن محروم بر مکان، حیزدن مستغنی بر ماده، مکندن مستغنی بر حرکت دخی قابل تصور و تعقل اوله مادیغی ایچون ممتعاندندر. بر شیدک عینی زمانده هم وار همده یوق اوله بیلیمسی ده بو قیلدن در.

شو مثاللر ایله تعریفات واقعه دن اکلاشیلیورکه (ممتع)، حد ذاتنده غیر قابل تعقل اولان بر شیدر؛ اونک ماهیتی تشکیل ایدن ارکان وعناصر فکریه یکدیگری پک صریح و واضح بر صورتده نقض وافنا ایدرده اونک



ایچون ذهن اوله برشی دوشونه مز. کورولویورکه بوتناقض ذاتی نك صری اولماسی ده شرطدر. چونکه پک چوق فکرلر واردرکه حدذاتنده ممتع اولدتلری حالده ارکان اصلیه لری اره سنده کی تناقض اساسی صریح و دفعه مشهود اوله مادیغی ایچون اونلرک ممتع اولدیغی درحال اکلاماق قولای دکلدرد. بلکه بوامتناع ذاتی، محاکات منطقیه ایله استدلال واثباته محتاجدر. برشی، ممتع وصفنه شایان اوله بیلیمک ایچون، تصور ماهیته مانع اولان تناقض ذاتی یکدن ذهنه چارپمالیدر؛ یعنی (بدیهی évident) اولمی در.

اصطلاحده (Réduction à l'absurde) ویاخود (Démonstration par l'absurde) تعیرلری مشهوردر؛ و بر طرز احتجاجک اسمیدرکه بر دعوا حقنده طوغرودن طوغروه اقامه برهان ایدیله جکنه، اودعوانک نقیضی اله آلوب امتناعی اثبات ایتک و بناءً علیه بالواسطه دعوانک صحتی تحکیم ایتک یولی در. اونک ایچون احتجاجک بودرلوسنه منطقیون اسلام (اثبات بالنقیض) دیمشلدرد. فی الحقیقه نقیض قضیه نك ممتع اولدیغی اثبات ایتک، دعوائی - انجق بالواسطه - اثبات ایله مکدر. بوقاعده یی اک اول هندسه دعوالرینه تطبیق ایدن، مشهور (اقلیدس) اولمشدر. حتی (کتاب اقلیدس) ک (آلتنجی قضیه) سی بو طرز احتجاجک اک ای نمونه سی اولق اوزره مشهوردر. آیریجه شایان دقتدرکه، متعارفه قیلندن اولان قضایانک براهین منطقیه ایله طوغرودن طوغروه اثباتی قابل اولمادیغی ایچون، (اثبات بالنقیض) طریزه احتجاج اصولی ضروری کورولمشدر ده نیله بیلیر. (démonstration) ه باقیکنز.

Académie

آفاده میا Académie

المانجه Akademie

انکلیزجه Academy

ایتالیانجه Accademia

(آقاده می) یونان قدیمده (آتنه athènes) ده بر (gymnase) یعنی ادمان یری) ایدی. اوراده آتنه کنجلی (ریاضات بدنیه gymnastique)

اجرا ایدرلردی . بوباغچه، مشهور قهرمانلردن (آقاده موس Academus (Ακαδῆμος) نامنه اضافله، اويله تسمیه اولونمشدی . بالاخره فیلسوف شهر (افلاطون Platon)، شاگردلرینی دائماً اوخلده طوبیایه رق درس ویرمکی عادت ایدیمش اولدینی ایچون، اوراسی عادتاً بر (مدرسه) اولمشدی .

دها صوکره لری افلاطونک تأسیس ایتدیکی مسلك فلسفی به بواسم علم اولدی وپیرولرینه دخی (آقاده می سیهن académiciens) ده نیلدی . آرتق تعبیر مذکور بو حیثیت معنا ایله تاریخ فلسفه به کچوب اصطلاحات مشهوره صیره سینه کیردی . شمدی علی الاطلاق (آقاده می) دینلیدیکی زمان، پارسده کی (انجمن دانش) خاطره کلیر ؛ فقط تاریخ فلسفه ده، افلاطوندن (آنتیوکوس Antiochus(d'Ascalon)) ده قدر امتداد ایتک اوزره - درت عصره شامل -

بردور فلسفی آکلاشیلیر . مع مافیه بودور فلسفی، عینی اعتقاداتک تحکمی، عینی مسلکک بلا فاصله دوامی دیمک دکدر . کرک اهمیتی، کرک احکام و اصول متمایزه سی اعتباریله یکدیگرندن آز چوق فرقلی بر طاقم مسالک فلسفه، آقاده می تعبیریله علاقه داردر . ا کلاشیلورکه بوتعبیر، تدریسات و تعلیمات واقعه نك ماهیت فلسفه سینه رعایتله دکل، بر موقعک اسمنه نسبتله وضع اولونمشدر . صوکره - افلاطونک مذهبه و تعلیماته موافق اولسون اولاسین - واستاده ادعای منسوبیت ایدن فرق متفکرینه، علی العموم، (آقاده می سیهن) دیمک عادت اولمشدر . بناء علیه بوتعبیرک حیثیت معناسی صرف اعتباریدر . ترقیات فکریه تاریخنده انجق بردور مخصوصه اشارت ایدر . بعض مورخین فلسفه، اوچ آقاده می قبول ایدیورلر ؛ یعنی آقاده می تعبیرینک احاطه ایتدیکی اودرت عصرلق دور فلسفی نی - بربرندن ممتاز -

اوچ مدرسه به تقسیم ایدیورلر . برنجیسی افلاطونک آقاده می سی ؛ ایکنجیسی (آرکسیلاس Arcésilas (de Pritane) ککی ؛ اوچنجیسی ده (قارنه آد Carnéade (de Cyrène) و (قلیتوماق Clitomaque (de Carthage))

ایله شهرت بولان مدرسه در . بر قسم منقدرل دخی (قارنه آد) دن صوکره کلن (فیلون Philon de Larysse) و (قارمید Charmide) ک تعلیماتنده احکام و اصول اعتباریله بر صفت متمایزه کوردکلرندن، بودوری، بربردننجی

آقاده می عدایتمک ایستیورلر . نته کیم دیگر بر قسم مورخین دخی (آنتیوکوس) ک تدریساتی ایله بر بشنجی آقاده می به وجود ویریورلر .

هر حالده افلاطون واونک مذهبه منسوبیت اعتباریله بوتعبیرک حیثیتی تعیین ایتک لازم کلیرسه انجق (برنجی دور)، آقاده می عنوانه استحقاق قازانه بیلیر . بودور افلاطون ایله باشلار، واستادک تعلیماتندن قطعاً آیرلیان (قسه نوقرات Xénocrate (de Chalcédoine) و (سپوسپ Speusippe) که آتنه لیدر و افلاطونک یکنی در ؛ ایله دوام ایدر . بو حقیقی و صادق فلاطونیلردن صوکره کلنلر، حقیقته افلاطونک وارث غیر مشروعی ایدیلر .

زیرا : (عقل بشرک، حقایق اشیا به کسب اطلاع ایدوب ایده میه جکی) نه دار le doute et la certitude مسئله سنده ؛ (افلاطونک اعتقادی و تعلیماتی هر درلو شبهه دن بری قاله جق درجه ده صریحدر . استاد، (یقینون dogmatiques) دن ایدی : [حقایق اشیا به مطلع اولق، انسان ایچون ممکندر ؛ فلسفه نك غایه سی وفلسوفک وظیفه سی انجق بودر .] ده نیلردن ایدی . [prototype, entité, idée, platonisme, dogmatisme سوزلرینه باقیکنز ؛]

حالبوکه برنجی آقاده می دن صوکره کلنلر (احتمالیه probabilisme) مذهبی ترویج ایدرک افلاطونک تعلیماته رعایتسزک کوستردیلر ؛ صوکره اونی بوسبوتون ابطال ایلدیلر . خلاصه افلاطون واونک تعلیماته حرفیاً اتباع ایدن برنجی آقاده می منسوبینی بر (حقیقت ذاتیه) به اینانیر، واکا کسب اطلاع ایده بیلمک امکانه ده اینانیردی . حالبوکه ایکنجی آقاده می باشلار باشلاماز، او حقیقت شبهه به دوشورولدی : [حقیقت یوقدر . وار اولدوغی فرض اولونسه بیله اوکا مطلع اوله بیلمک، بز، انسانلر ایچون ممکن دکدر . بناء علیه بزم ایچون هیچ بر حقیقت یوقدر . اولسه اولسه هرشی (مشابه حقیقت) در . بر بریله ضد تقیض اولان شیلر بیله عینی درجه ده حقیقه بکزر . اويله اولونجه هرشی، انجق (احتمالی probable) در . ادعاسی ایکنجی آقاده می دن اعتباراً ک مهم دستور حکمت اولمشدی .

شاعر مشهور (عبدالحق حامد) بکک شومصر اعلری ایکنجی آقاده می اربابنک،
یعنی (احتمالیه) مذهبک دعواسنه تماماً توافق ایدر :

سیان کبی، بیلمه مکله بیلیمک ؛
قارداشلردن زیاده بکنزر،
بکدیکرینه یالانله کرچک (*)

تاریخ فلسفه ده مضبوط و معلومدرکه، مشهور (سقراط Socrate) ایله
(سوفسطائیه les sophistes) آره سنده تحدث ایدن (شک و یقین دعواسی)،
(مبحث علم épistémologie) ساحه سنده سورکلی مناقشاتی موجب
اولمشدی. زمانزه قدرانتقال ایدوبده حالا قطعی بر نتیجه یه پیوسته اوله مایان
بومعارضات فکریه، دها اووقتلر (فلسفی فرقه لر) ک وضعیتنی لایقوله تعیین
ایتمشدی. ایکنجی آقاده می دورنده (یقینون مدعاسی la thèse dogmatiste) نی
کودنلر (رواقیون les stoïciens) [بو تعبیره باقیکنز !] دیه مشهور
اولان فرقه اربابی ایدی. معلوم اولدوغی اوزره بونلر، رواقیه مذهبک
واضعی (زینون Zenon) ک پیرولری ایدیلر. بونلر مقابله سنده - بالطبع -
(حسبانیون les sceptiques) دخی وار ایدی که اصل (ارباب شک)
بونلردر. واقع اولان مناقشات شدید و مدیده سایه سنده - آرده مختلف
فیه اولان - مسئله نک موضوعی بر تعبیر وجیز ایله ضبط ایدلش اولدی،
واوشکلده بزلره قدر انتقال ایتدی :

بو حادثات عالنه هرایکی فرقه حکما دخی (فانتاسیا Phantasia) دیمکده
اتفاق اوزره بولونویوردی. بولفظک معناسی (کورونوش) یعنی (phénomènes)
دیمکدرکه (ظواهر مشهوده) مقامنده قوللانلشدر. شیمدی، بو (فانتاسیاء
بوکورونوش، بو حادثات) عالنک حقیقته عقل بشر - هر نه وجهله اولورسه
اولسون - مطلع اوله بیلیرمی؟.. اوله مازمی؟.. ایشه دعوانک اساسی و طرفین
آه سنده جریان ایدن مناقشات فلسفیه نک دستوراستادی، بوسوآلک متضمن
اولدوغی مسئله ایدی. اوزمانلر، (رواقیه stoïciens) حکماسی (بو حقیقته

(*) بومصر اعلر، (مقبر) نامنده کی اثرنده مندرجدر.

مطلع اوله بیلیرز !) دیه ادعا ایدیورلردی ؛ و (fantaisie cataleptique)
(Φαντασία Καταληπτική) دیدکلری بو ایدی که بو ترکیبده (cataleptique)
لفظی (ممکن الاطلاع یعنی قابل تیقن) دیمکدر. رواقیونه معارض اولان
ایکنجی آقاده می اربابی ایسه، بو (فانتاسیایعنی عالم حادثات) ک، (acataleptique)
اولدوغنی شدتله ادعا ایدیورلردی یعنی (غیر ممکن الاطلاع)، غیر قابل
تیقن بر (معما) اولدوغنی سویلیورلر و بودعوائی درلو درلو دلیللر ایله
اثباته چالیشیورلردی. بو اعتقاد، زمانزده (آغنوستی سیزم agnosticisme)
فلسفه سنده منجر اولمش و صرف مابعدالطبیعیات دائره سنده رد و ارجاع ایدلشدر.
(agnosticisme لفظنه باقیکنز !)

ایکنجی واوچونجی آقاده می نک فلسفه مخصوصه سنده اصل اولان صفت
کاشفه و خصوصیت ممتازه، (علم مطلق) طرفداری اولان (یقینون) ایله
(شک مطلق) کردابنه دوشن (حسبانیون) فرقه لری آره سنده متوسط بر
وضعیت آلمش اولمسیدر. افلاطونک ایلك آقاده میسی (یعنی تعبیر معروفی اوزره
اسکی آقاده می la vieille académie) (rationaliste) ایدی. معقولات
مجرده یه اینانیردی. حواسک شهادتنه قارشی شبهه ایتمکله برابر، فلاطون و اتباعی
یقینونندن معدوددر. حالبوکه ایکنجی واوچونجی آقاده می مؤسسری و حقیقی
پیرولری، هم یقینونه، همده حسبانیونه عینی شدتله معترض ایدیلر. حقیقت اشیایه
مطلع اولمق دعواسنده بولونان یقینونک (وبالخاصه Zenon زینون و طرفدارلرینک)
شو مغرورانده ادعایری رد ایتدکلری کبی، کندی وارلقندن بیله تردد
ایده بیله جک درجه ده شبهه یه دوشن مشهور (پیرون Pyrrhon) طرفدارلرینک
طورغریبنی ده طبع سلیمه قارشی باطل بدیهی کورویورلر، و حیات شخصیه
و معاملات اجتماعیه مقتضیاتیلده غیر قابل توفیق بولویورلردی. بناءً علیه
اوکاده عینی قوت و شدتله اعتراض ایدیورلردی. اونک ایچوندرکه ایکنجی
آقاده می نک اک مشهور استادی (آرکه سیلاس Arcésilas ؛ قبل المیلاد ۳۱۶-)
(پرونیه Pyrrhonisme) علیه مناقشاتنده دوام ایتدیکی کبی، کندی
معاصرری و رواقیونک اوزمان، اک مشهوری اولان (تیمون Timon) ایله
طرفدارانه قارشی - کمال مهارتله - توجیه اعتراضات ایدیورلردی. مدعاسی،

خلاصه‌الخلاصه شوکا منجر اولورکه : « هیچ بر خصوصه یقینی بر علممز یوقدر. فقط کندیمزدن شبههیه دوشمکهده مجبورت یوقدر. بیهیلدیکمز برطاقم حادثات وار؛ لکن اونلرکهیچ بری بر حقیقت ثابته عرض ایتیمور. اونک ایچون هرشی ، - اولسه اولسه - (احتمالی) در. »

بو (احتمالی *Tò πιθανόν*) تعیرینی (آرکهسیلاس) وضع ایتشدی که صوکره‌لری ، ایکنجی آقاده‌می مذهبک نقطه استادی اولق اوزره مشهور اولدی . ایشته افلاطونیلردن صوکره کلن آقاده‌می نک اک اساسلی صفت کاشفه‌سی بودر؛ یعنی (احتمالیه *probabilisme*) مذهبی در. [تفصیلات ایچون بوکلهیه باقیکنز !]

آرکهسیلاسیک وفاتندن صوکره آقاده‌می ده درحال بویوک بر آدم یتیشه‌مدیکندن ، مدرسه‌نک حیاتی ، برمدت ، پک سونوک کیندی . لکن تقریباً ایکی بطن صوکره (قارنه‌آد *Carnéade (de Cyrène)* قبل‌المیلاد ، ۱۲۵ - ۲۱۵) ظهور ایدیورنجه آقاده‌می ، بوسفر فوق‌العاده پارلادی ؛ و اوچونجی دورینی فتح ایتش اولدی .

(قارنه‌آد) ک جدأ بویوک بردهای جدلی‌سی واردی : ترتیب‌اعتراض و اقامه برهان معرفتده پک‌ماهر و فطین برزکا ایدی . الزام خصم ایچون ، همان دائماً (قیاس‌مسلسل *Sorite*) ی [بولفظه باقیکنز !] ترجیح‌ایدردی . بوفلسوف احتمالیه مذهبک حقیقی ناظمی و اک‌موفق مروجی در. بومذهبک اک شدید خصم طبیعی‌سی اولان رواقیونه قارشی ، (قارنه‌آد) دخی - اسلافی کبی - شدتی بر مجادله آچش و اونلرک مبنای اعتقاداتی رخنه‌دار ایلشدی . اک فطین و اک‌قوی دلیلی : (حواسک علم‌یقین افاده ایده‌بیلیمه‌سی) ادعاسنه قارشی توجیه ایتدیکی صورت تعریضدر. (قارنه‌آد) ، (مدرکات سلیمه و صحیحه ایله غلطات حسیه آره‌سنده قطعی و معین بر حد فاصل اوله‌مادیغنی) اساس مدعا اتخاذ ایدرک ایلری سورمش ، و آرده درجات نامتناهی اولدوغنی و او یله اولماسی ایجاب ایده‌جکئی اثبات ایچون بویوک بر غیرت و هله فوق‌العاده بر فطانت و مهارت ابراز ایلشدی . بوتون مقصدی ده (تحصیل یقین *acquisition de la certitude*) دعواسنده ، (مدرکات

حسیه *perception des sens*) نک سلامت و حقیقته استناد ایدن رواقیونک بو خصوصه‌ده کی اعتقادی تشکیک ایدرک ، فلسفه‌لرینک نقطه استادی ییقمق‌دن عبارت ایدی . دعوائی بوزمین شبههیه نقل ایتدکن صوکره (حقیقی باطلدن قطعاً تفریق ایده‌بیلیمک ایچون الزم اولان) قطاس *critérium*) غائب اولویوردی بناء علیه حق و باطل بر برینه بکزه‌مکدن قورتوله‌میوردی . اوحالده دخی بودعواده ویریه‌بیله‌جک حکم ، احتمالات دائرة‌سنی آشه‌مازدی ، که بوده قارنه‌آدک اساس ادعاسیدر . بونی حقایق عقلیه‌ده تطبیق ایدرک اونلری ده تشکیک ایتشدی . [بویله بر حال تردد اوزره یاشامق و احتمال ایله حکم ایتک حیات عملیه ایچون موجب مهالکدر !] دیه واقع اولان شوجدی اعتراضه پک کوزل حتی پک طوغرو بر جواب ایله مقابله ایتش و : [حیات عملیه‌ده سائق حقیقی ، ارادتدر ؛ احتیاجات آنیهیه کوره انسانده حاصل اولان (میل) در. اوکافی ! .. انسان او میلک اقتضاسنه کوره حرکت ایدر .] دیمشدی . یعنی زمانمز لسانجه ایضاح ایدیلیرسه میل غریزی (سوق طبیعی !) ی ، اعمالده سائق حقیقی عد ایتش اولدوغنی اکلاشیلیر . [تفصیلات ایچون *probabilisme* تعیرینه باقیکنز !]

(قارنه‌آد) دن صوکره (قلیتوماق *Clitomachus*) کلدی ؛ فقط استادی‌نک عقائد شخصیه‌سنی قید و ضبط ایدوب عینیه تعلیم ایلدی . اوکا هیچ برشی علاوه ایده‌مدی . آقاده‌می نک انخطاطی بوتارینجندن باشلار . بوندن صوکره (قارماداس *Charmadas*) ، (مه‌لانختوس *Melanchtus* *(de Rhodes)*) ، (متروودور *Métrodores (de Stratonice)*) کبی بعض حکما کلمش ایه‌ده بو انخطاطه چاره ساز اوله‌ماشدر و آقاده‌می نک ضیای عرفانی سونمشدر . بر آز ده‌ا صوکره کلن (فیلون *Philon (de Larisse)*) و هله (آنتیوکوس *Antiochus*) آقاده‌می نک مسلک متخذندن آیرلقدن ماعدا رواقیونه - یعنی آقاده‌می نک اک مدهش تاریخی دشمنلرینه ! - بیه التحاق ایتدیلر و نهایت ، احکام اساسیه‌لری اعتباریه متناقض اولان مسالک معروفه‌ی ده تألیفه قالدیلردی . بناء علیه بودور انخطاطی آقاده‌می نک دوامی

کبی قبول ایدوبده (دردنجی) و (بشنجی) آقاده می یه وجود ویرمک
یا کلشدر . آقاده می نک فلسفه مخصوصه سندن غافل بولونمقدردر .

عروضه Accident

الماتجه	Accidentz = Zufällig
انکلیزجه	Accident
ایتالیانجه	Accidente

Accident

آرسطونک وضع ایتیش بولوندوغی اصطلاحات معروفه دن اولان بولمکنک
اصل یونانی سی (Συμβεβυκός) درکه ساده تورکجه (اولاغان) شی معناسه
کلیر ؛ یعنی عارض اولان ، واقع اولان شی دیمکدر . بناء علیه وقوعی ،
(واجب nécessaire) ، دائمی و (ذاتی essentiel) اولمایان شیر (عرضی) در .
فرنکجه سی ، لاتینجه (ad-cedere) دن کلشدر ؛ دوشمک دیمکدرکه
عربجه ده (وقوع) کله سی عینی معنایه موضوعدر . بونک مقابلی ، مابعدالطبیعیات
لساننده (جوهر substance) و (ذات essence) در . منطق ده (ذاتی
essentiel) و (واجب nécessaire) در . برشیک تصور ماهیتده اساساً
وذاتاً داخل اولان واو ماهیتدن انفکاک کی تمتع بولونان کیفیات اصلیه یه
(ذاتی) دیرلر . بونلردن ماعداسنه (عرضی) دیرلر . بناء علیه اعراضک
وجود و عدمی برشیک ماهیت ذاتیه سی ده کیشدیره مز . مثلاً ماهیت انسانی یه
نسبتله (یعنی منطق نقطه نظرندن انسانک حیوان ناطق اولماسنه کوره !)
سیاه ویا صاری صاجلی ، سیاه ویا مائی کوزلی اولمق ، ویا خود قاعد ویا قائم
بولونمق کبی احوال و کیفیات (اعراض) دن معدوددر . چونکه انسانک
تصور ماهیتده اوکی کیفیاتک قطعاً دخل و تأثیری یوقدر . فقط (کیفیات
ذاتیه) بویله دکدر . زیرا برشیک ماهیتی تشکیل ایدن اصل اونلردر .
طبیعت انسانی یه نسبتله قابلیت تعقل و منطق کبی . شخصیته نسبتله حفظه کبی .
آرسطو ، بو (عرض) تعبیری هان داتماً (جوهر = substance = ΟυσΙΑ)
مقابله سنده ذکر و استعمال ایده کلدیکی ایچون بعض معاصر متفکرلر آرسطونک
(جوهر) نی (وجود محض) کبی تلقی ایتیشلر و (عرض) تعبیری ده

بوکونکی لسان فلسفی نک (حادثه phénomène) لفظنه ، معنایه معادل
طوتمشدرکه یا کلشدر . فلاسفه معاصریندن و منطقین مشهوره دن متوفی
(پروفسور بهین Professor A. Bain) ودها بر چوق امثالی بو خطایه
نظر دقتی جلب ایله هر کسی تنیه ایتیشلردر .

آرسطونک (جوهر) ی ، هر درلو کیفیاتدن عاری بر (وجود صرف)
دکل ایدی . کیفیات اصلیه سیله قائم برشی ایدی . بو کیفیات ذاتیه ، هیئت
مجموعه سیله متصور اولونجه ذهنده ، اوشیک ماهیتی تشکیل و تمثیل
ایدردی . برشیک بویله بالجله اوصاف اصلیه سی جامع اولان (فکر معضل
idée complexe) اونک ، نوعاً ، (وجود ذهنی être rationnel) سی
اولش اولوردی که - منطق اصطلاحنجه - ماهیتی دها طوغروسی مفهومی
بودر . (idée, notion سوزینه باقیکنز !)

بناء علیه سقولاتیق فلسفه سنده علی العموم و منطقده بالخصوص مهم بر
حیثیتی حائز اولان بولفظی ، بوکونکی فلسفه لساننده عینی درجه ده مهم
اولان (حادثه phénomène) کله سیله بر طوتماملی در . برطوتانلر بویوک
بر خطایه اوغرارلر و طوغرودن طوغری یه سقولاتیق کریوه سنه دوشرلر .
بوکون ، محسوس و مشهود اوله بیلن هرشی (حادثه) جنسنددر . ایسترماده ،
ایسترسه قوت نوعندن اولسون ؛ ایستبر جوهر مفروضک کیفیات ذاتیه سندن
معدود اولسون ، ایسترسه اولماسین ! شو ایضاحه کوره آرسطونک (عرض)
لفظندن منقهم اولان معنائک نه قدر باشقه برشی اولدینی صراحتاً تبیین ایدر .
(phénomène لفظنه باقیکنز .)

زمانمز فلسفه سنده جوهر و عرض بحثی کلیاً متروکدر . یالکیز (عرض)
کله سی ، (منطق صوری Logique formelle) (بو تعبیره باقیکنز !) ده
اصطلاحات مشهوره دن اولمق اوزره حالا معتبردر . (مقولات عشره
Les dix catégories) (بوکله یه باقیکنز !) دن بری جوهر ماباقی طوقوزی
اعراضدر . سقولاتیق فلسفه سنده (جوهر و عرض) کله لری پک مهم بر
موقع اشغال ایتشدی . جوهر ، کندی کندینه قائم اولان شیئه ده نیرو (الذی
يقوم بذاته) جمله سیله تعریف اولونوردی ؛ عرض ایسه انجق بر جوهرله

قائم و اوکا محتاج اولان احوال و کیفیاته ده یردی. اوروپا سقولاستیکلرینک (ens per se) کندی کندینه موجود)، (ens in alio باشقه سنده موجود) تعبیرلری جوهر و عرضک عینی صورته تعریفدر (substance, essence, entité سوزلرینه باقیکنز !)

حکمای اسلام، تماماً جوهر ایله عرض تعبیرلرینک نفوذی آلتنده فلسفه یه مشغول اولمشلر و عرضک، کندی کندینه قائم اوله مامسی لازمکله چکنی قبول و تسلیم ایدنجه (قیام العرض بالعرض) یعنی بر عرضک دیگر بر عرضله قائم اوله بیلیمه سنده بالطبع امتناع عقلی اولدوغنی ده ادعا ایتشدردی. زیرا، (قاضی عضدالایچی) نک (مواقف) نام کتابنده دیدیکی کبی (عرض) (حال) اولمق اعتباریه بر (محل معین) ه محتاجدر. بعض حکما عرضی، محلدن انفکاک ایده من دیشلر اولیه اولونجه دیگر بر عرضله ده قائم اوله ماز؛ چونکه او (عرض دیگر) دخی حال اولدوغنی ایچون کندی کندینه قائم دکلدر، یعنی اوده بر محله محتاجدر؛ وینه عینی سببله در که بر عرض، بر محلدن دیگر بر محله دخی انتقال ایده من؛ دیه دوشونمشلر؛ حالبوکه قاضی عضد، انتقاله احتمال ویره بیلور.

علی العموم قرون وسطا سقولاستیکلرینک تعریفی ایشته بوایدی؛ فقط یونک آلتندن، حل اولونماز مسئله لر ظهوره کلشدر. زیرا بوتعریفه نظراً بعض کیفیات و حادثات عادییه یی ایضاح ایتک ممکن اوله مامشدر. مثلاً اوزمانه کوره اعراضدن معدود اولان (حرکت) و (سرعت) و (رایحه لر) و (طعوم) و بالجمله کیفیات اجسام، موضوع بحث اولمش: [سرعت، عرض اولمقله برابر حرکتله قائمدر. حالبوکه حرکت دخی عرضدر. بناءً علیه قیام العرض بالعرض ممکندر.] ده نیلمش. كذلك (هلانک رایحه سی و آتشک حرارتی اطرافه انتشار ایدیور. بونی شبهه سز حس ایدیورز. حالبوکه اومیوه، و یاخود آتش، اولدوغنی یرده طورویور. بونی ده کوروویورز. بناءً علیه اعراضک بر محلدن دیگر محله انتقالی انکار ایتک حسی انکار ایتک. دیمکدر. بوایه باطل بدیهی در.) [دیه ادعا اولونمش! بوکی اعتراضاته قارشی (قاضی عضد) و شارحی (سید شریف)، غایت غریب و قیصه بر

جواب ایله اکتفا ایدوب کچور: [او اعراض انتقال ایتیمور؛ مجاورت حسیله انسان او اعراضی بالذات احداث ایدیور؛ زیرا فاعل مختاردر.] و یاخود - حکمایه کوره - [عقل فاعلک بر استعداد مخصوصی واردر که مجاورت سببیه او کیفیاتی حاصل ایدر] دیور که سقولاستیک اصوله توفیقاً اجرا ایدیلن محاکمات فلسفیه نک اک عجیب، یعنی اک کوزل مثالی تشکیل ایدر. (Scholastique لفظنه باقیکنز!) (شرح مواقف) ک ایکنجی موقعی بالخاصه جوهر و عرضدن تفصیلاً بحث ایدر.

بوگونکی فلسفه بوتون بویهوده مناقشات نهایت ویرمش اولدوغنی ایچون (عرض) تعبیری یالکنز (منطق) ده (ذاتی essential) مقابله سنده ذکر اولونور. انواعی ده واردر. اولاً (عرض لازم) ماهیتدن انفکاکی ممتنع اولان احواله دیرلر. مثلاً انسانک ماهیتنده - هیچ اولمازسه بالقوه - قابلیت کتابت واردر. ایشته بوقابلیت (عرض لازم نوعندندر. ثانیاً (عرض مفارق) واردر و ماهیتدن انفکاک کی ممکن اولان احوالنددر. بونلرده یا (سریع الزوال) اولور؛ اوتانان بر آدمک، محجوبیت سببیه قیزارماسی کبی؛ یا (بطی الزوال) اولور، کنجک و اختیارلق کبی، (عرض عام) دیدکلری کیفیت دخی بر صنفک بالجمله افرادینه (مقول) اوله بیلیر. بر (کللی) در، یعنی او افراد حقنده علی السویه سببیه نه بیلیر، عمومی برسوزدر. بزم بوتون منطق کتابلرنده و (تعریفات سید) ده (عرض عام) ایچون ویریلن تعریف و مثال عیناً شورد: [وهو کلی مقول علی افراد حقیقة واحدة و غیرها، قولاً عرضیاً.] منطق کتابلرنده: [کالانسان، والفرس و الحمار، الخ] دیه مثال ویرلمشدر. بوراده تعریف طوغرو اولمقله برابر مثال موافق دکلدر. چونکه (انسان، فرس و حمار) کله لری بر اسم جامع اولمق اوزره، (جنس حیوان) انواعندندر. حالبوکه جنس نوع، فصل، خاصه، بوتعریفدن خارج قالمق کرکدی که سید شریفک یوقاریکی تعریفه تذیل ایتش اولدوغنی ادعاده بودر: فی الحقیقه [قول عرضی قیدیله نوع، فصل و خاصه، تعریفده خارج قالیر] دیور. یونک تورکجه سی: (عرض عام) اوله بر وصفدر که بوتون بر صنف افرادی حقنده سوبلنه بیلیر. مثلاً (بالقحیاق) و یاخود (رنجبرک)

انسانك ماهيت اصلیه سنده مطلقاً داخل اولان کیفیات ذاتیه دن دكلدر. چونكه انسانى دوشوندوكمز زمان بهمه حال (بالقجلىق) و (رنجبرلك) خاطره كلز وبوصقتلر انسانيتك شرائط لازمه سندن صاييلماس. بناء عليه بونلر برر عرضدر. بونى بوتون برصنف افرادنده كورورسهك، اوافرادك خصوصيات شخصيه اعتباريله فرقلىرینه باقيه رق بووصفى اونلرك هر برینه اسناد وعطف ایده بيليرز. [كه منطق اساننده (مقول اولمق) دیدكلرى بودر.] اوتقديرده بو وصف، اوصنف ایچون (عرض عام) اولور.

بوكون بومسئله لری پك صریح و پك طبیعى بر نقطه نظر دن تتبع وتقدير ایتمك یولی بولونمشدر. زمانمز لسان فلسفیسنك، سقولاستیق لسانه قارشى بر بویوك فضلى ده بووضوح وصراحتیدر. عصر مزك اك مشهور منطقینندن (وهن Venn) عرضى پك كوزل واكلاشيله جق صورتده تعریف ایدیور. (منطق تدریجى Empirical logic) ناميله مشهور اولان كتابنده كى بیانات مخصوصه سنى تلخیصاً عرض ایدیورم:

« هر صنف اشیا نك بر اسم مشتركى، بر اسم جامعى واردر؛ وبواسمك متضمن اولدوغى اوصاف، اوصنفده داخل اولان هر فردده واردر. ذاتاً افراد متشخصه ارسنده موجود اولان اوصاف مشتركه اوزرینه بر اسم جامع وضع اولونور. (تصنيف classification) (بوسوزه باقیكز!) ده دخى اساس بودر. لکن بواسم جامعك اخطار ایتدیكى اوصاف مشتركه دن ماعدا، اوصنف افرادینك آیری آیری هر برنده بر چوق اوصاف متمایزه وخصوصیه اوله بیلیر؛ واسم جامع بو اوصاف خصوصیه یی افهام ایده مز؛ چونكه اودرلو خصوصیاتى ماهیتاً متضمن دكلدر. فرضاً انسان دیدیکمز زمان، اختیار، کنج، اوزون ویا قیصه بویلى خرسیتان یاخود مسلمان (والی آخره؛) کبی مغالره اشارت ایتمز. ایشته بودرلو اوصافك جمله سنه - منطق لساننده - اعراض وعرضیات دیرلر. چونكه بونلر اسم جنس معناسنده داخل دكلدرلر؛ وبعضاً موجود اوله بیلیرلر بعضاً ده اولمایوریرلر. بونلر ایکی قسمدر. بر طاقى عینى صنفك بالجمله افرادنده بولونور بروصف عمومیدر. بوکبی لرینه (عرض غیر مفارق inseparable accident) دیرلر.

فقط عینى صنفك بعض افرادنده بولونوبده بعضیسنده بولونمایان ویاخود عینى شخصده بعضاً بولونوبده بعضاً بولونمایان احوال وکیفیاتده (عرض مفارق separable accident) ده نیر. (خسته لق کبی!) مثلاً (باقه قائمه سی) نظر دفته آلیرسه، بونده (کاغد اوزرینه مطبوع اولماسی) کیفیتى عرض لازم اولور؛ کاغدك (شکلى، رنگی، قطعه سی، تاریخ طبعی، قیمتی) کبی کیفیات دخى عرض مفارق اولور. بوترییات تصنیف ایچون پاییلیر، تصنیفده، مجملأ تعریف ایچوندر.

دیورکه، بونون بر سقولاستیق کتبخانه سندن دها زیاده - بومسئله حقیقه - معلومات ویرر. لسان منطقده (fallacia accidentis = sophisme de l'accident) ناميله مشهور بر (سفسطه) واردرکه، بزاونى (سفسطه بالعرض) دیه عیناً ترجمه ایده بیلیرز. بوده - یوقاریده تعریف ایتدیکم وجهله - اعراضدن معدود اولان بر حال وکیفیتی، اوصاف ذاتیه دن اولمق اوزره تلقی ایدرک بو ظن اوزرینه قیاس یاپوب یا کلش بر نتیجه ایله حکم ویرمکدر. انسانلر باشقه لرینی محاکمه ایدرکن چوق دفعه بوخطایه دوشمکدن قورتوله مازلر. بو خطانك اك کثیر الوقوع واک مقدوح اولانی، بر فردده واقع اولان بر قصورى ویا بر عارضه اخلاقیه یی - اوادمك منسوب بولوندوغى - جماعت ویاخود ملت افرادینك جمله سنه اضافه تعمیم وتشمیل ایتمکدر. مثلاً اوروپایه ایلك دفعه سیاحت ایدن بر شرقى نك بریالانجییه بر یان کیسیجییه تصادف ایتمه سی واونك اغفالاتنه قربان اولماسی اوزرینه [بوتون اوروپالیرلر یالانجیدر وخیرسزدر] دیه حکم ایلدسى بو قیلدن بر سفسطه در. زیرا بوقیاسك طوغرو اوله بیلیمه سی ایچون، اوروپاده هر کسك - محضاً اوروپالى اولمق حیثیتله! - یالانجی اولماسی مسلم بولونمالی؛ یعنی بوقباحث، عوارض اخلاقیه دن اولیوب (اوروپالیق شاندن) بولونمالی، وبوتون اوروپالیرده بروصف مشترك اولمالی در. حالوکه هیچ ده اوله دكلدر. کذلک، کوروب کوروشدوکمز بش اون اوروپالینك صارى صاحبى ومائى کوزلى اولماسنه باقه رق: (بوتون اوروپالیر قومرالدر!) دیه حکم ایدرسهك عینى سفسطه یه دوشمش اولورز. زیرا، اولاً: صاچك وكوزك

رنکی ماهیت انسانی ده داخل اولان کیفیات ذاتیه دن دکلدر. ثانیاً: قومرال اولق (اوروپاللیق شانندن) دکلدر. ثالثاً: بوتون اوروپالیلری کورمدیکمز حالده تشمیل حکم ایتک یا کاشدر، چونکه فی الحقیقه قومرال اولمایانلری ده پک چوقدار .

اکلاشیلیورکه بوسفسطه، (نامشروع بر صورتده تعمیم حکم généralisation illégitime) ایتکدن ایلری کلیور و بر نوع (استقرا خطایی erreur d'induction) در. (sophisme و induction) سوزلرینه باقیکنز. (conversion par accident) ایچون (conversion) سوزینه باقیکنز.

Achilles (Argument d')

Achilles
(argument)

(برهان) اضیرفی

یونان قدیمده میلاددن (۵۷۰) سنه اول، (قولوفون Colophon) شهرنده تولد ایتمش بولونان مشهور فیلسوف (قسنوفان Xenophanes)، ایتالیا یه هجرت ایتمش و اوراده (هله آ Elée) شهرنده بر مدرسه تأسس ایلشدی. بوشهر، ایتالیا نك سیچلیا اطه سنه مقابل دوشن جنوب شرقی ساحلنده کائن مستملکات یونانیه دن ایدی. ذاتاً (هله آ) نك معنای لغویسی (یونانستان) دیمکدر. فقط اصل یونانستانه نسبتله بویالتا مستملکک سنه، او وقتلر، (بویوک یونانستان la grande Grèce) ده نیلیر ایدی. حالا تاریخ فلسفه ده بوتعیر، اوزمان ایتالیا ده مؤسس بولونان بویونان مستملکک سنه اشارت ایدر.

بومدرسه مشهوره نك کندینه مخصوص بر فلسفه سی واردی؛ اربابنه (Eléates) ده نیلیر. [écoles سوزینه باقیکنز] (هله آ) شهرنده طوغوب بومدرسه ده یتیشن (زینون Zénon d'Elée) (مناظره و جدل dialectique) ده جرزه فوق العاده سیله تمایز ایدرک تاریخ فلسفه ده بویوک نام بر ااقش بر آدمدر.

یونانستان قدیمک هر طرفنده چوقدن مدرسه لر تأسس ایتشدی؛ بونلر میاننده (مدرسه یونانیه Ecole ionique) اک شهرتشعار اولانلردن

بریدر. اوزمانلر (ایونی Ionie)، قلازومن شهری ایله برابر تکمیل از میرولاتی سواحلی تشکیل ایدیور و پک بویوک فیلسوفلر یتشدریریوردی. بومختلف مدرسه لر اربابی آرده سنده دخی مناقشه لره وسیله لر ظهور ایدیور وبالخاصه (آتیه) شهری بومحاضراته صحنه اولور بودی. (هله آتیر) ایده آلیست؛ (ایونیقلر) ماتریالیست ایدیلر. بناء علیه، اعتقادات فلسفه جه بویکی مدرسه اربابی، طابان طابانه ضد بر وضعیتده بولونویورلردی. بر چوق مسائل فلسفه نك وجه تلقی سننده نقطه نظر اختلافی، بالطبع وبالضروره مدرسه یونانیه اربابی ایله (هله آت) لری بر برینه قاپیشدرمش و آرده شدتلی مناقشاتک ظهورینه و کرکین بر صورتده دوامنه سببیت ویرمشدی. او وقتلر (قسطاس حقیقت le critérium de la vérité)، (تجربه l'expérience) اولمایوب (قدرت مخیله puissance de l'ima-gination) اولدوغی ایچون، اینجه دوشونمک وهله جرزه ابراز ایتک، مباحثات فلسفه ده غلبه یی تأمین ایده بیله جک وسائلک اک قوتلیسی عد اولونویوردی. بوقدرتله مستتا بر درجه ده مالک اولان (زینون Zenon) مدرسه یونانیه نك احکام فلسفه سی چوروتمک ایچون بر چوق مسائل ترتیب ایدوب حلی خصملرینه حواله ایلهمشدی. (شاشیرمه) قیلندن اوله رق ترتیب ایدلمش بولونان بوتشکیکات، تاریخ فلسفه ده (les apories de Zénon) نامیله مشهوردر. بحثی صدندنه بولوندوغمر (برهان آخیه فس) ده اولنلردن بری واک مهی در.

(مدرسه یونانیه)، (مادیه matérialisme) مذهب فلسفه سی پیوسته اولمش و حتی بوکونکی کوملجنه جوارنده وقتیه مؤسس بولونمش اولان (آبدر Abdère) شهرینی، تاریخده شهرتشعار ایدن (لوسیپ Leucippe و ذیمقراطیس Démocrites) ک تعلیماتیه بو (ماتریالیزم)، (اتومیزم atomisme) شکنه منجر اولمشدی. بناء علیه بوفیلدوفلر هر شیک ذره لردن مرکب و متشکل بولوندوغنی تعلیم ایدیور و (اسباب علم - moyens de connaissance) دن اوله رق دخی (حواسک شهادتی le témoignage des sens) نه اعتقاد ایلوردی. حالبوکه (هله آتیر) تماماً بواعقادی نقض

ایده جک تعلیماتده بولو بویورلردی . اونلر نظرندۀ علم ایچون انجق ایکی واسطه واردی : (بری (حواس (les sens)، بریسی ده (عقل (la raison). حواس واسطه سیله تلقی اولونان معلومات ، خیالات باطله دن عبارتدر . بودرلو معلوما تمزك، هیچ بری، ثابت ، مستبدیم، یقینی ، و بناءً علیه حقیقی دکلدر . حالبوکه عقلک واسطه سیله ایدیندیکمز معلومات صحیحه ، یقیناتدندر ، شبهه کوتورمز ، چونکه بالذات بدیهی شیردر . (جزؤ کلدن اصغردر) کی ! او حالده حادثات علمنک شوشکل ظاهر یسنه اینانمق عوامه وجهلایه یاقیشیر بر اعتقاددر . فیلسوفلر انجق عقلک کشف ایتدیکی حقایق ثابته و یقینه یه اینانمق . درلر . [دیورلردی ؛ (زینون) بواساسه بنای محاکمه ایدرک ده ایلری یه کیتدی : مثلاً « حرکت ، حساً ادراک اولونویورسده حقیقه تعقل ایدیله بیلیر بر کیفیت دکلدر . عقل ، حرکت احتمالی قبول ایده جک اولسه ، متحرک اولان برشیئک ، عینی زمانده عینی مکانده هم وار همده یه ق اولماسی احتمالی ده قبول ایتمکه مجبور قالیرکه بو ، عقل نظرندۀ باطل بدیهیدر ؛ چونکه حرکت ، بلا فاصله طی مکان ایتک دیمکدر . فضله اوله رق حرکت کله کلن بر ماده ، طی ایده جکی مسافه نك هپسنی بردن قطع ایتزدن اول یاریسنی واونکده یاریسنی ، واونکده یاریسنی و بناءً علیه - الی غیرالنهایه - اقسامی وکسورینی قطع ایتک لازمکلیر . مسافه مفروضه نك بوتقسیمنه عقلاً بر نهایت تصور اولونه میه جنی ایچون ، حرکت ، عقلاً متمنع کورونور . واقعا جسمز شهادت ایدیورکه حرکت واردر ؛ فقط جسمز یالانجی در . حرکت بر حقیقت دکل ، جسمزک بر شعبده سی در ؛ بر غلط حس در . یوقسه حرکتک عقلاً ، وقوعی دکل ، احتمالی بیله تصور ایتک ممکن دکلدر . دیمش ایدی . ایشته زینونک ترتیب ایتدیکی تشکیکاتک اکثریسی بوکی ملاحظات فلسفیه نك محصولیدر . طبیعی (برهان آخیه فس) دخی عینی دعوا یه مستنددر .

شیمدی ، بوملاحظاتدن نصل اولوبده بوفیلسوف ، مسئله لر چیقارمش ، واونلر حقنده برهانلر ترتیب ایتمش . . . اونی تدقیق ایدم :

(زینون) ، پک انی آکلامش که ، بومبجشده اساس مسئله (ماده نك ، عقلاً الی غیرالنهایه انقسامه قابلیت) در . ماده ایچون حال بویله اولونجه ،

تصوراً ماده دن آریله میان (مکان) ایچون دخی اویله اولمق ضروری در . وشبهه یوق که [ماده و مکانک الی غیرالنهایه انقسامه قابلیت] دعواسی ایله [ماده نك ناقابل انقسام ذرات صغیره دن مرکب اولماسی] اعتقادی ، تألیفی غیر ممکن ایکی عقیده متناقضه در . اوحالده (مدرسه یونانیه) نك اساس فلسفه سنی تشکیل ایدن (اتومیزم) دعواسی طوغرودن طوغریوه رد وابطال ایتمکه چالشمقدن ایه ، ماده نك الی غیرالنهایه انقسامه قابلیت اعتقادی اوزرینه بر مسئله ترتیب ایدوب ، خصملرینک اوکنه آتیورمک وذهنلرینی تشویش ایدوب افکار و عقاید متناقضه یی بر برینه قاتیورمک ده پارلاق بر شی اوله جقدر ! . . ایشته (شاشیرمه اویونی) اصل بوراده کیزلی در . فی الحقیقه زینون (aporie) لرینی بوتون بونیتله ترتیب ایتشددر .

اولا سرعت فوق العاده یه تمثال اولمق اوزره - چوبکلکی ایله مشهور اولان - یونان قهرمانی (آخیه فس Achilles) ی نظر ملاحظه یه آلمش . (برهان آخیه فس تعبیرینه سببده بوقهرمانک اسمی اولمشدر .) ثانیاً بطاآت حرکتک هر کسجه معروف بر نمونه مجسمی اولان قبلومبغه یی تصور ایتمش . [بوقبومبغه براز ایلریده (و فرضا اون مترو فاصله ایله اوکده) بولونمق شرطیله آخیه فس ایله ق شویاریشنه باشلاسلر ، الی غیرالنهایه آخیه فس ، قبلومبغه یه یتیشه میه جکدر .] دیه ادعا ایتمش . حسک شهادتنه قارشى طوران شو دعوا ی غریبی اثبات و تحکیم ایچون دخی (زینون) ینه مکانک ، (یعنی شو ایکی یاریشجیلر آره سنده موجود بولونان مسافه فاصله نك) الی غیرالنهایه قابل تقسیم اولماسی امکانی اساس اتخاذ ایتمش ، وخصمانه خطابا شو (برهان) ی ایلری سورمش که اصل (argument d'Achilles) بودر :

(آخیه فس ، نه قدر چیزلی قوشارسه قوشسون ، طبیعی درکه قبلومبغه ایله کنددی نقطه حرکتی آره سنده موجود بولونان اون مترولق مسافه یی هپ بردن و برآنده آطلایه ماز . هر حالده او مسافه نك هپسنی قطع ایتزدن اول ، هیچ اولمازسه ، یاریسنی یعنی بش مترولق مقدارینی قطع ایتمه سی لازمکلیر . فقط بوترز محاکمه یی او (بش مترولق مسافه) یه ده عیناً تطبیق ایتمکه مجبورز ؛ یعنی اوبش مترولق ساحه یی ده قطع ایتزدن اول ، یاریسنی ؛ واونکده یاریسنی

واونك ده ياريسنى والى غير النهايه دائماً باقى قالان قسمك نصفى طى ايتمى ايلاب ايدر. كورويورسكز كه مسئله نامتناهى به قدر كيديور، چونكه بوتنصيفاته نهايت يوقدر. بناء عليه، قلوبغه به يتشوب، اونى كچمك شويله طورسون، آخيله فس، حركته بيله مقتدر اوله مامق لازمكه جكدرد.

حتى بوبرهانه - نو عما - بر حيثيت رياضيه ويرمك ايچون، اونى برشكل ديكرده دخى عرض ايتمشدر كه اوده شودر:

« فرض ايدلم كه آخيله فس، آرادده كي فاصله نك - ايلك حمله ده - اونده برينى قطع ايتسين. او حالده بر متر و لوق مسافه طى ايتمش بولونه جقدرد. قلوبغه دخى، كندى او كنده كي مسافه دن انجق بر (ده سيمترو) قطع ايتمش اوله جقدرد. زيرا قلوبغه نك (آخيله فس) دن اون دفعه بطى حركت ايتديكى ذاتاً - فرضمى اقتضاسى! - قبول ايتمشدك. او حالده (آخيله فس) قلوبغه به كيتدكه يا قلاشه جقدرد. زيرا بو ترتيب اوزره آرادده كي فاصله كيتدكه كوچوله جك ومثلاً ايلك خطوده ده (۱/۲)، ايكن، ايكنجيدده (۱/۳)، او چونجى ده (۱/۴)، صوكره (۱/۵)، اوله جق ودها صوكره (۱/۶) اوله جق، يعنى نامتناهى دوام ايدده جكدرد. چونكه بوكسوراتك شو سلسله مطرده سنه نهايت تصور ايديله مز. مع مافيه عبنى نسبت، ينه الى غير النهايه باقى قاله جنى ايچون قلوبغه به طوته ميه جقدرد. مسئله نك شو ايكي درلو وضعندن آكلا شيليور كه (زينون) شو برهان مشهورينى [متناهى بر مكانك نامتناهى بر تقسيمه قابليتى!] ادعاسى اوزرينه تأسيس ايتمش واصل بو نقطه ده اذهانى تشويش وتشكيك ايله مشدرد. حالو كه بر (مسافه متناهى) الى غير النهايه قابل تقسيم اولسه بيله - حد ذاتنده - ينه بر (كميت متناهى) اولمقدن قور توله ماز. اوندن ماعدا بويله بر تقسيم، فعلى دكل، انجق تصويرى در. فضله اوله رق معهود مسافه به طى ايتمك ايچون صرفى لازمكان (زمان) دخى اويله در. يعنى [حد ذاتنده محدود اولمقله برابر - عبنى صورته - الى غير النهايه، نظرى بر تقسيمه قابلدرد.] فقط بويله اولدوغى حالده تكميل او مسافه محدوده ينه اون متر و لوق بر ساحه دن عبارت قالد ينى كى، بوتون زمان دخى بش دقيقه لى بر (مدت) ايچنده محصور در. يعنى، هرايكى بي ده مقادير متناهى دندر. بناء عليه (زينون) ك شو

(برهان سفسطى argument sophistique) سنده اساس اولان (نقطه تشكيك)، (نامتناهى l'infini) ايله [نامتناهى تقسيمه قابل بر كميت متناهى une quantité finie divisible à l'infini] نى بر طوتمق خطاسنده. ويا خود حيله سنده در. اصل ذهنلى شاشيرتان جهت ايسته بو حيله اولمشدر.

بو حيله ي - ماهيتله - اك اول كشف ايدن و معهود برهانك بر سفسطه دن عبارت اولدوغى اورطيه قويان (آرسطو Aristote) اولمشدر. مع مافيه يك اسكى زماند نبرى اك بويوك فيلسوفلر، [هله منطق مباحثنده!] بوبرهاني تنقيد و مناقشه ايتمكدن كنديلرينى آله مامشدر؛ حتى ايچلر نده بعضلرى بوسفسطه نك فسون تاثيرينه بيله طوتولمشلردى كه (بهيل Bayle) كى مهم بر فيلسوف ده بوزمرده داخلدر. نته كيم معاصر بنزدن (Gompertz غومپرتس) دخى بوبرهاندن اوزون اوزادى به بحث ايتمش و سفسطه اولدوغى قبول ايتمكه برابر، يوقاريدده كى وجهله، او كا رياضى برشكل و يرلديكى تقديرده مسئله نك حلى ممتنع بر حالده قاله بيله جكنى سويله مشدرد. بونده آز چوق طوغرو بر ملاحظه وارسه، اوده حسك شهادتى ايله عقلك حكيمى آراسنده كى مبانيت فطريه و اساسيه طاند اولان فكر و ادعادر.

عصر مزك اك نافذ النظر فيلسوفلر نندن (جون ستوئث ميل J. S. Mill)، بوبرهاني (منطق) كتابنده لايقيه تنقيد ايتمش و بو كتابك (سفسطه) به عائد اولان باب مخصوصنده [بواكلنجلى منطق مسئله سنى]، (Sophisme de confusion) عدادينه ادخال ايله مشدرد. ديكر بعض منطقيون ايسه، (ignoratio elenchi) نوعندن بر سفسطه عدايتمشلردرد. [بوتعيرات ايچون Sophisme سوزينه بايكيكز.]

يونان قديمك بر چوق مباحث فلسفيه سنى و مناقشاتى اولدوغى كى شرقه نقل ايدن - كمى اسلام و بالخاصه (معتزله)، برهان آخيله فس ايله مشغول اولمشلر. حكيم شهير (قاضى عضدالايحي)، (مواقف) نام كتابنده بوبرهاني تمثيل ايدن مسئله ي، تام موقعنده ذكر ايتمشدر: اجسامك قابليت اقسامى مسئله سنى تذكر ايدن (دردنجى موقفك مقصد نالنده) دعوا عينا بسط و مناقشه اولومشدر. (مواقف) كتابى بويوك بروقوف ايله شرح ايدن مشهور

(سید شریف جرجانی) ، و خصوصاً بعض تفصیلات مهمه ویریور ، و (بر مسافه متناهیة نك اجزای غیر متناهیة دن مرکب اولوب اوله میه جفی) بحثنده حکمای معتزله دن (نظام) ایله (ابو هذیل العلاف) آره - سنده بر مناقشه آچیلش و علافك نظامه قارشی برهان آخيله فس ایله مقابله ایتش اولدوغنی نقل ایدیور . فقط غریبدرکه زینونك و برهانك قطعاً اسمی ذکر ایدیور . مسئله بطی [قبولمغه ؟ !] ایله سریع [آخيله فس ؟ !] دعواسی اوله رق علی الاطلاق موضوع بحث اولویور . حالبوکه بوتجاهله رغماً (سید) زینونك سوزلرینی همان عیناً نقل ایدیور :

«... اکر - نظامك ذهانی وجهله - متناهی برمسافه ، بالفعل اجزای غیر متناهیة دن مرکب اولسه یدی ، متناهی بر زمانده اومسافه نی قطع ایتك تمتع اولوردی . زیرا مسافه مذکور نك یاریسنی قطع ایتنه دن اول ربعی ، و تمام ربعی قطع ایتنه دن اول دخی سکزده برینی و سکزده برندن اولده ، اون التی ده برینی و بوموال مطرد اوزره الی غیر الهایه کسوراتی قطع ایتنه سی لازمکیر . بوکاده نامتناهی زمان ایست و بناء علیه (سریع) ایله (بطی) آراسنده برمسافه قلیله اولونجه - اومسافه دخی غیر متناهی اجزادن مرکب بولونه جفی ایچون - متناهی بر زمانده سریعك بطی یه ایریشه سی قطعاً ممکن اوله ماز .» دیه دعوائی نقل ایدیور . صوکره (ابو هذیل) ك بودعواسنه قارشی (نظام) ك فنا حالد جوابدن عاجز قالمش اولدوغنی و (لاف ایله طفره فروشلفه صایدیغنی) آکلاتیور و بوسفسطه نك حیله سی تمامیه بیلن سید شو وجهله حکم ایدیور که ، تماماً ارسطونك و میلک والحاصل مسئله نی طوغرو حل ایدنلرك ملاحظاته عیناً تطابق ایدر .

«... بوطفره فروشلفه حاجت یوقدی . زیرا مسافه مفروضه انحق بالقوه نامتناهی تقسیمه قابلدیر ؛ بالفعل دکل ! . ثانیاً اومسافه نی قطع ایتك ایچون لازم کلن زمان محدود دخی عینی صورتله بالقوه نامتناهی تقسیمه قابلدیر . بناء علیه بومقادیرك ینه جمله سی ده کیات محدوده و متناهیة دن عبارتدر . نظام [نامتناهی] تعیری ایله [نامتناهی یه قابل تقسیم اولان بر مقدار معینی] عینی شی ظن ایتكله شاشیرمش و خطایه دوشمشدر .»

دیور که تماماً خطا دخی بودر . انگلیز فیلسوف معاصری مشهور (میل) ودها یك چوق امثالی هپ بویله حکم ایتشلردر . سیدك عصر لرحه اول بونی بویله جه بیان ایتش اولماسی احاطه علمیه و فطانت جبلیه سنه دلالت ایدر . ایشه بوکون بر (سفسطه) دن عبارت اولان (برهان آخيله فس) بودر . [Argument سوزینه باقیکز !] .

Accomodatice

الطابق (معنای رموزی) (Accomodatice sens)

برلفظه - ماضع لهی خارجنده - بر معنا ویرمك ، یعنی او لفظك هر کسجه معروف و مشهور اولان معناسی بر اقوبده ، كرك (تأویلاً) ، کرکسه (یا قیشدیرمه) صورتیه اوکله یه دیگر بر معنا (اویدور مق Accomoder ؟ !) چوق دفعه واقع اولمشدر و اولور . ایشه (sens accomodatice) برکله یه ویریلن بو (معنای بعید) ه دیرلر . فرانسز جه ده بو تعیر یکی در ، و (accomodation) لفظندن آلمشدر . [انجمن اصطلاحات] بوکله یی (اطباق) لفظیه ترجمه ایتش اولدوغنی ایچون ، اوندن مشتق بولونان (accomodatice) لفظنده (اطباق) کله سنی ایجاد و وضع ایتمشدر . ظنمجه بو تعیر غریبک اصطلاح اوله رق اقامه اولونمسه یی بهوده در ، زیرا بزم شرق مؤلفات صوفیه سنده و علی الخصوص (باطنیه ésotérisme) حکمتنده (معنای باطنی) ، (معنای رموزی) ، (معنای تأویلی) کبی یك مشهور ترکیلر واردر که ذاتاً اصطلاح اوله رق مقبولدر . کتب مقدسه نك متنی ، معنای ظاهری و لغویسی ایله تلقی ایتیبوده ، هرکله یی کیزلی بر معنایه اشارت اولمق اوزره قبول ایلک و اوکا کوره متن کتابه معنا اویدور مق (تأویل) در . مثلاً (عرش) لفظنی (بدن انسان) ، (کعبه) یی (کوکل) معنایله تلقی و تفسیر ایتك کی... (تصوف mysticisme, théosophie çoufisme) ده [بوسوزلره باقیکز !] بوطرز تفسیر ، بر (اصول) تشکیل ایتدیکی ایچون ، (معنای تأویلی و رموزی) ، (sens accomodatice) مقابلی و معادلی اولمق اوزره اصطلاحات مشهوره صره سنه کچمشدر . بناء علیه تصوفه متعلق اولان آثار و مؤلفاتده بو تعیره تصادف ایدلیکی تقدیرده (معنای

تأویلی (دیه ترجمه اولونملی در . فقط فرنکجهده بوکمه نك زمین تطبیقی چوق دها واسع اولدوغندن استعمالی تصوف لساننه منحصر قالمایه بیلیر . اوتقدیرده بز، بوکا (یاقیشدیرمه) دیرز؛ اگر یاقیشدیریلان معنا، بوسبوتون غریب دوشرسه (اویدورمه) دیرز . (accomoder) ، ذاتاً برشیئی یکی بروضه اویدورمق دیمکدر . لکن بونلر بزم لسانمزدده اصطلاح صایله ماز . بزده بوکمه منحصرأ حکمت صوفیه تعییراتنددر .

Accomodation

اطباء

Accommodation

Accomodation انکلیزجه فرانسجه

Accomodamento ایتالیانجه

هرهانکی بر آلتی (مثلاً برفوطوغراف ماکنه سنی !) - لایقی وجهله - قوللانمق ایچون ، قورمق ، دوزه لیمک ؛ الحاصل ، اوندن بکله نیلن خدمتک حقیله استیفا اولونه بیلیمه سنی تأمین ایتک ایچون اوکا بروضیت مخصوصه ویرمک ، اونی (accomoder) ایتک دیمکدر که یوقاریده کی کله اصطلاحیه بواصلدن مشتقد . اصطلاحده معناسی ینه بوکا بکزر : برعضوک - ایفای وظیفه امرنده - محیطنه وخدمت جدیده سنه مطابقتی وبناء علیه بوسبوتون یکی بعضی احوال وایجاباته کندینی اویدورمق ایچون یکی بروضیت آلماسی کیفیتنه (accomodation) ده نیر . بوضورتله عضو مذکور وظیفه سنی ، قابلیت - آز چوق - تعدیل ایله کندینی محیطنه (اطباق ایتش) یعنی اویدورمش اولویور ، دیمکدر .

بو تعییر اولاً صناعتده اصطلاح اولمشیدی . صوکره (غریزات - physiologie) علمنه دخی اوحیثیته کجدی ، وبالخاصه (فوطوغراف آلتی آکدیران) کوزک وضوح رؤیتی مسئله سنده قوللانلیدی . برنقطه نك واضحاً (یعنی بوصلی وبولانیق اولمایه رق) کوروله بیلیمه سی ایچون ، اونقطه دن وارد اولان شعاعانک بهمه حال (شبکه rétin) اوزرنده ، بر (محراق مزدوج foyer conjugué) تشکیل ایتیمه سی شرطدر : بو محراق نهایلریده ، نهده کزیده اولمالی در ؛ عکسی تقدیرده واضح وبراق برنقطه یرینه بولانیق بردائر کورونور . کورولن شیلرک اوزاق ویاقین اولمالرینه

کوره ، کوزک (صیایی کسر ایتک قابلیت réfringence) تبدل ایتدیکندن طولانی ، عضو بصر محراق نقطه سنی تام یرینه کتیرمک ایچون برعملیه مخصوصه اجراسنه مجبور بولونویور ؛ - (واضح - nette) برخیال بولمق ایچون - عادتا برفوطوغرافچی نك ؛ اوبزه قتیفی ایلری کری سورمه سنه بکزر بر حرکت اجرا ایدیور . (عضله هدیه muscle ciliaire) واسطه سیله (جسم بلئوری cristallin) نك (سطح خلفی face postérieure) سنی تعدیل ایدیور . ذاتاً بوکوچوجوک جسم بلئوری نك هرایکی سطحی ده برآز محذب بولوندوغی ایچون ، عضله هدیه نك تقلص واسترخاسی (یعنی طوبلانوب کوشه مه سی) ایله محدبیتی آرتوب اکیلیور وبوسایه ده محراق نقطه سی ، تام شبکه اوزرینه کتیرلش اولویور . ایشته (accomodation) بو عملیه فیزیولوژییه دیرلر . [تفصیلات ایچون قاموس عمومی نك علوم طبیعی و طبیه قسمنه مراجعت ایدیکنز .]

بو (اطباق) کیفیتک مباحث فلسفیه یه جهت تعلق ، پک مهم بر دعواده بر (دلیل قوی) تشکیل ایتیمه سی اعتباریله در ؛ اوده (ادراک مکان la perception de l'espace) مسئله سیدر . عجبا ، مکانی (آنی اوله رق یعنی بلاواسطه immédiatement) وتعیر دیکرله (تحدسی اوله رق intuitivement) می ادراک ایدیور زده (اوزاق) و (یاقین) فرقنی بیلورز ؛ یوقسه تعقل و (محاکمه inférence) نك بوخصوصده بردخلی اولویور می ؟ . . . ویاخود مکان حقنده کی حسمز ، بسیط می در ؛ . . . یوقسه (مولف combiné) می در ؛ . . . اگر بوحس ، بلاواسطه و (دفعی اوله رق impulsivement) ، آن واحده ، بزه خارجدن کش برشی ایسه ، بر (ادراک طبیی) در ؛ وبناء علیه بسیطدر ، تحلیل اولونه ماز . اویله اولمایوبده بعض مدرکات بسیطه یی ذهنمز بالاخره تألیف ایتدکن صوکره بز ، اوزاق ویاقین فرقنی آکیورسه ق ، مکان حقنده کی علممز بر (ادراک کسبی perception acquise) در . [acquis تعییرنده تفصیلاته باقیکنز !] بو حیثیته ده (مؤلف) در . سائر عناصر حسیه (éléments de sensation) یی ، ذهنمز تألیف ایتش ومحاکمه واسطه سیله

بر (فکر) استخراج ایدوب بزه تبلیغ ایلش دیمکدرکه بویله اولونجه بودرلو ادراکده ارادتمزک وعقلمزک کلیاً دخلی اولماسی لازمکه چکی محقق و مستدر. ایشته مسئله بودر و اوکاتملق ایدن دعوالرک دستوری ده بودر. (مبحث معرفت épistémologie) بحثنده بومسئله غامضه عظیم وسورکلی مناقشاته سبب اولمش؛ بر طرفدن (تحدسیه intuitionisme) دیگر طرفدن ده استحضاریه (représentationisme) مذهبلینه وجود ویر مشدر. [بوتون بوتعیراته باقیکنز !]

استحضاریونک اک بویوکلرندن اولان وحتی بومذهبک مؤسسی بولونان فیلسوف مشهور (بارقه Berkeley)، (نظریه رؤیت théorie de la vision) حقنده (۱۷۰۹) تاریخ میلاد بسنده (یعنی بوندن ایکی یوزسنه اول) بر مهم رساله یازمش و بودعوایی آچمشدی. مکانی تحدسی اوله رق دکل، انحق عقل ایله و بعد الحاکمه (یعنی تفکری اوله رق) ادراک ایتمکده بولوندوغمزی؛ وهله (اوجونجی بُعد la troisième dimension) ی یعنی (عمق = دهرینلک) ی، طوغرودن طوغریه ادراک ایتک ممکن اولمادیغنی ادعا ایله مش و عضو بصری تشکیل ایدن عضلات و سائر اقسام مختلفه نک فعالیتنی ذکر ایدرک بو خصوصده محاکات ذهنیه مزک و ارادتمزک بویوک بر دخل و تأثیری بولوندوغنی ده بیان ایتمشدی. ایجه بر زمان سوکره واقع اولان تدقیقات و کشفیات علمیه (بارقه) نک بو نظریه سنی تأیید ایتدی. [(مکان espace) و (افتکاریه مطلقه absolu idéalisme) کله لینه باقیکنز .]

(accomodation) تعیری، (فلسفه طبیعیه philosophie naturaliste) ده دخی عمومی و مهم بر اصطلاح اولدی. (داروین Ch. Darwin) و طرفداراننک آثار یله (استحاله transformisme) [بوتعیره باقیکنز !] اعتقادی همان بوتون علمای متخصصین طرفندن قبول و تصویب ایدیلنجه، (اجناس les espèces) ک تحولاتی و بوسایه ده بوسوتون یکی انواع حصولی adaptation (انطباق) [بو تعیره باقیکنز !] نظریه سیله تعریف اولونه بیلدی. بونظریه یه کوره علی العموم اجناس حیوانیه و نباتیه نک، (ایجابات محیطه

(circonstances ambiantes) یه و (محیط milieu) ک (شرائط جدیده nouvelles conditions) سنه توفیق حیات مجبوری ایله، یاواش یاواش (استحاله transformation) یه دوچار اوله کلدکلی ادعا ایدیلور. او حالده بوقابلیت انطباقدن کلیاً محروم بولونان جنسلر، شراط جدیده تحتنده یاشایه مادقلری ایچون - کیت کیده - محو و منقرض اولویورلر، یعنی (غوغای حیات la lutte pour la vie) ده دها (لایق apte) اولانلر بونلره غالب کلیور و میدان، یاشامغه آلیق اولانلره قالیور؛ دیمک چقیور. [تفصیلات ایچون Darwinisme سوزینه باقیکنز .]

بوکون (accomodation) ایله (adaptation) تعیرلری آره سنده - علماجه - برفرق تعین ایتمشدر. بر (عضو organe) ک، یاخود بر (فرد individu) ک یکی یکی شراط و وظائف حیاتییه کندینی اویدورمه سی کیفیتنی بیان ایچون (accomodation) طباق تعیری ترجیح اولونویور. بو استحاله یوزندن اکتساب ایدیلن قابلیات جدیده نک ارثاً انتقال ایدوبده مؤید و مشید اولماسنه و بناءً علیه بر (سجیه عضویه caractère organique) تشکیل ایتمه سنده (انطباق adaptation) کله سی تخصیص ایدیلور.

وژانه (اصولی) Accord (méthode d')

[(Concordance) کله سنه باقیکنز .]

Achromatopsie	عمای الرايه
Achromatopsie	آلانجه و فرانسزجه
Achromatopsia	انکلیزجه
Achromatopsia	ایتالیانجه

باصره نک بر قصوری در؛ ولادی اوله بیلیر؛ کسبی اوله بیلیر. بوقصور ایله معلول اولانلر، انحق بر درلو احتساسات ضیائییه قابلدنلر. یالکنز بیاض ضیا ایله کولکه کوره بیلیرلر. رنگلری حس ایده مزلر. بناءً علیه اونلر نظرنده رنگارنگ بر طابلو، بر فوطوغراف کبی کورونور. بو قصورک ولادی اولماسی اندردر؛ اولدوغنی تقدیرده دخی حاسه

بصريه نك دها باشقه علتلريله، قصورلريله همان دائماً مترافقدر . كسي اولدوغى زمان، عصب بصري نك (تردى ضمورىسى *dégénérescence atrophique*) حالته مشاهدده اولونور . بو حالده عماى تام (يعنى بوسبوتون كور اولوق) ايله (دالتونيزم *Daltonisme*) (بوتعيره بايكنز!) آره سنده بر صفحه مخصوصه تشكيل ايدر . او وقت بو حاله مبتلا اولانلر انجق صارى ايله ماوى رنگى حس ايدده بيليرلر . صوكره هيچ رنگ كورمزلر؛ دها صوكره دخی هيچ برشى كورمزلر : تماماً كور اولورلر . (تفصيلاتى ايچون قاموس عمومى نك علوم طيه قسمنه بايكنز.)

فلسفه ايله علاقه سى (مبحث معرفت *épistémologie*) مسائله وبالخاصه ادراك (*perception*) (بو تعبيرلره بايكنز!) بحثه تعلق اعتباريله در . (انفسيه *subjectivisme*) و (اضافيت علم *relativité de la connaissance*) تعبيرلرينده مراجعت ايديكز .

خلف طريفير (*A contrario*)

هر لسانده لاتينجه سى قولاليلير .

بردعوايى اثبات بر شينك ضدنى نظر اعتباره الهرق اقامه اولونان دليله (*Preuve a contrario*) ديرلر . (*contre-épreuve*) دخی بوديمكدر و بوكون دها زياده مستعملدر .

(*démonstration* برهان سوزينه بايكنز .)

نفى عالم مسلكى *Acosmisme*

كانتاك وجود حقيقيسى انكار ايدن فيلسوفلر ك ، اعتقادى تلخيصاً تفهيم ايچون وضع اولونمش بر تعبيردر . بو اعتقاده ميل ايدنلر على الاكثر وحدت وجوده قائل اولان صوفيه ايله (وحدتى *moniste*) فيلسوفلردر . بو ادعا ده بولونانلره بالخاصه متشرعين و آلهيون اسناد الحاد ايتشلردى . اوروپا فلاسفه مشهوره سندن و متأخريندن (سپنوزا *B. Spinoza*) ، زمانك آلهيون طرفندن تكفير ايدلديكى كى عالم اسلامده يتيشن حكماى صوفيه نك بلكه اك مشهورى اولان شيخ اكبر محى الدين بن عربى دخی متشرعين علمادن بر چوقلرينك شدتلى تعريضاتنه هدف اولمش ايدى . بالخاصه تفتازانى

Acosmisme

(رسالة فى وحدة الوجود) نام كتابى شيخ اكبر عليهنده يازوب نشر ايتمش واونى شدتله تكفير ايتشدى . حالوكه بو معامله محق دكلدر . زيرا (*acosmisme*) فلسفه نك انكار ايتديكى شى بالطبع شوكانتاك صورت محسوسه سى و هيئت ظاهره سى دكلدر ؛ انجق حقيقت ذاتيه سى و استقلال وجوديدر . بوندن بر واجب الوجودك ، بر وجود مطلقك وارلغى انكار چيقماس . بالعكس (يكانه و حقيقى وارلق انجق بردر ، اوده (وجود مطلق) در ،) ديه اعتقاد ايتدكدن صوكره وانجق بو شرط ايله ! كانتاك استقلال وجودى انكار اولونه بيلير . اوتقديرده ماسوا (يعنى وجود مطلقدن ماعدا هر نه وارسه) هپ ظل زائل و خيال باطل قيليندن اوله رق تلقى ايديله بيلير . وحدت وجود طرفدارلرى و بوتون صوفيه هپ بو فكر واعتقاده درلر . فقط منكر و ملحد دكلدرلر . صوفيه بو خصوصده ذره قدر شبهه محل براقه رق فكرلر يى كمال وضوح ايله بيان ايله مشلردر . محى الدين بن عربى نك بو بحثده سياق نظرى ترويجا و كندى سوزلرندن بعضلر يى تفصلاً يازلمش اولان (وحدت وجود) نامنده برساله دن عينا ذكر و ايراد ايتديكم شو جمله لر ، ملاحظات واقعه مى اثبات ايدر : (*وَأَعْلَمُ بَأَنَّا لَا تَفُولُ بَأَن جَمِيعَ الْأَشْيَاءِ مَدُومَاتٌ ، غَيْرَ مَوْجُودَاتٍ وَأَمَّا نَقُولُ أَنَّهُا مَوْجُودَاتٌ بوجود الله تعالى ، لا بوجود آخر ؛ على معنى : ان وجود الله تعالى هو القيوم على جميع الأشياء ، الى آخره ! . . .*)

بوتون صوفيه نك فكرى بودر ؛ (اشيا و موجودات محسوسه بوسبوتون يوق ديمك دكل ، فقط اونلر ك وجودى هر آن عدمه مقارندر . زيرا هر آن متحولدرلر ؛ و كندى كنديلرينه قائم دكلدرلر . اقامه حقله قائمدرلر . اونلر ك وارلغى كولكه كى در : بر (وجود ظلى) در . اونلر ، وجود حقيقى اولان ذات مطلقه نك خيالات ظهورى و مراهى تجليسى در .) محى الدين بن عربى نك بو فكرلر يى عثمانيلر آره سنده غيرتله نشر ايدن مشهور اسماعيل حقى (حضرات خمس *les cinq émanations*) رساله سنده بو بحثه دائر لايقيه تفصيلات و ير مشدر . حتى هر متصوف بونى ايضاح ايتمشدر .

واقعا منتشر عین (حقایق الاشياء ثابتة والعلم بها متحقق) دستوری بحث معرفتده (مبدأ principe) اتخاذ ایش اولدقلری ایچون ، خارجده اشیانک حقیقتی شبهه دوشورمک غیرتنک ، قسطاس علمی دخی حکمسز براقه جغنی وسو فسطائیہ ولا ادریه وادیسنه یول آچه جغنی جدیتله ملاحظه ایده رک ، صوفیه یه فنا حالدہ بغض وعداوت کوسترمشر . حالوکه صوفیه حقایق اشیانی قطعاً انکار ایتهمش ؛ بالعکس ، (مبدأ اول) ، و (حقیقه الحقایق) انجق (حق تعالی) در ! .. دیمکله اوئی وحدانیت صمدانیه ده بولمش در . بوتون موجوداتک (صور محسوسه formes sensibles) دن عبارت بولوندوغنی وبوتون بو صورتلرک حدوشنه ، قیام ودوامنه علت اولان وجود حقیقی نک (ذات مطلقه) اولدوغنی ، اوقدر صراحتله و اوقدر تکرار ایله سویله مشلردر که اوسوزلری بورایه نقل ایتمکه بیله حاجت یوقدر . هانکی تصوف رساله سی آچیلسه ، اک اول بو بحث کوزه چاربار . بناء علیه عالم اشیایه ، بو کونکی ایده آلیستر کبی باقان صوفیه یی - بو سبیل - الحاد ایله اتهام ایتک عظیم افترادر . [panthéisme) و (mysticisme) سوزلرینه باقیکنز !] نته کیم بر چوق بویوک فلسوفلر صوفیه وعلی العموم (موحدین les monistes) علیهنده واقع اولان اسناداتی وافترازی تنقید و تنقیح وبو فنا یا کلاشلی تصحیح ایتمشلردر . بومحققین میاننده اک بویوک آدملردن (ابوعلی الحسین بن سینا) ایله (جلال دوآنی) و (سید شریف جرجانی) یی ذکر ایتک کافیدر . هله اوروپا معاصرین فلاسفه سی علی العموم صوفیه یی بو خصوصده تزکیه ایله مشلردر .

بنم تحقیقه کوره : آلهیون ومنتشرعون وجود واجبی اثبات ایچون ائردن مؤثره انتقال صورتیله [preuve cosmologique] تعبیرینه باقیکنز ! احتجاج ایتکی ترجیح ایلدکلرندن طولانی ، کاشناتی انکار ایدن هر فلسفه دن شدتله انفعال ایتمشلردی . کندی نظرلرنده وجودی بداهه ثابت اولان اثر خلقت ، انکار اولوتجه ائردن مؤثره انتقال ایده بیلیمک ایچون منطقاً نقطه استناد قالمیوردی . اوندن طولاییدر که دنیانک وجودی انکار ایدن

حکمایی همان هر مملکتک متشرعینی وآلهیونی الحاد ایله اتهام ایتمشلردر . فقط طوغرو دکلدر . چونکه یکانه طریق اثبات بودکلدر . بوکون (acosmisme) اعتقادی یا لکنز تصوف ایله دکل ، (idéalisme) فلسفه سیله ده صیقی صیقی یه علاقه داردر . (بوسوزده باقیکنز .)

Acquis

Acquis

کسبی

Erworben

آلماجه

Acquisitive

انکلیزجه

Acquistato

ایتالیانجه

کسبی ، قازائش دیمکدر . فلسفه طبیعی و اخلاقیده بعض خصائل ویا قابلیاته وصف اوله رق قوللانیلیر . بو حیثیتله (inné وهی) ، (congénital ولادی) ، (ارثی héréditaire) ، (instinctif غریزی) تعبیرلرینه مقابل دوشر .

اسکیلرجه بوتعبیر معلوم ومعتبردی . اکثریا اخلاق کتابلرنده مذکوردر . (اخلاق تربیه ایله قابل تغییر واصلاح اولوب اولمادیفی) بمختنده خصائل انسانیه نک کسبی ویا وهی اولماسی باشلیجه بر مسئله مهمه تشکیل ایدیوردی . چونکه ، خصائلک جیبائی تقدیرنده اخلاق تربیه ایله قابل تعدیل واصلاح اوله بیلیمه سی تسلیم ایدیله میوردی . بالعکس ، اخلاق اثر الفت وعادت ایسه ، تربیه ایله تبدیل وتصحیح اولنه بیله جکنه اینانیلیوردی . بالطبع بویکی متناقض نظریه نک طرفدارلری واردی . مثلاً شرقده اخلاق یونک اک بویوکلرندن معدود اولان مشهور شیخ سعدی شیرازی :

(عاقبت کرک زاده کرک شود ؛ کرچه با آدمی بزرک شود .)

دیمکله تربیه نک اخلاق اوزرینه هیچ بر تأثیری اوله میه جغنی صراحة ادعا ایتمش وخصائلک جیبائی اولدوغنه بیان قناعت ایتلشدر .

سلیمان قانونی دوری فضلاسنگ مشهورلرندن وبالخاصه اخلاق یوندن اولان قینالی زاده علی افندی (اخلاق علائی) نام کتابنک مقدمه مستنده

بومستلهایی دقلیجه تتبع ایش ، واسلاف حکمانک بوبابده کی ملاحظه لریخی شو وجهله تلخیصاً نقل ایشدر .

(بومستلهده حکماندن منقول اولان اقوال معبره اوچ قولدر . بریسی اولدرکه ، تبدیل خلق مطلقاً امر ممنوعدر : بر خاق که ذات آدمی ده حاصل اوله ، اصلاً تبدیلی نامقدور ، وازاله سی غیر میسر در . زیرا خلق امر طبیعی در ، و امر طبیعی عوارضدن متأثر و موضعندن متبدل و متغیر اولماز . ایکنجی قول اولدرکه خلق ، ایکی نوعدر : بریسی طبیعی در ؛ یعنی اصل خلقتده مرکوز و مجبولدر ؛ آنک تبدیلی ممنوعدر . بریسی ده (الفی) و (عادی) در ؛ یعنی مألوف و معتاد اولمقدن حاصل اولور . و آنک تبدیلی ممکندر الی اخره !)

اکلاشیلیور که قینالی زاده (الفی) و (عادی) تعیری ایله بوکون بزم (کسبی) دیدیکمز معنایی مراد ایدیور . (طبیعی) لفظی ده (instinctif) مقامنده قول لائش کی در . هر حالده بواوچ کله دخی مواضع مختلفه به تخصیصاً بوکون بینه استعمال اولونه بیلیر .

زمانمزمده (داروینیزم Darwinisme) فلسفه سی ایله (علوم طبیعی و حیاتیة Sciences naturelles et biologiques) ساحه سنده آچیلان مباحثات ، (اجناس معینه) نک ، بعض (عوامل facteurs) تأثیر یله - غیر محصور بر زمان ظرفنده - تبدل ایدوب ایده میه جکنه دائر بر مسئله مهمه به وجود ویرمشدی . (transformisme) لغته باقیکنز .] بوبحث بر چوق مسائل نالیه بی ده قورجالادی واونلری بوسوتون باشقه و یکی بر نقطه نظر دن تلقی ایده بیلیمک یولنی آجدی . بالضروره وراثت مسئله سی ده یکی دن اورطه به آیلوب تدقیق ایدلمک باشلادی . اوصره ده ایدی که (حیات شخصیه انساننده کسب اولونان خصائلک ارثاً اولاد و اخفاده انتقال ایده بیلوب ایده میه جکی کیفیت) بر سوال شکننده میدان بحثه کیردی . اگر خصائل کسیده نک انتقالی تحقق ایدرسه ، کیت کیده طبیعت عضو به ده مرکوز اوله رق اونلرک بر باشقه (عرق race) وجوده کتیره بیلیملری و بویله بر عرقلده ایلریده یکی بر (espèce جنس) اوله بیلیمنی معقول کورونویوردی .

اجناسک لایتغیر اولدوغنی ادعا ایدن عالم مشهور (کوویه Cuvier) طرفدارلری ایله (داروین Darwin) نظریه جدید سنی قبول ایدنلر یکدیگرینه مقابل و شدتله معارض بروضیت آله رق عظیم بر مناقشه آجیدلر . تدقیقات تجربیه و علوم طبیعی ، (استحاله transformisme) نظریه سینه حق ویردی . فقط عینی وسیله معارضه بوسفر استحاله اربابی آره سینه دوشدی . بر طرفدن تکامل فلسفه سنک بانیسی اولان (هربرت اسپنسر) ، (کسبی اولان تغیرات عضو به نک و بر طاقم قابلیات و خصائلک ارثاً انتقال ایتدیکنی) ادعا ایدیور ، و : (انتقالی قبول و تسایم ایدلمکجه ، استحالات عضو به بی ، اجناس جدید نک ظهورنی ، الحاصل کیفیت تکاملی تعریف ایده بیلیمک ممکن اوله ماز !) دیوردی . دیگر طرفدن - تکامل فلسفه سینه معتقد بولونان - آلمان علمای طبیعیونندن (وایسمان Weissman) ، بو طرز انتقالی انکار ایدیور ، و (وراثت Hérédité) نامیله نشر ایتدیکی اثرنده وراثتک طوغر وودن طوغر ویه (حجیره منتشه Cellule germinative) واسطه سیله وقوع بولدوغنی ایلری سورویوردی . وایسمان ، (عضویت بالغه) ده ، یعنی یتیشمش و کالنه ایرمش بروجوده ، عارضی اوله رق حاصل اولان تغیراتک ، حجیره مذکوریه قطعاً تأثیری اولمادیغنی تذکار ایدرک دعواسنی تحکیم ایله مک ایسته مشدر . مع مافیه مسئله هنوز موضع تدقیق و صحه مناقشه ده در علمای زمان آراسنده ، هرایکی نظریه نک ده طرفد رانی موجوددر .

پسیقولوژی لساننده (بر حاسه نک ادراک طبیعی سی La perception naturelle d'un sens) دینلدیکی زمان ، بر عضو حسنی نک (تهییج excitation) ندن - دفعه و آتی اوله رق - حاصل اولان حس خصوصی (sensation spécifique) مراد اولونور . کوزومزک برر نک حس ایتمه سی کی که (بو فعل ادراک acte de perception) ده (ارادت شخصیه volunté personnelle) مزک دخلی یوقدر . بو بر عامل خارجی (facteur extrinsèque) نک محض تأثیری در که بز اونی ، بلا واسطه تلقی ایدرز . وقوع حال بویله اولایوبده بو (اثر تهییج) ، بالواسطه حصوله کلیرسه ، یعنی

طوغرودن طوغرویه خارجی برعالمک تأثیریه وقوعبولایوبده دیگر بر حسک ایقاعی ایله پیدا اولوویررسه ، بویه بالواسطه حاصل اولان بر طویغویهده (کسبی *acquis*) دیرلرکه باقیسه مدرکات طبیعیک (صدمه تأثیری) دیمکدر. مثلاً اوزاقدن آتشک قیرمزی رنگی کورمکه، صیجاقلغنی ده - عادتاً - کورمش کی اولورز. لیون صیقلدیغنی کورمکه ، آغیزمز صولانیر ؛ عادتاً نه کشیلکنی طامش کی برحس طویارز . حالبوکه بومناستده (لامسه *le tact*) ایله (ذائقه *le goût*) مزک علاقوسی اولامشدر . بو ایکی حاسه مزک آز چوق تهییجی (باصره *la vue*) واسطه سیله در . ایشه بو مثاله طبیعی اولان مدرکاتمز ، آنجق کوزومزله تلقی ایده بیلدیکمز حسیاتدر . چونکه آتشک رنگی ، لیونک شکلی طوغرودن طوغرویه ادراک ایتشدر . دیگرلری ایسه بومدرکات طبیعی واسطه سیله کسب ایتش اولدوغمز طویغولردر ؛ اونک ایچون بالواسطه وبالنتیجه حاصل اولان بوایکنجی نوع طویغولره (ادراکات کسبییه *perceptions acquises*) ده نیلمشد . بناء علیه بر (حاسه *sens*) نک (ادراک کسبی) سی، دائماً دیگر بر حاسه نک (ادراک طبیعی) سی در . دیمک اولویورکه ادراکات کسبییه ، حقیقت حالده حواس مخصوصه نک ادراکات صحیحه سی دکل ، مدرکات صحیحه و طبیعی نک بالواسطه ایقاع ایتدیکی بر (خیال *image*) در [بوکله یه باقیکنز !] بونک بوصورتله حصولنده تربیه طبیعی نک و (تداعی *association*) نک [بوکله یه باقیکنز !] ، حتی محاکات خفیه نک (*inférence* لفظه باقکنز !] کلیاً دخلی واردر . قارشیمزده لیون صیقیلیرکن ملاح وجهیه مزک اشمترازی و آغیزیمزک صولانمسی ، محضا برحاکمه ، یعنی بر (عملیه ذهنیه *opération mentale*) نتیجه سیدر .

فلسفه مباحثه ده بو (کسبی) تعبیری چوق کچر وپک اهمیتلی مسائل ایله علاقه داردر . (مدرکات حسیه مزک طبیعی ویا کسبی اولمالری) بحثی پک مهم وپک غامض بر مسئله اطرافنده دوران ایدر . بونک بالخاصه زمین مناقشه سی ، (مبحث معرفت *épistémologie*) ک [بو تعبیره باقیکنز !]

دائرة صلاحیتنده در . حتی - ده یه بیلیرم که - پسقولوژی ، فلسفه یه بالخاصه بونقطه ده تماس ایدر ؛ وفلسفه نک (نه پیسته مولوژی) ده نیلن قسمی بونقطه ده اصل موضوع اشتغالی بولور .

فلسفه ده مدرکات حسیه نک طبیعی ویا کسبی اولماسی کیفیتی ، بالخاصه (علم بلاواسطه *connaissance immédiate*) و (علم بالواسطه *connaissance médiate*) مسئله مشهوره سیله صمیمیاً علاقه داردر . فقط ، بومسئله نک تضمن ایتدیکی مواد ، یالکزر ارکان واکوان حقنده کی افکار وحسیاتمز تعلق ایدن خصوصی بحثلردر . یعنی (ماده *matière*) ، (روح *esprit*) ، (زمان *le temps*) ، (مکان *l'espace*) کی (مبادی *principes*) یه دائر بزده موجود بولونان افکار وحسیاتک ، مدرکات کسبییه ویا طبیعی دن اولدوغنی ادعا ایدن ایکی فرقه فلاسفه میانه سندده متحدث بولونان دعوایه متعلق در . مثلاً - یوقاریده ایضاح وتعریف ایتدیکم وجهیه ضیایی ویا رنگی ادراک ایدیشمز (شبه یوق که !) دفعه و بلا واسطه حاصل اولمش بر حس مخصوصدر . عجبا مکانی حس ایدیشمزده بوکا بکزر برشی می در ؟ ... یوقسه ، سائر حواسمزک مدرکاتی اساس اتخاذ ایدره ک - ذهنمزک - بعدالحاکمه تحصیل ایتدیکی بر فکر واعتقاد می در ؟ .. (یعنی مکان حسی *le sentiment de l'espace* بزده برادراک طبیعی می در ؟ . یوقسه بر ادراک کسبی می در ؟ ...) ویاخود حکمای اسلامک تعبیر مشهورنجه : (مکان حقنده کی علممز ، بر علم ضروری می در ؟ .. یوقسه بر علم نظری می در ؟) ایشه بو تعییرات ایله علاقه دار بولونان اک مهم مسئله فلسفه بودر ؛ و بوسؤال ، ماده یه زمانه والحاصل بالجمله ارکانه دخی تشمیل اولونمشدر . حتی (الله) ک وارلغنی بالواسطه می ؟ . یوقسه بلا واسطه می حس ایتدیکنمز دائر (علم الهی *théodicée*) ده موضوع بحث اولان مسئله دخی ، ماهیتی اعتباریه اونه کی نک عینی در ؛ باشقه برشی دکلدر ؛ چونکه (الله) اصل (مبدأ اول *le premier principe*) در . (absolu کله سندده (قوزن *Cousin*) و (هاملتن *Hamilton*) مناقشه سندده عائد تفصیلاته باقیکنز !]

شمیدی، ارکان اصلیه نك بلا واسطه ادراك اولوندوغنی ادعا ایدن
فیلسوفلره (حدسیون les intuitionnistes) دیرلر . عكسینه اعتقاد ایدن
فرقه فلاسفه یه ده (استحضاریون les représentationnistes) دیرلر . برنجیلرک
(حقیقیه réalisme)، ایکنجیلرک ده (افتکاریه idéalisme) فلسفه سیله
صیقی صیقی به علاقه لری واردر . آرده جریان ایدن مناقشات، تمامیه (تحدس
intuition) و (استحضار représentation) مسئله سینه نظرله در، و منحصرأ
اوکا تابع در . مثلاً (représentationniste-idéaliste) اولان معاصرین
فلا-فه دن (جون ستوئته میل J. St. Mill) و (پروفیسور آلکساندر
بهین Prof. Alex. Bain)، - معارضلرینه قارشئ مسلكلرینی حقیقه
مدافعه ایده بیلیمك ایچون - ارکانه - انجق بالواسطه پیدای علم ایده بیلدیگمزی
ادعا ایتشلر و بودعوانك دلائل ثبوتیه سنی بسیقولوجی مباحثده آرامشلردر .
[تفصیلات ایچون représentation ، و espace کله لرینه باقیکنز !]

(ادراکات کسبیه) ایله (احتساسات مرتبطه sensations connexes) نی،
بر طوتمامالی در . برعامل خارجی، فرضا بر جسم ، عینی زمانده ایکی حاسه یه
بردن اجرای تأثیر ایده بیلیر؛ و بوتأثیرات متخالفه، دائماً مترافق بولونه بیلیر .
مثلاً (حس شامه l'odorat) ایله (حس ذائقه le goût) بویله در . اوقدرکه
برشئك قوقوسنی طعمندن فرق ایتك پك کوچ در؛ و بالطبع بوايکی حاسه دن
بربك تهیجی، دیگر حسی ده برابر ایقاع ایدر و بویله جه ایکی طویغو بربرینه
قاریشیر . ایشه بوکا (احتساسات مرتبطه) دیرلر . بونك برباشقه درلوسی ده
اولور : بر حاسه نك شدت تهیجی ، دیگر بر حاسه یی ده تهیج ایده بیلیر .
[پروفیسور (بهین Bain) بوکیفیتی برنوع (انشعاع rayonnement)
ایله تعریف ایدیور .] مثلاً بعضی کسکین صدالرو یاخود غیجیرتی نر دیشلرده،
معهده ده، (ناحیه قطنیه rég. lombaire) ده ناخوش برطویغو حاصل ایدر .
بعض تماسلر، اك اوزاق اعضاده اورپرملر حصوله کتیریر . بونلر ادراکات
کسبیه دن دکلدر . چونکه بوکی احوالده انجق احتساسات آرده سنده (مشارکت
وتداعی association) واردر . حالبوکه ادراکات کسبیه ده مشارکت ،
(استحضارات ذهنیه représentations mentales) آراسنده واقعدر؛ یعنی

بالذات طویغولرده دكل، اوطویغولرك ایقاع ایتدیکی (خیال image) لرده
اولور . بناء علیه بر حاسه نك طوغرودن طوغرویه برعامل خارجی ایله تهیجندن
حاصل اولان طویغو ، (بر حس حقیقی sensation vraie) در، اویله
اولونجه بر (ادراك طبیعی) در . اکر بو طویغو، برعامل خارجی نك طوغرودن
طوغرویه عضو مخصوصنه تأثیریه وقوعه کله یوبده باشقه بر حاسه نك تهیج
طبیعیسندن منبعث اولمش ایسه، (یعنی بالواسطه ایقاع ایدلمش ایسه !)،
اوطویغو بر (حس حقیقی) دکلدر؛ بر حس حقیقی نك انجق خیالی در؛
اویله بر (غلط حس illusion de sens) درکه بوسبوتون باشقه برعضوك
صدمه تهیجی ایله حاصل اولمشدر . ایشه اصل (ادراکات کسبیه) بوکیلدن
اولان طویغولردر . مثلاً اوزاقدن کوردکمز بر دره نك سرینلکنی ده برابر
کورمش اولوشمز کی! یاخود برتابلوده مصور اولان شیلرک، یکدیگرنندن
اوزاق اولدوغنی کوروشمز کی که بو بر خیالدر . زیرا ایکی بعدلی برسطح دن
عبارت اولان طابلوده مصور اولان شیلرک جمله سی دخی عینی سطح
مستوی ده در . یعنی طابلوده کی رسمك عمقی یوقدر . حالبوکه (کولکه وضیا
clair-obscur) معرفتی ایله رستم بزده بویله برغلط حس ایقاع ایدیور وایکی
بعدلی بر منظرده بز، اوچونجی بعدی ده کوریورز، ده رینلکی کورورکی
اولویورز . اونك ایچون بعض شیلری یاقین، بعضلرینی ده اوزاق کورویورز .
(ادراکات کسبیه) نك (حیز، مفهومی la notion d'étendue) ایله
علاقه سی واردر . بوکیفیت زیاده مهم وشایان نظردر . سقولاستیق فلسفه سنده
(sensibles communs صور حسیه مشترکه) دیدکلری بوایدی .
[تفصیلات ایچون بوتعیراته باقیکنز !]

اسلافدن بر طاقم فیلسوفلرك و محررلرك روایتیه کوره (مشائیه
péripatétisme) مسلكنك موجدی و آتنده (Lycée) مدرسه سنك
مؤسسئ اولان مشهور (ارسطو Aristote)، درسلرینی ایکی قسمه آیریرمش:
صبح وقتلری بالخاصه کندی طلبه سنی جمع ایدر - وعوام ناسدن، یابانچیلردن

کیمسینی بو دائرة خصوصيته قبول ایتمهرك - يالكز ممتاز اولان او زمره سامعینه سرستجه درس تقرير ایدرمش . مع مافیه علم و فلسفه منتسب اولمایان اکثریت ناسی دخی ، تعلیماتندن - ممکن اولدوغی قدر - مستفید ایده بیلیمک ایچون (غالبا اوکله وقتلندن صوکره !) افراد خلقدن مرکب بر جماعتهده آیریشه بر درس ویریرمش .

زمانمزلک عمومی قونفرانسیرنی آکدیران بو (اقشام درسلی) ، بالطبع ، جماعت ناسک سویه عقل و عرفانه موافق اولمق اوزره آچیق برلسان ایله تقرير اولونورمش ؛ موضوع اعتباریلهده هرکسی علاقه دار ایده جک مسائل و مباحثه متعلق بولونور ایش . استاد یونانیك خصوصی درسلیرینه (داخلی = *ésotériques* = *ἐσωτερικούς*) و عمومی تقريرلرینه (خارجی = *éxotériques* = *ἐξωτερικούς*) دیمشلوبالا خره محررات فلسفیه سنی ده بو تقدیره کوره ایکیه آیرمشلردر . ارسطونک بو طرز تدریسی بزه انتقال ایشمی بیلیم ! شایان دقتدرکه اولافاتح سلطان محمد زماننده مدرسه لر حقنده تنظیم اولونوب بالاخره قانونی سلطان سلیمان زماننده دها زیاده ضبط و ربطه انسان نظامنامهده تعیین اولونان مراتب و درجات ، بوکا پک بکزر ! (خارج !؟) ، (حرکت خارج) ، (داخل !؟) ، (حرکت داخل) ، (صحن ثمان) الی آخره . . . کبی مراتب تعییننده سلیمانیه جامع شریفنک بناسی نظر اعتباره آلمش و تحصیلده ترقی خارجدن داخله بر حرکت تدریجیه صورتیله تمثیل ایدلمشدر . طبعی درکه هنوز خارجده ، یعنی مراتب تحصیلک ایلك قدمه سنده بولونان طلبیه سطحیجه علوم آلیه مقدماتی کوستریلیر و داخله حرکت ایتدجه درس لر (موضوع اعتباریله) یوکسه لیر ، دائرة تدریس دخی اهمیت و خصوصیت کسب ایدردی . اک بویوک مرتبه علمیه دخی (صحن ثمان مدرسلکی) پایه سنی احراز ایتک ایدی .

ارسطونک مدرسه سی و اصول تعلیمی حقنده واقع اولان تدقیقات تاریخیه دن آز جوق وضوح ایله آکلاشیلیورکه ، بو حکیم یونانی همان همان بزم اسکی مدرسه ترتیبه بکزر بر طرزده تعلیماتده بولونورمش ؛ مختلف صنوف سامعینه کوره موضوع بحثی انتخاب و تعیین ایلر و هر صنف افرادینه

- علی قدر عقولهم - سوز سویلیهرك درس تقرير ایدر ایش . . . بویه اولونجه کنديسنگ محرم افکاری بولونان ممتاز شاگردانه ویردیکی درس لر ایله ، مدرسه باغچه سینه طولانان خلقه سویله دیکی سوزلر آره سنده ماهیت موضوع واسلوب بیان و طرز تقرير اعتباریله مهم بر فرق اولمق لازمکلیر . فی الحقیقه بو ادعاده بولونانلر ، آز دکلدرد . بعض مورخین فلسفه ، ادعا ایدیورلرکه ارسطو عموم ایچون تقرير ایش اولدوغی درس لر یازوب ضبط وقید آلتنه آلدینی حالده ، بر جوق مسائل مهمه حقنده افکار ذاتیه سنی انجق ممتاز طلبه سینه شفاها تبلیغ ایله اکتفا ایتمشدر . بو خصوصی فکرلری خلقه افشا ایتمکده محظور ، حتی تهلکه ملاحظه ایتدیکی ایچون ، اولنر ، اک محرم شاگرداننک حافظه سنده ودیمه اوله رق قالمش و اورادن - ینه شفاها - یعنی نقلاً تعلیم ایدلمش و صوکره یاواش یاواش انتشار ایلمشدر . ایشته اصل (سمعی *acroamatique*) اولان تعلیماتی بوقیلدن اولانلریدر . فی الحقیقه ، یونانی قدیم لساننده (*ἀκροατικούς*) کله سی (*ἀκροαομαι*) مصدرندن مشتدرکه (ایشیتیمک) دیمکدر . بوتعیر اصطلاحی نك منشأی ده بودر .

شو تقدیرجه بو کله ، (*ésotérique*) دن دها خصوصی برمعنا افاده ایدر و بر فیلسوفک هرکسه افشا و تعلیم ایتمکدن چکیندیکی و یالكز صمیمی و محرم بعض دوستلرینه شفاها تبلیغ و تودیغ ایده بیلدیکی افکار و اعتقاداته (وصف) اوله رق قوللانیلیر .

شرقدده پک چوق فیلسوفلرک بویه شفاهی تعلیماتده بولوندقلرنده شبهه یوقدر و اسبابی آکلامق ده زور دکلدرد . مثلاً (ابن سینا) و بو حکیمک اثرینه اقتفا ایدن (مثلاً صدرای شیرازی) نك محررات مشهوره سینه باقیلیرسه تمامیه ارسطو وفلاطونک افکارنی برلشدیروب سقولاستیق اصوله توفیقاً ترویج ایش اولدقلری کورولور ؛ همد صراحة کورولور . حالبوکه بو بویوک فیلسوفلرک اخص شاگردانی - حتی بالذات کنیدی لری بیله ! - ادعا ایدیورلرکه یازدقلری اثر لر عموم ایچون (تعلیمات رسمیه) در . (زمانه

فلسفه‌سی در). مسائل غامضه حقنده اعتقادات شخصیه لری - مختصراً ؟ ! -
بر رساله ده مندرجدر و (نسخه‌سی نایاب ؟) در .
اکلاشیلیورکه بونلر (acroamatique) بر طاقم تعلیمات خصوصیه
اولمق کر کدر ! ..

ارسطو نامنه بزلره انتقال ایدن سلسله آثارک، کندی قلمندن صادر
اولدوغی محقق دکدر. بالعکس، طلبه‌سی طرفندن ضبط اولونمش وبالاخره
آز چوق تعدیلات وتصحیحاته اوغرامش محررات اولماسی احتمالی غالبدر .
بو ملاحظه مبنی درکه استادک اثرلری، نیجه عصر لردنبری (exotérique)
و (acroamatique) اولمق اوزره ایکی قسمه آیرلمشدی . بو آثارک
شارحی، مشهور (سیمپلی چیوس simplicius) [که میلاددن بش عصر
صوکره کیلیکیاده طوغمشدی !] بوتقسیمک ایلک موجدیدر، ظن اولونویور.
بوزات، بوایکی طاقم آثارک صفت کاشفه‌سی اولمق اوزره باشلیجه فرقلرنی ده
تعیین ایدیور : (استاد، خواص شاگردانه تقریر ایتدیکی درسدرده موجز،
جامع الکلم سوز سویلردی؛ و ایضاحاته حاجت کورمیه رک تفصیلاتی کلیاً
اهمال، و مبادیدن مقاصده؛ مقدماتدن نتیجه - کمال سرعتله طوغرودن
طوغرویه انتقال ایدردی) دییور. شو روایت کوره فرق موضوعاتده
اولیوب اسلوب تقریر و شکل تدریسده اولمق لازمکیر. حالبوکه مشهور
(پلوتارخ Plutarch) : (ارسطونک خصوصی تعلیماتی حکمت، طبیعات
و منطقه دائر ایدی؛ خارجی درسلی ده بلاغت، اخلاقیات و سیاسیه
متعلق بولونوردی) دیه ادعا ایدیورکه شوقدیرجه دخی فرق، شکل تقریرده
اولیوب بالخاصه (موضوع بحث) ده ایمش، دیمک چیقار.

(چیچهرن Cicéron)، (سترابون Strabon)، (آمونوس
Ammonius) هپ (سیمپلی چیوس) کی سویلورلر، یعنی برنجی ادعایه
طرفداردرلر.

بوراده یالکنز اهمیتلیجه بر نقطه وارکه شبه آلتنده قالملی در. عجا
ارسطونک شفاهی تعلیماتده اکثریت خلفندن کیزلی طوتولماسی لازمکن
(اسرار انکیز mystique) برشی وارمی ایدی ؟ ... مثلاً بزده (باطنیه

(les ésotériques)، یهودیلرده (باطنیه حروفیه les cabalistes) یونانیلرده
(هرمزیه les hermétiques) الی آخره کی صوفیانه فرقه لرك (اسرار
mystères) ینه مشابه برشی وارمی ایدی ؟ .. بو بر مسئله در .

ارسطونک حیاتی لایقوله تتبع و تحقیق ایدن (بله قسله Blakesley)،
بویوک انکیز آنسیقلوپه دیسندو بو مسئله ده دائر شویله سویلور :
(قطعاً ثابت اولمشدرکه ارسطونک (acroamatique) اثرلری دیگرلرندن -
موضوعاتک مغلق واسر رانکیز اولسیله دکل - فقط انحق (اصولی systematic)
اولسیله ممتازدرلر . یعنی بونلر مطرد و (متسق coordonné) بر منظومه
فلسفیه تشکیل ایدرلر . عوامه ویردیکی درسلر ایسه رابطه سز و مستقل
بعض مسائل حقنده کلیشی کوزل مباحثاتدن عبارت قونفرانس لر نوعنددر !)
بو ادعا يك طوغرو کورونور؛ زیرا ارسطوده تصوفک شمه‌سی بیله
حسن اولونه مامشدر. اوسیله درکه بوکون اصطلاحده (acroamatique)،
(encyclicque εγκυκλίον) مرادفی اوله رق تلقی ایدیلور؛ یعنی موجز،
کلی و عمومی درسلر معناسنه کایور. حالبوکه (ésotérique) کله‌سی
(اسرار انکیز تعلیمات صوفیه) معناسنه تخصیص اولونویور. (mysticisme،
ésotérique، mystère، Coufisme سوزلرینه باقیکنز !)

Acte

Acte

نعل

Act

انکیزجه

That, handlung

آمانجه

Atto

ایتالیانجه

بوتعبیر ارسطونک وضع ایش اولدوغی (ἐπεργεία) لفظنک ترجمه سیدر.
scholastique سکولاستیق (بوسوزه باقیکنز !) فلسفه سنده بویوک بر
اهمیتی واردی. بوکون تاریخ فلسفه ده ذکر کی کچر بر لغتدر. لسان عادی ده
و حقوقده ینه جاریدر؛ فقط (action عمل)، معناسنه کلیر (l'acte criminel
فعل جنائی) کی . [قاموسک حقوق قسمنه باقیکنز !]

ارسطو وقوع حادثاتی یعنی علی العموم تبدلاتی معقول بر صورتده
تعریف ایده بیلیمک ایچون بر نظریه دوشونمشدی : ذاتاً موجود اولان بر

شیئک قوه دن فعله کچمکده اولدوغنی تصور و بیان ایتشدی . (قوه Puissance) به (δύναμις) ، (فعل) ه دخی (ενεργεία) دیوردی . بناءً علیه ارسطو اعتقادنجہ تګون بالقوه موجود اولان بز شیئک بالفعل وقوعی ایدی . فقط بو حکیم یونانی ، فعلی منحصرأ حرکت و تبدل ایله برطوتمیوردی . اونک نظرندہ (وارلق) ذاتاً (فعل) دیمکدی ؛ ووجود (τὸ ὄν) دائماً تګونده اظهار استعداد ایدہ طورویوردی . یعنی (وجود) بلا فاصله قوه دن فعله چقیور و بناءً علیه دائماً تبدلده بولونیوردی . ایشته لاینتقطع واقع اوله طوران بوتبدل ، ارسطو نظرندہ (صیوروت devenir) دیمکدی . اکلاشیلورکه ارسطو وارلقی حدذاتندہ عاطل فرض ایتمیوردی . (بالقوه) موجود بر (وارلق) ایله آریجہ بالفعل بر ایکنجی وارلق دوشونه میوردی . اگر بویله ایکی درلو وجود تصور ایتش اولسه یدی بالقوه واراولان برشیئ فعله کتیرمک ایچون براوچونجی وجوده احتیاجدن مستغنی قاله مازدی . او وقتده تګون ، دور و تسلسله دوشردی .

بالقوه و بالفعل تعیرلری قرون وسطی فلسفه سنک همان هر بخته قاریشدیرلمش بولندوغی ایچون فوق العاده زبازرد اولمش کلمات مشهوره دندر ؛ بزم لسانمزده دخی ارسطونک تقدیر ایتش اولدینگی معنا اوزره تعین ایتشد . (مشائیون Péripatéticiens) (بوسوزه باقیکنز !) فلسفه سیله بزه عیناً انتقال ایتش اولسه کرکدر . مثلاً برمیشه آغاجی ، اونک میوه سی اولان پالامودده بالقوه موجوددر ؛ فقط پالامود عاطل دکدر ؛ زیرا اونک استعداد ذاتیسی برمیشه آغاجی وجوده کتیرمکدر . میوه ده بو قابلیت فعلیه هر زمان واردر . او تخمک فیلزئوب نشوونما ایتهمسی و یواش یواش اغاج اولهمسی ، دال بوداق صالیورهمسی ، پالامودده بالقوه موجود و مندج اولان استعداداتک فعله چقیمه سی دیمکدر . ایشته بو حرکت ، (صیوروت) در ؛ تګون ، دائمی بر صیوروتدر . ارسطونک نظرندہ (عقل) دخی طبق بویله در : عقل ده کی استعداد ذاتی ، حقیقتی ادراک ایتک و بو فعالیتی ایله محظوظ اولمقد . اونده بالقوه موجود اولان بو استعداد دائماً تجلی ایتکده و تجلی ایتدکجه انکشاف ایلکده در . ایشته عقلک استعدادات ذاتیه سی بویله قوه دن فعله چقیمده

دوام ایتدکجه عقل تکامل ایدر . ارسطونک (intellect) دیدیکی بودر . [تفصیلات ایچون بویله باقیکنز .]

Actif

فاعل Actif

فاعل ، بالذات اجرای فعل ایدنه دیرلر ؛ ضدی (منفعل passif) در . دیگر برضدی ده (عاطل inerte) در .

بو تعیرلر دخی ارسطونک تعلیماتیه شهرت بولمش وقرون وسطاده سقولاستیق فاسفه سنده خیلی زبازرد اولشدر . حتی ارسطونک (مقولات عشره les dix catégories) سندن بری ده (فعل action) در . [catégories سوزینه باقیکنز .]

زمانز فلسفه سی بوتعیره تکرار مراجعت ایدرک اونکی بر حیثیت ایله قوللانمشدر . مثلاً بر (حادثه فاعله phénomène actif) و بر (حادثه منفعله Ph. Passif) تعیرلری بوکونکی علم روح لساننده جاریدر ؛ وپک اهمیتلی مباحث فلسفیه ده بو ترکیباتک ذکر یکنر . (حادثه فاعله) بالذات فعالیتیه ده نیلیدیکی کبی ، فعالیتده بولونان بر وجودده او فعالیت سببیه حاصل اولان تغییراته دخی ده نیلیر . بالعکس یالکنز خارجدن کلن عواملک تأثیراته معروض قالان بر وجودک انفعال و تأثیری بر (حادثه منفعله) در . مثلاً ضیا ورنک ویاخود صدا ویا حرارت حس ایتک بر حادثه منفعله در . چونکه ارادت ذاتیه مزک بوادرا کده قطعاً دخلی یوقدر . حالبوکه بر برینه نسبتله ده اوزاقده ویا ده ایاقینده بولونان متشابه الاشکال - ایکی شیئ کوروب مسافه فرقی ادراک ایتک بر (حادثه فاعله) در ؛ زیرا بودرلو ادراکده بزم کندی ارادتمزک دخلی اولدینگی ، بوکون ارتق شبه کورتورمز بر حقیقت علمیه در . [accomodation, acquis سوزلرینه باقیکنز !]

(نظریه علم Théorie de la connaissance) (بوسوزه باقیکنز !) مسئله سنده بوتعیراتک پک مهم مباحث ایله علاقه سی واردر . عالم خارجییه تعلق ایدن علممز عجبا بزده دفعه "و" بلاواسطه (immédiatement) می حاصل اولویور ؟ .. یوقسه بالواسطه می ؟ .. بوسوال فلسفه ده ال بویوک مسئله لردن برینی تشکیل ایدر . بوکا فیاسوفلر ایکی درلو جواب ویردکری ایچون ،

(مبحث معرفت épistémologie) (بوسوزه باقیکنز!) ده دخی ایکی مذهبه آیرلمشلردر. بر قسمی (علم تحسینی connaissance intuitive) طرفدار. لری درکه حکمای اسلام بوکا علم ضروری دیرلردی!، دیگر بر قسمی ده (علم استحضاری connais. représentative) طرفدارلری درکه بوکاده بزده علم نظری دیرلردی! [بوسوزله باقیکنز!] بو بحثك شرح موافنده اوزون اوزادی به مناقشاتی کچر.

بو ایکی فرقه فلاسفه آره سنده آچیلان وحالا دوام ایدن دعوانك نقطه استنادی، کیفیت ادراکده ارادت و محاکمه مزك دخلی اولوب اولمامسی مسئله سی در. ادراکك، یعنی ایلک بیسلکیك بر (حادثه فاعله اولوب اولمامسی در.

بو مسئله ده (سرویلیام هاملتن) ایله مشهور (جون ستونوت میل) آره سنده واقع اولان تعارض اعتقاددن ناشی (میل) پك مهم بر اثر یازمش و (علم استحضاری) به طرفدارلغنی اظهار ایتشدر. (بهین A. Bain) دخی میلک اعتقادنده در. بوفیلسوفلر دعوانی تحکیم ایچون کیفیت ادراکده ارادت و محاکمه مزك بالخاصه دخلی اولدیغه دأثر تحلیلات بسیقولوزیه (analyses psychologiques) نك ویردیکی معلوماته استناد ایتشلردر. (représentation) سوزینه باقیکنز. [

كذلك (f. Passives fonctions actives) ویا خود (facultés actives) ملكات فاعله و (fac. passives) ملكات منفعله) تعبیرلری ده صوك زمانلرده چوق قوللانلغه باشلامشدر. دقت، ارادت ملكات فاعله دندر؛ چونكه نفسك بالذات تشبثی و توجهی ایله ممکن اوله بیلیر. (حس، sensation) ملكات منفعله دندر، چونكه بو حالدۀ نفس، یالکز عوامل خارجیه نك تأثیراتی تلقی ایتمكه قالیر. بونك كبی، مثلاً: تقلص عضلی طوغرودن طوغرویه جمله عصبیه نك تأثیر ارادتی ایله واقع اولورسه (actif) صایلیر؛ خارجی ویا بانجی برعالمك، فرضاً جریان الكتریقی نك تأثیریه اولورسه (passif) اولور. اكلاشیلیوركه ارادت نفسك دخلی اولوب اولماق بوخصوصه علامت فارقه در. [facultés, acquis actuel سوزلرینه باقیکنز!]

اسلام فیلسوفلرینك آثارنده وعلی العموم قرون وسطانك سقولا ستیق فلسفه سنده (intellect actif) مسئله سی برنجی درجه ده اهمیتلی بر بحث تشکیل ایدر. ارسطونك ایجاد ایتدیکی بر نظریه مشهوریه علم اولان بوتعبیر دخی استاد یونانی نك در. بونی بزم شرق فیلسوفلری (عقل فعال) دیه ترجمه ایتشدر و بویه جهده مشهور اولمشدر. (ابن سینا)، (ابن رشد)، (الغزالی) کبی عالم اسلامك کبار حکماسی آره سنده بحث ایدن اکثر مناقشاتك اساسی - نهایتۀ الهیاه - (عقل فعال) حقنده بعض اختلافاته منجر اولور. [تفصیلات ایچون intellect سوزینه باقیکنز!]

فعل Action

Action

لسان عادیده فعل، ایش دیمکدر؛ دها طوغروسی بر ایشك طرز و صورت وقوعه اشارت ایدر بر تعبیردر. اقتصاد لساننده (حصه سندی) معناسنه کلیر.

فلسفه ده، ارسطونك (مقولات عشره) سنده داخل اولمقه مشهوردرکه مقابلی (passion انفعال) در. [catégories به باقیکنز.]

لسان علمده (réaction عکس فعل، عکس تأثیر) مقابلی اوله رق قوللانیلیر واهمیتی مسلم اولان (مبادی Principes) دندر. (بوسوزه باقیکنز.) بومبداء، (La réaction est opposée et égale à l'action) دستوریه ادا ایدلمشدر. غازانك تضییق اولونمسنده بو کیفیت عادتا حس اولونور. مع مافیه عمومی بر پرنسیب درکه تحقیقات و تطبیقاتی، علم ماكنه نك (دینامیق dynamique) قسمنه عانددر.

(Principe de moindre action فعل اصغری مبدائی) دخی واردر، حتی بونی بر مبداء اولمقدن زیاده بر قانون اولمق اوزره تلقی ایدن بر چوق علما بوکا (la loi de la moindre résistance مقاومت اصغریه قانونی) دخی دیمشدر. (بونك ماهیتنی مختصراً اكلامق ایچون بر مثال ایله تعریف ایدیم: مثلاً، توتر بخار، واپورك قازاتی باطلا ده جق اولورسه اوقازانك جدراننده هانکی نقطه، بخارك تضییقه الكآز مقاومت کوستریورسه

مطلقاً اورادن باطلاق ویزیر . ایشته (مقاومت اصغریه) تعبیرینه سبب بو کیفیتک تحقیق در . فقط اوقازانک سطح داخلینه توتر بخارک اجرا ایتدیکی فعل تضییق ، نظر دفته آلیئر ، مسئله اونقطه نظر دن تذکر اولونورسه ، اکلایلیر که توتر بخار ، قازان جدارینک بالخاصه اک ضعیف نقطه سینه اصغری بر تأثیر اجرا ایتکه قازانی باطلاده بیلیر . ایشته (فعل اصغری) تعبیرینه سبب دخی بو نقطه نك هرشیدن اول ملاحظه اولونماسی در . کویا طبیعت بر تأثیر اجرا ایدرکن قوتنده تصرف ایدیورمش و اک آز مصرفله ایش کورو یورمش کبی دوشونلر دخی بولونوغی ایچون مقاومت اصغریه مبدای (قانون تصرف loi de parcimonie) (بوسوزه باقیکز!) اک بر شکل دیگرده دستور افاده سی اولمش اولویور .

(علت غائیة cause finale) ، [بوتعیریه باقیکز!] طرفداری اولانلر بوقانونی کندی سیاق نظرلرینه کوره تفسیر ایدیورلر ؛ چونکه ، فی الحقیقه حادثات طبیعیہ معقول بر صورتده تعریف ایده بیلیمک ایچون کندی عندی دوشونجه لر مزی طبیعت کلبیه عطف ایده جک بروضعیت فکریه آلیرسه ق بهمه حال (علت غائیة) یه قدر واریرز و مجبوری اوله رق واریرز ؛ ایشته طبیعتک ، قوتنده تصرف ایدوب اسرافادن چکیندیکنی فرض ایتک ، علت غائیة فرضیه سینه دوشمکدر . بوده ، طبیعت عقل و فکر و ارادت اسناد ایتدجکه اوله ماز . حالبوکه روح علم ایلہ بوفرضیه نك توفیق قابل دکدر .

هر حالده کاه قانون ، کاه پرنسیب حیثیتله تلقی اولونان بو کیفیت ، عندی بر فرضیه ایلہ تعریف اولونمقدن زیاده میخانیکی بر صورتده ایضاح ایدیلہ بیلیر ؛ و (مقاومت اصغریه) تعبیرینی ترجیح ایتک اولادر ، زیرا (moindre action) تعبیری ، قوتده ویا عملده برنوع تصرف ، برنوع نه قونومی معنایی اشارت ایتدیکی ایچون ذهنلری شاشیرتیور و طبیعت هر حرکتده اول باول مقصدانه بر صورتده طاور انوب قوتی تصرف ایتک خصوصی دوشونویورمش کبی برظن ایقاع ایدیورکه اساساً یا کلش در . بو پرنسیبی هر هانکی جنس حادثات ساحه سنده تبع ایتسه ک کورورز که میخانیکی بر صورتده تعریف ایتک ، علت غائیة فرضیه سینه دوشمکدن اولادر و چوق دهامعقولدر .

مثلاً بر آغاجک کوکلیری بر آلتده حجره بحجره ایلریله رک انتشار و تشعب ایدر ؛ فقط بر جذرک ایلریله مه سنده وجهه استقامت بالطبع مقاومتک اک آز اولدوغی طرفه طوغرودر . بر طاشه تصادف ایدرسه ، طبیعی اونی ده لوب کچه مز ، ایته مز ، یاننده کی میوشاق ورطیب طوپراغه طوغرو یورور و طاشک اطرافنی طولاشیر . اونک ایچون اغاج کوکلیری اویلہ عجائب یامری یومرو بر شکل آلیر . شمدی دوشوته لم : کرک زمان ، کرکسه قوت اعتباریه ، طبیعتک بونده تصرفی نهدر ؟ .. بالعکس جذرلر خط مستقیم اوزره نشوونما بولمامش ، و بعض موانعک خیلولتدن ناشی اعوجاجاته مجبور بولونه رق انتشار ایتمش اولدوغی ایچون ، دها زیاده زمان وقوت صرف اولونمش دیمکدر . بناءً علیه تصرف فرضیه سی بوراده تحقیق ایده میور احوالده بوسیاق نظر ، صرف عندی برظنه مقارن اولدوغی ایچون باطلدر . بومبدای اک اول کشف ایدن ذات (مورچیوس Pierre-Louis Maureau de Maupertius) درکه بویوک فرمده ربقک نظر توجهنی قازانمش ، حتی فرانسر اولدوغی حالده ، اونک نفوذیه برلین آقاده میسی رئیس اولمشدی . فقط ایکنجی درجه ریاضیوندن صاییله بیلن بودات ، بوکون فیلسوفلر میاننده ذکر بیلہ ایدلیور . فعل ، (ارادت volonté) و (حیات vie) اک اک باهر و ظاهر تجلیسی در . بوفعالیتی قوای مادیه نك (محصله résultante) سی کبی قبول ایدوب (دماغ le cerveau) ک (فعل ووظیفه fonction) سی اولمق اوزره تلقی ایتک ، (مادیة matérialisme) فلسفه سنک اساس ادعاسیدر . ماده نك فعالیت ذاتیه سی انکار ایدوبده هر نوع فعل و حرکتی مستقل بر روح قابلیت ذاتیه سی کبی تلقی ایتک (روحیه spiritualisme) فلسفه سنک مبدأ اعتقادیدر . بو ایکی مذهب آره سنده توکنمک بیلیمین مناقشات و اختلافاتک ، هان جمله سی ده نهایت تحقیقده بوایکی ضد دعوایه منجر اولور . [تفصیلات ایچون (matérialisme) و (spiritualisme) سوزلرینه باقیکز!] اجتماعیات و پولتیقه لساننده مشهور اولان (réaction) لفظی ایچون (agir) کله سینه مراجعت ایدیکز !

سقولاستیق تعیراتنددر؛ قرون وسطی حکمای بو لفظك تعریفده
(quod est in actu) دیمشردی که ارسطونك (τὸ ὄν κατ'ἐνέργειαν)
سوزلرینك عیناً ترجمه سی در. (اوشی که حال فعالیتده در) دیمك اولور.
حکیم یونانیك بو خصوصده فکری شو ایدی: بالقوه موجود اولان
بر شینك وجودی هنوز انحق ممکندر؛ اواکان دائره سنی آشوبده قوه دن
فعله کچرسه، او وقت حقیقتاً موجود اولور. مثلاً بر بوغداي دانه سنده
نشوونما قابلیت انحق امکان دائره سنده موجوددر؛ چونکه هنوز بالقوه
موجوددر؛ فقط شرائط لازمه بی جامع بر زمین مساعد بولوبده بالفعل
نشوونما باشلانجه، او قابلیت فی الحقیقه اثبات وجود ایدر. بناءً علیه
(actuel)، — شوتقدیره کوره — (حقیقی réel) معناسی ده متضمن
بولونویور؛ چونکه بزم ایچون حقیقی ثابت اولان شی اول امرده تأثیریه
بالفعل اثبات وجود ایدن شیدر. او سیدن طولانی درکه (actuel)
حال حاضرده موجود ویا واقع اولمده بولونان حادثات وکیفیاته دیرلر. او
تقدیرده دخی اویله بر شی بهمه حال بزه اجرای تأثیر ایدرك موجودیتی
— حالاً! — احساس واثبات ایلر. لسان عادیده دخی معناسی ذاتاً بودر.

(نظریه علم Théorie de la connaissance) بحثده (actuel)
لفظی بو صوک زمانلرده پك بویوك بر اهمیت قازانمشدر. حقایق
اشیایه بلا واسطه (یعنی طوغرودن طوغروه حواسمز دلالتیه) مطلع
اوله بیلیرمی یز؟ اوله مازمی یز؟... سؤال مشهورینه قارشی، زمانمز
فیلسوفلری ابتدا: اساسی بر نقطه ده اتفاق ایتمشلر؛ «(علم بلا واسطه
connaissance immédiate)، انحق (حالی actuel) اوله بیلیر؛ حالی
اولان شی ده بهمه حال (حقیقی réel) اولق کرکدر. «قضیه سنی ایلری
سورمشلردی. بناءً علیه: یالکزشوآن واحده طویدوغمز، تلقی ایتدیکمز
شیلر انحق (actuel) در؛ وانحق اونلر بزه بر علم ضروری افاده ایدر.
زیرا انحق اونلرك حقیقی شبهه کونورمز؛ بوندن ماعدا بیلدیکمز شیلرك

جمله سی ده یا حافظه مزك مودوعاتنددر؛ یاخود عقلمزك محاکاتیه — بالاستدلال
— حاصل ایتدیکمز افکار و ملاحظات قیاندندر. حالبوکه معلوماتمزك
یالکز (تحدسی intuitif) (بو سوزه باقیکز!) اولان قسمنه تمامیه
وبلا تردد اعتماد ایده بیلیرز. زیرا انحق اونلر (حس صمیمی sens intime)
مزك یعنی وجدانمزك شهادتیه مصدقدر. یالکز اونلر بسیطدر، غیر قابل
تحلیلدر و بو حیثیه بالجمله معلومات ممکنه مزك عناصر و مبادیسی، یعنی ارکان
ابتدائی سنی تشکیل ایدرلر؛ چونکه یالکز اونلر (actuel حالی) درلر. «
دیمشلردر. بوکون هر فیلسوف بو نقطه ده متفق الرایدر. یکدیگرینه
طابان طابانه ضد وشدته معارض اولان مذهب اربابی بیله علم ضرورینك
مبدأ معلومات اولدوغنی وانحق (actuel حالی) اوله بیله جکنی ادعا
ایدیورلر. مثلاً (هاملتن) و اوکا شدته معارض اولان (میل) کبی که
هر ایکسی ده بومسئله ده فکرلری عیناً وصراحه بیان ایتمشلردر.

زیاده سیله دفته شایاندکه کیفیت علم بحثده بوسباق نظره اتباع ایتک،
فیلسوفلری (phénoménisme حادثیه) زمیننده برلشدرمشدر. یعنی
بوکون هر فیلسوف شو حقیقی قبول ایدیورکه، ایچنده بولوندوغمز شو
(کائنات Univers) انحق بر (عالم حوادث Monde phénoménal) در.
بز بو عالمك (حقیقت ذاتیه réalité essentielle) سنی بیلیمورز؛ بیله -
میورز! بیلسه یدك، حقیقت بحثده (مختلف فیه Problématique) بر
مسئله قالمایه جنی ایچون فلسفه یه ده حاجت قالمازدی. بیلدیکمز، صرف
حادثاته واونلرك صور واشکالنه متعلق شیلردر. باقیسی هب بو عناصر
علمیه دن کندی محاکاتمله استخراج ایده بیلدیکمز، غندی ونسبی بر طاقم
فرضیاتدرکه اونلری محض حقیقت صانیرسحق پك فاحش بر خطایه دوشمش
اولورز. شبهه سز بیلدیکمز بر شیلر وارسه اوده انحق کندی حسیات
وتأثرات (حاضره Actuelles؟! مزدر. بوده اثبات ایدیورکه بوتون
معلوماتمز relatif) در؛ هم (phénoménal حادثاته منحصر) در؛
همده (انفسی الطبیعه Subjective par sa nature) در. یقیناً استشعار
ایده بیله جکمز مدرکاته، کلنجه، اونلر انحق (actuelles حالی) در.

ایشته زمانم زده علی الاطلاق حاکم بولونان و (علم بشرک اضافیتی
Relativité de la connaissance humaine) دستوریه یاد اولونان بو
فلسفه ده (actuel) تعیرینک نه قدر مهم بر حیثیتی حائر اولدوغی کورولویور.
[تفصیلات وایضاحات خصوصیه ایچون (Relativisme, subjectivisme)
سوزلرینه باقیکز .]

لسان علمده بو کلمه ، مقابلری اولان (potentiel) ، (virtuel)
تعیرلری ایله برابر قوللانیلیر . (حکمت طبعیه physique علماسی بو
لغتری (énergie قدرت) کلمه سی ایله برابر قوللانیلیر .)
tielle قدرت مکنیه) ، هنوز قوه ده اولان قدرت و قابلیتیه دیرلر . مثلاً
باروتده مکنین اولان تو ترکیبی که جزئی برقیوبلجم ایله تظاهر ایدر و اووقت
(énergie actuelle) اولور و آثار فعلیه حصوله کتیریر . کذلک بر
ساعت زنبیره کی دخی قدرت مکنیه نک قدرت فاعلیه تحول ایتسنه ای بر
مثال عرض ایدر . (virtuel) ایله (potentiel) آره سنده معناه فرق
یوقدر . فقط علمای ریاضیه بو قدرت مکنیه نک انواعی تعیین ایدرک
هر برینه براسم وضع ایتشلردر . مثلاً (énergie chimique قدرت کیمیویه)
باروت مثالده اولدوغی کی ! (énergie de position قدرت وضعیه) بر
نقطه یه نسبتله یوکسکده بولونان بر ماده نک بالقوه حائر اولدوغی قابلیت کی !
مثلاً یوکسکده بولونان بر صو کتله سنک وضعاً حائر اولدوغی قوت کی که شلاله
صورتنده قدرت فاعلیه تبدل ایدر . الی آخره . . . بو (قدرت مکنیه)
صورتلرینک جمله سی ده لدی التحقیق (énergie de position) ه منجر
اولویور . حتی قدرت کیمیویه بیله ، عناصر ماده نک بر صورت مخصوصه
اوزره ترتبه عطف اولونه رق تعریف ایدلیکی ایچون ، اوده (قدرت
وضعیه) انواعندن بری اولمق اوزره قبول ایدیلور .

بسیقولوی ده ، بر خاطر ، (actuel حالی) اولور . اکر شو آنده یاد
ایدیلوبده احیا اولونورسه ! تذکر اولونمازسه ، (virtuel) صایلیر ، یعنی
بالقوه موجوددر ، لکن انجق بعض وسیله لرله تکرار احضار و احیا اولونه بیلیر
دیمکدر . کذلک هر کس لسانی انجق بالقوه (virtuellement) بیلیر ؛

چونکه بیلدیکی لسانی ترکیب و تشکیل ایدن بالجمله کلماتک هپسی بردن ، آن
واحدده ! کیمسه نک ذهنتده مستحضر دکدر . کیمسه بوتون بر لسانک
بالجمله کلماتی بر آنده استشعار ایده مز ؛ فقط لزومه و صرسته کوره هر
کله یی خزانه حافظه سندن آلوب احضار ایده بیلیر ، و سوبلر ؛ اووقت حالاً
(actuellement) بیلمش اولور .

صوت حواس

Acuité des sens

فرانسجه

Acuteness of senses

انگلیزجه

حواسک کسکینلیکی دیمکدر . اوتهدنبری مؤلفات شریقه ده (حدت)
کلمه سی بومعنا ایله تلقی اولونه رق لسان اصطلاحه کچمشدر . (حدت ذکا)
تعیری مشهوردر که فارسیدن بزه انتقال ایتش اولان (زیرک) لفظی
بومعنایه کلیر . یالکز ، بو کلمه نک معنای اصطلاحیسنده یا کیلما مالی در :
حدت حواس ، فرط حساسیت دیمک دکدر ؛ برحاسته نک - حد اوسط
فوقده au dessus de la moyenne - فاروق اولماسی ، یعنی محسوسات
آره سنده کی ایجه فرقلری تمیز ایده بیلمه سی در . برانسان خسته اولور
وبوسیله فوق العاده (حساسیت sensibilité) آرتار ؛ چونکه (حواسنک
قابلیت تشنجی irritabilité des sens) آرتار . مثلاً ، اک خفیف بر
(حزمه ضیا faisceau de lumière) یه کوزی تحمل ایده مز ؛ اک خفیف
برجیتیریدن (سامعه l'ouïe) سی متأذی اولور . حدت حواس دیدیمکز
قابلیت تمیز ، بویه بر حساسیت مرضیه دکدر . کوز ، اکر ، رنکدرک
اک نازک (نوانس nuance) لرینی فرق ایده بیلیرسه ، (حاسه بصر حاددر)
ده نیلیر . قولاق ، اک ایجه سس فرقلرینی تمیز ایده بیلیرسه سامعه نک حاد
اولدوغی تحقّق ایدر . خلاصه حدت حواس ، بر برینه پک یاقین اولان ایکی
طویغونک فرقنی بر آنده تمیز ایده بیلمک قدرتی ، در . برحاسته ده بوقدرت
آرتما دینی حالده حساسیت فوق العاده زیاده لشه بیلیر ؛ بو حساسیتک - اربانه -
فائده سی یوقدر ، حالبوکه حدت حواس بویوک برصنفتکار اولمق ایچون

الزمدر : حتی (دهای هنوری) ایچون بو ، برنجی شرطدر . التي یوز کشیک بر (اورکسترا orchestre) طاقنی اداره ایدن برآمدک ، او-باش دوندوروجی - هنکامه آهنگ آره-سینده ، بر (دیبهز یاخود بهمول Dièze ou bémol یعنی یارم سس) فالصوسی حس واطظار ایتهمی ، سامعه نك حدتنه برکوزل مثال تشکیل ایدر . کذلک ، صارارمش بر صارماشیق یپراغنی کورور کورمز ، همان مختلف بویالری مناسب مقدارده قاریشدره رق ، او (قوری - یپراق) رنگنی تعیین ایدیورن بر رسامک شوقدرتی ، باصره نك حدتی اثبات ایدر . بوقابلیت ، بعض (مراکز عصبیه نك centres nerveux) و او مرکز لر پیوسته اولان (اعصاب محیطه nerfs périphériques) نك رقت ، صحت و مکملیتته دلالت ایتدیکی ایچون جبلی اولدوغی ادعا ایدلمشدی . مع مافیہ (کسبی acquis) (بو تعییرہ باقیکنز!) اوله بیله جکنه دخی قناعت ایدنلر واردر ؛ زیرا (اعما aveugle) لرك پارمقلرنده شایان حیرت بر (حدت لمس acuité tactile) اولدوغی محققدر . مجیدیه غروشنک قالب اولوب اولمادیغنی ، بر تماسده فرق ایدن کورلر نادر دکلدرد . کذلک ، فرانسه ده بعض (شراب مخمئلری) واردر که ، آغزلرینه بر یودوم شراب آلدقندن صکره اونک جنسنی ، قاچ سنه لک اولدوغنی (غراردو) سنی ، یعنی اسپرتوسنک مقدارنی ، حتی بعض عناصر کیمیویه سنی بیله تعیین ایده بیلورلر . ایشته بو (dégustateur) لر دخی (حدت ذائقه acuité du goût) نك اک کوزل نمونه سنی عرض ایدرلر . لکن کورلرک اللرنده ، بونلرک دیلرلرنده تحقق ایدن بو (حدت حس) حد ذاتنده نه قدر جبلی وفطری اولسه بیله ، شبه یوقدرکه تربیه نك دخی بونده بر درجه یه قدر دخل وتأثیری واردر ؛ ده نیله بیلیر .

بوتعیرک فلسفه ایله علاقه سی (هسته تیق - esthétique - بدیعیات) ه صیقی صیقی به مناسبتی اعتباریله دره بدیعیات مباحثنده (الهام inspiration) و (ادا expression) مسئله لری برنجی درجه ده مهمدر . (صنعتکار artiste) ایله (هنرور virtuose) فرق - اعتقادجه - (الهام) و (حدت حواس) کیفیتلرینه مستنددر . کائنات حضورنده ادنا وسیله ایله فوق العاده بر

(هیجان طبیعی émotion normale) یه قابل اولانلر صنعتکارلردر وبوقابلیت هیجان émotivité ، الهامک اصل منبعی در . لکن شومهم فرق وارکه صنعتکارک هیجانی ، هرکسک کی کبی عقیم وابتد دکلدر . (مبدع) در : مطلقا مادی بر (آثر œuvre) وجوده کثیر بر . بواثره (احسن تقویم اوزره!) برکسوه مادیت افاضه ایده بیلیمک قابلیتی ، اصل (هنرورک virtuosité) برنجی شرطی و معرفتی در . بوکا اصطلاحده (ادا expression) دیرلر . ایشته برائری ادا خصوصنده (حدت حواس) برنجی درجه ده مهم والزم بر استعداددر ؛ وباقیسه - یوقاریده سویلیدیکم کی - آلات حسیه مرک رقت و نزا کتندن ، یعنی اک اوافق طویغو فرقلرینی در حال تمیزه قابلیتندن عبارتدر . پک چوق فیلسوفلر ، بومسئله لری تذکر ایتشلردر . علی الخصوص مشاهیر معاصرینمزدن متوفی (پروفیسور بهین prof. A. Bain) ، (حواس و عقل the senses and the intellect) نام اثر معروفنده (قابلیات صنعتکارانه نك شرائطی Conditions of artistic acquirements) عنوانیله بر باب مخصوص آچمش وبومسئله لری اوراده موضوع بحث ایتشدر .

[بوتون بوتعیراته باقیکنز ؛ وبوبابده تفصیلات آلمق ایچون بالخاصه art و esthétique) کله لرینه مراجعت ایدیکنز !]

حدت حواسی بالتجربه تحقیق ودرجات ومراتبی بالفعل تقدیر وتعیین ایتک ، بالخاصه (پسیکوفیزیولوژی Psycho-physiologie) علمنک وظیفه سیدر . بونک ایچون بعضی آلات مخصوصه [esthésiometre کله سنه باقیکنز!] ایجاد ایدلشدر ؛ (وه بر پرکاری le compas de Weber) [بوکله به باقیکنز!] ایشته اوقیلدن بر آتدرکه (حدت لامسه) نك درجه سنی تعیین خدمت ایدر . حواسمز آره سینده حدتی اک زیاده وقطعی بر صورتده تعیین ایدیله بیلمش اولانی باصره مزدر . (حدت سامعه acuité auditive) و (حدت لامسه ac. tactile) هنوز اودرجه قطعی بر صورتده تقدیر اولونه میور . [فیزیولوژی به عادت تفصیلات ایچون قاموسک فنون طبیعی و طیه قسمنه باقیکنز!]

نظریه ، انطباق

Adaptation	فرانسوزی و انگلیزی	Adaptation
Anpassung	آلمانی	
Adattamento	ایتالیایی	

کوزمیک بر شیئی واضحاً کوره بیلیمسی ایچون عضو بصرک اقسام و اجزاسنده و عضلاتنده واقع اولان تغییراتی افاده ایدر بر کله در . فقط بو کیفیت - فیزیولوژییه بو کون (accomodation) تعیری تخصیص ایدلش اولدوغندن او کله یه عائد ایضاحاتده بو خصوصه دائر تفصیلات کافیه ویرلمشدر . (adaptation) کلمه سی ارتق (حیاتیات = Biologie) تعیراتندن معدود اولوب قالمش و بر معنای خصوصی آلمشدر : اولاً بر عضو مخصوصک، بعضی ایجابات طبیعییه تبعاً (و بالضروره!) یکی بروظیفه کنیدی اویدورمنسه انطباق دیرلر . مثلاً : یاراصه قوشی دیه، بیلدیکمز حیوانک معهود قانادلی، قاناد دکدر ؛ لدی التحقیق آکلاشیلیورکه - بنیه تشکلی اعتباریه - هیچ قوشه بکزه مین بو حیوانک اوک آیاقلری و بالخاصه اوک آیاقلرینک درت پارمانی حدندن زیاده بویومش و آره لرند بر اینجه غشا پیدا اوله رق بو صورتله آیاق قاناده بکزه مشدر . یعنی حد ذاتنده یورومکه آلت اوله رق تشکل ایتش بولونان بر عضو معین ، بعضی ضروراته تبعاً تبدلات تشریحیه اوغرامش و اوچق ایچون بر آلت اولمشدر . نته کیم (فوق Phoque) دیه مشهور اولان حیوانک (مسبحه = یوزکچ = nageoires) لری ده حقیقی مسبحه دکل آیاقدیر ؛ فقط بو حیوان اونکله انجق دکزده یوزه بیلیر؛ قرده کزه مز. ایشته (انطباق تشریحی فیزیولوژی - adaptation anato-physiologique) بودر ؛ و بر عضو مخصوصک شکل تشریحی و وظیفه فیزیولوژیسی اعتباریه ده کیشمه سی و یکی یکی شرائط حیاتیه کنیدی اویدورمه سی دیمکدر .

یالکمز بر عضوک دکل ، فقط بوتون بر (فرد عضوی un individu organique) نکده بوکی ضرورات ایله یکی یکی محیطله توفیق حیات

ایده بیلیمک ایچون تبدلات کلیه و اساسیه اوغرادینی اولویورکه بوکاده (انطباق) دیرلر . حتی بو انطباق کلی، اعضای بدنک انطباقی نتیجه سیدر . (فلسفه تکامل la philosophie évolutioniste) ، انطباق کیفیتیه بو بوک بر اهمیت ویرمش و اونی دقتله تحقیق و تتبع ایله مشدر . تکامل فلسفه سی کشف اولونمازدن اول، اجسام عضویه نک محیطلرینه انطباق مسئله سی، طبیعتک سرائر غامضه سندن بری عد ایدیلیردی . حتی آلهیاتده ، (علت غائیة خلقت cause finale de la création) ی اثبات ایچون (کیفیت انطباق) ایله اقامه برهان اولونور، و (طبیعتده بر نیت dessein dans la Nature) اولدوغنه، بو صورتله استدلال ایدیلیردی . بودرجه غریب کورونن بو کیفیتیه، تکامل فلسفه سی (شرائط محیطیه توفیق حیات) مجبورینی ایله معقول بر صورتده تعریف و ایضاح ایدنجه ، علت غائیة نظریه سنه ارتق حاجت قالمادی و بو اعتقاد طرقدار اولانلر بو برهان مشهورک هیچ اولمازسه بو بحثده حکمسز و لزومسز قالدیغنی کوردیلر، و فیا بعد (انطباق) حادثه سنده استعمال ایده مدیلر . و قیله سیاراتک انتظام حرکاتی مشاهده ایدوبده اسباب طبیعی سنی هنوز کشف و تیقن ایله ممش بولونان علمای اسلاف، عینیه علت غائیة برهانه محتاج اولویورلر و نظام عالمی اونکله تعریفه چالیشیورلردی . (کپلر)، (کوپرینیک) و نهایت (نیوتن) ک کشفیات مهمه سی سایه سنده (نظام عالم l'ordre de l'Univers) ، (میکانیك mécanique) قانونلریله، معقول بر صورتده ایضاح ایدیله بیلدی . (adaptation) مسئله سنده تکامل فلسفه سنک، فکر بشره خدمتی ده طبق بوکا بکزه دیکی ایچون ، مشهور (داروین Ch. Darwin) ی ، (نیوتن Newton) ه قیاس ایدوب خدمتده مساوی طوتانلر چوق اولدی . حالبوکه (اصطفای طبیعی sélection naturelle) دستوری تعیین اولونمازدن اول، اجناسک انطباقی، تکامل نظریه سنی مشکلاته ایقاع ایدیور و اوکا معارض کی کورونویوردی . (داروین) دن اول (استحالات عضویه transformations organiques) نی ، علمی و طبیعی بر نقطه نظرندن تعریفه چالیشان (لامارک Lamarck) ، بو تبدلاتی (تأثیر اقلیم l'influence du climat) ه اسناد ایدیوردی . بو (سطحی - نظر

فرضیه) ، بویله بر غریب کیفیتی حسن تعریفه کافی گله‌دیگی کبی ، انطباق عدم وقوعه دأثر بعض احوال دخی ، مبدأ تکامله قارشی مقام تعریفه ذکر و اشهاد اولونه بیلوردی . داروین بدایت امرده و تدقیقاتنک هنوز ایلك دوره‌سنده بو مشکلاتنک درجه‌سنی نظر اعتباره آلمش و مسئله تکاملی حل ایتمک خصوصنده (انطباق) کیفیتنک صحیحاً اک مبهم بر عقده تشکیل ایتدیکنی اکلامشدی . حتی (منشأ اجناس l'origine de espèces) نام اثر مشهورینک مقدمه‌سنده بونی اعتراف ایدیور ، و علمای بنامدن (نئیساغره ی Asa Grey) . (۱۸۵۷) تاریخنده یازدینی بر مکتوبده بو مشکلاتی فصل اقتحام ایده بیلدیکنی و لامارک فرضیه‌سنه حاجت بر اقادینی ایضاح ایدیور . [بوتون بو مقاله‌ده کی تعیرات مشهوریه و بالخاصه darwinisme و sélection گله‌لرینه باقیکنز .]

بوتعیری (accomodation) دن تمیز ایتمک ایچون امریقا علماسندن (مارک بولدوین J. Mark Baldwin) بر فرق تعین ایتمش و بویکی کله اصطلاحیه‌نک آری آری معنالرده قولالانسانی توصیه ایله مشدر : (accomodation) کسبی اولان طرز انطباقه ، adaptation) ایسه ، اثری اولان صورته تخصیص ایده‌لیدر ؛ دیمشدر . [accomodation تعیرینه باقیکنز !]

مطابق

Adéquat	فرانسزجه
Adäquat	آلمانجه
Adequate	انگلیزجه
Adequato	ایتالیانجه

Adéquat

لاتینجه (adœquatus) لفظندن آلمش بر تعیر اصطلاحیه‌ده که معنای لغویسی (مساوی کلک) دیمکدر . افکار و معلوماتنر حقنده وصف اوله‌رق قولالانلیلیر . فقط وضعاً ایکی درلو معناسی وارد و یکدیگرنن فرقی در . اولاً : فکرک کندی مضمونه مطابقتی اعتباریه قولالانلیلیر که اوتقدیرده بر (فکرک idée) ، کندی مفهومک متضمن اولدوغی بالجمله اوصاف و کیفیاتی

— بالاحاظه — بیان وافهام ایدیور ، یعنی مضموننک ماهیتی حقنده بر معنای تام ویریور دیمک . چیقار . احوالده (فکرک) تمیل ایتدیکی مفهومه مطابقتد اکر بویله معلومات تامه ویریورسه ، اوکاده (inadéquate) ده‌نیر .

ثانیاً بویله‌نک بر باشقه معنا ایله تلقی اولوندوغی‌ده وارد : چونکه بر فکرک کندی مضمونه مطابقتی ملاحظه اولونه بیلدیکی کبی ، موضوعی اولان شیئه دخی مطابقتی دوشونوله بیلیر ؛ و طولانیسی ایله [بوتون افکار و معلوماتنرک حقایق اشیایه تماماً مطابق اولوب اولمادیگی] مسئله‌سی ، مطابقتنک بویکنجی معناده تلقی اولونماسندن ظهور و تولد ایده‌جکی ایچون ، بوتعیرک اک مبهم واک غامض بر مسئله فلسفیه‌ایله علاقه‌دار بولوندوغی درحال تسلیم اولونور . فی‌الحقیقه فلسفه‌نک (مبحث معرفت épistémologie) ده‌نیلن قسمنده ، اک جدی مناقشه‌لر بومسئله اطرافنده دوران ایدر ؛ شبه یوقدرکه (نظریه معرفت théorie de la connaissance) بحثه عاڈ اولان (شک و یقین le doute et la certitude) دعواسنده شرط مطابقت (قسطاس حقیقت criterium de la vérité) اوله‌رق قبول ایدلشددر . یعنی : [معلوماتنر طوغرو و شایان اعتماد اوله بیلیمک ایچون ، نفس‌الامر ، حقایق اشیایه هر وجهله مطابق و تام اولمالی‌در ؛] دستوری علی‌العموم فیلسوفلرجه مسلم بولونمشدر . لکن اونوتامالی‌درکه یالکنز (مابعدالطبیعیون les métaphysiciens) ک تحقیق ایتمک ایسته‌دکلی مطابقت ، انجق بودرلو اوله بیلیر ؛ مذهب فلسفی اعتباریه (رالیستون réalistes) دن اولانلر دخی مطابقتی بودرلو قبول ایده بیلیرلر ؛ چونکه وجدان خارجنده مستقل بر عالمک وجودینه معتقددرلر . بناءً علیه علمنرک شرط صحتی ، افکارنرک عالم خارجی‌ده کی اشیا معلومه‌یه تمامی مطابقتی‌در ؛ و انجق اوزمان علمنر (یقین certitude) افاده ایدر . حالبوکه [ایده‌آلیست = idéalistes = افکاربون] دن اولان فیلسوفلر ، مطابقت کیفیتی ، انجق برنجی معنا ایله تلقی ایده بیلیرلر . یعنی (فکرک کندی مضموتی بالجمله اوصافیه تماماً ادا ایتمه‌سی) صورتیه تفهم ایدرلر ؛ چونکه فکر و وجدان خارجنده مستقل بر عالم اوله بیلیمه‌سنی قبول ایده‌منزلر . نته‌کیم

(عقلیون les rationalistes) كه دخی بوخصوصده وضعیتی تماماً ایده - آلیستركی کی در . حتی (هگل Hegel) ، (نظرو تصور dialectique) ایله برعالم افکار ابداع ایش و عالم حقیق نك تماماً کندی تصوراتنه مطابق اولماسی لازمکه جگنی ادعایه قدر وارمشدی . [بوتون بوتعیراته باقیکنز !]

اور پافلاسفه مشهوره سندن وده قارتك پیرو لردن (باروچ سینوزا B. Spinoza) بوتعیری برنجی معناسیله تلقی ایدوب ایضاح ایله مشدر . حتی (شرط یقین condition de la certitude) اولق اوزره ، بو بویوك موسوی فیلسوفی ، مطابقتده (وضوح) اولسی ایجاب ایده جگنی ادعا ایدیور ؛ بوخصوصده کی ملاحظاتی شووجهله تلخیص اولونه بیلیر :

موضوعنه ، تماماً مطابق اولان بر فکرك مضمونی ده واضحدر ؛ بدیهی در . بداهت معناسی صحت و حقیقتك دلیل یقینی سی اولور . چونکه معناسنده (وجوب nécessité) واردر . موضوعنه مطابق اولمایان بر فکر دخی بالعکس مهمدر ؛ ناقصدر ؛ مشوشدر . اوکا جهل قاریشمش ماهیتی . افساد ایشدر . بناء علیه معناسنده (وجوب) اوله ماز ؛ فرضا (تصادف le hasard) دیدیکمز زمان (inadequate) بر فکر ایچون ای بر مثال ویرمش اولورز . بوفکر ، افهام ایتدیکی معنای - بالجمله اسبابیله جامع اوله جق صورته - یعنی تماماً اعلام ایده میور . زیرا اوکا جهل و یا خطا تداخل ایشدر . فی الحقیقه تصادف دیدیکمز حالک وقوعنده هنوز بیله مدیکمز بر چوق عوارض ، اسباب وشروط واردر . اونك ایچون بوفکر (واقعه تماماً مطابق) دکلدر . اکر تصادفك نصل وقوعبولقده اولدوغنی بالجمله اسبابیله ، اك دکر سز شرائطیله بیلسه یك اووقت معناسنده بوشیمدیکی تشوش قالمزدی . ماهیتدن (امکان خاص contingence) زائل اولور ، اوکا بدل مفهومده (وجوب nécessité) حاصل اولوردی . [بوسوزلره باقیکنز !] لکن او حالده تصادف اوله مازدی ؛ چونکه اسباب و شرائطی و آن وقوعنی اولدن کشف وتقدير ایده بیلردك ؛ یعنی (تصادف) دیدیکمز واقعه نك قانوتی بولمش اولوردق ، و او حالده (تصادف) دیدیکمز (واقعه) ، (تصادفی !) اولمازدی ..

ایشته بومسئله حقنده سینوزانك خلاصه ملاحظاتی بودر . بوفیلسوف

شو ملاحظه سنه استناداً ادعا ایدیورکه (ممکن) عد ایتدیکنز شیر هنوز بزجه واقعه مطابق اولیان ، وبناء علیه حقیقی تماماً ادا ایده مین فکر لردر . بونلر جهل ایله قاریشیق معلومات جزئیه نوعنددر . بوقیلدن اولان فکر لرده خطا مندر جدر . بناء علیه خطا (عدمی négatif) در . [بوسوزه باقیکنز !] علم یقین اکیسکلکی در .

سینوزانك بومسئله ده افکاری تماماً وعیناً بعض حکمای اسلامك و علی الخصوص فخر الدین رازینك فکر و ملاحظه سنی آکدیریر . علم یخنده بوداهی شرق عینی صورته بیان ملاحظه ایشدی . (فخر رازی) عندنده علم ، [اعتقاد جازم مطابق لموجب] یعنی [موجبنه مطابق بر اعتقاد جازم] در . اولا واقعه مطابقدر ؛ وقوع حالی تماماً اعلام وافهام ایدر . ثانیاً شبهه ذره قدر محل بر اقاماز و صار صیلماز بر اعتقاد الهام ایدر ؛ زیرا معناسنده وجوب واردر . بوشرطره مقارن اولان علمه (علم یقین) دیرلرکه بداهتی کندی صحتنه دلیل محض اولور .

فخر رازی بوتعریفی ایله علمی ، (ظن) ، (جهل مرکب) دن (تقلید مصیب) دن تمیز ایشدر . شرح مواقفك (مقدمات) یخنده مسئله اطرافیه مناقشه ایدلشدر .

زمانز فیلسوفلری (نظریه علم) مباحثده بو (adéquat) تعیرینی پك قولانیلر و معلوماتك نفس الامر ، حقیقت اشیا به مطابق اولماسی تقدیرنده ذکر ایدرلر . بو طرز تلقی (مطلقون les absolutistes) کوره در . (اضافیون les relativistes) انجق (علم ایله معلوم اره سنده مطابقت تامه) آرادرلر . [adéquation لفظنه باقیکنز]

Adéquation

Adéquation مطابقت

معنای لغویسنه باقیلیرسه (ad-equation) معادله ، مساوات دیمکدر . حالبوکه اصطلاحده ارتق بومعنا معتبر دکلدر . معلومات ، نفس الامر ، تماماً توافق ایدرسه ، و یا خود بر فکر ، (مفهوم تام) ایله موضوعنی بیان وافهام ایلرسه ، علم ایله معلوم اولان شیر آره سنده ، یعنی فکر ایله موضوع

مخصوصی آره‌سنده (adéquation مطابقت) وارد در . علم ایله معلومك بوتوانی ، ارتق معادلت و مساوات صایله‌میور؛ زیرا مطابقت ، طبیعتی اعتباریله بوسوتون باشقه شیلر آره‌سنده واقع اولیور و بوسیدن ناشی‌کمیت ایله تقدیری امکان خارجنده قالیور. مثلاً بزم بر ماده حقنده علممز (اونك حد ذاتنده موجود اولدوغی اوزره) بالجمله اوصاف و کیفیاتی شامل بر فکر تام و کامل اولسه بیله ، ینه (طبیعت و ماهیت اعتباریله) (بیلگی) ویا (فکر) باشقه شی، اوفكرك خارجنده اشارت ایندیکی (ماده مخصوصه) بوسوتون باشقه‌شی‌در! خارجنده‌کی ماده کیتاً تقدیر اولونه‌بیلیر، طاریلیر، اولچولور؛ حالبوکه اوماده حقنده حاصل ایتش اولدوغمز علم، عددآ قابل افاده اولدیغی کبی ، عینی مقیاس ایله اولچویه طارقی‌یه‌ده کلز . بونلر (غیر مشترك المقياس incommensurable) شیلردر . [بوتعیریه باقیکنز .] اونك ایچوندرکه سقولاستیق فلسفه‌سنگ ایجاد ایتش اولدوغی بوتعیری بوکون دخی قوللاندیغمز حالده معنای لغویسنی قبول ایتیه‌رك مطابقت معناسنه آلیورز. یعنی فکرایله موضوعی آره‌سنده معادلت مراد ایتیورز. سقولاستیق فلسفه‌سی (علم ، معلومك عینی‌در) ظن ایندیکی ایچون بوتعیری وضع ایتش ولغت معناسیله تلقی ایلشدی ؛ ظنمجه سبب بودر . حالبوکه فلسفه جدیده نظرندره ارتق هیچ شبهه قالمامشدرکه علم ، معلومك عینی دکلدر ؛ حتی من وجه اوکا بکزر برشی‌ده دکلدر . یالکز بر اشارتدرکه ذهنده معلومی آ‌کدیریر . ایشته اوقدر! مع‌مافییه بواشارت ناقص ویا تام‌اوله‌بیلیر. تام اولورسه اشارت ایله مشارایله آره‌سنده یعنی علم ایله معلوم آره‌سنده مطابقت وارد در ؛ ده‌نیلیر .

اهمال قیم Adiaphorie

Adiaphorie

یونانجه (adiaphoria) کله‌سندن آلمشدر . السنه متمدنه علی‌الاکثر بوشکلده استعمال ایدر . (فرقسزلق) دیمکدر . اصطلاحده حسسزلك، قیدسزلق معناسنه کلیر . حادثات عالمه قارشى قیدسزلق ، حسسزلكدن نشأت ایدر ؛ حسسزلك دخی ، او حادثاتك هیچ برینه دیکرندن زیاده

قیمت ویرمه‌مکدن، و بناءً علیه، برینی دیکرندن - هیچ بروجه‌له - (فرقلی کورمه‌مك) دن ایلری کلیر. ظن واعتقاد، بوحده وارنجه انسانده هیجانه قابلیت قالماز؛ مطلوبه توجه ایده‌بیلیمك ایچون، برطرفه میل امکانی‌ده‌اولماز؛ چونکه مطلوب اولان شی ، قیمتده مرجح اولان شیدر . حالبوکه هیچ برنوع حادثه‌ده قیمتجه فرق کورمه‌ین بر آدم نظرندره مرجح صایله‌بیله‌جك برشی یوقدر. اویله اولونجه ، هیچ برشیته قارشى تأثر و هیجان‌ده یوقدر. بوحالده برشی یابه‌بیلیمك ایچون (تشبث فعلی) دخی اوله‌ماز، زیرا (ارادت volunté) ، (مفلوج paralysée) اولور قالیر . ایشته (تأثرسزلك apathie) ده‌نیلن حالت روحیه دخی بودرکه (لاقیدی indifference) نتیجه‌سی اولدوغنده شبهه یوقدر .

بوتعیرك وامثالنك (تاریخ فلسفه) ایله چوق علاقه‌سی وارد در :

اولا (حسابانیه scepticisme) مذهبك مؤسسى اولا (پیرون Pyrrhon) بوکله‌نی ایجاد و وضع ایتش اولدوغی ایچون (پیرونیه Pyrrhonisme) اصطلاحاتندندر. بوفلسوف هیچ برشیته اینانه‌مادیغی کبی، کندی وارلغندن بیله شبهه ایده‌بیلیردی . بناءً علیه هیچ برشیته‌ده قیمت ویره‌میه‌رك، بوتون وقوعات عالمه قارشى لاقید و حسسز قالیوردی . حتی (پیرون) نظرندره (خیر اعلا le souverain bien) بو حسسزلك ، بوقیدسزلق مرتبه‌سنه ایره‌بیلیمك وهردرلو هیجاندن آزاده وهرنوع آرزو واملدن فارغ و مستغنی اوله‌بیلیمکدی. اونی هرکسه توصیه ایدیوردی. [پیرونیه Pyrrhonisme لغتنه باقیکنز !]

ثانیاً : (روافیون les stoiciens) ده‌نیلن فرقه فلاسفه‌نك حکمت اخلاقیه‌سی دخی لاقیدی‌نی توصیه ایدیوردی . فقط حسابانیون ایله بونلر آره‌سنده اعتقاد فلسفیجه پك بویوك فرق وارد در ؛ بناءً علیه (لاقیدی) کیفیتنی صورت تلقی لری بوسوتون باشقه‌در . [بوبابده تفصیلات ایچون stoicisme تعیرینه باقیکنز !]

ثالثاً : شرقد (تصوف théosophie) اربابی ، (ریاضت pénitence) ایله تصفیة باطن ایتمکی توصیه ایلدکری ایچون (ترك وامساک abstinence)،

و (فراغت abnégation) ایله هرشیدن ال یومق ، (یعنی ال ییقامق ،
الینی چکمك ، واز چكمك !) لزومه قائل اولمشلردی ، و بویوزدن ،
فکراً (افعال قیم) درجه سنه وارمشلردی . بواعقاد ، (عملده en pra-
tique) ، (تأثر سزلك ولا قیدلق apathie) ده نیلن (عطالت inertie) ی
استلزام ایتشدی . (تأثر سزلك) تعیری (رواقیه) اصطلاحاننددر .
رواقیون بونی توصیه ایتدکلی حالده قطعاً عطالت منهك دکل ایدیلر ؛
حالبوکه صوفیه نك مبدأ اعتقادی ریاضت یوزندن قلندر لکه پیوسته اولمش
ونهایت عطالت طایانمشدر . صوفیه ده واقعا خیراعلا (وصال حق com-
munion avec Dieu) در . فقط بونك ایچون امور دنیا ده مطلقاً (اهل
قیم) برنجی شرطدر . بومرتبه یه بالفعل ریاضت ایله واریله بیلیر . ایشته
شرقه (رند آزاده) دیدکلی (انسان کامل l'homme parfait) ، بویله
برآدم ایدی . (آزاده خوف ورجا) ، (لاقید و لاأبالی) ، (وارسته
تکلیف و تکلف) ، کلیاً (بی امل) (ادناس دنیویه دن قطعاً ال یومش)
برانساندی . نظرنده [نیک و بد عالم سیان !] دی . بویله اولان (کلین
les parfaits) ، (احرار les indépendants) ده نیلردی . [بوتون
تعیرات مهمه یه باقیکنز !]

(تناقض) لفظاً صورتاً (Contradiction) In adjecto

In adjecto

[هرلسانده لاینبجه سی مستعملدر (این آجه قنو) اوقونور]

بوتعیر ، مباحث منطقیه ده کچر ، و (تناقض contradiction) وصفنده
قوللانیلیر . (contradiction in adjecto) ، صوری یعنی شکه عائد بر
تناقضدر که ، اونده (محمول attribut) ، (موضوع sujet) ک ماهیت و مفهومی
صراحتاً نقض ایدر بر شکل و وضعیتده در : (مظلم بر آیدینلق) کبی ! . . .
ظلمت ، آیدینلغک ضد نقیضی اولدوغی ایچون ، بویله بر (ترکیب وصفی) ده
مندج اولان معنای تناقضی در حال ادراك و اذعان ایتمهك ممکن دکلدر ؛
چونکه تناقض صوری در ؛ ظاهر در ؛ بدیهی در . لکن اکثریا بویله اولیه بیلیر :
کرك موضوع ایله محمول آره سنده ، کرکسه ایکی قضیه نك مفاد حکمی

آره سنده کی تناقض ، کیزی قاله بیلیر . او تقدیرده (تناقض ، ضعی در .
la contradiction est implicite) ده نیلیر . مع مافیه هر (تناقض ضعی)
بر (تناقض صوری) یه ارجاع اولونه بیلیر ؛ زیرا حقیقتاً تناقض وارسه ،
البت ، آراده احکام متناقضه اولدوغندن ناشی در ؛ والبت اوکی احکامدن
متناقض نتیجه لر استخراج ایدیله بیلیر . چیقاریلنجه دخی (کیزی تناقض)
تظاهر ایدوب (صوری) اولووریر .

(تناقض صوری) بحثه تعلقی اوله بیله جك امثله تاریخیه نك اك مهملرندن
بری ، (سقوج فلسفه سی écossisme = philos. écossaise) ک مؤسسی
اولان (دوكتور رهید Dr Ried) ک (قدرت = pouvoir = power)
کلمه اصطلاحیه سنه عائد اولمق اوزره فیلسوف مشهور (جون لوق John Locke) .
تعریضیدر . (لوق) ، ملکات عقلیه مزه علی العموم (قدرت) دیمش و بونلری
(فاعل actif) و (منفعل passif) اولمق اوزره ایکی صنفه آیرمشدی .
(دوكتور رهید) : [قدرت ذاتاً فاعلدر ؛ حتی فعالیت قدرت عینی معنا افاده
ایدر . بناء علیه فاعل اولمایان بر قدرت تصور اولونه ماز که قدرت منفعله
تعیری مقبول اوله بیلسین !] دییور ؛ یعنی (قدرت منفعله) تعیرنده تناقض
صوری وظاهری واردر . دیمك ایستور . (هاملتن) بومناقشه یی ذکر ایتش
و (لوق) طرفی الزاماً حکم ویرمشدر . [بوراده کی تعیرات مهمه یه باقیکنز !]
بوتعیرك انجق (منطق logique) (بوسوزه باقیکنز !] ده ومعقولانده
حکمی واردر . ادبیاتده و بدیعه یوقدر . بالعکس بدیع و بیسانده اکثریا
کنایه لر وهله مبالغه لر تناقض صوری یه برر مثال تشکیل ایدر . (جانلی جنازه)
(ثولو حیات) کبی ؛ جنازه نك جانلیسی جنازه اولماز . نته کیم حیات دخی
مماك ضد نقیضی در . فقط طرز اداده مبالغه ، بدیعه برهنر اولدوغی
ایچون بویله شیلره ادبیاتده مساغ اولدقدنمعدا بر قیمت مخصوصه بیله ویریلیر .

Adulte

Adulte ٲاھل

جسم عضوینك اك اساسی قابلیت ، هویتی بوسوتون ضایع ایتمهك
نشو و نما و تبدل ایتسی و بوسایه ده یکی یکی شروطه ، یکی یکی محیطلره تطبیق

معیشت و توفیق حیات ایله بیلیمه سی در . [(adaptation) ه باقیگز .]
 بوقابلیت دوام ایتدیکی مدتیجه حجره ، نسج ، عضو ، هر نه ایسه ، نشوونما
 دورنده در . فقط بوقابلیت الی نهایت دوام ایده من . بر زمان کلیر که اکتساب
 ایتدیکی شکل وقابلیت اوزره قالیر و ارتق - ضویت تبدل ایده من اولور .
 ایشته بوحل توقف ، عضویتک دور کهولتی در . بودوره ایریشن بر عضویت
 ارتق شرائط جدیدیه ، یکی محیطلره تطبیق حیات ایده من ؛ عوامل خارجیه نک
 اقتضاسنه کوره توفیق حیات ایده مدیکی ایچون دخی تأثیرات خارجیه ، اونک
 بنیه سنی یواش یواش تخریبه قویولور و بوتخریبات تغذی ایله تلافی مافات
 ایده مزده آهنگ حیات مختل اوله جق رادهیه واریرسه ، (تولوم la mort)
 دیدیکمز حال وقوعه کلیر و جسم عضوی طاغیله رق عناصر اصلیه سنه ایریلیر .
 علی الانفراد ، اعضای بدنیه دخی بوتعبیر تطبیق ایدیلیرک استعمال
 اولونویور . برعضو (انطباق قابلیتی pouvoir d'adaptation) نی ضایع
 ایدنجه (کاهل در) دهنیر . وجودک بالجمله اعضای مختلفه سی عینی زمانده کاهل
 اولوب اختیارلاماز . دماغک اقسام و مراکز مختلفه سی ده بویه در . حتی
 جمله عصبیه نک بعض قسملری وارکه هیچ کاهل اولماز اکر اولورسه حیات
 ممکن دکلدر . حیات اونلرک فعالیت دائمه سی و یکی یکی شرائطه سهولتله انطباقی
 سایه سنده انجق دوام ایده بیلیر .

حیات مغنویه دخی بونی تطبیق ایدرلر ؛ کاهل برزکا ، تشکل ایتیش
 و اصول واحکام اعتقادیه سی ترتیب وتنظیم ایتیش برزکادرکه یکی بر اعتقاد
 یکی بردوشونوش قبول ایده من . بناء علیه حیات فکریه ده محافظه کارلغک بر
 نوعی ، ذکاک کهولتی اثریدر ، دهنیله بیلیر . بوتعبیر اجتماعیاتده دخی تطبیق
 اولونور . برمدنیت مخصوصیه ایرمش و مدت مدیده اوکا کوره یاشایوب
 یورولمش وقوتی غائب ایتیش برامت ، یکی بر مدنیتک شرائط اجتماعیه سی
 قبول ایده میه جک رادهیه کلش ایسه ، دور کهولتی ادراک ایتیش دیمکدر .

Adventice افکار راصد

دور اخیرک مجدد مشهوری ، فیلسوف (ده قارت Descartes) ک ایجاد
 ووضع ایتیش اولدوغی تعبیرات اصطلاحیه دندر . لایتنجه (adventitious) دن

Adventice

آلنشددر ؛ فقط عموم طرفندن قبوله مظهر اوله مادینی ایچون تعمیم ایده مه مشدر .
 ده قارت اوچ درلو (فکر idée) من اولدوغنه اینانیوردی . حواس واسطه سیله
 ایدیندیکمز افکاره = idées adventices ؛ cogitationes adventitiae
 دییوردی . بونلره بوکون هر فیلسوف (sensations احساسات) دییور . عرب
 حکما سنک و انکلیر فیلسوفلرینک (حسیات sentiments) دیدیکی بودر ؛
 بونلری بوکون هیچ کیمسه (افکار) نوعندن عدا یتیز . بوحسیاتی اعمال ایدرک
 ذهنک بالذات تحصیل ایدیکی فکرلره دخی (idées factices افکار مجعوله)
 دییوردی که ده قارتک ظننجه - ذهنک کندی معمولاتندن اولان (یا پیه فکرلر)
 دیمک اولور . واجب ، ضروری و عمومی اولان کلیات افکاره دخی (افکار وهیه
 idée innées) دییوردی . بونلرک حواس دن کله دیکنی ، ذهنک معمولاً
 تندنده اولمادیغی ادعا ایدیور و بزمه برابر طوغماش ، بالعکس بزه هر حالده
 تقدم ایتیش اولدوغنه قانع بولونویوردی که (innée طوغماش) تعبیرینه سبب
 اوفیلسوفک بو اعتقادیدر . بوکون بوصوک تعبیر مشهوردر و مهمدر . فقط بو
 جنسندن اولان فکرلرک منشأ و ماهیتی حقنده نظرلر متخالف و حتی متناقضدر .
 حسیاته کتنجه قطعاً فکردن صایلمیور . حالبوکه ده قارت ، بالجمله (تلقیات حسیه
 acquisition des sens) یی و بوتون (محتویات وجدان le contenu
 de la conscience) ی (افکار idées) نام عمومی سی ایله یاد ایدری .
 (بوتعبیراته وبالخاصه rationalisme سوزینه باقیگز !)

Adynamie

Adynamie فخرانه قوا

درمانسزلق دیمکدر ، یونانی دن کلشدر : (a ادات نی) ،
 (δυνάμις = dynamis) ده قوت معناسنه در . بوحال ، بر کیفیت
 مرضیه درکه بالخاصه انسجه عضلیه نک فوق العاده ضعیفه نمایان اولور .
 او حالده (تقلصات عضلیه contractions musculaires) یا پک کوچ اولور ،
 یا هیچ ممکن اولماز . اکثر وخیم حائلده بوضعف کورولور .

(مادرات) تأثیر (Phénomènes) Affectifs

Gefühls	آلمانیجه
Affective	انگلیزجه
Affettivo	ایتالیانجه

شخصیت معنویه مزی تشکیل ایدن (حسیات sentiments) و (ارادت la volonté) ایله (افکار les idées) آره سنده وضع و جنس وماهیته اهمیتلی برفرق واردر. بونلرک جمله سی ده (حادثات روحیه phénomènes psychique) دن معدود اولقله برابر، حسیات، بزم اصل بنلکمزی تشکیل ایدر و بوحیثله، اونلرک تحولاتی کندی بنلکمزک تحولاتی دیمکدر. افکاره کلنجه، اونلرک بنلکمزله، حیات روحیه مزله بودرجه صمیمی علاقه سی یوقدر و (کندی اناتیز notre moi) قارشوسنده افکارمز، (non-moi غیرانا) حیثشده در: بنلکمزه یابانچی اولان شیلرکی در! بومهمه یی نظر دفته آله رق (محتویات وجدان le contenu de la conscience) ی تقسیم ایدن (علم روح اربابی les psychologues) حسیات نوعندن اولان حادثات معنویه یی علی العموم (حادثات تأثریه phénomènes affectifs) دیورلر. افکار و خیالات جنسندن اولان قسمنده (حادثات ذهنیه phénomènes intellectuels) دیورلر. بوایکی طاقدن برینک مبدأ واصل اولدوغی ادا عایدلیدکنه کوره تعین ایدمکک مذهب فلسفی یه (intellectualisme ذهنیه) و (volontarianisme ارادیه) دهنیلورکه برنجیسنک اک مشهور مروجی (Herbart هربارت) در. ایکنجیسنک ده (Schopenhauer شوپنهاور) در. (بوتون بوتعیراته باقیکنز.]

شوالده - بالخاصه حادثات ذهنیه دن قطع نظر ایدرک - صرف حسیاته واردته متعلق اولان احوال روحیه نک جمله سنده بردن (حادثات تأثریه phen. affectifs) دهنیلور، دیمکدر. بوده حسیات نوعنه منحصر اولورسه (passif انفعالی) اولور. مثلاً ذوق و الم حس ایتک کی. عرب فیلسوفلری

تأثر Affection

Affection	فرانسزجه و انگلیزجه
Gefühl	آلمانیجه
Affezione	ایتالیانجه

بوکله لاتینجه (Affectus, affectio) لغتلندن آلمشدرکه بر شیدن متأثر اولق، دیمکدر. لسان عمومی ده، همان همان محبت لفظک مرادی کی قوللانیلیر. مثلاً حساس و محبه میال اولان کیمسه لره و اوایله کیمسه لرک طورلرینه، وصف اوله رق (affectueux) دهنیلیر. اصطلاحده معناسنک تنوعاتی واردر. اک اسکی معنای فلسفی سی - علی الاطلاق - (حادثات منفعله phénomènes passifs) دیمکدر، که اشاده کیفیات مقوله سندن اولان بعض احوال دن عبارتدر. بونلره فرانسزجه (manières d'être) دیرلر. لکن آرتق بوکون بومعنای ادا ایتک اوزره (modification, modalité, mode و qualité) کله لری قوللانیلور، و (affection) تعیری یالکز حساس اولان موجوداته تخصیص اولونمشدر. بو تخصیصه کوره (تأثر affection)، نفسمزده حاصل اولوبده بزدن انفاک کی ممکن اوله مایان، حتی نفسمزک غیری برشی ایمش کی دوشونوله مین حسیاته دهنیلور. شو اعتبار ایله افکارمز، تأثراتمز دن یک فرقلی و آیری برصنف تشکیل ایدر. زیرا، افکارمز دخی - حد ذاتنده - نفس ناطقه مزک محصولی اولقله برابر، اونلری کندی اناتیزدن، یعنی کندی بنلکمزدن، کندی نفسمزدن بوسبوتون آیری و مستقل شیلر ایمش کی تلقی ایدمیلیر. بالعکس تأثراتمز روحزک حیاتی در؛ و (هیجان émotion) نوعندن بر حادته انفسیه در. یالکز شوفرک وارکه (هیجان) عمومی برتعیردر، و (passion اختراص، ابتلا)، (desir آرزو، شوق) کی حالات وجدانیسه نک جمله سنی ده معنا شاملدر. حالبوکه (تأثر)، اختراصدن ده آزشیدید ودها

از مبرم بر (ميلان inclination) در . نته کيم آرزوده اويله در . (تأثر)
بومعاده تلقی ايديلنجه، اونده برخوصيت ممتازه بولانلر اولمشدر . (لاشليه
Lachelier) نام فرانسز فيلسوف معاصر ادعا ايدییورکه تأثرده (علت
موجبه cause efficiente) ايله (غايه مترقبه but visé) برله شیر : برازانه ،
کيم (affection) الهام ایدرسه او حسیات تأثريه نك ، اوميلان محبتك
هدفی ینه او آدمدر ؛ باشقهسی اوله ماديني کي باشقه برشیده اوله ماز . حالبوکه
آرزو وشوق ایچون سبب محرك (mobile یعنی سائق) باشقه، غايه ومقصوده
باشقه در . بونقطه نظرده باقوب معنایي بوسبوتون تخصیص ایدرك بونوع
تأثري يالکز انسانه حصر ایدنلر اولمشدر . مشهور (سقوج écossais)
فيلسوفی (رهيد Reid) بوفکرده در :

(اعمال بشريده متنوع سائقه لر واردركه اونلرك هدف مخصوصی
(اشخاص personnes) در ؛ وسوائق مذکورنك طبيعت ذاتيه لر ،
برطاقم اشخاصه وحتى بعضی جانلی موجوداته قارشى این ویا کوتی بر حس
ایله متأثر اوله مزى استلزام ایدر . اکثر اعمالنك مباديسنی تشکيل ایدن
بوسوائقه ، بن ، عموماً (تأثرات affections) دیيورم . ایسترسائر انسانلره
قارشى بزى اعمال حسنه یه سوق ایتسینلر ، ایسترسه اعمال سيئه یه سوق
ایتسینلر .) دیيور .

(رهيد) ، بو تعریفی ايله کله نك معناسنی ، حسیاتنك بر صنف
معینه تخصیص ایتکله برابر ، مفهوم اصطلاحی بی ، لسان خلقدده معتبر
اولان معنایه تقریب ایتمش اولویور . شو تقدیرجه تأثراتنك این و کوتی اوله بیلیمك
اعتباريله ایکی درلودر . برینه (تأثرات حسنه affections bienveillantes)
ده نیر : متدارلق ، میل مودت ، دوستلق کي ! . . . دیکرینه دخی (تأثرات
سيئه affections malveillantes) ده نیر ؛ غیض ، نفرت ، خرص ،
حسد ، انتقام کي !
آکلاشیلیورکه انسانلره قارشى محبت ونفرت متعلق بعضی انفعالاته عائد

اولق اوزره حاصل ایتدیکمز حسياته تأثرات ده نیلیر ، وبو حسیاتك ابتلا
واختراص درجه سنده شدید اولماماسی ده تعریفده داخل برشرطدر . قورقو ،
امید ، تهور کي احوال روحیه مزى بالخاصه (تهيجات émotions)
صنفه داخل ایدوب تأثراتنك آبییریورز . بو تعیراتك ، پسیقولوژی
واخلاق علملریله علاقه سی اولدوغی آشکاردر .
برده عینی لغتدن مشتق (affectation) کله سی واردركه پك قوللانیلیر .
بز بونی کندی لسان عمومیمزده (جعلی) کله سیله ادا ایدرز . (تصنع
وصنعه) دخی بودیمکدر ودها زیاده حقوق جزا لساننده مستعملدر ؛ جدی
وحقیقی اولمایان اوضاع واطواره جعلی دیمك متعارفدر . (affecter de ne
rien savoir = تجاهل) ديه ترجمه ایدیلیر . بوحال ، دائماً تأثرات صحیحه
وجديه نك تقلیدنی یا یقندن عبارت قالدینی ایچون ، بر چوق احوالده
(simuler) کله سی بوکا بدلاً قوللانیلیر . (خسته لنی تقلید ایتك =
تمارض) کي ! (d'un air affecté جعلی برطور ايله !) ديه ترجمه ایدیلیر .
[تعیرات مهمه یه وخاصة (phénomènes affectifs) سوزلرینه
باقیکز !]

صادرہ
واردہ
Afférent , Efférent

Afférent
Efférent

اعصاب ، وظیفه وخدمتیرنه کوره ایکی درلودر . بر قسمی وارکه محیط
بدنه پیوسته اولان اوچلرنده وقوعه کلن تهيجاتی ، محیطدن مرکزہ یعنی
سطح بدنن ، دماغه ، (مخ شوکی moelle épinière) یه وبرطاقم (عقدات
عصبيه ganglions nerveuses) یه نقل ایدرلر . تأثرات محیطی بو وجهله
مراکز عصبيه کترین اعصاب تللرینه (nerfs afferents اعصاب وارده)
(و) (centripètes الی مرکزیه) دیرلر . دیکر بر قسم اعصابده واردركه
مراکز عصبيه ده حاصل اولان انفعالاتی وتغیراتی ، محیطده بر عضو مخصوصه
نقل ایدرلرکه عضو مذکور او عصبك نقطه انتهائیه سیدر . بونلرده (nerfs
efférents اعصاب صادره) ویا خود (centrifuges عن مرکزیه) ده نیلیر .
بوجنسدن اولان اعصابك نهایت بولدوغی اعضاهان دائماً عضله مخصوصه در .

دیگر لری ایسه عالم خارجی ایله تماسده بولونان اقسام بدنیه مزده منتهی اولور. اونک ایچون بونلر خارجدن مرکزیه خیر نقل ایدرلر. دیگر لری ده مرکزدن محیطه اراده کوتورورلر.

عربلر کتیرنلره (وارده)، کوتورنلره (شارده) دیشلر ایدی.

(Psycho-physiologie) علمیه عائد اولان بوتعیرات، فلسفه مباحثنده کیفیت ادراک مسئله سنده اکثریا ذکر اولونور. (انا moi) نك (غیرانا le non-moi) ایله یعنی نفسمك عالم خارجی ایله (تماس و مناسبتی contact et rapport) بحثنده وارد اولور تعیرات علمیه دندر.

علاقه Affinité

Affinité

Verwandschaft, Affinität المانجه

Affinity انگلیزجه

Affinità ایتالیانجه

(لاتینجهده Affinitas) دن آتمش برکله در، وقرون وسطی لسان عرفانندن بزه انتقال ایتشد. (علوم غریبه sciences occultes) دن اولان (الکیمیا alchimie) به عائد اسکی برتعیردرکه بکون حالایکی کیمیا ده ودها پک چوق شیلرده قوللا تلقدده در. بر عنصر مادینک دیگر بر عنصر مادی ایله برلشوب بر ترکیب وجوده کتیرمک خصوصنده کی میلان طبیعیینه اسکی الکیمیائیون (Affinité) دیرلردی، وبو علاقیه انفسی بر ماهیت اسناد ایدرلردی. مثلاً انسانلرک بر برینی ترجیحاً محبتی یا خود نفرتی کی!.. حتی طیب و عالم مشهور (بوئر هاو Boërhave) علاقیه ای، اجسام آه سنده بر محبت اولوق اوزره تعریف ایتشدی. بکونکی کیمیا نظرنده علاقه، بر جسم مرکبک عناصر اصلیه سنی یکدیگرینه باغلی بولوندوران واونلری یکپاره طوتان قوته ویا خود قوای طبیعیه نك (محصله résultante) سنه دیرلر. کیمیا علمی، (ماکنه ذره وی مکانیک atomique mécanique) دیمک اولدوغنه نظراً (علاقه کیمیویه) ارتق انسانلرده کی علاقۀ انفسیه به بکزر بر ماهیتده تصور اولونه مازده بلکه بو علاقۀ جاذبه نك خصوصی: نوع تجلی.

سیدر، واحتمالکۀ اجسام و عناصرك (électropositif) و (électronégatif) اولماسی سبیلله یکدیگرینه انجذابیه میلی نتیجه سیدر. (بوتعیرات ایچون قاموس ریاضیاته باقیکنز!)

(پسیقولوژی یعنی علم روح) لساننده دخی بوکله بعضاً قوللانیلور. بر فکرک دیگر بعضی افکاری ذهنده دعوت و احضار ایتمه سی (association d'idées - سوزینه باقیکنز!) بحثنده (علاقۀ روحیه Affinité psychologique) تعیری استعمال اولنور. نته کیم ایکی درلو (تصورات concepts) (بوسوزه باقیکنز!) اره سنده کی رابطه فکریه به دخی (علاقۀ منطقیه Affinité logique) ده نیلور. آلمان شاعر و حکیم مشهوری (گوته Goethe)، عشق انسانی حقنده (علاقۀ انتخابیه Affinité élective) تعیر معنادارینی قوللانش و محبت ده نیلن علاقۀ انفسیه ده روح عاشقک، بر شخصی دیگر لرینه ترجیح و انتخاب ایتدیکنی نظر دقتۀ ابراز ایلهرک کیفیت عشقی تعریف ایتک ایتسه مشدر. هر حالده (علاقۀ)، ماهیتی مبهم اولقله برابر بر (کیفیت محسوسه fait sensible) در؛ وهر لسانده رایج برکله در.

Affirmative

(prop.) Affirmative (قضیه) مرهیه

Negative

(prop.) Negative (قضیه) سالبه

بوتعیرات، لسان منطقده اصطلاحات مشهوره و (متضایفه connotatif) دندر. (connotation سوزینه باقیکنز!) قضیه حقنده وصف اوله رق متقابلاً قوللانیلر. بر (قضیه proposition) موجبۀ اولور، اگر (موضوع le sujet) ایله (محمول l'attribut) آراسنده کی نسبتک وقوعیه حکم اولونورسه!.. (انسان فانی در.) کی که بوراده نسبتدن مراد، (فانلیک) در و بو حال انسانده وقوع بولور دیه حکم اولونمشدر. بالعکس آرا ده کی نسبتک (لاوقوع) ی ایله حکم اولونورسه بویه بر قضیه (سالبه négative) اولور. (سقراط لاموت دکلدرد.) کی!.. قضیه نك بو وجهله موجبۀ ویا سالبه اولماسنه (بر قضیه نك کیفیتی la qualité d'une proposition) ده نیلر. (Affirmation) سوزینه باقیکنز!

Affirmation ایجاب

et و

Négation سلب

Affirmation et négation فرانسیزجه وانکلیزجه

Behauptung المانیجه

Affermazione negazione ایتالیانجه

Affirmation

et

Négation

ارسطونك وضع ايتديكي اصطلاحات منطقیه دندر . اصل یونانیسی :
(ایجاب Κατάφασις) و (سلب ἀπόφασις) در . فرانکجه سی ،
لاتینجه : (negatio, affirmatio) دن کلیر . منطقده ، بر قضیه موجبہ نك
افادہ حکمنه (ایجاب affirmation) دیرلر . ضدی (سلب negation) در .
برده (تصدیق assertion) تعیری واردر که ایجاب ایله برطوماتلی در .
ایجاب ایله سلب آره سنده (تقابل تضاد) واردر . مثلاً (انسان فانی در) ،
(انسان فانی دکدر) کبی که بویکی قضیه نك مفاد حکمی آره سنده درجات
متوسطه اوله ماز و برینك ادعایی دیکرینك کی اساساً و قطعياً و تماماً نقض
ایدر . حالبوکه (assertion) تعیری بومتناقض الحکم اولان قضیه لرك ایکیسندده
تطبیق اولونه بیلیر ؛ چونکه ایجاباً اولسون سلباً اولسون هرایکیسندده حکم
واردر . بناءً علیه (assertion) ، (شبه doute) مقابلی در . و بویکی حال
آره سنده بالجمله احتمالاتك درجات متفاوتی واردر . اکلاشیلیور که هر درلو
حکمه (assertion) ده نیر ؛ ایجاباً واقع اولان حکمه (affirmation)
تعیری تخصیص ایدیلیر . (شو شویله در ؛ بو بویله در) کبی ! . سلباً واقع
اولان حکمه دخی (négation) تعیری قوللانیلیر . (شو شویله دکدر ؛
بو بویله دکدر .) کبی ! ...
(affirmation) هنوز ذهنده ایکن (حکم jugement) در . سوزله
بیان ایدیلنجه ، دستور افاده سنه (قضیه Proposition) دیرلر . اووقت
بر کیفیت یا خود برشی دیکر بر شیئه حمل واسناد ایدلمش اولور . (حیات
زحمیلی در) ؛ (بختیاراق قولای دکدر) کبی که بویکنجی قضیه ده حکمك
سلب ایله واقع اولماسنه رغماً ینه بر (حمل attribution) واردر : (قولای
اولماق) کیفیتی بختیارلغه حمل واسناد اولونویور دیمکدر .
(Proposition) سوزینه باقیکنز .

A fortiori بطریق الارلی A fortiori

(آفورسی یوری) اوقونور . (هر لسانده لاتینجه سی مستعملدر)

بو بر شکل محاکمه در که برهان حیثیتی حائر در . جزئی نك حکماً کلی ده
مندرج اولسی کیفیته مستددر . بناءً علیه ، کلی نك حقیقی اثبات اولونجه
اونك ضمیمه مندرج و حکمنه تابع اولان جزئی نك حقیقی ، دها زیاده قوتله
ثابت اولمش اولور . (a fortiori) تعیری ده بو سببله وضع اولونمشدر . مثلاً
(بعض (ا) ، (ف) در . زیرا هر (ا) (ف) در .) دیدیکمز زمان بو
برهانك اك بسیط و اساسی شکلی عرض ایتمش اولورز . (بعض انسان
فانی در) صغرا ، (زیرا هر انسان فانی در) کبرا اولدوغنه نظراً کبرانك
حکمی صغرانك کنی ذاتاً شامل و متضمن بولونویور ؛ بناءً علیه هر انسان
فانی اولونجه ، بعض انسانلرك البته فانی اولمه سی لازمکه چکی (دها زیاده قوتله
یعنی a fortiori) ثابت اولمش اولویور .

منطقیون ، بونی برنوع (قیاس مطوی enthymème) اولمق اوزره

تلقی ایدیورلر . [بو تعیره باقیکنز]

Agent عامل = فاعل Agent فرانسیزجه وانکلیزجه

لاتینجه دن آلمشدر . اصلی (agens) در ؛ (ago فعالیتده بولونمق)
معناسنده در . بناءً علیه (agent) فاعل دیمکدر . ضدی (patient منفعل) در .
بو تعیرلری ارسطو ایجاد و وضع ایتمش وینه کندی ترتیبی اولان (مقولات
عشره les dix catégories) [بو تعیره باقیکنز .] میانسنده (فعل) و
(انفعال) ی درج ایتمشدر . بو کونکی لسان علمی و فلسفی ده حالا مستعملدر ؛
و فقط معناسنجه برآز فرق واردر . بزم لسانمزرده آرتق عامل دنیلیور ؛
حتی بوکا برده (مؤثر) صفتی تردیف اولونهرق (عامل مؤثر) ترکیبده
قوللاندیقیده واردر . حالبوکه مؤثر لفظی حشودر ؛ یعنی لزومسز و فضله در ؛
زیرا عاملك حیثیت معناسنده ذاتاً مؤثر اولمق شرطی داخلدر . مؤثر اولمایان
عامل ، عامل صایلماز . واقعا بر حادثه طبیعی بر جوق عوامل مختلفه نك

Agent

(محصله resultantه) سی اولدوغنه نظراً، عواملک بر قسمی تأثیرینی کوسترمه من ایسه ده، او تأثیر یوق دیمک دکلدر. بلکه عوامل سائره و متقابله نك تأثیرینی تعدیل و موازنه ایتمکده در. فرضاً ماصه اوزرنده طوران شو کتاپ، جاذبه ارضیه نك لایتنقطع تأثیرینه معروض بولونمقده در. جاذبه ارضیه متمادی اوله رق او تأثیری اجرا ایدن بر عاملدر. فقط (کتاب دوشمیور) دیه رك او تأثیری انکار ایده مه یز. تأثیر جاذبه کوروله میورسه، ماصه نك مقاومتی سبیلله او تأثیرک صفره منجر اولوب موازنه حاصل ایتمکده در. کذلک عضلات وجهیه مزك دائمی بر تأثیر عصبی تحتده بولوندوغندن خبردار دکلز. حالبوکه اک ساکن او یقوده بیلله او تأثیر، متایدیر و متقابلدر. اونک ایچونده متوازن در. اگر (عصب وجهی nerf facial) نك بری، مثلاً صاع طرفده کی مفلوج، یا خود مقطوع و مجروح اوله جق اولورسه، در حال انسانک آخری و دوداقلری صول طرفه بوزوله رك چارپیلیر. زیرا وجه یالکنز صول طرفدن کلن تأثیر عصبی به معروض قالدینی ایچون او طرفه طوغرو قتلص ایدر. بناءً علیه (مؤثر) صفقی فضلدر (عامل) دیمک کافی. [antagonisme سوزینه باقیکنز]

بو کون (عوامل طبیعی agents naturels)، (عوامل اجتماعی ag. sociaux)، (اخلاقیه moraux)، (سیاسیه politiques)، (مرضیه morbides) حتی (جغرافییه géographiques)، (ارضیه géologiques) الی آخره... کی برچوق موضعلرده بوکله قوللانیلیر؛ و ذاتاً بوکی حادثات متنوعده جزئی کلی بر (سبب) معناسنه کلیر. اونک ایچوند رکه بعضاً (مؤثرات مدنییه، اجتماعییه اخلاقیه الخ) تعبیرلرنده اولدینی کی، مؤثرات سوزی عوامل یرینه قوللانیلیر؛ فقط عامل لفظی اصطلاحده مرجحدر. [action, activité, actif سوزلرینه باقیکنز]

(قوای طبیعی forces naturelles) تعبیری ده بو معنایی افاده ایدر سه ده آرده بر مهم فرق واردر. (قوت) دائماً ماهیتی مهم بر عامل اوله رق تصور اولونور. حالبوکه (عامل) تمامیلله معین اولمق شرطدر. مثلاً (شوماکنه یی حرکت کتیرن بر قوتدر) دیرسه ک مجرد و مهم بر صورتده

بیان رأی ایتش اولورز. او قوتی تعیین ایدرده (حرارت) در، یا خود (الکتریق) در؛ دیرسه ک مؤثری ماهیتی ایله تعیین ایتش اوله جمنز جهتله حرکتک عاملی کوسترمش اولورز.

اخلاق بحثده ده (عامل) سوزی، اهمیتله کچر. بزم لسانمزه اسکي سقولاستیق فلسفه سندن انتقال ایتش اولان (فاعل) لفظی مشهوردر. (فاعل مختار agent libre) دیرز. بویکی کله نك حیثیت معنجه هیچ فرقی یوقسه ده ارتق بوکون طبیعت جامده یه متعلق و اوندن صادر اولان قوتلر حقنده (عامل) لفظی ترجیح ایدرک قوللانیلیر. (عوامل طبیعی) دیرز. فقط عاقل و حر و مدبر فرض اولونان روح انسانی ایچون (فاعل) تعبیری ده کیشدیرمه مشزدر. بونلرک ایکسینک ده فرنکجه مقابلی (agent) در. عاقل اولمق قیدی، بوتعبیرک مباحث اخلاقیه ده وجه استعمالی تعیین و تخصیص ایدن بر مهم شرطدر. عاقل اولمایان موجوداتک خلاق مسألی ایله مناسبتی اوله ماز. قوانین اخلاقیه نك حکمی انحق انساندر؛ و اونک حرکات و معاملاتنده جاریدر. بوده عاقل و مدبر اولماسی حیثیتله و مسئولیتی متحمل اوله بیللمه سی اعتباریلدر. بناءً علیه اخلاق بحثده (فاعل agent)، (مختار اولمق کرکدر doit être libre) دیه دوشونولمشدر. فقط (فعل action) (بوسوزه باقیکنز!)، تحقق ایده بیلیمک ایچون، برطاقم شروطکده تحقیقی لازمدر. مانعه لره فائز و غالب اولمادقچه فعل ایچون استطاعت ممکن اولماز. ایشته بومهم نقطه یی نظر دفته آلان و نفس انسانیه یی حد ذاتنده مرید و مختار اولمق اوزره تلقی ایدن (ارسطو Aristote)، بوتعبیره بر معنای مخصوص ویرمشدی: اگر فعل، موانع خارجیهدن و یا خود موانع فیزیولوژیهدن (مثلاً آخری و صیزیدن طولایی قیملدایه مامق کی!) بوسبوتون آزاده اوله رق وقوعه کلیرسه، اونی ایقاع ایده نه، ارسطو (فاعل مختار) دییوردی. بوکون، هر نه اولورسه اولسون بر فعلک وقوعی و تحقیقی، همه حال بر چوق شرائطک وجودینه مقتدردر. بونده کیمسه نك شبهه سی قالمادینی کی شرائط مذکور نك جمله سنه، بیلله بیلله توفیق حرکت ایده بیلیمک دخی کیمسه ایچون ممکن دکلدر. بوده شبهه کوتورمن. اوبدن طولایی درکه بوکونکی لسان

فلسفه ده (agent moral) تعبیری قوانین اخلاقیه به تابع اولان کیمسه به دیرلر. او قوانینك اقتضاسنه کوره عمل ایدن دیمکدر. بومعاندن اگلاشیلورکه ارسطونك (فاعل مختار agent libre) ی ايله (agent moral) ك فرقی واردر. بوبریکی (serf arbitre فاعل مقید) وضعیتده در. (arbitre لغتنه باقکیز. [

فعله استطاعت مسئله سنده قیود معنویه و شروط خارجیه نك يك بويوك اهمیتی اولماسی، باشلی باشنه بر بحث مهمه سببیت ویرمش وارسطو زمانندن بری (فاعل مختارك فعلنده، خوفك، الملك، خصانك وجهلك نه درجه لره قدر دخل و تأثیری اوله بیله جکی) مسئله سی مختلف فیه برشکده قالمشدر. بزم علم کلامده دخی (استطاعت مع الفعل می؟ .. قبل الفعل می؟ .. بعد الفعل می؟) دیه اوزون بر مسئله واردر.

اجرای فعل و اجزای تأثیر (Agir)

Agir

بر حرکت ايله بر (فعل acte) [بوتعییره باقکیز!] حصوله کتیرمك مناسنه کلیر. بو حرکت ارادی اولسون اولماسین، معایه حکمی یوقدر. بوتعییری، مثلا کیمیاده بر (حامض acide) حقدده قوللانیدیغمز کبی، حکمتده، ضیا حقدده ده استعمال ایدرز: (ضیای شمس فطوغرافی پلاقی اوزرینه اجرای تأثیر ایدر). دیرز. علم حیاته ده (پروتوپلازما protoplasme) ده نیلن ایلک ماده عضویه نك (حرکت آمیبیه mouvement amiboïde) سنه [بوتعییره باقکیز!] دخی بوکله بی تطبیق ایده بیلیرز. بالخاصه فلسفه و تاریخ فلسفه ده، ارسطونك (مقولات عشره les dix catégories) سنده [بوتعییره باقکیز!]، بوکله، (انفعال pâtir) مقابله سنده موضوع اوله رق داخل بولونور. بزم حکمای اسلام بونلری اوته دنبری (فعل و انفعال) دیه ترجمه ایتمشلر در. (réagir) بر فعل و تأثیره قارشى قویق صورتیله واقع اولان حرکت ارادییه ده نیلیدیکی کبی بر فعلك محض تأثیری دیمك اولان (حرکت دفعیه mouv. impulsif) یه ده ده نیلیر. (فیزیولوژی = غریزیات) ده موضوع بحث اولان (فعل منعکس action reflexe)

عضوی بر حرکت، بر اثر حیات اولمله برابر، شعوره مقارن، یعنی (جمله عضویه مرکزیه système nerveux central) ايله علاقه دار اولمادیغی ایچون عضویتك بر عامل خارجی به قارشى بالذات (réaction) ی در. ذاتاً اولتعییرك معنایی عکس تأثیر دیمکدر. سوسیولوژی و پولتیقه لساننده (réaction) (ارتجاع) کله سیله ترجمه اولونور؛ و بر جریان حریت پرورانه به قارشى کلك واسکی حالی اعاده ایتك ایچون ماضی به رجوع غیرتی دیمك اولور که باقیلسه (محافظه کارلق conservatism) ك نامعقول بر صورت جاهلانیه سیدر. عادات مستحسنه بی و غنغات و مؤسسات ملیه بی محافظه ایتك غیرتی مقبولدر و ارتجاع صاییلماز. مع مافیه سیاسیات و اجتماعیات لساننده بوتعییر اکثریا ده کنیش بر معنا ايله قوللانمده در. براختلال و قوعیله بوزولن اسکی (موازنه اجتماعی) بی اعاده و یکیدن تأسیس ایتك غیرتیله حرکت ایدوب حکومتك طرز اخیرینی و جماعتك موازنه جدیده سنی اخلاص و تعدیله تصدی ایدنلره دخی (réactionnaires) دیرلر. بوتقدیره کوره شوکله نك معنایی مطلقاً مقدوح بر طرز سیاسته اشارت ایتز. چونکه اختلال، نتیجه سی اعتباریله احرارانه بر اداره یه وجود ویره بیلیدیکی کبی، اسکینندن ده امتز دی بر اداره یه ده منجر اوله بیلیر. نته کیم اوروپا تاریخ سیاستده امثالی جوق کورولمشدر. فقط هر وجهله حال حاضره نسبتله حال سابقه رجوع غیرتندن عبارت قالان (réaction) ینه ای کوتو بر ارتجاع در.

Agnosticisme

آگنوستیسم (مذهب فلسفه سی) Agnosticisme

Agnosticism	انگلیزجه
Agnosticismus	آلمانجه
Agnosticismo	ایتالیانجه

یونانی دن آلمش در. ذاتاً (ἀγνωστος یعنی بیلنه من) تعبیری نوفلاطونیلر لساننده اصطلاح اولمش و بوتون شرق تصوفنه انتقال ایتشدی. (حقیقت الوهیتی، انسانك شوعاجز و محدود ذکاسی ادراك ایده من، بیله من و هیچ بروقت بیله میه جکدر.) دیه (پلوتینوس Plotinus) ادعا

ایدردی و (θεός άγνωστος) تعیرینی قوللایردی که (Dieu incon-naissable) دیه ترجمه ایدلشدر . فقط بوندن (آگنوستیسزم) تعیرینی چیقاروب وضع وتشهر ایلهین ذات ، معاصرینمزدن پروفیسور (هکسلی Huxley) درکه برقاچ سنه اول وفات ایتشدی .

فلسفهده (اسباب علم (moyens de connaissance) مسئلهسی ، اوتهدنبری الك مهم بخلردن برینی تشکیل ایتمش وخیلی جدی مباحثاته میدان آچمشدی که حالا زمانمزمده دوام ایتکدهدر . (بز انسانلر حقیقی ادراك ایدهبیلیرمی یز ؟ . .) سؤالنه قارشی ، تصدیقاً جواب ویرن فلسوفر (dogmatisme و scepticisme سوزلرینه باقیکنز .) شو ادعالریله (ریونیون) دن ، (احتمالیون (les probabilistes) دن ، (اضافیون (les relativistes) دن ، (تنقید یون (les criticistes) دن (بوتعییراته باقیکنز !) آیرلقدن (یقینیون (les dogmatistes) نامیله تمایز ایتدکدن صوکره ، کندی آرهلرندهده اسباب علم مسئلهسنده اختلافه دوشوب - بالضروره ! - اوچ فرقیه انقسام ایتشلردی . زیرا : (حقیقی ادراك ایدهبیلیرز !) دعواسنی بالاتفاق ایلری سوردکدن صوکره : (هانکی واسطه ایله ؟ ؟ .) سؤالنه قارشی انجق اوچ درلو جواب ویریه بیلیردی : یا (حس (sens) ایله ؟ . . . یا (عقل -intelligence) ایله ؟ . . . یاخود (الهام (inspiration) ایله . . . ده نیله بیلیر . ایشه بوجوابلره کوره (حسیه (sensualisme) ، (عقلیه (rationalisme) و (تحدسیه (intuitionisme) مذهبلی تعین ایدر . بوکون حقیقت مطلقیه دائر (علم یقین (connaissance certaine) احتمالی صراحتاً رد ایدیلهرک (لادریه (agnosticisme) مذهبه اعتراف ایدلایکی حالده ینه حسییون ، عقلیون وتحدسیون موجوددر ؛ فقط دعوا یالکنز علم اضافیمزک منشائی تحقیق ایتک بحثنه منحصر قالمشدر . حالبوکه متقدمین ، علی العموم (یقینیون) دن ایدیلر ، فقط (ارباب شك) برفرقه مستتاً تشکیل ایدیوردی . متقدمین ومتوسطین (یعنی قرون وسطی فلسوفرلی !) نک برقسمی (حسیون) دن دیگر برقسمی ده (عقلیون) دن ایدی . یالکنز (نوفلاطونیلر - les néoplatonistes) ، واولردن - عقاید حکمت اعتباریله ! - هیچ فرقی اولمایان

(صوفیون (les théosophies) ، (تحدسیون) فرقه سنی تمثیل ایدیورلردی . چونکه حقیقت مطلقیه ، انجق (کشف ضمیر) یعنی الهام ایله ادراك ایتک ممکن اوله بیلدیکنه اینانیورلردی . اوزمانلر ، برده (gnostique) لرنامیله برفرقه پیدا اولمشدی . بونلرک باشلیجه مسلکی - بالخاصه - کتب مقدسه یی واحکام دینییه (معقول بر صورتده ! .) تفسیر ایتمکدن عبارتدی . بونک ایچون ده افلاطونک ونوفلاطونیلرک مبادی اعتقادیه لرینی احکام ونصوص دینییه تطبیق ایدرک (نقل) ی (عقل) ایله تنویر وکتب مقدسه یی معقول برطرزده تفسیر ایتمکدی . بزم شرقده دخی بوکبی متفکرینک امثالی چوقدر و (rationalisme) ک برمعناسی ده بودر . (agnosticisme و rationalisme سوزلرینه باقیکنز !)

ایشته عالم مشهور (پروفیسور هکسلی Professor Huxley) ، بو (gnostique) تعیرینه قارشی (agnostique) کله سنی وضع ایتمش بوندن (agnosticisme) تعیرینی اویدورمشدر . (gnostique) لری استخفاف ایتدیکنه باقیلیرسه بوکله نک معنای تاریخی و اصطلاحیسنی لایقیله بیلیمه دیکی واونی (عرفا) کبی برتعیر ظن ایتمش اولدوغی اکلاشیلیور : (وقتیه برفرقه حکما وارمش ؛ کندیلیرینی (gnostiques) دیه تشهر ایتشلر . بونلر هر شیئی بیلیمک ادعاسنده ایتشلر . بن عکسی ادعاده ییم . اونک ایچون کندی جهلمی اعتراف صدندنه (agnostique) تعیرینی ایجاد و وضع ایتدم . دیور .

هر حالده بومهم کله ، پک قیمتی برتعیر فلسفی اولمشدر . زمانمزمده فوق العاده برتهاسکله مظهر قبول اولوب رواج بولماسی پک طبیعی ایدی ؛ زیرا اسمی یکی قومش اولسه بیلله بومسلک فلسفی پک اسکیدن بری واردی . ادیمبورغ دارالفنونی معلملرندن پروفیسور (روبرت فلینت R. Flint) ، (agnosticisme) نامیله تألیف ایتمش اولدوغی قوجه مان برکتابده صاحب مسلک فیلسوفرلردن هر برینک بو خصوصده کی افکار واعتقاداتی بسط وتنقید ایتمش وحکمای اسلامی ده اونوتمامشدر .

آغوستیسیزمک بوکونکی معناسی ینه ده کشمه مشدر . [عقل بشر
صرف عالم حادثاتی ادراک ایده بیایر . علم بشر اضافی در . بود اثره خارجیه
انفاذ نظر ایده من ؛ عجز طبیعی محققدر . بناء علیه انسان نه قدر کامل ،
نه درجه عاقل اولسه ینه حقایق اشیائی اکلایه ماز علی الخصوص (حقیقه
الحقایق) اولان ذات الوهیتک نه اولدوغنه مطلع اوله ماز . یالکیز (وجوب
وجود) نی ، آثار خلقتدن استدلال ایده جکی جهته ، بهمه حال بر خالق
مطلق وارلغنه بالضروره ایمان ایدر .] ده ینلرک جمله سی (agnostique)
درلر ؛ و بودعوا آغوستیسیزم دعواسیدر .

عالم اسلامده آغوستیسیزم نصوص قطعیه اوزرینه مؤسسدر . ذات
الوهیت حقده برشیه وصف اولونه ماز (لیس کئله شی) بویورلمشدر .
(تعالی شأنه عما یقولون) و (سبحان الله عما یصفون) کبی کلمات جلیله هب
بومعنایه اشارت ایدر . [اللهم ذاتی تفکر ایتهمیکیز ؛ نعمتلرینی تفکر
ایدیکیز] معناسنده وارد اولان [تفکروا فی آلاء الله ولا تفکروا فی ذات الله]
حدیث شریفک تنبیهی ده بودر . و [سبحان ماعرفناک حق معرفتک یا معرّف]
قول شریفی دخی ذات الوهیتی حقیله بیلیمک ، هیچ بر انسان ایچون ممکن
و میسر اوله میه جغنی مقر و معترفدر . اونک ایچوندرکه بالجمله متفکرین
اسلام ، [کرک حکمادن ، کرک منتشرعیندن ، کرکسه صوفیه دن اولسون]
هب حضرت پیغمبره اقتدا ایدرک بوخصوصده اعتراف عجز ایله مشلردر .
شرقک حکیم داهی سی (ابو علی ابن سینا) اوحدیث شریفی ، شو مشهور
قطعه سنده تضمین و کندی عجزینی بلیغ بر صورتده اعتراف ایتمشدر :

اعتصام الوری بمفرتک !

عجز الواصفون عن صفتک !

تب علینا فانا بشر :

(ماعرفناک حق معرفتک) . . .

ینه عالم اسلامک ال بیوک حکما سندن فخرالدین رازی به اسناد اولونان
شو فارسی رباعی ، عینی معنایی متضمندر ؛ و (بیلیم که هیچ برشی بیلیمورمشم)
ده ین سقراطک شو سوزنی تأکید ایدر ؛ بناء علیه آغوستیسیزمک علی الاطلاق
بردستور افاده سیدر .

هرکز دل من ز علم محروم نشد .

کم ماند ز اسرار که مفهوم نشد .

هفتاد و دو سال فکر کردم شب و روز :

معلوم شد که هیچ معلوم نشد ! . . .

فلسفه ایله بالالتزام مشغول اولمایان شاعر تزیه حافظ شیرازی بیله عالمک
مبدأ و معادی حقده هیچ برشی بیله مدیکمزی پک صریح و ظریف برادا
ایله سویلیور وهله پک کوزل برتشیه ایله تمثیل ایدیور :
ما زاغاز وزانجام جهان بی خبریم ؛
اول و آخر این کهنه کتاب افتادست ! . . .
دیور .

حکمای شعرانک و ریاضیون شرقک ال بویوکلرندن اولان عمر خیام
(مسائل لدنیه) حقنده بیان ایدلمش اولان افکارک عندی فرضیاتدن باشقه
برشی اوله میه جغنی دوشونه رک شو کنایه لی اسلوب ظریف ایله اوفرضیاتی
افسانه به بکزه تیور ، و افسانه سویله ینلرکده اویقویه وارد قلینی ؛ یعنی بومعنا
اکلامادن وفات ایتدکلرینی تعریف ایدیور که حقیقتاً کوزلدر .

آنان که صاحب فضل و اداب شدند ،

در مجلس عرفان ، شمع اصحاب شدند ،

ره زین شب تاریک نبردند برون :

کفتند فسانه و در خواب شدند ! . . .

حکمای اشراقیه و شعرای صوفیه به کلنجه ، اونلرک جمله سنک اثرلرندن
بومعنایه دائر مثاللر انتخاب ایتک لازم کلسه برایی جلد طولدوریه بیایردی .
او قدر چوق یازمشلر و او قدر کوزل و شاعرانه یازمشلردر . آثار مشهوردن

واژگیورم؛ منظوم برایکی مثال ویرمکه اکتفا ایدیورم: حضرت مولانا:

اصل وذات حق تعالی هیچ کس

می نداند ای حکیم! این شرح بس!...

.....

بعد ازین کر شرح گویم ابلهست

زان که شرح این ورای آکهیست!...

دیور.

محمود شبستری:

منزه ذاتش از چندوجه و چون

(تعالی شاه عمان یقولون:)

دیور.

حکیم سنائی، بحق ادعا ایدیور که (فکر بشرک، جستجوی حقیقته

حدودی، عقل بشرک صـوـک موقف عجزیدر. کندی فهمنک نهایی در.

او هنوز الله دکلدر. الله اونک ده فوقده وماوراسنده در.]

آن که فهم ترادرو رده نیست،

غایت فهم تست؛ الله نیست!...

فیض هندی، آغوستیسیم اعتقادی عریض ایتمک اوزره اوزون ویک

مکمل منظومه لر یازمشدر:

ای همه در پرده نهان راز تو

یخبز آغاز، زآغاز تو،

بیتی ایله باشلایان، و:

یا اَزَلِ الظُّهُور! یا اَبَدِی الْحَقِّ!...

نورک فوق النظر؛ حسنک فوق الثنا!...

مطلع عربی سیله مشهور اولان ایکی اوزون و مستثنای منظومه سی بووادیله

یازیلان آناز ادبیه نکه الک کوزلرندندر.

بزم سنان پاشا تضرعات مشهوره سنده:

(سن اول موجد قدیم سک که عقول اولین و آخرین، دائرة قدمه

قدم باصه ماز.) دیور.

بزم ضیا پاشا:

بر فاعلک مآثریدر جمله حادثات!... الخ... ..

هر اعتقاد عقله کوره غائبانه در.

سبحان من تحیر فی صنعه العقول!...

سبحان من بقدرته یعجز الفحول. الخ... ..

ادراک معالی بو کوچوک عقله کرکمز

زیرا بو ترازو اوقدر ثقلتی چکمز. الخ

عثمانی شعرا سی میاننده - شبهه سز! - اک درین دوشون و برنشته فیلسوفانه

ایله ملهم اولان، عبدالحق حامد بک، (تولو) نام اثرنده (آغوستی سیزم)

اعتقادی نه شو کوزل سوزلریله بلیغ و عالی برادا ایله ترجمان اولمشدر:

بیلیرمی کوردوکنی - خواب، خواب ایچنده! - کشتی؟!...

نیم جهانده کی حالم، توکا مطابقدر!...

یازیق! خیر دکل، بونده، بر حقیقته دل!...

اگرچه کوردوکن سربسر حقایقدر.

اونی تجسس واره - بزده - انحق استعداد،

دیم که: کنه شیئک، بو عقل، فارقدر!...

کوروده بیلیمکی آکلامش!... دیرم محضا،

فقط، دیم: بشرک شونده علمی لایقدر!... الی آخره

عثمانی شاعر داهی سنک شو سوزلری، حقیقتاً، امثال عیدیه سینه

فائقدر.

بزم صوفیه به کلنجه :

واقعا بوسوزلره باقوب علی الاطلاق حکم ایتمه ملی درکه صوفیه همه حال آغوستیسیمده قرار قیلمشلر در. بالعکس عرفادن اولدقلری ایچون (حقیقت لدنیه vérité ontologique) یه مطلع اولمق دعواسنده دخی بولونمشلر در. مثلا کبار صوفیه دن منلا جامی (سلسله الذهب) نام اثرینه شو سوزلره باشلیور ، و :

هیچ موجود نیست در عالم ،

که شناسد حقیقت آدم .

داند آدم حقیقت همه چیز

عین حق را حقیقت همه ، نیز . الخ . . .

دیورکه بو دعوا آغوستیسیم روحنه منافی در ؛ چونکه انسانک هر شیئی بیه جکنی و حقیقت اشیایی عین الیقین ، حق الیقین کوره بیه جکنی ادعا ایدیور. [تفصیلات ایچون وبونقطه نك ایضاحی ایچون mysticisme سوزینه باقیکنز.]

آغوستیسیمک بویه (صوفی و آلهی mystique et théologique) صورتلری اولدوغی کبی برده صرف علمی و فلسفی صورتی وارد درکه زمانمز فلسفه سنجه معتبر و مسلم در . مذهب فلسفی نه اولورسه اولسون ، قانتدن بری آرتق آغوستیسیم تأسس و تحکم ایتشد .

فلسفه حاضرده آغوستیسیمی ضروری کوسترن و تسلیم ایتدیرن دلایل قویه (مبحث معرفت ونظریه علم épistémologie, théorie de la connaissance) (بو تعیرلره باقیکنز !) وادیسنده اجرا اولونان تحقیقاتدن استنباط اولونمشدر. (علم بشرک طبیعت وماهیتی la nature de la connaissance humaine) ، (صرف انفسی purement subjective) و (اضافی relative) اوله رق تین و تحقّق ایتمش و بناء علیه حقایق اشیایه ، لدنیات اموره ، وجود مطلقه ، مبداء و معاده) ودها بوکبی (مسائل لدنیه questions ontologiques) نک هیچ برینه ، هیچ بر وجهله و هیچ بر وقت عقل ایردیره میه جکمز دائر قناعت کامله حاصل اولمشدر.

اونک ایچون (Relativité de la connaissance humaine) اضافیت علم بشر (بو تعیره باقیکنز !) (عقیده doctrine) سی بو زمان فلسفه سنک زمین متین استنادینی تشکیل ایدیور . صوک دورده ، کال شدت و قطعیت اوزره بودعواده بولونانلرک اک مشهوری (قانت) وزمانزده (هامانن) در. آغوستیسیمک دلایل مقبضه و مجبره سی بر ایکی جنس اوزره ترتیب اوله رق مختصراً ذکر ایدیه بیلیر .

اولا : وسائط ادراکک هم معدود ، همده ساحه شمول واحاطه لری اعتباریه محدود اولملری بر مهم دلیل درکه فیزیولوژی علمنک ، تشکلات عضویه مزدن استخراج ایتدیکی براهینک جمله سنی جامعدر . ثانیاً کیفیت ادراکک اک غامض و مبهم بر معماً اولماسی که صرف (لدنی ontologique) بر دلیلدر . زیرا بو حل اولونمادقجه هیچ بر حقیقت اکلاشیله ماز : چونکه بوتون بیلدیکمز شیلر نهایت تحلیله مدرکاته منجر اولور .

ثالثاً محصول ادراکک صرف انفسی اولماسی ، و حقایق اشیایی عیناً بزه اعلام ایتیوب ، اشارتاً افهام ایتسی درکه بوده پسیقوولوژی نک ابراز ایتدیکی دلیل مهمدر . مثلاً ضیا ، حرارت و بالجمله کیفیات محسوسه نک بزه بر طاقم انفعالات و حالات روحیه دن عبارت بولونماسی و (کیفیات محسوسه) اولمق اعتباریه خارجه موجود اوله مامسی کبی !

صوکره ، بوتون معلومات صحیحه مزک اساسلرینی تدقیق و تحقیق ایتک ایچون ، اولملری تحلیل ایتدیکمز زمان یکدیگریله تماماً متعارض بر طاقم احکام متناقضیه پیوسته اولوشمز دخی عجز طبیعی مزه بر دلیل قوی درکه عقلمزله دخی بو درلو مسائلی حل ایدمه میه جکمز دائر بزه قناعت کامله ویرر . بوده بر دلیل منطقی در ؛ (بر دلیل معقول arg. rationnel) درو (antinomies) ده نیلن قضایای عقلیه بودر . [بو تعیراته باقیکنز !]

ایشته فلسفه فی ، کندی دائر عجزینه ارجاع و آغوستیسیمه مجبور ایدن ضرورتلر ، بونلر در . (مسئله معرفت اولان شو عالم حادثات ایله قناعت ایدیکمز :

Contentez-vous du monde donné (خطای آغوستیسیمزک ایلک مهم تنبیدر . فقط یالکز عالم حادثاتی تحقیق ایله قساعت ایدیلنلره آغوستیف دینمز ، (phénoménistes حادثیون) دینر . بو حادثات عالمنده صرف وسائط علمیه ایله کشف اولنان قوانین قویمه وثابته بی تألیف ایدرک فلسفه بی بوندن عبارت فرض ایدنلرده (positivistes اثباتیون) دینر که (مابعدالطبیعیات) و (مبحث وجود) متعلق اولان بالمله تحقیقات وملاحظاتی بیهوده لافزنلکدن عبارت عد ایدرلر . آغوستیق لک بو ایکی فرقه فلاسفه دن بر مهم فرقی شودر که بونلر، حقیقتی اعتباریه (لا یعرف inconnaissable) بر قدرت مطلقه قبول ایدوب بو کائنات حوادثی او قدرت کلیه مطلقه نک تجلیاتی اولق اوزره طایرلر . بناء علیه طبیعتی تعریف ایتک ایچون اوقدرت مطلقه بی مبدأ اتخاذ ایدرلر ؛ اوکا همه حال احتیاج کورورلر . فقط اوقدرتک ناصل شی اولدیفنه ویا اوله بیله جکنه دائر هیچ بر شی سوبله نه مه به جکنی ادعا ایدرک بو نقطه ده توقف ایدرلر . باقیلسه آغوستیسیمز یالکز طور اعتباریه مابعدالطبیعیات ولدنیات مسائلنه منحصر بر (ریلک) دن باشقه برشی دکدر . فقط (حقیقت مطلقه بی بیله مه یز!) دیمک اوکا اینامامق، اونی تسلیم ایتمه مک دیمک اولمادیقی جهته آغوستیسیمز علی الاطلاق- ریلک صایله ماز . (بوتون بوتعیرات مهمه به باقیکز !)

ضرف فمت Agoraphobie

یونانی برگه در . (agora بوشلق ، کنیشلک) (phobie قورقو) دیمکدر . کنیش وانکین یرلردن قورقق صورتیه تظاهر ایدن بر عصیت درکه بعض امراض عقلیه نک علامت مخبره و متقارنه سی اولق اوزره شایان دقدردر . بوقورقویه مبتلا اولانلر بر میدانن قارشی طرفه ، طوغرودن طوغرویه کچه مزلر ؛ همه حال کناردن طولاشه رق وبرقوس رسم ایدرک ، کیده جکلری نقطه به وایرلر . بو حالت مرضیه نک حیثیتاً عینی ، فقط شکلاً ضدی (claustrophobie) درکه اوده قبالی و محدود یرلرده بولونمقدن قورقق دیمکدر .

قابلیت تحریرک ضیاعی Agraphie

هیچ بر اثر فلج اولیه رق، یازی یازمه بیلیمک قابلیتک ضیاعنه (agraphie) دیرلر که یونانی دن آلتش بر کله در . (a) ادات نفی (graphie) ده یازمق اولدوغنه نظراً تعیرک معنای لغویسی (یازمه مامق) دیمک اولور . بو حالت مرضیه مصاب اولان آدم ، کرک کوزی ایله کوردوکی تمایل حروف واشکال کلماتی ، کرکه قولانغی ایله ایشیتدیکی سوزلرک (خیالی image) ، تمایل مخصوصه ومعینه سیله یعنی حروفات ایله ادا ایدمه بیلیمک ایچون لازمکن حرکات عضلیه به مقتدر اوله ماز . ایشیدر ، یازیلری کورور ، اکلار ، یازمه ماز . مع مافیه حرکت عضلیه به مانع اوله جق بر فلج اثری ده یوقدر . یالکز یازی یازمه ماز . اونک ایچون بونی بر (amnésie motrice graphique) اولق اوزره قبول ایتشلردر . یعنی ضیاع حافظه نوعدن عد ایتشلردر که شوقدیره کوره یازی یازمه بیلیمک ایچون پارمقلری اداره ایدن مرکز محرک خیال و تمثال الفاظی رسم ایتک و حروفات ایله کوسترمک معرفتی (اونوتمش) مش کی تلقی ایدلدیکی اکلاشیلیور . مع مافیه ، (agraphie) ده نیلن قابلیتسز لکک (ایکنجی تالیف جهی deuxième circonvolution frontale) ده بر جرحه یاخود بر اثر تخریب نتیجه سی اولدوغی ادعا ایدلمکده در . بونک (alexie) ، (alalie) ایلده مناسبتی اولدوغی ایچون بوکله لره دخی باقیکز .

کومه Agrégat

عینی جنسدن اولوب ده آرله رنده آز چوق بر ارتباط بولونان عناصر متشابه نک هیئت مجموعه سنه (agrégat کومه) دیرلر . مثلاً بر جسم ، بر چوق ذره لردن مرکب بر کومه در ؛ دیرز . اگر عناصر آرله سنده ده اسالی بر ارتباط بولونوبده وظائف متقابله اعتباریه تعاون و تقسیم اعمال اولورسه اووقت اوله بر هیئت کومه ده نیله مز ؛ اوکا (عضویت organisme) ده نیلیر . زیرا عناصر متشابه سی وظیفه اعتباریه و تقسیم اعماله کوره تعین ایتش اولقله برابر آرله رنده کی روابط ده زیاده صمیمیت وقوت کسب ایتش اولدوغی ایچون دخی بوتون هیئت ده یکپاره اولش و هر عنصر فرد حیات عمومیه به

دها یاقیندن اشتراك ایتشدرد . خلاصه عضویتده آهنگ و وحدانیت حیات ، ظاهر در . هر عنصر فردك وظیفه سی ، حیات عمومی یی تأمین ایچون تشريك مساعی ایتكدن عبارت قالیر ؛ و تقسیم اعمال ایله تعاون و تناصر وقوعه كیش اولدوغندن طولای هر عنصر و یا صنف عناصر ، ادامه حیات ایچون یكدیكرینه احتیاجدن وارسته قاله ماز . حیوانات سفلیده بعضیلری (agrégat) مثالدر . مثلاً (پولیپ polype) و (hydre) لر بر کیسه ایچنده و بر مایع لزوجیده سالیج اوله رق منفرداً یا شایان بر سوری حیراتدن عبارتدر . بو ، حقیقی معناسیله بر (حیوان animal) دكل ، بر طوریه ایچنده بر کومه حیراتدر . کذا ، افرادی آری آری یاشار و یكدیكریله هیچ رابطه و علاقہ سی یوق ، بر جماعت ابتدائی و وحشیه ، (سوسیولوژی) ده کومه مثالی در .

بر هیئت اجتماعیه بو کون بر (عضویت organisme) صایلیر . چونكه تشكلاتی وارددر ، صنوف اجتماعیه سی وارددر و حیات عمومی نك ادامه سی ایچون بو صنوف آره سنده هر وجهله (تعاون و تناصر solidarité ، coopération) وارددر . متأخرین فلاسفه دن (هوبس Hobbes) ، در تیوز سنه اول ، جماعت بشریه یی بر عضویتیه بکرتشدی . سنسیر بو طوغری فکری ، بونظر صائی قبول و فقط تصحیح ایله مشدر . سوسیولوژی یی بیولوژی یه اسناد ایتك به نقطه دن باشلار .

غیبت افکار Aïdéisme

Aïdéisme

بر حالت مخصوصه نك اسمی در كه اوکا دوچار اولان کیمسه ده افکار تمامیه زائل و غائب اولور . بعضی امراض دماغیه نك عاقبتده بو حال ، مشاهده اولوندوغی کبی ، انسانك - قضارا و یا قصداً - باشنه این برضربه دخی دماغی صاره رق یا موقتاً و یا خود اوزون بر مدت ایچون غیبت افکاری موجب اوله بیلیر . حکمت صوفیه ده غیبت افکاره زیاده سیله اهمیت ویرلشدرد . تصوف اعتقادنجه حقیقت مطلقه یی بیلمك ، (حقه وصول) ایله آنجق ممکن اوله بیلیر . (عقلیون rationalistes) غننده (اسباب علم moyens de connaissance) دن معدود اولان (عقل raison) ، (حسیون

(sensualistes) نظر نده باشلیجه واسطه معرفت اولان (حواس les sens) صوفیه جه شایان اعتماد دكلدر . انجق (الهام l'inspiration) ، یعنی - کندی تعبیرلرنجه - (کشف ضمیر intuition) ، انسانی حقه ایصال ایدر . فقط بونك ایچون (تعشقات دینه) و (علایق دنیویه) دن کلیاً قطع مناسبات ایتلی در . زیرا (الهی الاصل d'origine divine) اولان روح انسانی ، بو عناصر مادیه ایچنده ، بوتن قفسنده حبس اولونمش بر قوش کبی در كه وطن اصلسی اولان عالم علینه اوچق و مبدأ حقیقیسی اولان حقه قاووشق ایچون دائماً متحسر و مشتاقدر . لکن عالم مادی ایله اولان روابطی و بو حیات مستعاره تعلق ایدن (خواطر reminiscences) ی اوئی محبوس طوتار . روحی اطلاق ایتك آنجق روابط و علائقی کسر و فك ایتكله اولور كه بودخی آنجق (وجد و استغراق extase) ایله ممکندر . انسان ، وجد حاله کلدیمی ؟ .. اونده عقل و فکر قالماز ؛ حتی شعور و بونك قالماز ؛ (مست مدهوش و تماماً بیهوش) اولور و آنجق او حالت اوزره وجدانده نور حق جلوه ایلر . (وصال communion) بودر . اکلاشیلیور كه (حالت وجد état d'extase) ی دعوت ایتكدن مقصد (غیبت افکار) ایله تجرید نفس در . چونكه (و ساوس افکار) دخی ، انسانی دنیایه باغلیان رابطه لر دندر . واقعا افکار دنیویه دن تجرد ایتك ، منحصر آ و (مجرد وجود حقه نظر) ایچوندرد . لکن ، وجد حالی ، انسانده هیچ بر فکر بر اقامدینی کبی بالخاصه منظور وجدان اولان (حق) ، فکر ایله قابل تصور و لسان ایله قابل افاده اولمادینی ایچون ، تصوفده (وصال حق) اشتیاقیه استغراق ، (aïdéisme) . واریر . [(théosophie) , (néoplatonisme) , (absorption) , (extase)] کله لرینه باقیکنز .

ضیاع کلام Alalie

Alalie

اصلی یونانی در . (α) ادات نفی (λάλια) کلام دیمکدر . قابلیت تکلمك - بر عارضه سیله - و مرا کز محرکه ده تغیرات مادیه اولماق شرطیه کاملاً یا خود قسماً ضیاعی افهام ایدر بر تعبیردر . عینی معنای افاده ایدن (aphasie) کله سی بو کون مرجع اوله رق لسان علمده رواج بولمشدر .

یونان لسانده (α ادات قی λέγω قرائت) در . اوقویه مامق دیمک
اولور . احتساسات بصریه موجود اولدوغی حالده - برعاضه سیبیله -
یازی یی اوقومق قابیتتک ضیاعی در . بوحالته مبتلا اولان کیمسه ، برکتاده
حرفلری کورور ، فقط آرتق معالزینی آکلماز ؛ اونلری طانیه ماز .
بوقصوره (عمای کلام cécité verbale) ، ویاخود (کلامه عائد اولان
حافظه بصریه نک ضیاعی amnésie visuelle verbale) دخی دییورلرکه
تعبیر اولمقدن زیاده کیفیتنی تعریفدر .

تعبیر ، عربجه دن فرنکجه یه انتقال ایتشددر ؛ بو علمی عربلر کشف
ایتشدی و بدایتده (الجبر والمقابله) دیرلردی . (کیت صرفه quantité pure)
علمی در . یعنی کمیات و مقادیرک کیفیتنی نظر تقدیره آلمیه رق صرف کمیات
مجرده (abstrait) تعبیرینه باقیکنز اوزرینه حساب علمی در . اونک ایچوندرکه
اعداد یرینه بعضی حروف و اشاراتی تمایل اوله رق استعمال ایدر . بو علمه
حساب عمومی نظریله باقیلیور . تفصیلات ایچون قاموسک اصطلاحات ریاضیه
قسمنه مراجعت اولنه .

برآلتک اسمیدرکه ، برحس الم حصوله کتیره بیلیمک ایچون لازم کلن
شدت تخرشی اولچمک مقصدیه ایجاد اولونمشدر . سقاندیناویالی (بیورنستروم
Bjornstrom) ایله فرانسه لی دوكتور (شارل ریشه Ch. Richet)
آیری آیری چالیشه رق بویه برر آت ایجاد ایتمشدرکه هرایکیسنده ده
اساس ، انسانک دریسی اوزرینه (جیمیز pince) واسطه سیله برتضنیک
اجرا ایتک ، و اوتضیقک درجه شدتی ، قتلته یعنی اوقه ایله تقدیر ایلکدن
عبارتدر .

شرق علماسندن و ریاضیون مشهوره دن (الخوارزمی) نامنه منسوب
برتعبیردر . بویکه اوروپاده اون اوچونجی عصر میلادیده - غالباً -
عرب رقمیله اجرا اولتان اعشاری حسابیه علم اولمش ایش ؛ بو کون پک
مختصر و اعتباری برطاقم اشارات تمثالییه حسابده ، اصولنه توفیقاً ، استعمال
ایتمک (algorithmme) دیرلر . شو تقدیرجه علم جبرک افادات تمثالییه
الخوارزمی اصولی در . ذاتاً بو حروفی اولا معاملات حسابیه تطبیق ایدن
بو (ماوراء النهری) ریاضی اولدوغی ایچون ، اوزاتک کینه سی ، بو اصولک
اسمی اولمشدر . تفصیلات ایچون قاموس اصطلاحاتک ریاضیات قسمنه
باقیکنز .

لاتینجه (alter) (باشقه) دیمکدر ؛ بوده یونانجه (ἀλλοίωσις) باشقه لاشمق
کله سندن آلتشددر . اصطلاحده برشیکک انجق تبدیل صفت و تغییر کیفیت
ایتمک صورتیه باشقه لاشمه سنه دیرلر .

برشیکک تبدیل صفت ایدوب باشقه لاشمه سی کیفیت .

(فضایی) متناوبه

بو تعبیر ، منطقده ، یکدیگریله مربوط و بربرینه ضد ایکی قضیه حقنده
قوللانیلیرکه اونلردن بری طوغری ایسه دیکری بهمه حال یا کلشدر .
لسان عادی ده و عملی شیلرده (ایکی شقندن برینی اختیار مجبوریته) در .
(یا یاردن کچرسک ، یاسردن کچرسک) ضرب مثل مشهورنده اولدوغی کبی ؛
مخاطبمز ، ایکی ضد تکلیفدن برینی اختیار مجبوریتنده بر اقریسه ق ،
اووقت فکرمرزی ، انجق ایکی قضیه متناوبه شکنده افاده ایدم بیلیرز ؛
و بهمه حال (یا) اداتی هرایکی قضیه متضاده نک باشنده قوللانیلیرز : (یا ادیبانه

طاوورانیرسک، یا بوجلسدن چیقار کیدرسک! دیدیکمز کی که (بو ایکی تکلیفدن انجق برنی قبولده مختارسک!) دیمک ایسته مش اولورز. بو کی احوال عادیده (les deux alternatives) تعیری، (ایکی شقندن برنی اختیار) سوزلریله ترجمه اولونه کیشدر. شایان دقتدر که بویه احوال عادیده واقع اوله بیلن تکلیفلر ایچون ترتیب ایتدیکمز قضایای متناوبده یالکزر (مانعة الجمع) شرطنه اهمیت ویرمش اولورز. یعنی هر ایکی تکلیفک ایکیسی بردن قبول واجرا ایدمه جکنی، مخاطبمزه تفهیم ایتش اولورز. یعنی ایکی تکلیفی جمع ایتمکدن ممنوع اولدوغنی، کندیسنه اکلاتمش بولونورز. اوتقدیرده: (هم ادبیانه طاوورانمام، همد بو مجلسدن چیقوب کیتیم) دیه بیلیمه سنه احتمال بر اقامق ایسته دیدیکمز کوستریز. ویاخود (نه یاردن کچرم، نه سردن کچرم) دیه دعوا ایتسنک معتبر اوله میه جفنی - ضمناً فقط پیشناً عرض ایتش اولورز. اکلاشیلیور که لسان عادیده وامور عملیه ده قوللانیلان قضایای متناوبه حد ذاتنده مطلقاً ضد اولق لازمکمز. بوراده ضدیت (صوری formel) در. (یاردن کچمه مک مطلقاً سردن کچمه مک مجبوریتی) استلزام ایتمز. (یاردن ده سردن ده کچمه مک) پک ممکندر. یالکزر بوراده (مانعة جمعیت) اک اساسلی شرطی تشکیل ایدر. اوسبیلهدر که بالجمله قضایای متناوبه (شرطیه منفصله proposition disjonctive) شکلنده در. (بو تعیره باقیکز!)

قضایای عقلیه ده منابوه اولدوغنی زمان آرده کی ضدیت (ذاتی essentiel) در. (بو تعیره باقیکز!) بزم تکلیفمزدن نشئت ایتش بر حال دکدر. زمان و مکان واحوال وظروف ایله تبدل ایدمه بیلیر بر (وضع مخصوص) دکدر. مثلاً: (ب) یا (۷) در؛ یاخود (۵) در؛ دیدیکمز زمان بونی بر کیفیت معقوله ایله تصریح ایدرده فرضاً: (فیلسوف سپنسر) یا (صاغدر) یاخود (وفات ایتمشدر) دیه ادعا ایدرسک کوروز که: شرطیه منفصله نوعندن اولان بوقضیه نک ایکی رکنی آرده سنده کی ضدیت (ذاتی) در. چونکه حیات ایله ثبات بر برینه قارشو ضد تقیض در. بو ایکی حال عینی زمانده برلشمز. بناءً علیه قضایای متناوبه حد ذاتنده شرطیه منفصله اتواعندن بری در. [تفصیلات ایچون = propositions disjonctives و propositions hypothétiques]

تعبیرلرینه باقیکز] شو قدر وار که منطقده بوبجی تعمیق ولایقیله مسئله یی تحقیق ایتش اولان علمای متأخرین (مبدأ تناقض le principe de la contradiction) ایله (مبدأ تناوب le prin. de l'alternative) آرده سنده مهم برفرق بولوب تعیین ایتشلردر: [یکدیگریله (متناقض contradictoires) بولونان ایکی قضیه نک هر ایکیسی ده طوغرو اوله ماز. [ایشته مبدأ تناقض بودر. [ایکی قضیه متناقضه نک هر ایکیسی ده یا کلش اوله ماز. [ایشته مبدأ تناوبده بودر. اکلاشیلیور که هر ایکی صورتده دخی شکل قضایا شرطیه منفصله در؛ وهر ایکی صورتده مبدأ اساسی تناقض در. یالکزشو فرق وار که شرطیه منفصله شکلنده مروض اولان بر قضیه مرکبه نک (بر قضیه متناوبه) اوله بیلیمه سی ایچون، طرفینی تشکیل ایدن ایکی قضیه حملیه آرده سنده (ماذمه خلو) بولونمهی بر شرط اساسیدر.

مثلاً، تحقیقات عدلیه مأمور اولان بر طیبیک، بر مقتول مجهول قارشوسنده بولوبوده وقعه جنائییه محاکمه ایدرکن: [بو آدم، یا «باشقه بری طرفندن قتل اولونمش» در؛ یاخود «انتخار ایتش» در. [دیه دوشونمهی قضیه متناوبه نوعندن بر شرطیه منفصله مثال اولور؛ چونکه ایکی احتمالدن انجق برینک طوغرو اوله بیلیمه سی اولاً (شرطیه منفصله) اولسنه سبیدر. ثانیاً هر ایکی احتمالک بردن یا کلش اولاماماسی ده (قضیه متناوبه) اولسنه سبیدر. بوقضیه یی تمثالی بر صورتده افاده ایدرسک: (ب) یا (۷) در؛ یاخود (۵) در. دیه بیلیرز. احوال اعتباریه ده اولنجه، ایکی تکلیفدن آنجق برینک مطلوب اولدوغنی اکلاشیلیور. هر ایکیسنک ده خارجه چیقماق احتماله نظر یوقدر. مثلاً، بن برکیمسه یه: (یا بورجکی ویر؛ یاخود صاتون آلدیغک مالی اعاده ایت!) دیدیکمز زمان، مخاطبی شوایکی تکلیفدن برنی قبوله مجبور ایتک ایستورم (!؟) دیمکدر. مع مافیه، مخاطبم باطاقبی اولورده (نبورجکی ویریر، نه ده آلدیغی مالی اعاده ایدر!) ویاخود عزت نفسی وکبری غالب بر آدم اولورده بنم بو سوزلرمدن شدتله منفعل اوله رق هم بورحنی، همده آلدیغی مالی باشمه آتار، کیدر؛ بومکنکدر. فقط بنجه مطلوب ومنظور اولان حرکت بونلر دکدر. تکلیف واقعدن ایکی شک

برینی و آنحق برینی! قبول ایتمه سیدر. ایشه (alternative) شرطی بوراده در؛ و کور و لیور که بوکی احوال اعتباریه ده تناقض، آنحق اعتباری و (صوری formel) در. بوفرق پک مهمدر. [formel لغته باقیکز.]

دیگر کاملق Altruisme

Altruisme

علم اخلاق، تعبیراتنددر؛ (خودکاملق égoïsme) ک ضدیدر. بوتعبیری وضع ایدن مشهور فیلسوف (اوگوست قونت Auguste Comte) اولمشدر. اصلی لاتینجه (alter باشقه سی) در. دیگر لرینک خیرینی تمی ایتک، منفعتی محافظه یه غیرت ایتک، حقوقی طائیف حسیاتی، بزی، باشقه لری اوغورینه فدا کارلغه سوق ایده جک درجه یه واریرسه، اوزمان بزم بو حرکتمز دیگر کاملق اولور. یالکز شو فرقی ابراز ایتک ایجاب ایدر که، کرک مادی و کرکسه معنوی رابطه لرله افندیسه باغلی اولان بر (اسیر) ک، اونک اوغورنده فدا کارلق ایتمه سی (دیگر کاملق) صایله ماز. بناء علیه بوخصلت نجیه، اخلاقاً تعالی ایتش حر و مختار اولان انسانلرده بولونه بیلیر؛ هر والده و پدرک اولادی اوغورنده فدا کارلق ایتمه سی ده، دیگر کاملق اک طبیعی و عمومی مثالی اوله بیلیر. فقط بوده - حیوانلرده بیله موجود و مشهود بر (میل عزیزلی Inclinatio instinctive) اولدوغی ایچون - دیگر کاملق صایلماز. فطریدر. مبادی اخلاقیه ملاحظاتندن طوغمش بر حرکت عالیجنابانه صایله ماز.

(خودکاملق) ایله (دیگر کاملق) آره سنده کی تضاد و بوضدیتک حرکات و اعمالده نتایج ضروریه و یا محتمله سی، فلسفه اخلاق ساحه سنده موضوع بحث و مناقشه اولش و ایکی مختلف نظریه یه وجود یرمشدر. (تفعیون les utilitaristes) (بوسوزه باقیکز!)، دیگر کاملق، خودکاملقدن طوغمش بولوندوغنی و (تجاذب sympathie) [بوسوزه باقیکز!] کیفیتک بونده بالخاصه ذیمدخل اولدوغنی ادعا ایتشلر. هله مشهور (آدام سمیت Adam Smith) بوا اساس اوزره بر فلسفه اخلاقیه بنا ایتشدر که (فلسفه تجاذب philosophie de la sympathie) نامیه معروفدر. بواعتقاده کوره [مناسبات مدنیه نک دها زیاده کسب

صمیمیت ایتمه سی و چوغالماسی، منافع بین البشریه آره سنده اقتصاد و تعاونی آرتدیره جق و انسانلر کیتدجه او ابتدائی خودکاملق لرندن واز کچه جکار و دیگر کاملقده دها زیاده تأمین منفعت ایده بیله جکلر در. [حالبوکه (بوزیتویست positiviste) لر (بوسوزه باقیکز!)، و علی الخصوص (Littre لیره) نظرنده دیگر کاملق، خودکاملقندن مشتق بر شی دکلدر. بو خصلت لک هر ایکسی ده اصلی و ابتدائی در. بری دیگرینه تقدم ایتمه مشدر. حتی ایکسی ده (عضوی) در؛ دهنیله بیلیر؛ چونکه خودکاملق (بقای شخصی conservation de l'individu) (سائقه طبیعی instinct) سنک الهام و اقتضا ایتدیکی برخط حرکتدر، و (تغذی nutrition) کیفیته مربوطدر. اولنسر اولماز؛ یعنی اول بول، هر فرد خودکاملق طاورانمازسه بقا بوله ماز و یاشایه ماز. دیگر کاملق (بقای نوع conservation de l'espèce) سائقه طبیعی سنک الهام و ایجاب ایتدیردیکی برخط حرکتدر، و (تناسل reproduction) کیفیتی ایله علاقه داردر؛ یعنی انسان اوته دنبری اولادینه و خویشاننه قارشی دیگر کامانه و فدا کارانه طاورانماسه یدی نسل بشر منقطع ونوع انسان منطقی اولوردی. بناء علیه کنندی کنندی اداریه مقتدر، و غوغای حیات بالذات قابل اولونجیه قدر، اک وحشی انسانلر بیله کنندی اولادلرینه قارشی دیگر کامانه طاورانیرلر؛ چونکه بوفدا کارلق بقای نسلک برنجی شرط امنیتی در. شواکی فرضیه نک خلاصه افاده سی شو اولیور که (تفعیون) نظرنده دیگر کاملق، دیگرینه قارشی برحمت خودکامانه در؛ حالبوکه لیره و امثالی عندنده دیگرینی - خودکامانه برعوض کوزتمیه رک - سومک و اوغورنده فدا کارلقدن چکنمه مکدر.

اوالده، کنندی منفعتی قطعاً حسابدن خارج طوته رق دیگرلری ایچون فدا کارلق ایتکده خیر اوله بیله جکی کبی، شر اوله بیلیمک احتمالی ده واردر. بناء علیه دیگر کاملق باشقه لرینه مورث شر دخی اوله بیلیر؛ دیه دوشونمک منطقی ایه ده بوکون دیگر کاملق تعبیرینک معنای اصطلاحی سنده باشقه لری ایچون خیری موجب بر فدا کارلق شرطی مند مجدر؛ هم بونی یالکز حسیات اولمق اوزره دکل، (برخط حرکت une ligne de conduite) اوله رق

تلقی ایدرلر؛ چونکه بالعمل فداکارلق شرطدر. بوکله یی ایجاد و وضع ایدن مسئله یی بحق لایق اولدوغی اهمیتی ورن (قونت Comte) بو عقیده فلسفیه یی (دیگرلری ایچون یاشامق vivre pour les autres) دستوری ایله تلخیص ایتمشدر. فقط بونی هر وجهله و هر صفحه سیله تحقیق و تتبع ایدن مشهور انگلیز فیلسوفی (هربرت سبنسر Herbert Spencer) در؛ بونک ایچون درت بش کتاب یازمش و بالجمله روابطی و هر درلو صفحاتی ایله کرک خودکاملغک، کرکسه دیگرکاملغک ماهیتی میدان قویمشدر. دیگرکاملغی (خیر خواهللق bienveillance) ایله بر طومش و بونک (مثبت positive) و (منفی négative) صورتلری تتبع و تحقیق ایچون (bienveillance positive) و (bienveillance négative) ناملریله ایکی جلد وجوده کتیرمشدرکه بوکتابلر اخلاقه دائر یازمش اولدوغی ساسله آنارده داخلدر.

قاره صر، که Amaurose

(احتساسات بصریه sensations visuelles) نک تناقص شدت وصفوتی.

ابهام Ambiguïté

برکله نک ایکی مختلف معنایی متضمن اولسی سببیه غیر معین و موجب تشویش بر حیثیتی حائر بولونماسیدر. بناء علیه بویه ایکی معنایه کلیر برکله نک مبهمیتی باشلی باشنه (سفسطه sophisme) [بوکله یی باقیکنز!] صایلماز؛ فقط اکثریا سفسطه یی سببیت ویا وسیله ویره بیلیر بر (لسان قصوری) در. محاکمه فکریه ده بویه برکله استعمال اولونجه، یاپیلان قیاس (منتج conséquent) ظن اولونورده دکدر، لافدن عبارتدر. اونک ایچون بویه ایکی معنالی برکله نک قیاسده داخل اولمسی و کبراده باشقه صغرا ده ینه باشقه معنا ایله قوللانمش بولونماسی اویه برنوع سفسطه یی سببیت ویریرکه اوکا منطق اصطلاحنده (سفسطه کلامیه sophisme in dictionem) دیرلر؛ زیرا سفسطه واقعه یی سبب محضا کله نک ابهامی در و [برحدک هم کبراده هم صغرا ده عین حیثیته داخل بولونماسی]

نرومه دائر معلوم اولان قاعده مهمیه - کرک قصدا کرکسه غفلة - رعایت ایلمه مش اولماسی در. بوتعیرک و بونوع سفسطه نک اسمی ابتدا ارسطو طرفندن وضع اولونمشدر. فقط بوکونکی منطق یون کله نک ابهامی یوزندن یاپیلان سفسطه یی (soph. in dictionem)؟! حقیقی سفسطه لر صنفندن عد اتمیورلر. [sophisme - سوزینه باقیکنز!] اکثر مباحثه لرده ذکر یی مجبوری بولونان کلمات اصطلاحیه نک معناری حقیقه تعیین ابدلنزه طرفین، اوکلمات مجردیه باشقه باشقه معنار ویره بویه جکندن هم بونوع سفسطه یی میدان آچیلمش اولور؛ همده مباحثه نزاع لفظی دن قورتاریله ماز. انگلیز مشاهیر منطق یونی، منطق کتابلرینک نهایتنده بو درلو کله لری نظر دفته عرض ایتک ایچون بر باب مخصوص آچشلر و او کلماتک فهرستی ویرمشلر در.

روح Ame

Ame	فرانسزجه
Soul	انگلیزجه
Seele	آلمانجه

بوکله نک یونان قدیم لساننده مقابلی (ψυχή) در، بوده (ψυχή) فعلندن مشتقدرکه معنای لغویسی (تنفس ایدیورم) و (اوقلیورم) دیمکدر. کاول، مشهور ارسطو بوکله یی اصطلاح حیثیته قوللانمش و بالاخره بوندن پک چوق اصطلاحات علمیه یاپیلمشدر: (psychique), (psychiatrie), (psychisme), (psychologie), (psychopathie) و ده امثالی کبی. تاریخ فلسفه و مذاهب فلسفیه حقنده معلومات وسیعسی مسلم اولان (سرویلیام هاملتن) بونک برچوق لسانلرده مقابلی ذکر ایدیور و جمله سنده ده روح تعبیراتنک عینی منشأ اعتقاددن تولد ایتدیکنی میدانه قویور؛ سوزلری بوریله نقل ایدیورم: [یونانی قدیمده (πνεῦμα) کله سی دخی (ψυχή) کبی روح دیمکدر و ایکسینکده معنای لغویسی (نفس) و (هوا) در. لاتینجه ده (spiritus) دخی (تنفس ایتک) معناسنه کلن بر مصدردن مشتقدر. کذلک ینه اولسانده

(anima) و (animus) کله‌لری ده وارد که ایلک معنای او بوتولاش و تشبیهی مغالریله قولاللقده بولونمشلردر. مع مافیله بولکله‌لرک معنای اصلی و مادی‌لری یونانی لساننک (άνεμος = آنه‌موس) لفظنده مضموندر که روز کار و هوا دیمک اولور. انکلیزجه (soul)، آلمانجه (seele) کله‌لری (غوثیق gothique) لساننده (فورطنه) دیمک اولان (saivala) لفظندن آتمشدر. ینه اسکی انکلیز لساننده (ghost) لفظی وارد که انجیلده علی الاطلاق (روح) معناسنه وارد اوله کلمشدر؛ آلمانجه (geist = غایست) لفظنک عینی‌در؛ بونلرک ایکسی‌ده (gas = غاز) و (gesht = کشت) اصلندن مشتقدر که (هوا) دیمکدر. عبرانی‌ده (نفسه) و (روح) کله‌لری نفس آلق معناسنه موضوع بر مصدردن مشتقدر. سانسقریت، یعنی اسکی هند لساننده (آتما = atmā)، هم روح، همد روز کار و هوا دیمکدر و یونانی‌ده (بخار) و (هوا) معناسنه کلن (atmos = ατμός)، اوندن آتمشدر (atmosphère) ده بوندن کلیر .. [الی آخره ...]

عربجه‌ده عیناً بویله‌در؛ چونکه (روح)، (ریح)، (رایحه)، (راحة) عینی اصلدن کلیر و کلمه اصلیه‌نک معنای ابتدائی‌سی (هوا) و (روز کار) دیمکدر.

علم لسان نقطه نظرندن واقع اولان شو تحلیلات بزه پک مهم بر کیفیت عرض ایدیور: لسان علماسنک بوتحلیلاتی ایل (آنتروپولوژی anthropologie) علماسنک تدقیقاتی عینی فرضیه‌یه پیوسته اولویور؛ و ابتدای امرده انساننک (روح) حقنده فصل بر اعتقاد پیدا ایده‌بیلش بولوندوغی بوتحقیقاتدن ظاهر اولویور. اکلان‌یلور که:

اک وحشی دورلرده بیله انسانلر نظرند (تولوم)، اک مهم فقط اک مهم بر مسئله اولمشدر. دنیاده مدنیتک هنوز شمه‌سی بیله یوق ایکن، (انسان ابتدائی l'homme primitif) تولوم اندیشه‌سیله - قدرتی یتدیکی قدر! - اعمال فکر ایتش و توللرده نه‌کسین شینک نه‌اولدوغی دوشونمکه مجبور بولونمشدر. بوکا دائر قوی دلیللر وار. وفات ایدن بر کیمسه‌ده انقطاع حیاتی اثبات ایدن اک واضح و شبهه‌سز دلیل، نفسک یعنی صولوغک

کسیلمه‌سی‌در. (حتی بوکون بیله مختصر بر آدمک حقیقه تولمش و یاخود بایلوب قالمش اولوب اولمادیغی تحقیق ایچون آغزینیه آینه طوتارلر. جزئی نفس آلورسه آینه سطحنده (بوغو) یعنی بخار حاصل اولور که علامت حیاتدر) اکلاشیلیور که انسان ابتدائی روح ایله صولوغی، صولوق ایله هوای نسیمی‌ی بر طومش و اوسبیله روحی هوا نوعندن برشی ظن ایتمشدر. بوطن، ضروری و طبیعی اولمش اولسه کرکدر.

بوکون بر چوق اقوام وحشیه‌نک، بلااستثنا جمله‌سی، بواعقاده بولونویور؛ بونی (نه‌توغرافی)، (آنتروپولوژی) و (سوسیولوژی) علماسی تحقیق ایتمشدر.

روحک ماهیتی حقنده کی اعتقاد قدیم و ابتدائی بوصورتله برظندن تولد ایتش بولوندوغی کی، (بر جوهر مستقل و غیر جسمانی) اولماسی اعتقادنده دخی، کیفیت (رؤیا le rêve) نک بویوک بردخل و تأثیری اولمشدر. شبهه یوقدر که اک وحشی انسانلر - حتی حیوانات عالیله بیله! - رؤیا کوره‌بیلور. حیات روزمره‌سینک هیجانی وقوعاتی رؤیا‌سنده تکرار یاشایان و کوزلرینی آچار آچاز کندینی و بولوندوغی محلی ادراک ایدن انسان وحشی‌نک، بوسرار انکلیز حاله حیرت ایتسه‌سی طبیعی‌در. کیفیت رؤیایی کندنجه تعریف ایچون دخی نفس و صولوقدن عبارت عد ایتدیکی روحک - بر مدت - بدنی، اولدوغی یرده ترک ایدوب سیاحته چیقمش و نیجه نیجه عجایب سیر ایتش اولماسی دوشونمه‌سی‌ده ضروریدر. شرک اسکی محرراتنده، حتی بومسئله‌ره دائر بزده موجود اولان بر چوق آثار عثمانیه‌ده (کیفیت رؤیا) تماماً بوصورت اوزره تعریف اولونمش و تولوم ایله رؤیانک - بری برینه پک بکزر-ایکی قارداش اولدوغی عمومی بر اعتقاد اوله‌رق تأسس ایتمشدر. آثار صوفیه‌ده دخی رؤیا تعریفنده (روحک بدنی موقتاً ترک ایدوب (عالم مثال) ده سیران ایتدیکی و اوعلنده (جابلسا) و (جابلقا) نامنده ایکی (معنوی - مملکت) کزوب، اورالرده عجایب شیلر تماشا ایلدیکی [ادعا اولونویور. تورکجه آثار مشهوره مزدن ارضروملی ابراهیم حق نک معرفتنامه‌سی بواعقاده دائر اک مهم و ثائق جامعدر.

بولندر هب (آنترپولوژی) علماسنك تحقيقاتنه مستند بولونان بر نظریه مشهوره نك مقرون حقیقت اولدوغنی کوستریور .
مع مافیه تاریخ فلسفه اثبات ایدیورکه انسانیت ابتدائیه نك - ازمنه قبل التاریخیه دنبری - روح حقنده حاصل ایتش بولندوغنی بواعقاد ساده دلانه (باطل برطن ، قاباومادی بر تشبیه محصولی اولقله برابر !) قیمتی چوق مدت محافظه ایتش وایلك یونان فیلسوفلرنجه بیله مقبول اولمشدر . مثلاً ، (مدرسه یونانیه Ecole Ionique) نك (Ecole کله سنه باقیکنز !) مشهور فیلسوفلرندن ایکنجیسی اولان (آناقسیماندر Anaximandre de Milet) (۵۴۶ - ۶۱۰ قبل المیلاد !) ، کائناتك (جوهر ذاتی Substance essentielle) سی هرشیئك (اول الاوائل l'Archée) ی (هوا) در و هوا زیر و حدر ! . . . دیه اعتقاد ایدیوردی . بو آدمك شا کردی اولان (آناقسیمه نس Anaximènes) ایسه ، هوایه نامتاهی صفتی اسناد ایدرك ، [الله در !] دیوردی . [آتومیزم مذهبی Ecole atomistique] مؤسسارینك اك مشهوری اولان (دیمقراطیس = Démocrite) ، هواده بر چوق ارواح واردر ؛ زیرا هوا بر چوق (ذیروح - ذرات) دن مرکدر .
ἐν γὰρ τῷ αἰερί πολλὸν ἀριθμὸν εἶναι τῶν τοιούτων, ἃ καλεῖται ἐκεῖνος νοῦν καὶ ψυχὴν .
مشهوره سندن قلازومنلی (آناقساغور Anaxagore de Clazomène) ؛
(۴۲۸ - ۵۰۰ قبل المیلاد !) واردرك اك اول روح بشری (Nous = νοῦς = عقل) دیه تعریف ایتش ایدی . فقط عقل نسیمه ایتدیکی روحی فصل تاقی ایلدیکنه دائر بو حکیمك کندی سوزلری مضبوطدر بوسوزلر صراحتاً اثبات ایدیورکه اوده روحی یعنی عقلی [باجمله اشیاى مادیه نك اك صاف واك رقیق ولطینی καθαρώνατον καὶ λεπτότατον τε πάντων χρημάτων]
ظن ایدیورمش ! . یعنی روحك غایت رقیق بر ماده اولدوغنه اعتقاد ایدیورمش ! . (مادیه matérialisme بولفظه باقیکنز !) مذهب مشهورینك مؤسسی اولان (ئه پیکور Epicure) (۲۷۰ - ۳۴۱ قبل المیلاد !) ، [روح اك لطیف بر جسمدر ἡ ψυχὴ σῶμα λεπτομερές] دیمشدرکه کندی فلسفه سنه کوره موافق وطیبی بردوشونوشدر ، اما یا ککشددر .

مشهور سقراطك اعتقادی ، روحی جسمانیت ومادیت تصورندن بوسبوتون قورتارمشدر . بو حکیمك فکرنجه (روح اویله بر جوهر غیر جسمانی درکه بوماهیته ، الله ایلله مشارکتی واردر . یعنی جوهریت غیر جسمانیه سی اعتباریله روح ، الله بکنزر . الله نصل کوزدن نهان اوله رق کائناتی اداره ایدیورسه ، طبقی اویله جه ، روح دخی ، غیر مرئی اولدوغنی حالده بدنه تصرف وجسمی اداره ایدیور . بدن خراب اولدوغنی حالده روح فانی اولمیور .)
معلومدرکه بوکون ادیان منزله نك ؛ حکمت صوفیه نك ؛ روحیون مذهب فلسفی سنك ؛ واکثریت ناسك اعتقادی بودر وحتی عوامك بوبابده فکری بوقدردن عبارتدر .

افلاطونك روح حقنده کی نظریه سی (فیثاغوریون Pythagoriciens) دن مستعار اولقله ، پك مهمدر . مع مافیه بو حکیم (فهدون Phédon) نام اثرنده ایکی سطرله بو خصوصده کی فکرنی واضحاً بیان ایتمشدر : [روح ، الهی در ؛ لایموتدر ؛ مذکر در ، غیر جسمانی در ؛ بسیطدر ؛ غیر مرئی در ؛ و تصرف و اداره ایتمکده بولندوغنی بدندن اقدمدر ؛ یعنی ده اول موجوددر .
Τῷ μὲν Θεῷ ; καὶ ἀθανάτῳ ; καὶ νοητῷ ; καὶ μονοειδεῖ ; καὶ ἀδιαλύτῳ ; καὶ αἰεὶ ὡσαύτως ταὶ κατὰ ταῦτ' ἔχοντι ἑαυτῷ ὁμοιότατον εἶναι ψυχὴν .
دیمشدر . روح دن کیفیات واحوالندن ، اك اول ، (اصولی دائره سنده methodiquement) بحث ایدن ارسطو اولمشدرکه افلاطونك اك مشهور شا کردی ومعارضی ایدی . (روحه دائر Περὶ ψυχῆς) یازدینی کتاب ، دنیاده پسیقولوژی نامه یازمش ایلک اثردر . اونده ارسطو روحی ، آثار باهره وعلائم ظاهره سنه نظراً تعریف ایدیورده :
[روح ، اودرکه : اونکله یاشارز ؛ حس ایدرز ، دوشونورز ! -
Ἡ ψυχὴ δὲ τοῦτο ᾧ ζῶμεν καὶ αἰσθανόμεθα καὶ διανοοῦμεθα .
روحه دائر هیچ برشی سویله میوب ، هرکسک بیلدیکی علائم ظاهره نی تکرار ایتمکدن عبارت قالیور . مع مافیه ارسطو بو مسئله غامضه حقنده چوق دوشونوب اعمال فکر ایتش وبر نظریه ترتیب ایلشدرکه بالخاصه عالم اسلامده

(الحکما) دهنیلن (فلسوفلر فرقه‌سی) اونی عیناً و تماماً قبول ایتمش و حالا بوزمانه قدر اعتبارده طوتمش در: بوده مشهور و پک معروف اولان (عقل اول، یاخود عقل فعال = و کال اول = $\epsilon\nu\tau\epsilon\lambda\epsilon\chi\epsilon\iota\alpha\ \pi\rho\omega\tau\eta$ = $\epsilon\nu\tau\epsilon\lambda\epsilon\chi\epsilon\iota\alpha\ \pi\rho\omega\tau\eta$) نظریه سیدرکه، (intellect) کله‌سندده بوکادائر تفصیلات کافیہ ویرلشدر. [اورایه باقی‌کز !] بوراده انجق مختصراً بونظریه مهمه‌یی عرض ایتمکه مجبورم؛ زیرا بوتون اسلام فیلسوفلرینک اکثریت کلیه‌سی، بونی اساس اتخاذا یتشلددر.

ارسطو سائر فیلسوفلر کی، یاخود آلهیون کی روحی، بدنن آیری بر (جوهر نورانی) اوله‌رق قبول ایتبوردی. جسم مادی‌نک شکل هویتی افاضه ایدن و کیتدجکه، [یعنی تکامل ایله !] اوشکلی اصلاح واکال ایله‌ین قابلیت حیانه (روح) دیبوردی؛ و کندی فکر نجه بوقابلیت (فعل = $\epsilon\nu\epsilon\rho\gamma\epsilon\iota\alpha$ = $\acute{e}nergie$) دیمکدی. بوقدرت، جسم عضویده بالقوه موجود بولوندوغی حالده (صیورت le devenir) ایله، بالفعل نظامر ایدیور و او جسمه (صورت کال) نی ویریوردی. طبیعی درکه روح بویه دوشونولور ایسه، جسمدن آیری و مستقل اوله‌رق تصویری ممکن اوله‌ماز؛ اولسه‌ده بیهوده اولور. مع مایه، استاد یونانی بر اللهه اعتقاد ایدیوردی؛ فقط اولله دخی جسم کائناتدن آیری و مستقلاً موجود بر (روح عمومی) دکلدی. یننه جسم کائناتده مندرج بر (قابلیت کال) ایدی که کائناتده، ازلدنبری (بالقوه) موجود اولدینی حالده هر آن (بالفعل) تجلی ایدرک، کائنات کال صورت افاضه ایدیوردی. اونک ایچوندرکه ارسطو - بو حیثیت معنا ایله تلقی ایلدیکی - روحی، هم (علت صوریه cause formelle)، هم (علت فاعلیه cause efficiente)، همده (علت غائییه cause finale) عدایدیوردی. جسمک ماده‌سی، جوهری، یعنی خاموری دخی (علت ماده $\text{cause mat\`erielle}$) سی اولویوردی. ایشته ارسطونک (علل اربعه les quatre causes) فرضیه‌سی، روح حقنده کی اعتقادینه - صمیماً - مربوطدر. برشینک موجودیتی ایچونده بو درت در. بری کندی مادیتی، دیگر اوچی ده نشوونما ایله کال صورت

اکتساب ایده بیلیمک خصوصسندده کی قابلیت فطریه وازلیه سیدر. (علت اولای تکونی، علت غائییه سی) ده بونده در. کندیسندده بالقوه موجود بولنان استعداد کالک، احسن تقویم اوزره، یعنی اک کوزل شکل اوزره تجلی ایتیمی در.

ایشته ارسطو اساننده (l'intellect premier $\epsilon\nu\tau\epsilon\lambda\epsilon\chi\epsilon\iota\alpha\ \pi\rho\omega\tau\eta$) بودیمکدر؛ و ($\epsilon\nu\ \tau\acute{\epsilon}\lambda\omicron\varsigma\ \acute{\epsilon}\chi\epsilon\iota\nu$ = یعنی کندیسندده بر غایه کال وار!.. ce qui a sa fin de perfection en lui-même) دیه تفسیر ایدلشدر. بوروبور نظریه‌سی عیناً و تماماً عارفان اسلامیه انتقال ایتمش وهان علی الاطلاق حکمای اسلامک اذهانیه تحکم ایلشدر. بوتون (هیولا و صورت = $\psi\alpha\nu\kappa\alpha\iota\ \mu\omicron\rho\phi\eta$ = $\psi\alpha\nu\kappa\alpha\iota\ \mu\omicron\rho\phi\eta$) forme et matiere) عقیده حکمتی و بوندن نشأت ایدن و مناقشه‌سی الی عصر سورن (صورت جنسیه ونوعیه) مسئله‌لری، عالم اسلامده (فلسفه مشائییه $\text{philosophie p\`eripat\`eticienne}$) نک یعنی، ارسطو فلسفه سنک نه بویوک بر نفوذ ایله تحکم ایتدیکنی - صراحة - کوستریر. حکمای اسلام (intellect) کله‌سنی (کال اول) دیه ترجمه و حقیله ادا ایتشلدر. شرح موافقک، دردنجی موقفنک نصف اخیری هان کاملاً ارسطونک بو (روح نظریه‌سی) نی مناقشه‌یه حصر ایدلشدر. بو خصوصه دائر لازمکلا تفصیلات (intellect) کله‌سندده مندرجدر. اسلام حکما سندن مشائی اولانلرک افکارینه عائد ملاحظات دخی اوراده در. [مراجعة ایدیکز !]

ارسطو، روحی بدنن آیری و مستقل برشی کی دوشونه‌مدیکی ایچون (تناسخ m\`etempsychose) ی انکار ایتلشدر؛ بوده پک طبیعی در؛ زیرا روح بدنن آیریه مادجه کندی باشنه سرسریانه سیاحت ایده‌مز؛ و روحسز بر بدن بوله‌ماز که صاحبسز برخانیه کیررکی - اوکا کیره بیلسین!.. روحک - ابدیتیه رغماً - حادث، یعنی مخلوق اولوب اولماسی اعتقادی دخی ارسطونک فلسفه‌سندده - بر مسئله اوله‌رق ! - موضوع بحث اولمش و حقیقت روح معناسنک حلی مشکل، بلکه ناقابل اولدوغی تظاهر ایتلشدر. بو بحثک بوراده تفصیلی پک اوزون سوره جکی جهته مسئله‌نک حد ذاتنده

و اسلام حکماى عندنده اهميت فوق العاده سنه بناء - غایت مختصر بر فکر و یروب اشارت ایتکی مناسب کوردم .

اولا شو نقطه مهمه به نظر دقتی جلب و دعوت ایتکه مجبورم که نصوص قرآنی به مبنی اولان حکمت اسلامیة ، روح حقیقی بمحتمه لال و ابکم قالمی ترجیح ایتشد . زیرا بومسئله خطیره ده مانع بحث اولان آیت پینه نک منطوق منیف صریحدر : [ویستلونک عن الروح ؛ قل الروح من امر ربی !] یعنی [سکا روحدن صورار لرسه ، دی که روح اللهک بیه جکی برایشدر !] بیورلشدر . بوکون ، زمانزک عرفانه حاکم اولان هیچ بر فیلسوف یوقدر که بومعنادن ذره قدر انحراف ایدرک روح حقیقته دائر بر فکر بیان ایده بیلیمش اولسون ! (سپنسر) ، بیک بشیوز صحیفه لک (پسیقولوژی) کتابنده : [روح حقیقتی بیه میز و بیه میه جکز ! . . یالکز آثار تجلیاتسندن ، قوا سندن ، الحاصل حادثاتسندن بحث ایتکه صلاحیتیز وارددر . پسیقولوژی دخی انحق حادثات روحیه دن بحث ایدر بر علمدر !] دیور . (هاملتن) (میل) ، (مه نسل) و بوتون بویوک فیلسوفلر ایله برابر ، (دوبا ره میوند Dubois Reymond) ، (قلود برنار Claude Bernard) و امثالی کبی اجله علماء هپ بوفکرده درلر و اونی صراحتاً بیان ایله اعتراف عجز ایتکدن چکنمه مشلدر . علمای اسلام ایسه ، اونه دنبری بومسئله ده - تأدباً توقف - ایله مشلردی . لکن فلسفه نک (مابعد الطبیعیات) قسمی ، بالخاصه بو کبی (مسائل لدنیه questions ontologiques) ایله اوغراشمه بی کندینه وظیفه بیلوب بونوع حقایق - بالخاصه موضوع بحث ایدینش بولوندوغی ایچون ، - آنحق بر فرضیه اولق حیثیتله ، بوخصوصه بیان فکر و ملاحظه ایتکده بأس کوروله مش و بالاتفاق (روح بمحتمه مساغ) اولدیغنه فاعت حاصل اولشدر . اونک ایچوندر که اجله حکمای اسلامیة دن بر جوق مشاهیر و علی الخصوص ابن سینا و فخرالدین رازی کبی کبار فلاسفه روح بمحتمه اسلاف یونانیة نک بالکلیه افکارینی تتبع ایدرک عرفان اسلامه نقل و اوانلری تنقید ایتدکن صکره کندیلمی دخی بوخصوصه - فقط بر فرضیه اولق اوزره - برر فکر بیان ایتشلردر . حتی شرح مواقفک

دردنجی موقفی تتبع اولونورسه کورولور که اسملرینی هنوز ذکر ایتدیکم اسلام فیلسوفلری و معتزله فرقه سندن (نظام) ودها بمضلری ، اساتذۀ یونانیة نک دقایق آثار و افکارینه - شایان حیرت بر درجه ده ! - انفاذ نظر ایدوب فوق العاده بر احاطۀ علمیة و بویوک وسالم بر قدرت تنقیدیه اثبات ایتشلردر . حکمای اسلامک اکثریسی ارسطویه اتباعاً ، روحی جسم ایچون (کمال اول intellect = entéléchie) اولق اوزره تلقی ایتدکن صوکره ، بونی اوچ نوعه تقسیم قبول ایله مشلر : بری ، (نفس نباتیه l'âme végétative) درکه یالکز (تغذی و نمو) قابلیتیه مالکدر . ارسطونک (το θρεπτικόν) یعنی نفس غاذیه دیدیکی بودر . حکمای اسلام بونک تعریفی عیناً ارسطودن آلهرق :

[النفس النباتیه ، وهی کمال اول جسم طبیعی آلی من حیث یتغذی و نمو] یعنی ، نفس نباتیه عضوی اولان بر جسم طبیعی نک تغذی و تنمی ایتمه سی حیثیتله کمال اولی (نه ته لی کی = entéléchie) سی در . [دیمک اولور .

ایکنجیسی ، (نفس حیوانیه l'âme animale) درکه تغذی و تنمی ایله برابر حس و حرکت قابلیتیه مالکدر . ارسطونک (το κινητικόν) یعنی نفس محرکه [دیدیکی بودر . حکمای اسلام بونک تعریفی دخی عیناً ارسطودن آلهرق :

[النفس الحيوانیه ، وهی کمال اول جسم طبیعی آلی من جهة ما یحس و یتحرك بالاراده] یعنی نفس حیوانیه عضوی اولان بر جسم طبیعی نک بالاراده حس و حرکت ایتمه سی جهیتله کمال اولی در . [دیمک اولور .

اوچونجیسی ، (نفس انسانیة l'âme humaine) درکه بوکا (نفس ناطقه l'âme raisonnable) دخی دیرلر . تغذی ، تنمی و حس و حرکت ایله برابر ، ادراک ، تنقید ، محاکمه و تعقل قابلیتیه مالکدر . ارسطونک (το κριτικόν ، منقد) ، (το λογικόν ، ناطق) دیدیکی بودر . مع مافیة افلاطونک تقسیماتی دخی بر جوق حکمای اسلام قبول ایتشدر . افلاطون ، دخی روحی اوچ نوع اولق اوزره تلقی ایدردی ؛ دهاطوغوسی

روحك قواى نلته سنى تشكيل ایدن اوچ نفس قبول ایدردی که ارسطو دخی
ا کثریا (les énergies = ἐνέργειαι) تعیری ایله بومعنائی مراد ایتشدرد.
برنجیسی ، (la raison = λόγος = نفس ناطقه) درکه اونك مقامی
ومحل تعلق دماغ بشردرد ؛ وفانی اولمایان روح انجق بودر . ایکنجیسی ،
(Θυμός = نفس غضبیّه) درکه محل تعلق، قلب انسانی در . اوچونجیسی
(το επιθυμητικόν = نفس شهوانیه) ایدی که محل قراری کبد یعنی
قره جگر ایدی . بزم کاتب چلبی ده وقینالی زاده علی اقدینك (اخلاق
علائى) نام کتابنده ، ارضروملی ابراهیم حقى نك معرفتنامه سنده ودها بر
چوق معتبر آثار اسلافده ، بونظریات عیناً بسط اولونمشدرد . محضاتفصیلدن
اجتناباً وهله بوکون کلیاً متروک وبلکه ده منسى بر طاقم فرضیات باطله دن
اوله لرینه بناء بورایه اونلری نقل ایتکده فائده کورمدم . تاریخ فلسفیه
تعلق اعتباریله بوقدر ایضاحات کفایت ایدر .

(مواقف) نام کلیات فلسفیه نك صاحبی ، (قاضی عضد الایحی) ،
بومهم اثرنده ، روحك بر (جوهر مجرد substance indépendante)
اوله سنى انکار ایدنلردن دخی بحث ایدیور ؛ (خاتمه فی روایه مذاهب
المنکرین لتجرد النفس الناطقه) عنوانیله شایان دقت اولان بوفصل کتابده ،
بومذاهبك پك چوق اولدوغنی ذکر ایتدکدن صوکره (اك مشهورلری
طوقوز فرقه در!) دییور . بوفرقة اربابنك حقیقت روح بجنده فکری
پك معنادار اولدوغنی ایچون مختصراً بورایه نقل ایدیورم :

بونلردن برنجیسی (ابن راوندی) نك فکریدر . بوفیلسوف ، (روح
قلبه بر جزء لایتجزادر!) دییور . ایکنجیسی (ائمه معتزله دن!) نظامك
فکریدر : (روح بدنده ساری برطاقم اجسام لطیفه در ، طبق کل صوینك
کلده سرایتی کی!) دییور .

نظامك فکری تماماً مذهب مادیه نك مؤسسی مشهور (نیهیکور
Epicure) ك فکریدر ...!

اوچونجی فکره کوره ، (قاضی عضد اسم ذکر ایتیور!) ، (روح
دماغه بر قوت در!) [

بواعقاد ، بوکونکی ماتریالیستلرك وفیزیولوژی علماسنك اعتقادیدر که
روح ، بو تقدیرجه انجق (دماغك بروظیفه سی ، برفعالیتی une fonction
du cerveau) اولمش اولویور ؛ وبویله اولونجه بالطبع مستقل اوله ماز
ودماغ ایله برابر فنا بولور .

دردنجی فکره نظراً (روح ، اوچ قوتدن عبارتدر بریسی قلبدده در .
بو نفس حیوانیه در . ایکنجی سی قره جگرده در ؛ بوده نفس نباتیه در .
اوچونجیسی دماغده در که بو - انجق - نفس انسانی در .)

شوتعریفك عیناً وتماماً افلاطوندن آلمش اولدوغنی - بذاته - بدیهی در .
بشنجی سی (روح برهیکل مخصوصدر) ، اعتقادیدر .

بوراده کی هیکل ، جسمك شکل وقیافتنده وطبقی اونك کی بر کولکه
دیمکدر . بوده مشهور (ذیمقراطیس = Démocrite) ك ، پك معروف
اولان (= ἰδὸλον = idole) فرضیه سندن التمشدر ؛ وحالا اقوام
وحشیه وابندائیهدن پك چوغنی روحی بویله بر هیکل صانیر ورؤیاده ،
اطرافی کزوب عجائب شیر سیر ایدن ، انسانك بوهیکلی ، بوکولکه سی
بو (ایکنجی سی l'autre moi) در ظن ایدر . سوسیولوژی وآنترپولوژی
علماسی برچوق دلیلرله اثبات ایدیورلر که ، اقوام وحشیه وابندائیهدن
خرافات اعتقادیه سندن اك مهم برینی تشکیل ایدن (جادی) و (خورتلاق)
مسئله سنك ، بواعقاد ایله صمیمی برعلاقه سی واردر . علمای متخصصیندن
(طایلار Tylor) ، بومسئله ره دائر ایکی بویوک جلد یازمش وبومناسبتی
صراحتاً کوسترمشدر . شهرستانی ده بوکا دائر بحث واردر .

التنجی فکره کوره ، روح ، (اخلاط اربعه نك کمیت وکیفیت اعتباریله
اعتدالی در .) شبه یوقدر که بوفکر دخی اطباء یونانیه نك وعلی الخصوص
(جالینوس حکیم Gallien) نامیله عالم اسلامده فوق العاده بر شهرت ونفوذ
قازانمش اولان ذاتك اعتقادی ایدی . (اخلاط اربعه les quatre humeurs)
نظریه سی ذاتاً اونکدر . بو حکیمك اخلاط اربعه دیدیکی شیر (قان، صفراء
بلغم وسودا) نامیله وجودك مایع قسملری ایدی که تحت دخی بونلرك
موازنه اعتدالندن ، کمیت وکیفیت اوزره متناسب بولونماسندن ایلری کلیوردی .

یدنجی فکره کوره ، روح ، (مزاج نوعی نك اعتدالی در .) بوده
آلتنجی فكرك جزئياً معتدل بر صورتی در . بوسوتون مستقل بر فكر دكل ! ..
سكنزنجیسی ، (قانك اعتدالی در .) بوده اودر . انجق اخلاطك
جمله سی آره سنده اولاجغه یالکزر دمنده براعتدال ، ظنی در .

طقوزنجیسی ، (روح هوادر !) ده بن فرقه در . دلیلی ده پك بسیطدر :
(اذ بانقطاعه طرفه عین تنقطع الحیاة) یعنی : (هوادر ، زیرا انقطاعی ایله
لحه بصرده حیات دخی منقطع اولور) دیمکدر .

بونك پك ابتدائی براعتقاد اولدوغنی ، بومقاله نك بدایتده عرض ایتش
و (آناقسیمندر) نام فیلسوف یونانی نك بو اعتقادی بردستور فلسفی شكله
قومیش اولدوغنی کوسترمشدم .

[تعبیراته باقیکنز ؛ روحك انتقالی حقنده تفصیلات آلمق ایچون دخی
بالخاصه تناسخ métempsychose کله سنه مراجعت ایدیکز . قوای روح
ایچون (faculté) لفظنه باقیکنز]

تصوف اربابنك روح حقنده کی اعتقادینه کلنجه ، باشقه در . طبق
(نوفلاطونی (néoplatoniste) لرك كنه بکزر .

بومذهب فلسفی بر مکمل (سیستم) حالنه کتیروب اکمال ایدن مشهور
(پلوتینوس Plotinus) ، پك مهم برسلسله آثار وجوده کتیرمشدی که بوکون
تمامیله محفوظدر . بوفیلسوفك فکرینه کوره هر شینك مبدأ ومعادی (وجود
مطلق) در ؛ وجود مطلق غیرمادی بر روح عمومی در ؛ روح عالمدر . (l'âme

universelle = ἡ ψυχὴ ὑπερκόσμιος) و (ἡ ψυχὴ τοῦ παντός)
(l'âme de l'Univers) تعبیرلری لسان تصوفده (روح کلّی) ، (نفس
کل) و (عقل کل) ترکیبلیله ادا اولونور . (پلوتینوس) ك اعتقادنجه

(عالمده حرکت و حیاتك باشلیجه سببی (χορηγός τῆς κινήσεως) و (عالم
حسّی نك و مخلوقاتك سلطانی (Βασιλεύς τῶν γιγνομένων) ایشته روح
کلّی اولان او وجود مطلق در . بزم روحلر من ، اوتیر فیض و حیاتك ، او
آتشك آنجق برر قیویلجیمی در . حضرت مولانا جلال الدین رومی نك
منویده دیدیکی کبی :

حزؤ عقل این ، ازان عقل کل است :

جنبش این سایه ، زان شاخ گل است ! ..

یعنی [بوانسانك عقل جزئی سی ، او وجود مطلق دیدیکمز عقل کلک
بر جزئیدر . بوکولکهنك قیملدناماسی ، اوکل داللك حر کشتدن نشأت ایدر .]
بویله اولونجه ، روح ، الهی الاصلدر . بو (خاکدانه دوشمه سی !) بر آن
امتحان ایچوندر . یوقسه ، او اویله بر ورقاء قدسی (یعنی مقدس بر کوکر جین !) در که
علیندن هبوط ایتش و بو (تن قفسنده !) محبوس قالمشدر . دائمی وشدید
براشتیاق ایله (وطن اصلیسنه) یعنی وجود مطلقه رجوع ایتك املنده در .
بناء علیه ذاتاً ظل زائل و خیال باطل اولان عناصر مادیه ایله - وجهاً من
الوجوه ! - هیچ بر مناسبتی یوقدر . انجق منافرتی وارددر . عناصر ، ظلمانی
الطبیعه ؛ روح ایسه نورانی الطبیعه در . الی آخره ! ... [بوبابده تفصیلات
ایچون تصوف Confisme ، mysticisme ، théosophie ، کله لرینه
و تفصیلات تالیه ایچون abstinence ، abnégation ، aidéisme ،
extase ، absorption لفظلرینه باقیکنز !]

تصوفده روح بختی ، تماماً و عیناً بویله در . حتی متصوفدن صایلمامش
اولان حکمای اسلامدن بعضلرینك بو خصوصده کی اعتقادلری تماماً صوفیانه در .
مثلا مشهور ابن سینانك معروف عالم اولان (قصیده روحیه) سی ، حرفی
حرفه پلوتینوسك فکرینه ترجمان اولور .

هَبَطَ إِلَيْكَ مِنَ الْمَحَلِّ الْأَرْفَعِ

ورقاء ذات تمتع وتمتع . الی آخره

مطلع یتقی ، روح ، عالم علویدن هبوط ایتش قیمتدار ، ومقدس بر
کوکر جین در ؛ تشبیهی ایله باشلا یور که شایان دقتدر . حالبوکه ابن سینانك (شفا)
و (نجات) نامنده کی آثار مشهوره سنه نظراً فلسفه سی تماماً (مشائی
péripatéticienne) ، یعنی ارسطو فلسفه سیدر . واقعا (روح عالم) تعبیری
ارسطوده دخی کچور ؛ فقط فیثاغوریلردن آلمش بولوندوغنی بر تعبیر اولسه

کر کرد ؛ [انسانك عقل جزئی سی نك عقل كلدن بر جزؤ اولماسی] دخی استاد یونانی نك آثارنده مذکور در. ارسطو، بویخته (ἀπόσπασμα τοῦ Θεοῦ = fragment de Dieu = اللهمن بر پارچه ، بر جزؤ) تعبیری قولانه رق روحی تعریف ایتشدر . فقط (کمال اول) نظریه سیله بوعتقادی تألیف ایتکده کوچلك چکیله جکی اکلاشیلیور . [intellect کله سنه باقیکر !]

خلاصه ، روحی ، بوسوتون روحانی ، مستقل وغیرمادی تلقی ایدنلر میاننده بر جوق حکمای شرق ایله برابر بالخاصه صوفیه برنجی صفده ذکره شایاندر .

[دور اخیر، یعنی دور جدید فلسفه سنك بومسئله ده کی اعتقادات متخالفه سی] matérialisme ، spiritualisme ، sensualisme ، immatérialisme ، parallélisme ، کله لرینه عائد اولان تفصیلاته ذیلاً لزومی قدر ایضاح ایدلمشدر ؛ اورایه باقیکر !]

زمان حاضره کلنجه ، روحك وحدت واستقلالنی قبوله مجبور اولان فیلسوفلرك خلاصه افکاری بروجه آتی در :

اولا : عوام ناسك وجهورك یعنی اکثریت متفكرینك اعتقادینه تماماً موافق اولان (ثنائیه Dualisme) مذهب مشهوری واردركه بونك دستور اعتقادنجه (روح l'âme) و (جسم عضوی corps organisé) بر بریله متقابل وصمیمیاً علاقه داردر. بودعواده بولونانلر، فکرلری تشبیهی برلسان ایله عرض ایدیورلر وبوندن اکلاشیلیورکه بو فرضیه یی ایکی وجه اوزره تلقی ایتك ممکندر.

برنجیسی : جسم عضوی بر ماکنه یه بکزرکه زیاده سیله (معضل complexe) وکرفت، آلات وادواتدن متشکلدر. فقط، بوماکنه واونی تشکیل ایدن اعضا عاقلدر. کندی کندینه ایشلیه مز. اونی حرکت کتیرمك ایچون بر (قوت force) لازمدر. ایشته روح ، جسمی تحریك واحیا ایدن (مبدأفعال principe actif) در. (مشعور conscient) اولسون، (غیرمشعور inconscient) اولسون، بوتون (تمایلات tendances) مزه سبب اودر؛ بومیلان اوکاعائددر. روحك فعالیت ذاتیه سنه شعوری اولدوخی

تقدیرده، بو فعالیت (ذوق و ألم؛ le plaisir et la douleur) شکلنده حسن اولونور و (عقل l'intelligence) بو طویغولرك ماهیتی تفریق وتنویر ایدر . بنساءً علیه بوعتقاده کوره (ماده la matière) ، تمامیه (عاطل passive) در؛ روح ، اوکا تأثیر و اونی تحریك ایدن قوتدر. بو اعتقادك دستوری، اسکی روما شاعرلرندن مشهور وبرژیل بر (وجیزه aphorisme) شکلنده عرض ایتش و (mens agitāt molem = روح ماده یی تحریك ایدر !) دیمشدر . بویله دوشونلره کوره (ارادت la volonté) ، بر (جهد effort) دن عبارت قالیر.

ایکنجیسی : جسم عضوی بر ماکنه در؛ فقط ذیروح و ذی حیات بر ماکنه در؛ روح، مستقل اوله رق، خارجدن کلوب اوکا تعلق ایتمز. جسم عضویك کندینه خاص بر فعالیت واردر. (حساسیت ، sensibilité) ، (فکرت pensée) ، وبر مقصدمعین تأمین ایچون (میل ایتك inclination) کی (اعمال عالیه fonctions supérieures) انجق روحه عائد قابلیتنددر؛ وبونلردائما شعورایله مترافقدر. غیرمشعور اولان میلانلر مز، جسم عضویك اقتضای حیاتی در؛ زیرا جسم عضوی نك ده کور کورینه بر فعالیت واردر. حالبوکه روح، بر (مبدأ مدبر principe directeur) در؛ عاقلدر. بوعتقاده کوره (ارادت la volonté) ، (اختیار le choix) قابلیته منجر اولور . وشایان دقتدرکه بوسایق نظره وبوتعریفه کوره روحك عضویتدن مستقل بر جوهر مجرد اولماسنی قبول ایتك پك کوچدر.

بو ایکنجی نظریه ارسطونك ، اعتقادی آکدیریر؛ زمانمز فیلسوفلری یوکا، طاقیله (énergétisme) دیمشدر .

اوچونجیسی : (دعقارت Descartes) وتوابعنك نظریه مشهوره سی در. یوفرقه اربابنه کوره روح و جسم بوسوتون (متخالف الطبیعه de nature différente) ، ایکی (جوهر substance) در . روح ، (جوهر متفكر la substance pensante) ، جسم دخی (جوهر تمتد la substance étendue) در . ده قارتك (فکرت = pensée) دیدیکی شی بوکون بزم

على الاطلاق (وجدان = conscience) دیدیکمز شیدر . بناء عليه (شعور) دن عبارت قالیر . اونك ایچوندرکه ده قارت (غیر مشعور) اولان حرکات بدنیه ایله برچوق (حادثات روحیه psychiques phénomènes) یی بالخاصه روحه عطف ایده میهرک (عضویت l'organisme) ک فعالیت حیاتیه سنه اسناد ایله تعریفه چالیشیوردی . حتی (خاطرات les souvenirs) ، خیالات (les images) و (اختراصات les passions) کبی (کیفیات وجدانیه les faits de conscience) یی ، بر طاقم (نفوس حیوانیه animaux esprits) به حمل ایده رک تعریف ایدیوردی که ، یوقاریده عرض ایتدیکم تفصیلاتدن صراحتاً اکلاشیله جغه نظراً — بوجدد مشهورک هنوز قرون وسطاء وهله ارسطو پسیقولورسندن یاقه سنی قورتاره مامش اولدوغی آچقندن آچیغه تحقّق ایدر .

ده قارته کوره روح ، جسمدن برچوق (انطباعات impressions) تلقی ایدیور ، و جسم اوزرینه اجرای تأثیر ایدرک اونی تدبیر و تصرف ایلور . روحک فعالیت ذاتیه و اعمال خصوصیه سی ، (محاکمه و نظر jugement et raisonnement) در . (ارادت) ایسه (عقل) دن عبارتدر . (روحیون les spiritualistes) ، (جسم ایله روحک فرقی) حقنده مشهور اولان نظریه مابعد الطبیعه لرینی ، ایکی سلسله ملاحظاته بنا ایدیورلر . بوده (وحدانیت l'unité) و (عینیت = هویت = l'identité) حقنده کی فکر لیدر . یعنی روحک ، برچوق حالات و حسیات و افکاره رغماً دائماً (بر) و (عینی) روح اوله رق قالماسی در .

روحیونک بو اعتقادی مشهور سقوج فیلسوفی (دهی ویدهوم David Hume) شدتله صارصمشددر . [تفصیلات ایچون (atomisme و phénoménisme) سوزلرینه باقیکز] (وحدانیت روح) دعواسنده بولونان فیلسوفلر ادعا ایدیورلرکه : روح (بر) در . اونک (حالات و تطورات états et modalités) ی پک چوق اوله بیلیرسه ده ! ... روح ، هر حال و طورنده ینه (عینی !!) روحدر . (identique en elle-même) . روحک بو وحدانیتی و بو عینیتی ، جسم عضوینک

تبدلات متباده و دائمه سنه قارشیی بر بویوک (تضاد contraste) تشکیل ایدر ؛ و یالکمز بو کیفیت بیله اثبات ایدرکه (روح) دماغک بر اثر فعالیت (fonction du cerveau !) دکدر . مستقل و لایتغیر و ابدی بر قوتدر . بر (جوهر غیر مادی substance non-matérielle) در .

[روحیونک بو ادعای اساسیه سی مادیونه و بالخاصه فیزیولوژی علمای مادیونه قارشیی در . تفصیلات ایچون matérialisme سوزینه باقیکز !] اوندن صوکره روح (بسیط simple) در ! . ادعاسی ده روحیون نظرنده اساسی بر ادعادر ؛ و روحی بر (حزمه حسیات faisceau de sensations) عد ایدن (حادثیون phénoménistes) ک و علی الخصوص اونلرک اک بویوک عد ایدیلن (هیوم Hume) ک بو خصوصده کی تعریضاتنه جواب اولمق اوزره ایلری سوروله بیلیر . [phénoménisme و personnalité لفظلرینه باقیکز !]

بوساطت روح ادعاسی ، روحک جوهر یتته عائد و اونی بالذات مستلزم برمدعا اولدوغی ایچون مشکلات عظیمه یی داعی اولمش و روحیونه یاردیم ایده جکنه زیاده سیله ضرر ایراث ایله مشدر . چونکه روحک ، جوهریتی بحثنی میدان مناقشه به تکرار دعوت ایتش و (حقیقت و جوهریت روح) مسئله سنه دائر بیان فکر و ملاحظه ایتک وظیفه سی — بالجبوریه ! — روحیونه توجه ایله مشدر . حال بوکه بوکا دائر شیمدی به قدر هیچ بر کیسه نک معقول بر سوز سویله بیلدیکی کورولمش و ایشیدلمش دکدر . بناء علیه زمانمزمک بو خصوصده حکم قطعیسی یوقاریده ذکر ایتدیکمز آیت جلیله نک منطوقنی تصدیق و بومعمای غامض حضورنده اعتراف عجز ایتمکدن عبارت قالور .

قانتک ، سنسیرک هاملتک و اک بویوک فلاسفه نک دیدیکی کبی : (بز روحک حقیقتی بیلهمیز و بیلهمیه جکمز ؛ یالکمز آثار تجلیاتی یعنی حادثات باهره و یاخفیه سنی تتبع ایده بیلیرز . علم بشر ، بو حدی آشه ماز .) دیمکه اکتفا ایله جکمز ! .

[تعییرات مذکوره به برده Agnosticisme کلمه سنه باقیکز !]

حرکات آمیب (Amiboïde (Mouvements)

(آمیب amibe)، تك حجره دن عبارت یعنی الك بسیط بر جسم عضویدر. بر (پروتوپلازما protoplasma) یعنی ماده ابتدایه دن متشکله؛ اورطه سنده ده بر (نوه nouveau) سی یعنی چکر دک کبی بر اوزی واردر. بوعضویت، کندینه خاص بر صورتده حرکت ایدر. اولاً بر طرفندن طومور جق کبی بر چیقینی پیدا اولور؛ صوکره دها زیاده اوزار. بواواییشنه (استطاله prolongement) ده نیلیر. اوزایان پروتوپلازما قسمیدر. اوزامش اولان بو پارچه یه دخی (pseudopode) یعنی (یالاندن آیاق) ترکیبی تعبیر اصطلاحی اولمشدر. بوضورتله، حجره آمیبیه نك بر قسمی طومور جقلا نوبده اوزادقندن صوکره جوارنده کی ماده لردن برینه تماس ایدر، بالاخره، آمیک بوتون وجودی اوجهته آقوب طولانور. بونی قاببرتشیه ايله تعریف ایچون، بر صولوجانك طرز حرکتی خاطر لاتمق کافیدر. صولوجان اولاً بر جهته اوزانیر؛ وباش طرفی اینجه لیر؛ صوکره بریره استناد ایدر، بدنك ارقه طرفی یواش یواش سوزولوب ایلری یه طولانیر و حیوان بووجهله تبدیل مکان وقطع مسافه ایتش اولور.

ایشته (حرکت آمیبیه) طبقی بوکا بکزر. پروتوپلازما نك صورت استطاله سی دخی صالیانغوزك بوینوزلرینی اوزاتمه سنه بکزر. آمیب ده نیلین حجیرات، بودرلو حرکتیه قابلیتله تبدیل مکان ایتش اولور. تغذی ایتله لری ده (pseudopodes) دیدیکمز استطالات سایه سنده درکه، جوارنده بولونان جزئی بر ماده غذاییه نی اواستطاله ايله قوجاقلا یوب کندی ایچنه آلیر و برمدت صوکره تمیل ایدر؛ ایدمه دیکنی ده عینی صورتله آتار، براقیر.

بوتعبیر، فلسفه عمومییه مسائلیله علاقه دار دکدر. (علم حیات biologie) اصطلاحاتنددر. فقط فلسفه طبیعیه ده وطولایینی ايله فلسفه عمومییه ده پك مهم بعض مسائل غامضه نی قورجالایه رق - کیفیت حیات حقنده - مناقشات وملاحظات جدیه یه سبیت ویرمش اولدوغی ایچون زمانمز فلسفه سنه دخی انتقال ایدرک منهور اولمش بر اصطلاح در.

بوکون تدقیقات تجربیه ايله ثابت اولمشدرکه، عضویات عالییه درلو درلو حجیرات واردر؛ و اولردن بر قسمی حرکات آمیبیه ايله بدنك بر نقطه سندن دیگر نقطه سنه انتقال ایدرلر؛ و غوغای حیات امرنده بویوک بر رول اوینارلر. اوسببله درکه بویله لرینه (سیار حجیرات - cellules mig-ratives) دیرلر. قانده پك چوق مقدارده موجود بولونان (کریوات بیضا globules blancs) ایشه بوقیلدن سیار حجیره لردر. بویاض کریوات، حرکات آمیبیه لری سیاسنده، کوچوک دامارلردن، انساج عضویه دن و اینجه غشالردن ده کچرلر؛ و نواحی بدنیه یه هجوم ایدوبده داخل اولمش بولونان میقروبلرله مجادله ایدرلر. بو کیفیت مهمه نی - الك اول - بالتجربه تحقیق وکشف ایدن آدم، روس عالم مشهوری (مچنیقوف Metenhikoff) اولمشدر. بوذات، حجیرات عضویه ايله میقروبلرک بودائی مجادله سنده حرکات آمیبیه نك نه مهم بر رول اوینادینقی تتبع ایتش: کریوات بیضانك استطاله ل اصدار ایدرک میقروبلری ایچلرینه الدقلرینی وهضم ایتدکلیخی - میقرو سقوب ايله - کورمش واکثر کریواتك ده عینی زمانده تسمه ایتدیکنی تحقیق ایلشدر. عناصر عضویه نك بو محاربه سنه مچنیقوف (فاغوسی توز fagocytose) اسمنی ویرمش که (یکدیکرینی ییمک) دیمکدر؛ بومناسبتله، کریوات بیضایه بعضاده (فاغوسیت fagocyte) ده نیلیر. بو کیفیت مهمه نی شرائط مختلفه سی وتفصیلاتیه تتبع ایتک (میقروبیولوژی microbiologie) نك باشلیجه وظیفه سیدر.

مچنیقوف، حقیقتاً فن تداوی ده وفن امراضده یکی بردورک فاتحلری صیره سنه کچمشدر. وقیلله مشهور (جالینوس Galienus) ک افکار وتعلیماتی ذهنلره حاکم ایدی. بوتون خسته لقلر، کیفیات اربعه نك، یعنی (حرارت، برودت، رطوبت، ییوست) ک مزاجی تعیین واستعدادات مرضیه نی حاصل ایتسیله تعریف اولونوردی. یاقین زمانلره قدر بوباطل اعتقاد حکمفرما ایدی؛ چونکه صریح بر صورتده بطلانی اثبات ایدله مه مشدی. بزم اسکی اطباء عثمانیه وبالخاصه (کاتب چلبی) و امثالی علما، جالینوس حکیمک بوتعلیماتی بلاتنقید وتحقیق قبول ایتشلردی. فقط (مچنیقوف) ک بوکشفی

زمانی بوسوتون ادوار سابقه‌دن آیردی و کندی استادی (پاستور Pasteur) ک کشف ایتش اولدوغی عضویات خرده بینیه عالمده بیه (غوغای حیات la lutte pour la vie) مبدأنک کرکی کبی تحقیق ایتدیکنی بالتجربه کوستره‌دک (داروین Darwin) ک قانونی عالم خرده‌بینی به قدر تشمیل ایتش و حیرات ایه میقروبلر آره‌سند دخی غوغای حیاتنک دائمی بر صورتده دوام ایتکده اولدوغی بالفعل اثبات ایش بولوندی. عینی زمانلرده المان علامه‌شهری (دوقور پروفیسور ویرخو Dr. prof. Virchow) ک (علم امراض حجریه Pathologie cellulaire) ساحه‌سند کی کشفیات مهمه‌سنی ده تنور و تصدیق ایتدی.

اونک ایچون درکه زماننک اک بویوک موفقیات علمیه‌سندن معدود اولمشدر، و مسائل حیاتی و مرضیه‌نی کرکی کبی تحقیق ایده‌بیلیمک ایچون تجربه و نظره یکی برجرا آچمشدر.

(حرکات آمیه) نک بوخصوصده مبدأ اولدوغی اونوتاملی در؛ زیرا کریوات بیضاده و بعض حیرات مستقلده بویه برقابلیت اولماسه‌یدی و یاخود اولدوغی کشف ایدیله‌مه‌سیدی، هنوز برچوق حقایق، بزم ایچون غامض برر معما حالنده قالدی؛ فن تداوی دخی اسکی نظریات باطله‌دن تاملیه قورتوله‌میه‌جق ایدی.

(حرکات آمیه) باشلیجه علامت حیات و خصیصه عضویت اولق اوزره تلق و قبول ایدلمشدر. زیرا حیاتنک بالجله قابلیاته ابتدائی و (عنصری élémentaire) برمال تشکیل ایده‌بیلور. (بنفسها حرکت spontané) وار؛ (تغذی nutrition) وار؛ و بالطبع (تقلص contraction) دخی وارکه بونلر انجق بر جسم عضویه مشاهده اولونه‌بیلن اثر حیاتنک باشلیجه قابلیات اساسیه‌سیدر.

مع مافیه (حرکات آمیه) یالکز سیار حیراتده مشاهده اولونماشدر. حیرات ثابتنک دخی آره‌صیره بعضی استطالات اصدار ایتدکری کورولش و یوکیفیت غریبه یک مهم بعضی مسئلهلر ظهورینه میدان آچمشدر. مثلاً حیرات عصیه‌نک (پروتوپلازما) سنده بویه بر طاقم استطالات و تقلصات

وقوعی تحقیق ایتشدر. اولجه حیرات عصیه آره‌سند کی استطالاتنک متادی اولدوغی، و بر حیره‌نک حیرات مجاوره ایه دائمی بر صورتده تماس و مناسبتده بولوندوغی ادعا ایدیلوردی؛ (که، که‌رلاخ فرضیه‌سی l'hypothèse de Gerlach دیدکری بودر!) صوکره‌لری (رامون ئی‌قاهال Ramon y Cajal)، (کولیکر Kölliker)، (به‌چیوس Betzius)، (فان‌که ئوختن Van Gehuchten) کبی بیولوژی و فیزیولوژی علماسنک تدقیقاتنه بناءً اوفرضیه ترک اولوندی؛ اعصابک - نوعما - غلافی تشکیل ایدن و (cylindres-axes = اسطوانه محور) ده‌نیان اقسامک، دیگر حیره‌لردن صادر اولان استطالاته تقرب و اونلر جوارنده تشعب ایتدیکی و بوضورتله او حیراته تماس و اتصال پیدا ایلدیکی، (یکی بر فرضیه اوله‌رق) ترجیح ایدلدی. شواله نظراً حیرات عصیه آره‌سند واقع اولان بو استطالات متقابلنک تماس واسطه‌سیله تأسیس و تأمین مناسباته خادم اولماسی لازم کله‌جکده دائر ضروری بر فکر حاصل اولدی؛ استطالات مذکورنک تقلصی ایه یکدیگرندن ده‌ها زیاده تباعد ایدوب ایده‌میه‌جکی‌ده آریجه بر مسئله تشکیل ایتدی. ایشه (فرضیه آمیبت l'hypothèse de l'amiboïsme) دیدکری‌ده بودرکه بالخاصه دوقور (ماتیاس دووال Mathias Duval) ایه (له‌پین Lépine) بو فرضیه‌نی اتمام واکاله چالشمشدر. (اویقو le sommeil)، و (ضیاع حس l'anesthésie) دیدیکمز احوال، که هنوز غرائب مسائلندر؛ ایشه بو فرضیه ایه - معقول بر صورتده! - تعریف اولونمق ایسته‌نیلیور: [حیرات عصیه‌نک استطالات آمیه‌سی موقتاً تقلص ایدیور و بوضورتله مناسبات متقابله سکتیه اوغرایور؛ اویقو و ضیاع حس دیدیکمز احوال، ایشه بوسبیل و قوعه کلیور.] ده‌نیلیور. کله‌نک پسیقولوژی مسائلی ایه علاقه‌سی بو فرضیه یوزندندر.

(دومور Demoor)، (مادمازل‌سته‌فانووسکا Melle Stéfanowska)، (رامون ئی‌قاهال Ramon y Cajal) و (مانوئلیان Manouélian) نام ذاتلرک بوبابده کی تدقیقات خصوصیه‌سی، بو (آمیبت) فرضیه‌سنی تصدیق ایده‌جک کبی نتیجه‌لر ویرمشدر. [اصطلاحه و خصوصاً Cylindre-axe کله‌سنه باقیکنز!]

ضیاع حافظه Amnésie

هر هانگی بر سبیل اولورسه اولسون حافظه نك ضایع اولماسنه (amnésie) دیرلر. یونانی دن آلمش بر کله در، خاطر لایه مامق دیمکدر. لکن، بسیقولوژی دائره سنده واقع اولان تدقیقات کوستریورکه، حافظه دیدیکمز قابلیت بسیط برشی دکلددر. برچوق انواعی، حتی اطوار واشکالی وارددر. طبیعی درکه (amnésie یعنی اونوتقائلق) ک دخی اونستبد تنوعاتی اولق کرکدر. حافظه یی شخصیت معنویه مزک (le moi) یعنی بئلکمزک غمده سی، نقطه استادی عد ایدرلرکه طوغرودر. بوده اثبات ایدیورکه ضیاع حافظه نك انواعی اولق لازمکیر؛ چونکه بوتون بوتون حافظه نك ضیاعی ایله حیات ممکن دکلددر. حافظه نك بوتونوعاتی (روحیون les spiritualistes) ک (بساطت روح la simplicité de l'âme) حقنده کی ادعالینه معارض بولوندوغی کبی، (هویت identity) و (وحدانیت unité) روح نظریه لرینی ده رد ایده جک بر وضعیت ده در. (تفصیلات ایچون personnalité و âme سوزلینه باقیکنز !)

بوکون، تدقیقات علمیه ایله تحقیق ایتشددرکه مراکز ونواحی دماغیه دن هر برینک کندینه خاص بر حافظه سی وارددر؛ و برینک ضیاعی ایله مطلقا دیکرلرینک ده اضمحلالی لازمکمز. بناء علیه (amnésie) دیدیکمز کیفیتی دخی انواعه کوره تقسیم وتبع ایتشددر. چونکه، ضیاع حافظه دائما (جزئی partielle) در؛ بر دکل، برچوق درلوسی اولویور. (مطردده amnésie systématique) ده نیلن بر نوعی وارکه فرانسه لی دوکتور (پیر ژانه Pierre Janet) اونی تحقیق ایتش وبواسمی اوکا تخصیص ایله مشدر. بو حالده انسان، عینی جمله دن اولان خاطراتی اونوتور. کیمسی (اسماء خاصه les noms propres) یی؛ کیمسی ده یالکنز (جغرافیائی اسملر les noms géographiques) یی کیمسی ده انجق بر شخصه، یاخود بر وقعه یه عائد اولان شیلری اونوتور. (aphasie ضیاع کلام) ده نیلن قابلیت سز لکک برچوق انواعی، بو (مطرد amnésie) لر نوعنددر. بر طاقم

انسانلر دخی، یالکنز بر لسان اجنبی یی طاقیله اونوتورلر. بعضی کیمسه لرده ایشیتدکلی کله لک افکار متقابله ومتعادله سنی خاطر لایه مازلرکه بودرلوسنه (کلام صاگیرلنی surdit  verbale) ده نیلیر؛ و یاخود یازمش کله لری پک اعلا اوکورلر، فقط افاده ایتدکلی معناری تخطر ایده مزلرکه بوکاده (عمای کلام c citt  verbale = alexie) ده نیلیر.

بعضاًده ایشیتدکلی و یاخود او قودقلری کله لک نه دیمک اولدوغی اکلارلر، فقط اونلری تلفظ ایده مزلرکه (اصل ضیاع کلام aphasie) بودر. بعضاًده یازمه مازلرکه (agraphie ضیاع قابلیت تحریر) ده بودر. (بوتون بوتعیراته باقیکنز !)

اونوتقائلغک برده (localis e یعنی متمکن) بر صورتی وارددر. بو حالده انسان، وقایع عمرندن وصفحات حیاتیه سندن انجق برینی تخطر ایده مز. (amn sie simple) دیدکلی بودر، واکثریا غیر طبیعی بر اختلاج، بر جرحه و یاخود شدید بر هیجان ویا (سیرفی المنام = somnambulisme) نتیجه سنده وقوعه کله نیلیر. اکثریا (درکی r trograde) اولور؛ یعنی انسان، اووقعه دن اولکی شئوناتی اونوتور؛ بعضاًده بونک عکسی اولورکه اوکاده (ant rograde تقدیمی) دیرلر؛ وقعه دن صوکره کی حادثاتی خاطر لایه ماز. ده طوغروسی ضیاع حافظه یه سببیت ویرن (ذات وقعه) یی اونوتماز؛ فقط اوندن صوکره ظهوره کلن وقوعاتی حفظ ایده مز.

بردرلوسی ده وارکه خاطراتی احضار واحیا ایتک قابلیتک ضیاعنه مثال اولور؛ بوکا (amn sie de reproduction) دیرلر. انسان، بو حالده خاطراتی بوسبوتون ضایع ایتش دکلددر؛ چونکه بعض احوال استثنائیه ده، مثلا هیجان، هذیان وسرخوشلق حالده اونلرک جمله سنی خاطر لایه نیلیر. فقط ایسته دیکی زمان احضار ایده مز. بو اونوتقائلق، آره صیره بوکبی احوال وظروف تحتده، منتظماً واقع اولورسه اوکا: (دوری p riodique) دیرلر. بعضاًده انسان، خاطراتی منتظماً احضار ایدر وغیرطبیعی بر حال عرض ایتز؛ فقط کندی، بو خاطراتی احضار ایتدیکندن خبردار دکلددر. عاداتا

بوتخدرات ، (انسیاق ایله automatiquement) واقع اولور . بناءً علیه
خاطرات مذکوره یی ، امثاله قیاساً (تمثیل assimiler) ایتک قابلیتی یوقدر .
اونک ایچون ، ذهنی ماکنه کی حرکت ایدرک تخدراتی احضار ایتش اولور .
لکن کندی بنلکنه عطفاً طایماز ، اونلری تمثیل ایتمز . بوحالی لایقیله تتبع
ایتمش اولان دوتور (بیه رزانه P. Janet) ، بودر لوسنه (amnésie d'as-
simulation) دیبور ، وبونک بویوک (nevrose) لرده ، ایستردی ده
کورولدوکنی ادعا ایلور . برده (amnésie de reconnaissance)
دیدکلری نوعی وارکه : برشیئی پک اعلا تخطر ایدوبده اونک بر خاطره
اولدوغنی طانیه مامق در . باقیلسه بو بر نوع غلط حافظه در . (برسام hallucination)
نوعندن بر حالدر . بونک ضدی ده واقعدر ؛ یعنی آنی اولان بر کیفیت وجدانیه یی
بر خاطره ظن ایتک ده ممکندر . بوکاده (fausse mémoire) دیرلر . خلاصه
بو حافظه قصورلرینک انواعی پک چوقدر . اساساً پسیقولوژی یه تعلق ایدن
بو احوالک فلسفه یه مناسبتی ، روح مسائلیله علاقه سندن طولانی در . روحک
بر جوهر بسیط اولوب اولمادیغنی موضع بحثه دعوت ایدر . [تعبیراته باقیکنز !]

لاضدوقی Amoral

Amoral

اخلاق ایله علاقه و مناسبتی اولمایان احوال و خصوصاته قوللانیلیر بر
تعبیردر . بناءً علیه (immoral یعنی ، منافی اخلاق) دیمک دکلدر . منافی
اخلاق اولان بر حال ، بر کیفیت ، بر فکر ، بر طور و عادت ، الحاصل برشی ،
مبادی و احکام اخلاقیه یه تماماً ضددر . حالبوکه لا اخلاق اولان شیلرک -
وجهاً من الوجوه - اخلاق مسئله لر یله علاقه سی یوقدر . ایشلنمه سی مباح
اولان شیلر هپ بویله در . بو تعبیر ، اسان فلسفه ده - بوضوکه زمانلرده - بر
وضع مخصوص اوزره چوق قوللانیلشدر ؛ حتی بو خصوصده مهم مباحثاته
وسیلرلر آچلمشدر . مثلاً [صنایع نفیسه ، طبیعت جامده و طبیعت انسانیته ک
هردرلو اطوار تجلیاتی تصویر و عرض ایتک معرفتی مقصد و غایه اتخاذ
ایدیمش اولمق حیثیتله ، مبادی اخلاقیه ایله علاقه دارمیدر ؛ دکلر در ؟ ..
مؤسس و معتبر اولان قواعد اخلاقیه یه رعایت مجبوریتله مقید اولمایمیدر ؟ ..

یوقسه کندی طبعینک الهاماته تابع اوله رق یالکز (ادای صنعتده
dans l'expression de l'art) ، (حسن le beauté) ، و تصویر حسنده
صنعت ابراز ایتکمی چالشمالی در ؟ .. خلاصه بر صنعتکار ، غایه خیالیه سنی
یعنی (ایده آل idéal) نی حقیله تصویر و عرض ایدرکن ، مبادی و عقائد
اخلاقیه یه رعایتله مقید اولمایمیدر ؛ بو اوغورده الهاماتی قنید ایتلی میدر ؟ ..
یوقسه اخلاق بحثنده جمهور ناسک اعتقادات معتبره سنی پایمال اهل ایدرک
یالکز الهامه می تابع بولونمالی در ؟ .. [دیه بر مناقشه مهمه آچیلمشدر . بونی
خلاصه افاده ایدرک اولور سهق (صنعت لاسلاقی می در ؟ .. دکلر در ؟ ..)
سوالنه منجر اولور .

کذلک ، ملاحظات فلسفیه سنده مبادی اخلاقیه یی نظر اعتباره آلمایان
واکثریت غندنده معتبر اولان عقائد اخلاقیه یه ذره قدر رعایت ایتیرک الهامات
فکریه سنه تبعاً تفلسف ایدن (فریدریش نیچ Friedrich Nietzsche) نک
فلسفه سنه ، - ایشته بولابالی لکندن ، و مبادی اخلاقیه یه قارشی بو
قیدسنز لغندن طولانی - منقدر (amoral) دیمشدر .

سیاستده مبادی اخلاقیه یه رعایت اولونمادی ، حتی اولونه مادیفی پک
معلوم و مشهور بر شیدر . ایتالیا حکمای حقوقدن (نیکولائو ماکیاوه للی
Nicolao Machiavelli) ، عالم سیاستده (مقصد ایرمک ایچون هردرلو
وسائطک مشروعیتی) اعتقادی بر دستور اساسی اتخاذ ایدرک ، آئارنده شرح
و تفصیل ایله مش و بو عقیده یی - عادتاً - بر سیستم شکلنه قویمشدر که کندی
اسمنه نسبتله (ماکیاوه لیزم Machiavélisme) دیدکلری حکمت سیاست
بودر . سیاستده (naturalisme) ک صورت واضحه سی ده بودر . زمانمزه
قدر ، (ماکیاوه للی) نک دستور حکمتی تحکیم ایتش و (بیسمارک Bismarck) ،
(لورد صولسبره ی Lord Salisbury) کی اک بویوک سیاسیون زمانه :
[معاملات سیاسیته ک احکام اخلاقیه ایله قطعاً مناسبتی اولمادیغنی] صراحتاً
ادعا ایدرک ماکیاوه لیزمی تصدیق و اعترافه مجبور بولونمشلر در . بونلردن
صوکره ککن سیاسیون فعلیاته ، اسلافی ده کچمشلر در . (اخلاق ایله سیاستک

مناسبتی اولمادی (ادعاسنه باقوبده، بوطرز سیاست (لااخلاق amoral) اولدوغنه ذاهب اولمالمی در. سیاست، جماعات انسانییه آره سنده حقوق مشترکه و متقابله نك کیفیت موازنه سنی تأمین ایده بیلمك معرفندن، و بو اُمْنیه موفق اوله بیلمك هنزدن باشقه برشی دكلدر. حقوق بشریه نك موضوع بحث، و یا خود بالفعل ذیمدخل بولوندوغی. معاملاتك هیچ برنوعی یوقدر و اوله مازكه اخلاق ایله علاقه دار بولونماسین ! . . . ذاتاً اخلاق - موضوعی، حتی منشأی واحكام و قوانینی اعتباریله - او معاملاتدن عبارتدر. بناءً علیه خیر و شری تقدیر ایتكم، معاملات مذكوره نك ماهیتته نظرله ممکن اوله بیلیر. خیر و شر مسئله سنی متضمن اولان هر شئك - طوغر و دن طوغر و به وصیقی صیقی به - اخلاق ایله مناسبتی وارددر.

حالا سیاست انسانییه ما کیا و لیزم حکم ایدیورسه، بو کیفیت شو وجهله تفسیر و تعریف ایده بیلیر: اخلاق شخصیه نك قواعدی تعیین ایتشددر. لکن بوقواعد (بین الملل = internationale) معاملات هوز قابل تطبیق اوله میور. جماعات بشریه منافع حیاتییه مسئله سنده، دور ججری انسانلری کبی حرکت مجبور بولونویور. بلکه ایلریده، جماعات یکدیگرینه قارشى موازنه منافعنی تنظیم و ادامه ایده بیله جك قوانین اجتماعی و قواعد اخلاقیه کشف و تعیین اولونه بینه جکدر. فقط بوکون - محققدر که ! - بین الملل سیاست (amoral)، دکل (immoral) در. [حیات - ممات مسئله سی question de vie ou de mort] حسن صورته حل اولونه مایجه، انسان و انسانیت، بالضروره سوق طبیعی ایله، ایلک وحشت حیوانیه به رجوع ایدیور؛ اخلاق مسئله سی بو شرائط حیاتییه داخلنده موضوع بحث اوله میور. اونك ایچوندركه انسانی و انسانیتی بوکبی ضروراته ارجاع ایدن عوامل طبیعی و اجتماعی نك جمله سی ده، بلااستثنا، (منافی اخلاق immoral) اولویور. مثلاً فیلسوفلرك: حرب وحالت فوضا منافی اخلاقدر (la guerre et l'anarchie sont immorales) دیه ادعا ایتهلری، شوملاحظات واقعه به نظر آدر.

بی شکل Amorphe

بی شکل تعیری، نسبی اوله رق تلقی ایدلمی در. چونکه علی الاطلاق (بی شکل) برشی اوله ماز اولسه بیله بزم ایچون ادرا کی محال برشیدر. بزاونی تصور بیله ایده میز ! برشی، وار اولونجه، همه حال اونك بر - کندینه مخصوص - شکلی ده وارددر. چونکه کتله سی وارددر و مکنده بر (حیز) ی وارددر. ایشته مکنده اشغال ایتدیکی ی، اونك شکلی تعیین ایدر. بناءً علیه اصطلاحده (amorphe) تعیری، منتظم بر شکله مالک اولمایان شیلره وصف اولور. مثلاً: بر حامور پارچه سی (بی شکل) در. کرچه اونك کندینه مخصوص بر شکلی وارسده، اشکال هندسییه بکزمه مز؛ منتظم دكلدر. خصوصاً ثابت دكلدر. كذلك، فرضا کیمیاده (بی شکل کوکورت souffre amorphe) دیدیکمز زمان، تبلر ایتمه مش بر کوکورت اکلازز. حتی او ماده اسطوانی بر شکله و کوچله حالنده بولونسه ده ینه بی شکلددر. ظاهری شکله اعتبار ایتمه یز؛ انتساجنه باقارز ! عضویت عالمده ده بوتعیر، چوق زبازددر. ماده عضویه نك انساج متنوعه صورتنده تکاملی، او ماده عضویه شکی افاضه ایدر؛ فقط هنوز پك ابتدائی بر در کده بولونورده (ژلاتین gélatine) یعنی پلته حالنده اولورسه اوکا (amorphe) دیرلر. (morpho-logie) اشکال عضویه یی تتبع ایدر بر علم عمومی در که علم تشریح و انساج اونك شعباتنددر. مواد جامده و معدنیه نك (morphologie) سی، (cristallographie) دیدکری شعبه علمییه در که بلوراتك اشکالی، جنسی و کیفیاتی تحقیق ایدر. (علم اجتماعی sociologie) ده دخی بوتعیر تشبیه طریقیله و توسیع معنا ایله قوللا تلقدده در. بناءً علیه هنوز صنوف اجتماعییه وجود ویرم بیله جك قدر (تشکیلات ؟ !) ه موفق اوله مایان ابتدائی جماعتلره (amorphe) دیرلر که هنوز (تعضی organiser) ایتمه مش، فرق اجتماعی و صنوف مختلفیه آریله مامش وحشی بر انسان سوروسی دیمك اولور. اکثر اقوام ابتدائییه بو حالده در. احوال وجدانییه ده، بر حس مبهم قالبرده حقیقه تعیین ایده مزسه، اوکاده (amorphe)

ده نیله بیلیر . خلاصه هر نه اولورسه اولسون ، علی الاطلاق بر شیئک ماده اصلیه بی تشکلات عضویه ایله تعین ایتمه مش اولورسه اوکا بی شکل تعبیری وصف اوله بیلیر .

فلسفه تاریخده ، ارسطو (صورت و هیولی) یعنی (شکل و ماده) اساسلری قبول ایله مش وشکله بویوک بر اهمیت ویرمشدی . [تفصیلات ایچون intellect کله سنه باقیکنز !]

Amour عشق

Love انگلیزجه

Liebe آلمانجه

Amore ایتالیانجه

Amour

بوکله ، لاتینجه (Amor) دن آلمشدرکه عینی معنای افاده ایدر . عشق ، همان هر کسک بیلدیکی برشیدر ؛ برحالت روحیه در ؛ فقط ماهیتی حقیقه تعریف ایتک دخی اولسبتده کوچدر . زیرا ، عشق ، (دوستلق amitié) دکدر . (آرزو ، شوق désir) ده دکدر . (میلان inclination) ده دکدر . (تجاذب و تمطف sympathie) دخی دکدر . (قوه شهویه concupiscence) ، هیچ دکدر . معنایه بو حالات مختلفه نك جمله سیله علاقه دار اوله رق کوروله بیلیر برنوع (هیجان émotion) درکه بالجمله اختراصات بشریه یه حاکم وقاهر اولق اوزره معروفدر .

اکثریت خلق ولسان عمومی ، (سومک aimer) ، ایله (عشق آره سنده - یالکز درجه اعتباریه ! - بر فرق کورور . انسان ، بر کیمسه ایله کندی نفسی آره سنده (تجاذب sympathie) حس ایدر سه ، بومیلان (سومک) دیدیکمز حالت روحیه یی تولید ایده بیلیر . اشته بو (سومه) نك شدته لسان عادیده عشق دیرلرکه انسانی ، او (سه ویلن) کیمسه یه بویوک بر (شوق و آرزو) ایله مربوط بولوندورور . انسان ، اونك ایچون سودیکنی دائماً کورمک ، اونکله هر زمان برابر بولونمق ، حتی اونی منحصر آ وتماماً بنمسه مک ایستر ! ...

شوعادی تعریفه کوره اکثریت ناسک ، نصل اولوبده ، عشق ایله تجاذبی ، میلانی ، محبتی ، شوق و آرزوی بر برینه قاریشیدیردینی کلاسیلیور . حالبوکه (پسیقولوج) لر ، یعنی علم روح اربابی ، بو احوال روحیه آره سنده - شایان نظر - فرقلر بولشدر و تعین ایتشدر .

اولا شونقطه مهمده فیلسوفلر متفق درلرکه (عشق) ، ماهیتی اعتباریه ، ینه (سومک) دیمک اولدوغی حالده ، هر هانکی بر (نیت و مقصد خودکامانه intention et but égoïstes) دن بری و کلیا معرا بر محبت شدید و قیমে در . اصل بویله بردواملی و شدتلی (سوکی) اولماسیله (آرزو) دن بوسوتون فرقلی برحالت روحیه در . آرزوده مقصد اصلی و یکنانه ، (آرزو اولونان شیئه) تملک در . تملک برحس خودکامانه دن ایلری کلیر . بوراده درجه شدتک حکمی یوقدر . آرزو شدید اوله بیلیر ؛ اولمایه بیلیر ؛ فقط نصل اولورسه اولسون بونده اساس مقصد ، او آرزوی الهام ایدن شیئه تملک ایله بر احتیاج مادی یی تطمین و یاخود بر منفعت معینه یی تأمین ایله مکدر . دیمک اولویورکه (عشق) ایله (آرزو) آره سنده اک مهم فرق شدت محبت دکل ، (دیکر کاملق altruisme) و (خودکاملق égoïsme) فرقیدر . بناء علیه : (عشق حقیقی ده - دائماً - اساس ، سعادت و منفعت شخصییه دن فراغت . renoncement) ایتکدر !

ده ین - روس محرر مشهوری - متوفی (طالسگوی Tolstoi) ، عشقی اینی آ کلامش واختراصات سائرده دن بو حالتی تمیز ایدن فرق اساسی یی ابراز ایتکله ، تعریفده اصابت ایله مشدر .

فلاسفه معاصریندن و (روحیون les spiritualistes) دن ، متوفی ، (مهن دو بی ران Maine de Biran) دخی ، (عشق) ایله (آرزو) آره سنده کی فرق اساسی یه مبنی ، بر تعریف ویرمشدرکه ده مینکی نك همان عینی در :

[آرزوده اصل مقصد و مطمح نظر (طیب نفس le bien de soi-même) در ؛ سعادت شخصییه در . عشق ده ایسه ، سعادت شخصییه مزك سببی اولق اوزره تلقی و حکم ایتدیکمز شی ، یاخود شخص ، اساسدر . انجیق اوکا باقیلیر ؛ اودوشونولور !]

(راوو Rauh) نام بسیقولوغ دخی عینی فکرمده در :

[عشق ایله آرزو آرمه سنده کی فرق شودرکه : عشقده ، بوحالته سبب محض اولان شی ویا شخص ، انجق دوشونولور. حالبوکه آرزوده ، انسان یالکز وخصوصاً کندی نفسی دوشونور .]

او حالده (عشق حقیقت l'amour de la vérité) ، (عشق عدالت l'am. de la justice) ، (عشق انسانیت l'am. de l'humanité) ، (عشق وطن l'amour de la patrie) ترکیلری طوغرودر ؛ اگر حقیقت ، انسانیت ، عدالت ، وطن اوغورنده فدا کارلغی متضمن ومستلزم بر محبت شدید و دیگر کامانه اولورسه !... اولردن خدمت بکله مک ومنفعت تأمین ایتک معناسنده تلقی ایدله یوبده بالعکس اولره خدمت ایتک ومنفعت تأمین ایله مک اوغورنده ، انسانی فدا کارلقلره سوق ایدله جک درجهده شدید و دوامی بر محبت معناسنه کلیرسه ، عشقک - انجق تعریفی - طوغرو اولش اولور . اگر بالفعل ، بر کیمسهده بوفدا کارلق کورولورسه عشق ، اعلوی ، انجیب آثار باهره سیله تظاهر و تحقق ایتش اولور. تاریخ مدنیت وسرگذشت انسانیتده - بومعنا علویسیله - عشقک امثالی نادر اولقله برابر ، پک بویوک نمونه لری ده واردرکه بوتعریفی ، افعال واشخاص ممتازه ایله تمثیل ایدر : مبهم براقاز .

(عشق الهی l'amour de Dieu) دخی بوملاحظاته توفیقاً ، حقیقتیله تعریف ایدلمشدر :

عشق الله ، - کمال صدق و خلوص ایله - الله خدمت وعبودت ایچون اولورسه حقیقی در ؛ عشقک تعریف صادقانه موافقدر . (خوف عذاب و شوق مکافات حتی امید نجات) ایله اولورسه عشق حقیقی صایله ماز ، چونکه بویله بر محبتده مقصود اصلی ، ذات الهیه دکل ، کندی نفسمز ، کندی منفعت وسعادت مزدر .

عشق حقیقی بی ، اختراصات متماثلده دن اساساً وماهیماً تمیز ایدن بوصفت دیگر کامانه یه اوروپانک - قرون وسطی فیلسوفلری - بر قیمت مخصوصه عطف ایتش و بناء علیه (amor beneficentiae) و (amor concupiscentiae)

ترکیلری ایجاد و وضع ایله رک معنای عشق ایکی صورت اوزره دوشونمکده مجبوریت کورمشلردر . برنجیسنده کی (bienfaisance=beneficentiae) صفت کاشفه سنه نظراً ، اینک ایتک وخیر ایشله مک محبتی سائقه اصلیه دره . مثلاً : زمره مظلومین وجاعت فقرا حقنده ابراز اولونان عشق انسانیتپرورانه بوقیلدندرکه - اربابی - مظلومین وفقرانک مدافعه حقوقی وترقیه حالی اوغورنده فدا کارلقلره سوق ایدر. عشق حق وعدالت ، عشق انسانیت ، بونده ذاتاً مند مجدر . نته کیم عشق وطن دخی بوجنسده داخل بر نوعدر . ایکنجیسنده کی (concupiscentiae=concupiscentiae) صفت بارزه سنه باقیلیرسه بونک بر (عشق شهوانی) اولدوغی ظاهر در . هله خودکاملغک بونده سائقه اصلیه حیثیتیه ذیمدخل بولوندوغی سویله مک حاجت بیله یوقدر ، زیرا خرص شهوت ، الک ابتدائی واک حیوانی اولان (احتیاج غریزی besoin physiologique) مزی تسکین و تطمینه خادم بر (میلان طبیعی inclination naturelle) در . بر (غریزه instinct) در . (عشق) کله سی بلاوصف قوللانیلیرسه ، هان هرلسانده بویکنجی معناسیله آکلاشیلیر ؛ یعنی دیشی ایله ارکک آرمه سنده ، فطرتاً موجود اولان (میلان جنسی inclination sexuelle) دیمک اولور . هرکس نظرنده وهله عادی ، عمومی معناسیله (عشق) بودر ؛ فیلسوفلر ، بوکا دخی ، ملاحظات سابقه بی تطبیق ایتش و قادین ایله ارکک آرمه سنده جلوه کراولان عشقک ، معنای حقیقی وعلویسنه مطابقتی ایچون بو محبتک متقابل اوله سنی وخصوصاً بر (علاقه انتخابیه affinité élective) دن نشأت ایتش بولونماسی برنجی شرط اوللق اوزره تلقی ایله مشلردر . (علاقه انتخابیه) تعیری ، آلمان فیلسوفی وشاعر شهیری (گوته Gethœ) نک ایجاد ایتش اولدوغی بر ترکیب مهمدرکه ایکی کله ایله (عشق جنسی l'amour sexuel) نک الک عالی نظریه سنی متضمندر . [affinité کله سنه باقیکز !]

فیلسوف مشهور (هربرت اسپنسر H. Spencer) ، عشق (معضل complexe) بر (مجموعه حسیات) ک (محصله résultante) سی اوللق اوزره تلقی ایدر. تأهل مسئله مهمه سی (بقای جنس بشر conservation)

اجتماعیه نك اقدم واهمی بولونددوغندن وبوخصوصده عشق دیدیکمز میلان جنسی ، حسیات واختراصات سائردهن دها زیاده بر رول اوینادیغندن ، تأهل مسئلهسی - عشق طولایسی ایله ! - فیلسوفلر آره سنده آریجه موضوع بحث و مناقشه اولمش و بعضی نظریه لرك ظهورینه وسیله ویرمشدرد. بونلرمیاننده پك یوكسك فكرلر واردركه تشکیل عائله خصوصنده هر تربیه لی انسان ایچون (ایده آل Ideal) یعنی نمونه امتثال اولسه کر کدر؛ اوفکرلری شویله جه بر قاج سوزله تلخیص ایتك ممکندر :

تربیه لی آدم لرك - حتی بوتون انسانلرك - هر وجهله کوزل ، یعنی هم جسماً ، هم اخلاقاً ، همدۀ عقل و حسیات اعتباریه کوزل برانسان حقنده - آرز ، چوق - بر فکر مخصوصی واردرد . بوبر (ایده آل) در ؛ علاقه انتخابیه ده انسان ، بوفکرینه ، بوطننه کوره حکم ایدر : کندی ذوق و خیالنه الکی زیاده مقارن و موافق اولان برکیمسه بی ، دیگرلرینه ترجیح ایدر و انجق اونو سهو بیلیر . عشق جنسی نك اك طوغروسی و حقیقی ، صمیمی ، خالص و دائمی اولانی بودرد . (حرمت respect) ، (امنیت confiance) (حریت liberté) ، بویله بر عشقك (شرائط لازمه و متقابله conditions nécessaires et mutuelles) سندندر . بونده حرمت واردرد ؛ چونکه الکی زیاده مستحسن اولان ، به که نیلن برکیمسه نك ، انسانه الهام ایده جکی حسیاتدن بری ده حرمتدر . امنیت و حریت ده واردرد ؛ زیرا بومیلان متقابل بر علاقه انتخابیه نتیجه سیدرد . بوایکی وجود انجق یکدیگرینه مفتون و یکدیگرندن ممنون اوله جنی جهته قیصقا انجق دعوت ایده مز که طرفین بر برینه قارشئ امنیتسزلک عذابنه طو تولسونده ، یکدیگرینك حریت حرکتی تحدیده قالقشسین ! امنیتسزلک ، بر طرفدن جبر و تحکمك ، دیگر طرفدن ده اسارتك مقتضیات طبیعیه سندندر ؛ (قیصقا انجق la jalousie) دخی اونك نتیجه ضروریه سی در . سودیکنی ایده آلنه کوره انتخاب ایدنلر ، کندیلرندن آشاغی دکل ، کندیلرندن عالی برانسان نمونه سی انتخاب ایده جکلری ایچون ، اویله بر (سوکلی) یه (اسیر) معامله سی ایده مز لر . بناء علیه جبر و شدت

وامنیتسزلکه حاجت قالماز . حرمت متقابله ، هر خصوصده موازنه بی تأمین ایدر .

ایشته سینسر ودها بر چوق مهم فیلسوفلرك بو مسئله مهمه حقنده ملاحظات شخصیه لری خلاصه بودرد . طبیعی در که تأهل امرنده منفعت مادیه بی مقصد اساسی اتخاذ ایتك ، یعنی (mariage de convenence) یا بمق مسئله سی بوملاحظاتدن خارجدر . چونکه اونك عشق ایله علاقه سی یوقدر . او بر نوع تجارت ، دها طوغروسی بر (شرکت مضاربه) در .

قرون وسطی فیلسوفلرینك عشق معناسنه ویردکری تفرقه بی - مجدد مشهور - (ده قارت Descartes) رفع ورد ایدرک ، بوحالنی علی الاطلاق بر (اختراص passion) اولق اوزره تلقی و تعریف ایله مشدر .

[عشق روحك بر هیجانی در که ، بعضی سوائق معنویه نك اثر تحریکی اوله رق وقوعه کلیر . بو هیجان سببیه روح ، کندینه موافق و ملایم کورونن شیلره واصل و نائل اولق ایچون ، کال اشتیاق ایله و - بالارادت de volonté - او طرفه توجه ایدر .] دییور . فقط - بنجه - بو ، (خرص و ابتلا تعریفی در . بر علیل سرخوشك ایچکی به ابتلا سی ؛ بر فاجرک - سکینت بوله مایان - خرص شهوتی ؛ بر قاربازک - اصلاح قبول ایتمه یین - ابتلا ی منحوسی ، هپ بو تعریفك حوزه احاطه سنه داخل اوله بیلیر . حالبوکه بونلر ، هپ (اختراصات) قیلندن اولمقده عشقه - من جهة - بکزر سهده (ابتلا) نوعندن بر (ضعف faiblesse) اولق اعتباریه اوندن ممتازدر . خصوصاً بوکی ابتلالرك جمله سنده بر احتیاج شدیدی تطمین ، حتی بر احتیاج مرضی بی تشفی ضرورتی ، باشلیجه سائقه طبیعیه اوله رق ذیمدخل بولوندوغی ایچون عشق حقیقی به بکزه مز ؛ و بر خود کاملق صایبیلیر . بودرلو مبتلالر ، اکثر یا مر حته ، بعضاً ده طعن و تشنیعه مستحقدر لر . واقعا بزم شرق شاعرلری ، اکثر یا عشقی بر (ابتلا) اولق اوزره تصویر ایتمشلردر و بو بلایه گرفتار اولانلری (زسوا ی) کوستر مشلردر . عشقی - اک صاف واک علوی معناسیله تلقی ایدن - فضولی بیله :

عاشقه طعن ایتک اولماز (مبتلادر) در؛ نیله سین !!؟

آدمه مهر و محبت، بر (بلادر) در؛ نیله سین !!؟

دیور .

شو قدر وارکه ده قارتک تعریف مېهنده، فیلسوفلر ویسقولوغلر،
ایکی نقطه یه اهمیت ویرمشلردر. بریسی، (ارادت) ک محبت امرنده اساساً
وکیلاً ذیمدخل بولونماسی؛ ایکنجیسی ده عاشق اولان برکیمسه نک، سودیکی
انسانله یکوجود اولماسی در.

ارادت، واقعا، عشق ده (سائق mobile) دکله بیله، پک مهم بر
(عامل agent) در کبی کورونور؛ حالبوکه سه ووب سه وومک الله دکلدرا!
یعنی عشقده ارادت یوقدر؛ معلوم!... انسانک اختیاری الدن کیدر!..
بو بچده ارادت دیدیکمز می - اولسه اولسه -! (بیله بیله سه وومک)
وسودیکنی بیلیمکدرکه بوشعور، حساً حاصل اولان بختیارلغه، عقلک حظوظ
واذواقی دخی ضم ایدرک بر قات ده مسعودیتی موجب اولور. بنم ظم
بودر! مع مافیه عشقک (inconscient غیر مشعور) بر میل اوله رق
- چوجوقلرده بیله!... تجلی ایده بیلدیکنه برچوق مثاللر وارددر. اونک
ایچون (ارادت) ک بوراده معنستی (conscient مشعور) ونقطه توجی
معین بر (میلان) اولق اوزره تفسیر ایدرسه ک بر درجه یه قدر مقبول
اوله بیلیر. ایکنجی نقطه یه، یعنی عاشقک سودیکی کیمسه ایله یکوجود اولماسی
بجته کلنجه، پک طوغرودر. فضولی:

ایله من خلوتسرای سر وحدت محرمی،

عاشق معشوقدن، معشوقی عاشقدن جدا.

دیمکله بوآدعایی ایلری سورویورکه تصوفده (غایه عشق)، عاشقک،
سودیکی ایله یالکنز یکوجود اولماسی دکل، حتی سودیکنک عینی (identique)؟!
اولماسیدر. همان شیمدی بونکته یی ایضاح ایده جکم!..

(حکمت نوفلاطونیه philosophie néoplatonicienne) ده و - احکام
اساسیه سی اعتباریله - اوندن اصلا فرقی اولمایان (حکمت صوفیه - philosophie

(mystique) ده عشق، (علت تکوین cause de la création) اولق
اوزره فوق العاده اهمیتی حائر بر نظریه فلسفیه نک اساسی تشکیل ایدر.
(صوفیه شرق coufisme oriental) مذهبک، هندقدیم فلسفه سیله - نوعاً -
برعلاقه سی اولوب اولمادینی، منقدین ومورخین فلسفه غندنده - بروقتلر -
اوزون اوزادی یه موضوع بحث اولمش ایدی. هند فلسفه سنجه عشقک امر
تکوینده قطعاً ذیمدخل اولمادینی لدی التحقیق ثبوت بولونجه، تصوفک
طوغرودن طوغریه (نوفلاطونی) حکمتیله علاقه صمیمیه سی تعیین ایتدی؛
فی الحقیقه، شرقده (حکمة الاشراف philosophie illuminative) نامیه
معروف ومنتشر اولان مذهب فلسفی نک (نوفلاطونی ک) دن باشقه بر شی
اولمادینی دخی لایقیله اکلاشیلدی. بناء علیه تصوفده عشقک ماهیت واهمیتنه
دائر عرض ایده جکم شو تفصیلاتک، تماماً وحر فیا، فلسفه نوفلاطونیه یه دخی
تطبیقی طوغرودر.

تصوفده، یکانه وجود، و حقیقی وارلق (وجود مطلق l'être absolu) در.
وجود مطلق، حقیقت ذاتیه سی اعتباریله بر (قدرت ازلیه) در. بو (تحلیلات
حوادث)، هنوز واقع اولمدهن، یعنی کائنات یارادلمدهن، او (قدرت ازلیه)
کندی عالمده موجود ایدی که بوکا اصطلاحات صوفیه ده (عالم le monde
de la nébulosité) دیرلر. [تفصیلات ایچون, emanation, coufisme, théosophie
کله لرینه باقیکنز!]

اووقت، زمان، مکان، ماده وروح یوقدی. بوتون وارقلر، هپ
وجود مطلقک (احدیت ذاتیه l'unité essentielle) سنده (محو و مستهلک)
ایدی. قائلی مجهول اولان شو ظریف رباعی نک دیدیکی کبی: [ایکی جهاندن
اثر یوقدی. وارلق لوحه سی اوزرینه نقش اغیار (یعنی صور حادثات)
ترسم اتمه مشدی. معشوقه (یعنی وجود مطلق!)، عشق، و بز انسانلر هپ
برابر، اویله برکیزلی کوشه ده بولونویوردق که، اوراده بر (دیار = معبد
بکجیسی)، یعنی هیچ بر انسان، هیچ بر مخلوق متحسس، یوقدی.

زان پیش که، ازدوگون، آثار نبود،
برلوح وجود، نقش اغیار نبود.
معشوقه و عشق و مابهم می بودیم،
درکوشه خلوتی که، دیار نبود !!

ایشته (کمون مطلق) یعنی (سر مطلق) عالمی بودر.

فقط مادام که وجود مطلق، هر در لولو وارقلرك (مبدأ و معاد le principe et la fin dernière) ی در و اوحیثیته، هر شیئی احدیت ذاتیه سنده جمع ایتشدر؛ اوایله ایسه (کمال مطلق la perfection absolue) در ! . اوایله اولونجه، عینی زمانده (جمال مطلق la beauté absolue) در ! . نته کیم (خیر مطلق le bien absolu) درده !!

جمال مطلق مختفی قاله ماز؛ کیزلی طوره ماز. اونک شانی، کندینی اظهار ایتشدر : شاعرک دیدیکی کبی : [کوزللك قابل اخفا دکلدرا !!]

لکن (جمال)، عشقی مستلزمدر. اونسز اوله ماز. اولسه عبث اولوردی !! . ازلی وارلقده، وجود مطلقدن باشقه برشی تصور اولونه مدینی ایچون، قدرت ازلیه، هم حسنی، همده عشقی، کندی ذاتنده بولق کرکدر. اونک ایچون صوفیه نک اعتقادنجه، (عالم اطلاق و کمون) ده وجود مطلق کندی کندیسنه عاشق و معشوق ایدی !! .

منلا جامی، مشهور عالم اولان (یوسف وزلیخا) نام اثرینک مقدمه سنده بواعقاد صوفیانه بی پک کوزل و پک شاعرانه برطرز بیان ایله ادا ایتشدر؛ اوراده، وجود مطلق حقنده :

نواي دلبری باخویش می ساخت !

قار عاشقی باخویش می باخت !! . الی آخره !! .

دیپور .

طبیعی در که عاشق اولق، (ظهور و تجلی émanation, manifestation) یی ایجاب ایدر، و بوجلوه، معرفتی (یعنی طانیه بی و طانشه بی !) مستلزمدر.

ایشته اونک ایچوندر که : صوفیه (کنت کتزا ! . الخ.) حدیث قدسی سنی بوموقعده ایراد ایدیپور . قدرت ازلیه، بوحدیث ایله : (بن برکیزی دینه ایدم ؛ اوایله آرزو ایتدم که بیلنه یم !! . و خلقی یار ایتدم که اونلر واسطه سیله معروف اوله یم !!) دیپور، و کندی کندینه عاشق اولان برکیمسه نک - کندی جاللی کوره بیلمه سی ایچون - آینه یه محتاج اولماسی کبی، وجود مطلق دخی - کندی ضدی اولان - (عدم مطلق le néant absolu) ی، آینه کبی تاقی ایدیپور . (تقابل عدم و المله که، یعنی وارقله یوقلغک قارشیا شماسی) ایشته بودر !! .

ایکسینک بر آنده تقابلندن، بو موجودات مخلوقه میدان چیقویریپور . چونکه (الاشیاء تنکشف باضدادها) یعنی هر شی کندی ضدی ایله انکشاف ایدر .

الکبلیغ و سلیس شعرای صوفیه دن (فیضی هندی) و (محمود شبستری) نک برر بیتی شوراده ذکر ایدیپورم که تماماً بومعنائی افاده ایدر :

زانکه سر عاشقی خویش داشت،

هژده هزار آینه دریش داشت !! . (فیضی هندی)

چوقاف قدرتش، دم، بر قلم زد،

هزاران نقش برلوح عدم زاد !! . (محمود شبستری)

بلااستنا، بوتون شعرای صوفیه ده بومعنا، عیناً بوضورت بیان اوزره ادا ایدلشدر؛ و طبیعی ! . بونلر هپ تصورات شاعرانه و بیانات مجازیهدندر. یوقسه صوفیه (امر تکوین l'acte de la création) ک برسر غامض اولدوغنی معترفدرلر . یالکز شوکا قاعددرلر که (قدرت ازلیه)، (عشق ذاتی) سنی وسیله ظهور و سبب تکوین اوله رق افشا ایتشدر . وعدم مطلقه مقابله ایدنجه، بواون سکز بیک عالم محضا برجلوه فسون اوله رق !! - [آینه ده کورونن صور خیالات مثلوه] برآنده (وار کبی) کورونمشدر !! .

دیورلر . اونك ايجون موجوداته (مرایای تمین) دیمك، صوفیه لساننده بر تعبير اصطلاحی اولشدر .

فیضی هندی (مرکز الادوار) عنوانیه معروف اولان اوزون و حقیقتاً دلبر شعرنده، عادتاً صوفیه اعتقادنجیه، بر (مبحث تکوین cosmogonie) یازمشدر . وجود مطلقه (لادریه agnostique) اداسیله خطاب ایدن بر مقدمه می متعاقب :

عشق که ، عالم ، همه شیدای اوست ،
نغمه ، یکی موجّه دریای اوست !..

بیت ظریفی ایله سوزه کبریشه رک ظهور کائناتی — علی مراتبهم — نقل ایدیور . اولاً [ازلیت حر مسر اینده درین اویقولره طالمش اولان] موجودات ممکنه !؟) بو بوقلق اویقوسندن اویانوب ، کوز آجیورلر ؛ غنچه ایجادک بلربوب میدان کله جکی ، رایحه فیضک نه سه جکی طوتویور ؛ یعنی کتر مخفی آشکار اولویور ، کائنات یارادیلور ! بو وارلق باغنده ایلک آچیلان گل ؛ (عقل کل) اولویور ! صوکره (برق نور) بردها شمشعه ایله چاقیور ؛ اوندن ده (نفس کل) ظهوره کلیور ؛ ده صوکره ده (طبع کل la nature universelle) وجود بولویور ؛ ینه دریای ازلیتک طالغملری قاباریور و ساحل وجوده (طبقات افلاک) دیدیکمز بو طوقوز صدفی آتیوریور !.. بو طوقوز کره عشق ایله سیرایتمکدن اوقدر ایصینیور ، آتشله نیور که فلک ، عشق معبدینک آتشکده سنه دونویور . [الی آخره !..]

خواب کرانان حریم قدّم ، — چشم کشادند ، ز خواب عَدَم
غنچه ایجاد ، دَمِیدن گرفت ! — رایحه فیض وزیدن گرفت !..
اول ، اَازین باغ ، که بشکفت گل ، — بود (نوآیین جهان) ، عقل کل .
بازدکر شمشعه زده برق نور : — نفس کل آمد بمقام ظهور .
موجّه دریای قدم شد بلند : — نه صدق چرخ ، بساحل فکند .

نه کره چون کرم شد از سیر عشق — شد فلک آتشکده دیر عشق !..
الی آخره !..

جداً کوزل و حقیقتاً شاعرانه اولان بو منظومه نک امثالی ایران ادبیاتنده یک چوقدر . یالکز (مثنوی) ، باشلی باشنه برخزینه در . عشق حقنده اک عالی سوزلری مولانا جلال الدین رومی نک آتارنده بوله بیلیرز .

ایشته صوفیه ، عشقه بویله بر حیثیت مستننا عطف ایندکری ايجون ، اوهیجانی (هادی حقیقت) اولمق اوزره قبول ایتمشدر . فلاسفه (اسباب علم moyens de connaissance) بخشنده کاه حسه ، کاه عقله اعتماد ایدرلر ؛ صوفیه انجق الهامات عشقه اینانیر !..

یعنی (intuitionniste) [بوتعیره باقیکز] درلر . اونك ايجون مولانای رومی :

عشق ، اُسْطُراب اسرار خداست !..

دیمشدر که یک درین برسوزدر . بزم (حق عاشق) اولان شاعریمز فضولی بغدادی ؛ [عاشق لره مناج هدایت اولسون و حقه طوغرو یول کوسترسین دیه عشق آتشی یاقلمشدر !] دعواسیله سوزه باشلایه رق ، مثنوینک برنجی صحیفه سندن ملهم اولمش ، و :

قد انا رالعشق للعشاق ، مناج الهدی :

سالک راه حقیقت ، عشقه ایلر اقتدا .

عشق در اول (نشئه کامل) که آندندر مدام :

می ده تشویر حرارت ، نی ده تأثیر صدا !..

بیتلرینی سوبله مشدر . بوایکنجی بیت حرفیاً مثنوینک برنجی صحیفه سندن آلمشدر ؛ اصل فارسی سی :

آتش عشقست ، کاندرنی فتاد !..

جوشش عشقست ، کاندرمی فتاد !..

بیتی در . فقط عشقی بر (نشئه کامل) ترکیبی ایله تعریف ایتمک ، حقیقتاً اک علوی معناسیله اکلامقدر . فضولی نک شوایکی کلهک تعریف موجز

و معجزی - فکر بجه !- تعریفات سائرته نك جمله سنه فائقدر وهپسندن زیاده
صادقدر . ذاتاً صوفیه نك اعتقادی بودر . چونكه تصوف اربابنك فكر
وحسنه كوره (عشق حق) تماماً وکلیاً غرض وعوضدن بری اولمق کرکدر!...
ینه فضولی نك شونازنین بیته ، اك شیرین برادا ایله اومعنائی افاده ایدر:
کرچه جاناندن دل شیدا ایچون کام ایسترم !...

صورسه جاتان، بیلزم (کام دل شیدا) نه در؟!...

تصوف مذهبی - ماهیت فلسفیه سی اعتباریله - (وجودیه افتکاریه
panthéisme idéaliste) مسلکینه موافق اولدوغی کبی ، (وصال حق
communion avec Dieu) دخی ، صوفیه اعتقادنجیه (خیر اعلا
le suprême bien) (و) مقصدافصا (le but ultime) بولندوغی ایچون،
اکثر صوفیه ، موجودات ممکنه یی انکاردن باشلاویه رق ، بو ، (انفسیه
subjectivisme) وادیسنده اودرجه ایلری کیتمشلردرکه (انیه solipsisme)
ده نیلن وعالم وجودده کندی نفسندن باشقه (حقیقی وارلق) کورمه یین
فلسفه افراطه دوشمشلردر . عشق ایله وصال حقه نائل اولمق سایه سنده
(صوفی عاشق)، معشوق ازلی اولان حق ایله (عین identique) اولدوغی
ایچون ، (لی مع الله) دیدکلری بو (مرتبه فنا) ده ، بو (مقام قدس) ده
عاشق معشوق فرقی قالمیور .

ابن سینانك کبار معاصرینندن وعرفای صوفیه نك اك بویوکلرندن بولونان
(شیخ ابوسعید ابوالخیر) ، عینیت مرتبه سنه مخصوص اولان عشق قدسی یی
شوربای سی ایله - کنایه لی برصورتده - آکلاتیورکه مهم بروثیقه فلسفیه در:

جسم همه اشك ؛ وچشم بگریست ؛

درعشق تو بی جسم ، همی باید زیست !...

ازمن اثری نمائد !... این عشق زجیست ؟...

چون من همه معشوق شدم ، عاشق کیست ؟!...

معناسی : [وجودم بوتون کوز یاشی اولدی ؛ (نه دیدی !) ینه کوزم

آغلیور !. دیمك كه سنك عشقكه دائماً بی جسم یاشماق کرکدر !...
بندن اثر قالمادی (محو اولدم !) بو عشق نه دندر ؟... بن هب معشوق
اولدم !... عاشق کیمر ؟!... [دیمکدر . الی آخره !...]

(amour platonique عشق فلاطونی) تعبیری ده واردرکه لسان
اصطلاحده مشهور اولمشدر . افلاطون ، دنیاده موجود اولان هرشیك
شكل وحسن اعتباریله ناقص و قصورلی اولدوغی ادعا ایدردی . فقط
هرشیك بر (idée) سی اولدغنده اینانیر ، و بو (idée) لری موجوداتك
(ایلك مکمل نمونه لری = les portotypes) عد ایدردی . کویا ،
اشیای مادیه اوازی نمونه لرك قاباطاسلاق برتقلیدندن عبارت اولیوردی .
بونلره بزم شرق فیلسوفلری (مثل فلاطونیه) ، منطقیون (ماهیات) ،
صوفیه (اعیان ثابته = entités immuables) دیمشلردر . انسان دخی
بویله در . یعنی اك کوزل ومکمل انسان بیله ، انسانلغك (عین ثابته) سنه
نسبتله قصورلی وچیرکین در . بناء علیه - افلاطونك فکرنجیه - انسان ،
برکیمسه یه عاشق اولورسه ، او کیمسه نك ، شوالنده بیله آزچوق آثار کالنی
افشا ایدن ماهیته ، عین ثابته سنه مفتون اولدوغندندر . او آدمك وجود
مادیسنه دكل ، اونده کیزی بولونان (فکر کمال) و (ماهیت حسن) ه
عاشق اولدوغندندر . او حالده برنی سومك ، انجق وسیله وواسطه در . اصل
مقصود ، او واسطه ایله عشق حقیقه ای . وب ادراك کمال ایدرك فوق العاده
والهی برنشئه حاصل ایله مکدر . معرفتك اك یوکسك مرتبه سی ایشه بودر .
(تفصیلات متممه ایچون (idée) کله سنه باقیکیز ! بزم صوفیه لساننده عشق
فلاطونی یه (عشق مجازی) دیرلرکه (مقصود بالذات) اولان عشق بو
دکلدر ؛ (عشق حقیقت) در! . غریزی و حیوانی اولان عشقه دخی (عشق
حماری) دیرلر .

لسان عادیده (عشق فلاطونی) - حرص شهوانی دن معبرا ومبرا - بر
حسن محبته دیرلرکه - باقیلسه !... - عشقندن زیاده اونده (حسن استحسان
sentiment d'admiration) غالبدر . افلاطون بوفکری ، (بلکه ؟!)

استادی (سقراط) دن تلقی ایتشدرد... فقط، هر، نصلسه (amour socratique) تعبیری، قرون وسطاده، بر رذیلت شنیعهیه علم اوله رق شهرت آلوب تذلیل ایدلشدرد.

غایت فطین و مستهزی (وولتر Voltaire) مشهور (قاموس فلسفی Diction. philosophique) سنک برنجی جلدنده (amour) کلمه سنده بو خصوصه دائر اینجه دن اینجهیه تنقیدات و ایضاحاته کیریشمشدر.

(amour propre) تعبیری ده وارددر که بز اوئی (حب نفس)، (عزت نفس) دیه ترجمه ایدرز. علم اخلاق ایله ده ازیاده علاقه دار بر تعبیر اصطلاحی در.

معنای حقیقیسنه باقیلیرسه (عجب = یعنی کنندنی بکنمک = vanité) نوعندن بر حالت روحیه در. فلسفه صوفیه ده اک بویوک قباحث صاییلیردی. زمانمز اعتقادنجه افراطی، ینه قباحتر؛ فقط اعتدال معقولی مقبولدر؛ چونکه (حسن حیثیت و وقار sentiment de dignité) اونسر اولماز. بوسبوتون تذلیل نفس ایتمک ایسه، حیثیت امرنده لاابالیلکی دعوت ایدر. اونک ایچون، اعتقاد مزجه عزت نفسک فقدان بر بویوک قصوردر. [تعبیرات اصطلاحیهیه باقیکنز!]

(کلمه نیک معنایمنده) ابهام Amphibolie

Amphidolie

انگلیزجه Amphibolia
ایتالیانجه Anfibia

تعبیرک اصلی یونانی در: (ἀμφιβολία). ارسطو، (ارغنون) نامیه مشهور عالم اولان منطق کتابنده بوکله یی اصطلاح اوله رق قولانمش و او یله معروف اولوب قالمشدر. بوکون برکله نیک ایکی مختلف معنا افهام ایتمه سنه (amphibolie) دیرلر که اکثراً بواهم یوزندن، مباحثانده (تزع لفظی) وقوعه کلیر. بوتون (جناس لفظی) لرده بوقیلدندر. حتی بوکلی کله لری قیاساته ادخال ایدرک صغرا ده باشقه، کبراده باشقه بر حیثیت معنا ایله قولانمش سببیه برنوع (سفسطه) یا بیلمش اولور که، اصطلاح علمده اوکا (sophisme in dictionem) یعنی سوز یوزندن حاصل اولمش (سفسطه لفظیه) دیرلر.

مجددین فلاسفه دن (ئمانوئل قانت Emmanuel Kant) بوکله اصطلاحیه یی، احیا ایتمش و (تنقید عقل صرف Critique de la Raison pure) نام کتابنده بوسبوتون بر باشقه حیثیت معنا ایله قولانمشدر. بو المان فیلسوفی نظرنده (amphibolie)، دیمک، تجربه محصولی اولان (مفهومات notions) ی (قبل apriorique) (بو تعبیراته باقیکنز) بعضی مفهومات اصلیه ایله حیثیتاً بر طوتمق خطاسیدر. یعنی تورکجه سی: قانت نظرنده افکار و مفهومات ایکی بویوک صنفه منقسمدر. بونلرک بر قسمی، صرف تجربه ایله حاصل اولمش و بالخاصه تجربه دن طوغمش فکرلر در. بونلرده (وجوب nécessité) یوقدر. دیگر بر قسمی ایسه، عقلدن نشأت ایتمش فکرلر در. بونلر (بالذات بدیهی) شیلر در. یعنی واجبدلر. [idées innées سوزینه باقیکنز!]

شیمدی: (جوهریت substantialité) و (عینیت identité) حقنده کی اعتقاد اتمز، قانتک ادعاسنجه! - عقل صرفه عائد (افکار و هییه) دندر، یعنی (مبادی عقلیه) دندر. بونلر اول امرده تسلیم و قبول اولونما دقجه، تجربه، ذاتاً یا پیلله ماز. تجربه بواساساته استناد ایدر. فقط بونلرک قیمتندی ده اظهار و اثبات ایدن ینه انجق تجربه در. بومبادی یی بالتجربه تحقیق و تأیید ایتمک لازم کلیرکن، مشروع اولان اصول تجربه یی اهل ایدوب ده منحصرأ منطق بر طرزده اونلری اثباته چالشاق و بوسبوتون (متعال transcendental) بر اصوله اتباع ایتمک (عقل صرفه عائد اولان مفهوماتده ابهام l'amphi-bolie de l'entendement pur) خطاسنه دوشمکدر. نته کیم بوکلی مبادی عقلیه (principes rationnels) یی صرف تجربه محصولی عد ایتمک دخی (amphibolie) خطاسیدر. [تعبیراته و بالخاصه (amphibologie) سوزینه باقیکنز.]

Amphibologie

نقصیه مبراهمه Amphibologie

بوکله نیک نهایتده (logie) لغت یونانیه سنی بولوندوغی ایچون، (مبحث ابهام) دیه ترجمه سنه قرار ویرلشدی. بو تعبیرک معنای اصطلاحیسی صریح در. بناء علیه (مبحث) لفظنک مناسبتسز بر حشو تشکیل ایده جکی، تعریفات آتیه دن ظاهر اوله بیلیر.

(équivoque)، ایکی مختلف معنایه اشارت ایدیهیلن برکلهیه دیرلر .
(amphibologie) ایکی مختلف معنایه حملی ممکن اولان برقصیه در. ایشته اوقدر!..
بونک اگ کوزل مثاللرینی اسکی (دهلف هاتفی l'oracle de Delphes) نک
سوزلرنده بهلهیلیرز: مثلاً قدیم ایران شاهنشاهلرندن مشهور (دارا
Darius)، اسکندر کبیره قارشی محاربهیه تشبث ایتزدن اول، کویا!؟ (هاتف
غیب) ک رأینی صورمش ایش. هاتفک جوابی؛ (محاربه ایدرسهک، بر بویوک
سلطنت محو ایدرسک!..) تنبیهی اولمشدر؛ ده نیلیور!.. (بر بویوک سلطنت)
سوزنده کی (ابهام!) ایران ویاما کدو نیا سلطنتلرندن هانکی سی مراد ایدلر یکنی
کلیاً مسکوت عنه بر اقدینی ایچون، شواییک ایمر اطور لقدن هر برینک ده
احتمال اضمحلالنه - هاتفک سوزنده - اشارت واردر. نصل که محاربه واقعه
اسکی، ایران سلطنتک انقراضی منتج اولوبده، دارا، هاتفی، جهل ویالانجیلقله
اتهام ایدنجه، هاتف: [بن، بر سلطنتک محو اوله جفتی خبر ویردم. دیدیکم
چیقدی. دارا سلطنتی محو اولدی.] دیه جواب ویروب ایشک ایچندن
چیقمشدر. یعنی [بنم سوزم هراییکی طرف ایچونده آیری آیری احتمال
اضمحلال بیان ایدر بر (قصیه مبهمه amphibologie) ایدی؛ بن قطعاً
شو ویابو سلطنت محو اوله جقدر! دیمدم] دیمک ایسته مشدر.

فن بیانده (ضعف تألیف) ده نیلن قباحه اسلوب، علی الاکثر قضایای
مبهمه قیلندن بر شیدر. مثلاً؛ [تحصیل علمه چالیش؛ کامل بر آدم اول
باباک کبی جاهل اوله!] دیسهک، فکر مزنی (ضعف تألیف) صورتنده
بیان ایتش اولورز. زیرا: [کامل بر آدم اول؛ باباک کبی!.. - جاهل
اوله!..] می دیمک ایستیورز؟.. یوقسه [کامل بر آدم اول!.. - باباک
کبی جاهل اوله!..] می دیمک ایستیورز!.. اگلا شلمیور و جملهی هراییکی
معنا ایله تلقی ایتک ممکن اولویور.

Amusie حس موسیقی نک ضیاعی

انسانده حس موسیقی واردر، بونک ده اول امرده سامعه ایله علاقه سی
اولدوغی ایچون، دماغده (مرکز سمعی centre acousique) ایله صیقی
صیقیه رابطه سی واردر. بعضی اسباب طولانیسیله انسان بو حس موسیقی

Amusie

قابلیتی ضایع ایدیهیلیر؛ ایشته بوحاله (amusie) دیرلر. تکلم قابلیتک
ضایع اوله بیلمه سی کبی که، (aphasie) دیدیکمز حالده اودر؛ و اوکا
قیاساً بوکله احداث ایدلشدر. کیفیتی تحقیق ایدن (فیزیولوژیست) لر، ذاتاً
(aphasie) ایله (amusie) نک صحیحاً علاقه دار اولدوغی اگلا مشلردر.
بعض انواعی واردر. (amusie auditive)، موسیقی بسته لرینی ایشیدوبده
اگلا یه مامق در. (amusie visuelle) موسیقی نوطه لرینی اوقویه بیلمکله
برابر او حروفات موسیقیه نک معناسی چیقارمماق، یعنی افاده ایتدکلری
الحانی، ادراک ایلیه مه مکدر. (amusie motrice)، تغنی ایدمه مک،
بر ساز چاله مامق در. اگلا شیلیور که طبق کلام قابلیتک ضیاعنده اولدوغی کبی
شو عجزک انواعی ده دماغده بر مرکز مخصوصک عطالتنه یا خود اضمحلالنه
دلالت ایدر و او مرکز لرده واقع اولان تخریبات واختلالاتک آثاریدر.
بناء علیه بوسیله در که (amusie) دخی بر قاچ نوع اوله بیلیور؛ و منفرداً
بر نوعی نادرآ کورولویور، بو حس موسیقی نک ضیاعی، هان دائماً
(agraphie), (alexie), (aphasie) ایله علاقه داردر. [بوکله لره باقیکنز.]

Amalgésie حس الیک ضیاعی

حس لمس ایله حس الم ماهیتاً، طبیعتاً آیری غیری طویغولردر. لکن هر
ایکینسک - موردی اعتباریله - عمومی موضعی جلدیمزدر. بناء علیه بو طویغولر،
بردرجه شده وارنجه یکدیگرندن فرق اوله نه ماز. وجود مزک برقسمنده،
بر ناحیه سنده و یا خود هر طرفنده بردن یالکیز الم طویمق قابلیت زائل اولورسه،
یعنی قابلیت لمس اسکینسی کبی قالوبده، یالکیز آجی طویمق حسنی ضایع
ایدرسهک، بوحاله (analgesie) دیرلر. بعضی مواد طیبه وادویه انسانده
بو حالی ایقاع ایدیهیلیر؛ (عملیات جراحیه opérations chirurgicales) ده
استعمال اولونان (قلوروفورم) وامثالی کبی! بودر لوسنک، فلسفه مسائلی
ایله پک اوقدر علاقه سی یوقدر. بوحالتک صرف مرضی و عصبی برشکلده
واردر که یاقین زمانلره کلنجیه دکن، سببی کشف و تحقیق اولونه مامشدی.
مع مافیه اونه دنبری بوحالت، بعضی انسانلرده مشاهده اولوندوغی حالده اسباب

Analgesie

حقیقه‌سی اگلاشیله مادینی ایچون خارق عاده بر کیفیت ، حتی بر اثر کرامت و قدسیت اولق اوزره تلقی ایدیلوردی . مثلاً، دین نصرانیتک ابتدای ظهورنده ، خلقک اگ سفل و فقیر طبقه‌سندن بر حزب قلیل - مظلومینه دنیاده مساوات وعدالت ، آخرته سرمدی بر سعادت وعد ایدن - بودین انسانیتپرورانه در حال انتساب ایتشدی ؛ فقط بوانتساب - بالضروره - مخفی طوتولویوردی . زیرا اوزمانلر عالم مدینته علی الاطلاق حاکم اولان روما ایمپراطورلنی، بوتظاهراته - بدایت امرده - ذره قدر اهمیت و برمه‌دیکی حالده ، براز صوکره ، بومساوات دعوالرندن ازیجق اندیشه ایتمکه باشلامش و هنوز ماهیت اعتقادیه‌سی معلوم اولمایان بویکی مذهب اربابی بر نوع آنارشیست ویا (قومونیست communiste) فرقه‌سی کبی تلقی ایتشدی . بناء علیه ، طور و حرکتلری آسایش عمومی اخلاله مستعد کوروندوکی ایچون روما ایمپراطورلنی ضابطه‌سی ، خرستیان اولان افراد اهالی‌نی شدتله تعقیبه قویولمش و غدارانه بر صورتده تجزیه ایتمکه باشلامش . نهایت بوجنایات سیاسی (cirque) لرده تماشا اکنجه‌سی اولدی . بر سوری بیکناه و فقیر خلق ، - بت پرستلکدن یوزجو یروب بردینه انتساب ایتدکلری ایچون ! - چولوقلریله ، چوجوقلریله (cirque) اورطه اویونی میدانی نه سوق ایدیلر و حیوانات وحشیه‌یه ویریلر ؛ وبوملعت ، سیر و تماشا اولونوردی . بر جوقلری دخی دیرکلره صاریلر ، زینت‌ایله بولانیروکیجه‌لری روما جاده‌لرینی تنویر ایچون مشعله خدمتی ایفا ایدردی . فقط بونلر آره‌سنده بعضی کیمسه‌لرک ، چاییر چاییر یانارکن ، ذره قدر آجی طویمایوب ، فتور علامتی کوسترمیوب الهی اوقودقلری و کمال سکونت و سعادتله ترک حیات ایتدکلری چوق دفعه‌لر کورولمش و بو حالت غریبه (معقول rationnel) بر صورتده ، [یعنی اسباب طبیعی‌سیله !] تعریف اولونه مادینی ایچون ذهنلری طور دورمشدی . (analgésie ؟) بر قوه قدسیه‌یه حمل اولوندی ، وبر چوق مظلومینک اسملری (اعزّه خرستیانیه les saints) لیسته‌سینه کیردی ، مشهور اولدی . نته‌کیم بالاخره ، عینی دین انسانیتپرورانه اوغورنده (جزویت جمعیتی la corporation des jésuites) (انکیزیسیون inquisition) یعنی

تحقیقات نامنه !! یوز بیکلرجه معصومینی ، اشد عقوبات ایله ، یاقوب ، تلف ایدرکن ، ینه بر چوق مظلومینک ، الم حسن ایتیمه‌رک ، فتور کوسترمیه‌رک عالی سوزلر سویله دکلری و (بختیارانه ؟) بر صورتده اولدکلری مشاهده اولوندی . بونلر (اعزّه) صیره‌سینه کیرمه‌دیلر ؛ فقط ینه مشهور اولدیلر . کذلک ، بوندن تقریباً آلتش ، یتیم سنه اول ایرانده ظهور ایدن (بابیه Babisme) مذهبی‌نک واضعی (سید محمد باب) ، - روایت اولوندوغنه کوره ؟ ! - بغیر حق و مظلوماً اولدورولدکن صوکره (بابی‌لر) نام عمومی‌سی ایله مشهور اولان اکثر تابعینی ، ایرانک هر طرفنده اشد عقوباته ، اشع جنایاته هدف اولدیلر . اوزمانلر طهرانده فرانسه سفیری بولونان و بو هنکامده شاهد عادل اولان محرر حکیم و مستشرق شهیر (C. De Gaubineau) قونت دوغوبینو) ، (آسیای وسطی فلسفه‌سی وادیانی Religions et philo. de l'Asie centrale) نامیله یازدینی مهم بر اثرده مشاهداتی نقل ایدیور : [. . . . سواقلرده زنجیره اورولمش بر سلسله معصومین کوردم که چیلای وجودلری بیجاقلرله شرحه شرحه ایدلمش و اوشر حله‌له یانارموملر دیکلیمش اولدوغنی حالده کچیورلردی ؛ فقط بوبابی‌لر ذره قدر آجی طویمورلر و بلیغ برلسان و فریح بر ادا ایله شعرلر اوقویه‌رق ، جاهل و متجاوز خلقک آراسندن بر حیثیت مستنا ایله مرور ایدیورلردی .] دییور .

کورولویورکه بو حالت خارق العاده‌نک امثالی چوقدر . کیفیت ، هیچ کیمسه بوکون انکار ایتیمور و ایده‌مز . لکن بوکون بوغریبه‌نی علمای طب ، یک معقول بر وجهه‌تعریف ایتک یولنی بولملشدر . زمانمزک امراض عصبیه متخصصلری و علی الخصوص اونلرک اگ مشهورلرندن بری اولان متوفی (دوقتور شارکو Dr Charcot) ، (ایسته‌ری Hystérie) ده‌یلان مرض عصبی‌نک بویه غریب تجلیاتی اولدوغنی و بعضاً (اشتهازلق anorexie) [بوکلّه باقیکز !] کتیرمکه برابر ، وجودک قطعاً دوچار ضعف اولیه‌رق (بر ایکی سنه ؟) آج طورده بیلدیکنی ، بعضاً دخی ذره قدر الم حسن ایتیمه‌رک اگ شدید اذا و عقوباته تحمل ایده‌بیلدیکنی علماً تعریف ایتشدر . بالخاصه (analgésie) نک بر اثر (فلج paralysie) اولدوغنی

سویله مشدر . فضله اوله رق (ایستهری) نك (اشكال مرضیه formes pathologiques) سنی تمیز و تعداد ایتدیکی صیرهده (شکل دیندارانه forme religieuse) سنی ده لایقیله ایضاح ایله مش و بو خصوصده قوی بر ایمان (une foi inébranlable) ك پك بویوك بر رول اوینادیغنی اكلا تمشدر : بویله بر ایمان ایله (autosuggestion) واقع اولدوغنی و بوسیله (analgésie) حصوله کتیردیکنی کوستر مشدر . صو کره بالذات (مانیه تیژما magnétisme) ایله بعض مرضای عصیه (hystériques !!) اوزرنده تجربه لر یاپه رق (بالتلقین par suggestion) عینی حالی ایقاع ایتش و بو خصوصده شبهه بر اقام مشدر . ایشته اوللری قوه قدسیه حمل اوله رق تعریف ایدیلن بو حالت غریبه نك قدسیتی قالماش و بر مرض عصی ، ویا بر هیجان شدید نتیجه سی اولدوغنی ثبوت بوله رق علما تعریفه موفقت الویر مشدر . یعنی (rationalisme) ، بر بویوك خطوه ترقی آتمه موفق اولمشدر . [بوسوزه باقیکنز] .

مشابهات ، مماثلہ ، تمثیل

Analogie	فرانسجه و آلمانجه
Analogy	انگلیزجه
Analogia	ایتالیانجه

Analogie

یونانی لساننده (آنالوی با = ἀναλογία) ، (نسبت) دیمکدر . بو کلمه یی اولافلاطون استعمال ایتش و اونك شا کردی ارسطو معنای اصطلاحیسی ایله تعیین و تعریف ایله مشدر .

لسان عادی ده (مبهم بر مشابیهت) معناسنه قوللانیلیر . علی الا کثر ، طبیعتاً بر برینه بکزه مه یی ایکی شیئک - بعض وجود ایله - یکدیگرینه مشابیهتی بیان ایچون بریخی دیگر یی ایله (تمثیل) ایدرز ، و بو صورته ، مبهم بر کیفیتی ، دیگر بر کیفیت ظاهریه تشبیه ایدره کدها ای آکلامق و آکلامق ایسترز .

بعض انگلیز منطقینو ، بونك اک مشهور مثالی انجیل شریفدن نقل ایراد ایدر لر : [امتی قویون سوروسنه و اونی طوغرو بوله هدایت ایدنلری ده چوبانه بکزه تمک] ، معنای عادسیله (تمثیل) کوزل بر مثال اولور دیرلر .

بزده ده (رعیه ورعایا) لفظلری بومعنای تمثیلی متضمن کلمات مشهوره دندر . مؤلفین سالفه اکثریا بویله تمثیل ایله بر چوق کیفیاتی تعریف ایتک مرا قنده ایدیلر . بزده دخی فرضا قینالی زاده علی اقتدی ، ارضروملی ابراهیم حق ودها بر چوق مؤلفین ، (روحی سلطانه ، حواس دن بر قسمی جاسوسه ، بر قسمی عسسلره ، بدنی قلعه یه) بکزه ته رک تعریفه چالشمش لردر که بو طرز بیان ، بر (تعریف تمثیلی) نمونه سیدر . کذلک : جسمی عناصر اربعه دن مرکب فرض ایدوبده او عناصری ، بر محبسک درت دیوارینه و روحی ده بر محبوسه بکزه تمک ، بر تمثیل مشهور در که آثار صوفیه نك جمله سنده کرات ایله تصادف اولونه بیلیر . الی آخره ! . . .

ایشته عادی معناسیله (تمثیل) . بودر حالبوکه اصطلاحده (تمثیل و مماثلہ) باشقه (تشبیه و مشابیهت) باشقه در .

تمثیل و مماثلہ یی ، ارسطو ، [اشیا آره سنده دکل ، (نسبتلر les relations آره سنده بر مشابیهت) اولمق اوزره تعریف ایتشدی که حالا بو کون کلمه نك اصطلاح معناسی بودر .

استاد یونانی ، (بالقوه in virtus) وجود ایله (بالفعل in actu) وارلق آره سنده مماثلہ یی ، و یقوده اولان بر آدمک حالی ایله گزینن بر کیسه نك حالته بکزه تیوردی . [بوتعیراته و intellect لغته باقیکنز !] مع مافیه ، ایکی نسبت معینه نك یکدیگرینه (مثل analogue) یعنی (نظیر) اولدوغنی لایقیله اکلا ته بیلیمک ایچون (هندسی نسبتلر relations géométriques) دن مثاللر ایراد ایتشدی . فقط (analogie) مطلقاً (کمی quantitative) نسبتلره خاص دکلدر . (کیفی qualitatifs) دخی اوله بیلیر . نته کیم (منطق logique) ده مماثلہ انجق بودر لودر ؛ و بو علمی ، اصول و قواعد یله ضبط و تدوین ایدن ارسطو ، انجق کیفی مماثلہ لرله تقید ایدوب مشغول اولمشدر . منحصر آ کمی (analogie) لرله مشغول اولان و بوتعیرره معنای ریاضی سنی ویرن ذات ، مهندس شهیر (اسکندریه لی اقلیدس Euclide d'Alexandrie) درکه (برنجی بطلمیوس = Ptolémée Soter) زماننده یاشیوردی [قبل المیلاد ۳۰۰ - ۲۸۲] .

ریاضیاتده مماثلته نك الك بسيط صورتی ، (اربعة متناسبه) در : [(۱) :
(ب) :: (ب) : (س)] کبی ؛ فقط غایت مغلق صورتلری ده واردر .
ده نیله بیلیرکه ریاضیات عالیله ده (نسب مماثلته) دن مهم بر موضوع یوق کبی در !
[بوخصوصده تفصیلات ایچون قاموس عمومی نك ریاضی قسمنه باقیکنز !]
(analogie) بحثی ، اوتهدنبری فلسفه ومنطقده ، الهیات وتصوفده ،
بیولوژیده - بویوک براهیمتله - تلقی ایدلمش وزمانمزده بیله مناقشهسی دوام
ایتمکده بولونمشدر .

قرون اولی ووسطی فلسفهسنده منطق تحکم ایتدیکی جهتله (قسطاس
حقیقت ، le criterium de la verite) ، (تجربه ، l'expérience)
دکل برهان ایدی . چونکه (اصول تحقیق methode de verification)
دخی (نظر واستدلال raisonnement et argumentation) ایدی .
استدلال آنجق اوچ درلو اوله بیلیر . یا (قیاس deduction) ، یا (استقرا
induction) ویاخود (تمثیل analogie) صورتیله ممکندر . ایشته
بوصور ثلاثه اوزره واقع اولان استدلالات نتیجهسنده ویریلن حکم ، بر
(برهان) در . لکن براهینک (قدرت اقناعیه) اعتباریله قیمتی بردکدر .
مثلا (برهان قیاسی argument deductif) ، عموماً مسلم بر (قضیه
کلیه proposition universelle) نك شمول حکمنده مندرج بر حقیقت
جزئییه ، کشف واستخراج ایتمکدن عبارت بولوندوغنه نظراً ، قوتلی
بردیلدر . زیرا ، اوقضیه کلیه - صحیحاً موافق حقیقت ایسه ! - متضمن
بولوندوغی جزئیات امورک جملهسنی ، البته شاملدر . بناءً علیه اوقضیه
کلیه نك حکمی جزئیاتیده متضمندر . فرضاً : (بوتون انسانلر فانی در !)
ده نیجه ، بو حکم ، سقراط ، ارسطو وابن سینایی دخی شاملدر . چونکه
بوفلسوفلر دخی ، انسان اولمق اعتباریله او حکمک دائرة احاطهسنده داخلدر .
بوترز استدلاله کیمسه اعتراض ایدهمز ؛ مکرکه ، سند اصلی اولان
اوقضیه کلیه نك شمول حکمنی انکار ایتمک لازم کلسین ! . . . بناءً علیه
بوترز استدلال تمامیه قناعت بخشدر .

لکن ، برچوق افراد جزئیلهده تحقیق ایتدیکمز بر کیفیتی ، سند اتخاذ

ایدرك تعمیم حکم ایلرسهك بوصورتله واقع اولان استدلالمز اودرجه قدرت
اقناعیهنی حائر اوله ماز . مثلاً : (قوغو cygne) دیدیکمز قوشلردن قاچ
دانه کوردك ایسه تماماً بیاض کوردوکمز ایچون ، (دنیاده نه قدر قوغو وارسه
هپ بیاضدر !) دیرسهك ، طوغرو اولورمی ؟ .. هپسنی کوره مدك که بو حکممز
طوغرو اوله بیلسین ! .. اوحالده دلیلک بودرلوسی اوته کی قدر قوتلی اوله ماز .
نته کیم سیاه قوغولر دخی کشف اولونمشدر . تمثیله کلنجه ، اونک قدرت
اقناعیهسی ده آزددر . واقعا ریاضیاتده نسبتلر کیمی بر صورتده معین اولدوغی
ایچون (تمثیل طرزنده استدلال) قطعاً (یقین certitude) افاده ایدر .
زیرا بر نسبت ریاضیهده (حد اکبر le grand terme) ، (حد اوسط
le moyen terme) دن نه قدر زیاده ایسه ، حد اوسط دخی (حد اصغر
le petit terme) دن تماماً اونسبتده فضلدر . فقط (کیفیات qualities)
قیلندن اولان احوالده تظاهر ایدن نسبتلر ، بویله بر قطعیت ریاضیه ایله -
یعنی کیمی بر صورتده ! - تقدیر ایدیله مدیکی ایچون (استدلال کیمی
raisonnement quantitatif) ده قوی بر دلیل اوله بیان (تمثیل) ،
(استدلال کیفی raisonnement qualitatif) ده انجق ظنی واحتمالی بر
نتیجه ویره بیلور .

ایشته ، بومسئله بالخاصه منطقیون عنندیده وطولاییمی ایله فلاسفه آرهسنده
جدی مباحثاته میدان آچمشدر . چونکه منطقده (استقرا) و (قیاس)
مسئلهلریله صیق صیقیه مناسبتی واردر . بونکده فلسفه وعلی الخصوص
(مبحث اصول methodologie) ده (تدرییه empirisme) و (عقلیه
rationalisme) مدعایریله پک صمیمی واساسی برعلاقهسی واردر .

اونک ایچوندرکه ، بواوچ طرز استدلالدن هانکیسنک محاکات فکریده
اصل اولدوغی تعیین ایتمک لازمکلمش وبو صورتله ، مناقشه ، بر ایکنجی
مسئله ده تولید ایتمشدر . بوایکنجی مسئله نك دخی جدی براهیمت فلسفیهسی
واردر . زیرا (استقرا) اصل ایسه ، تجربه اوکا اساسدر وبناءً علیه حصول
علمی تجربه به اسناد ایدن (فلسفه تدرییه phil. empirique) ، بودعواسنده
حق قازانمش اوله جقدر . یوق ، (قیاس) اصل ایسه ، انجق بر (مبدأ کلی

principe universel) قبول ایدوب، اونك ضمنتده مندرج بولونان حقایق جزئیہی استخراج ایتک صورتیلہ واقع اولان استدلالک اولویتہ حکم ایتک لازمکہ جکدر. مبادی کلیہ - طبیعت وماہیتلری اعتباریلہ! - محصول تجربہ اولمایوب، قضایای عقلیہ دن صایلدقلری ایچون، حصول علمی تجربہ یہ دکل، بو (مبادی) یہ عطف ایدن (فلسفہ عقلیہ phil. rationaliste)، دعواسندہ حق قازانہ جقدر.

ایشته بولکە نك منطقده نہ کی مسائل ایله علاقدار اولدوغی و مسائل مذکورہ نك فلسفہ یہ نہ یوزدن مناسبتی بولوندوغی شو ایضاحامدن آشکار اوله بیلیر.

حکمای اسلام - بالطبع - بومسئلہی، لایق اولدوغی اهمیت وجدیتلہ تلقی ایتشلردر. فلسفہ و منطقہ متعلق اولان مصنفات مشہورده بوبحث تفصیلاتیلہ بسط و تنقید ایدلشدرد. شرح مواقفده، برنجی موقفک مقصد ثالثی: [الاستدلال، اما بالقیاس، والتمثیل (!؟)، والاستقراء] عنوانی ایله جالب نظر در و بالخاصہ بومسئلہی موضوع بحث ایدر. قاضی عضد و شارحی سید شریفک ملاحظاتی - اختصاراً - عرض ایدیورم:

« استدلال یا کلی دن جزئی یہ اولور؛ حیواندن انسانہ انتقالاً حکم ایتک کی. بوکا قیاس دیرلر. و یاخود جزئی دن کلی یہ اولور کہ استقراء بودر. برصنفک جزئیات افرادندہ (حکم کلی) تماماً ثابت اولور ایسہ، اوکا (استقراء تام) و (قیاس مقسم) دیرلر. جزئیات افراد، احاطہ و حصر ایدیلہ مدیکی حالده تشمیل حکم اولونورسہ اوکا (استقراء ناقص) دیرلر کہ نتیجہ، انجق بر حکم ظنی دن عبارت قالیر؛ یقین افادہ ایدہ مز. برده جزئی دن جزئی یہ استدلال یولی وارد در کہ بوکا تمثیل دیرلر. بودہ ایکی (امر fait)، یعنی ایکی وقعہ، ایکی کیفیت آرہ سندہ حکمہ سبب اولان مشارکت در. بومشارکت، او ایکی جزئی یی شامل بر (کلی) صاییلیر!.. حکما (استدلال بحثندہ!) دیورلر کہ: مطلقاً دلیل ایله مدلول آرہ سندہ بر مناسبت مخصوصہ بولونمالی در کہ مدار حکم اوله بیلسین! اگر دلیل، مدلولی شامل ایسہ، (استدلال بالقیاس) اولور. مدلول، دلیلی شامل ایسہ (استدلال بالاستقراء) اولور. اگر هم

دلیل، ہمدہ مدلولی بر (امرنالک) یعنی او چنجی بر کیفیت شامل اولوبورسہ، او وقت (استدلال بالتمثیل raisonnement par analogie) اولور. دلیل ایله مدلولدن ہر ایکسینک دخی قضایای کلیہ دن اولماسندہ بآس یوقدر. آرہ لرنندہ کی (نسبت مشارکت) او ایکی قضیہ یی دخی شامل و بناءً علیہ دہا عمومی بر کیفیت اولدوغی ایچون، او ایکی قضیہ، بو کیفیت عمومیہ یہ نسبتلہ (جزئی) لولش اولور!...! الی آخرہ!...

ایشته قاضی عضدک تعریفی وسید شریفک ملاحظات مختصرہ سی بودر. شو مطالعاتہ نظراً (استدلال بالتمثیل) صورتیلہ ابراز واقامہ اولونان بر (برهان argument) ک نہ درجہ لرہ قدر صحتہ اعتماد و قیمتہ اعتبار ایدلہ سی لازم کلہ چکی - حالیہ!.. موضوع بحث و وسیلہ مناقشہ اولمشدرد. مسئلہ نك اهمیتی آشکار در؛ زیرا محققدر کہ بزہ انسانلر، اکثر احوالده، اک زیادہ (تمثیل صورتیلہ!) محاکمہ یہ ابستدار ایدرز و فکر مز ایچون - (نقطہ حرکت point de départ) اولان بر مثالی (!؟)، ظنمزہ، یاخود دعوا مزہ بر (دلیل) اولہ رق ابراز ایدرز. ہم، بونی: اک مبہم کیفیات حقندہ حکم ویرہ جکمز زمان یاپارز. دہاقوی دلیل بولہ بیلسہ یڈک، البتہ بر (مثال) ی آلوب برهان اولمق اوزرہ اورطہ یہ آتمازدق!... ذاتاً تمثیل ایله استدلال دیمک، بر (مثال ایله استدلال = raisonnement par l'exemple) دیمکدر. بر مثال، نصل دلیل اوله بیلیر!.. ونہ دن قوی و معتبر بر دلیل اولسون؟!.. ولو کہ، ایکی شی و یا حال آرہ سندہ اکثر یا مشاہدہ اولونہ بیلن بر نسبتی (مثال) اتخاڈ ایتش اولہ لمده، سائر بعض احوال و اشیا آرہ سندہ کورد و کمز بر رابطہ یی ایضاح و تعریف ایچون او مثالی (برهان) اولہ رق اقامہ ایتش بولنہ لم!.. بوندہ اساس، ہر حالده مشابہت دکل!... مشابہت دہ نہ وار کہ (دلیل) قوتی و حیثیتی حائر اوله بیلیر؟!.. ایشته منطقینونی و فلاسفہ زمانی اشغال ایتکدہ بولونان عقدہ بوراسیدر.

مثلاً: (۱) ایله (ب) نك مناسبتندن (ج) حصولہ کلیور؛ دیہ (۱) ایله (ب) نك رابطہ سندن (ج) کی بر نتیجہ حیقمق، نہ دن لازم کلسین!... اکثر جاہل کیمسہ لر بو خطای استدلالک، ہان دائماً قربانی اولورلر: فرضاً

فلان علاجك فلان خسته لغه انی كلدیكنی، — مثلا (آتی پیرین antipyrine) كه،
باش آغریسنه انی كلدیكنی — برباشقه آدمك تجربه سنه بناء! — تحقیق ایدنجه
كندی باش آغریلری ده تسكین و دفع ایچون، خلق، سلمه السلام، او علاجی
استعمال ایدر. حالبوكه باش آغریسی لاقول بش آلتی درلو اسباب متخالفه دن
ایلری كله بیلیر. بواسبابه نظراً، او علاجك آلمسندنه بر (مانعه مهمه)
اوله بیلیر: قلب خسته لغندن منبعث اولان باش آغریسندنه (آتی پیرین) كه،
يك مضر و شدته ممنوع اولماسی كبی! (آغری، آغری یه بگزنیور) دیه
(علاجك ده علاجه بگزیه مسی) لازم كله جكنی ظن ایتكندن نشأت ایدن بو خطا
اثبات ایدیور كه، استدلال بالتمیل، بویه سطحی بر مشاهده یه مبنی اولورسه طوغرو
اولماز. اولمايخده (قیاس مع الفارق fausse comparaison) نامیه
معروف اولان خطا وقوعه كلیر.

بوترز — استدلاله شایان دقت بر جهت ده وار: کیفیتك حقیقتاً
و تماماً متشابه اولدوغی قطعاً ثابت اولمی كه تمیل طوغرو اوله بیلسین ...!
بوده یالكز سطحی بر نظرله نتیجه یه بافته اولماز: (باش آغریسی) مثالی
بونى تامیه كوستیر! .. عجبا هر باش آغریسی بر برینه بگزرمی؟ .. او بر
نتیجه در؟ اسبابه باقمالی ز! .. اسباب ایله نتایج آره سسندنه کی نسبتی حقیقه
كشف و تعیین ایدمزشه كه، تمیلمز، (قیاس مع الفارق) خطاسنه مستند
اولور؛ و بویه چوروك بر اساس اوزرینه مبنی اولان استدلالتمز بر (برهان
قوی) تشكيل ایده مز. اونك ایچون، بر برینه متشابه ظن ایتدیكمز نسبتلرده
مشترك اولان کیفیات اصلیه یه قدر انفاذ نظر ایده بیللملی ز. اسکی منطقینونك
(نسبت اساسیه fundamentum relationis) دیدیكى، بیفیت اصلیه یی
بولمالی ز. چونكه ایكى مختلف نسبتده، نتایجك عینی صورته ظهورینه
سبب، انجق اودر! ..

اوله اولونجه، بر برینه بگزركورونن احوال و اشیا ده نسبت مشابهی
لاقیله كشف و تعیین ایده بیلیمك ایچون، (کیفیات متشابهه - qualities se-
mblables) یی (کیفیات متغایره qual. dissemblables) دن آیره بیلیملی بزرگه
او احوال و اشیانك، نه كبی (اوصاف مشتركه propriétés communes)

علاقه سیله بر برینه بگزرك اولدقلى میدانیه حقیقه بیلسین! .. بوايسه (اصول
طرد méthode d'accord) و (اصول تفاضل méth. de différence) دیمكدر.

كورولویوركه بوبحثك (دردت اصول تجربیه - les quatre métho-
des expérimentales) ایله مناسبتی اولدوغی كبی (سببیت causalité).
مسئله سی ایله ده علاقه سی واردر.

شبه یوقدر كه (تصنیف classification) کیفیتده اساس بودر.
زیرا عمده تصنیف یكدیكرینه هر وجهله بگزیه مین برچوق افراد آره سنده
بر رابطه مشابته كشف ایتك و افراد متشابه و مختلفه یی اوكا كوره سلسله
ترتیب ایله مكدر. اكر كشف اولونان او علاقه مشابته، حقیقتاً او افرادی
— سائرلندن زیاده — بر برینه باغلایان بر رابطه اساسیه ایسه، یعنی — دهمین
ذكر ایتدیكم — (fondamentum relationis) ایسه، او، بر (تصنیف طبیعی
clas. naturelle) اولور. دكل ایسه اوله بر تصنیف، (اعتباری
conventionnelle) و (صنعی artificielle) اولور. (بوتعیاراته باقیكز!)
زمانمرك اك درین دوشونن فیلسوفلرندن واك بویوك منطقینوندن
(جون ستوته میل J. S. Mill) مشهور منطق كتابسندنه، بالخاصه
(analogie) دن بحث آچاركن: «بونك قدر مهم بر صورتده، و مختلف
معنا ده قوللانیلان بر كه یوقدر!» دییور. (تمیل ایله استدلال) بحثنده ده
بوتون منطقینونك رأینه مخالف بر فكرده بولونویور: بوزمانه كلنجیه قدر،
بوترز استدلالك آنجق بر نتیجه ظنیه ویره بیه جكنی، وبناء قوی بر دلیل
اوله مایه جغنی بوتون منطقینون ادعا ایتمشلردی. (میل):

(برهان تمیلنك، ضعیفی ذاتی intrinsèque) دكلدر. «یعنی محضا
مشابته مبنی اولماسندن طولانی بو دلیل سائرلندن آشانی دكلدر!» اكر
مشابته عمده اولان کیفیت، بر رابطه اساسیه و (ذاتیه essentielle) ایسه،
(استدلال بالتمیل) قطعاً (منتج concluant) در؛ و بوتقدیرده (استقراء
تام induction parfaite) دن — قوتجه — هیچ فرقی یوقدر. اكر او
مشابته، بر کیفیت اساسیه یه مستند دكل ایسه، برهان تمیلی هیچ در.

حکمسزدر . دلیل ، صایله ماز . [دیور ؛ وپونی بعضی کوزل مثالر ایله
ایضاح ایدیورکه برنی نمونه ایچون ذکر ایتک کفایت ایدر :

[اکر بر منفعت مشترکه سبیلله ، افرادی یکدیگریله علاقه دار بولونان
جامعتلرک - مثلاً حصه داران شرکتلرینک ! - . حاله باقوبده ، بوخصوصده
الک ایی شکل اداره نک ، حصه دارلر طرفندن منتخب بر (هیئت comité
d'administration) تأسیسی صورتنده ممکن اولدوغنی کورورسهک ، وشو
مثالی اساس اتخاذا ایدرک برملت ایچونده الک ایی حکومتک ، اوملت طرفندن
منتخب بر (مجلس assemblée) تشکیلی صورتیه ممکن اولماسی لازم
کله جکفی استتاج ایدرسهک ، تمثیل ایله استدلال ایتش اولورز . بونده اساس ،
بر ملتک بر (حصه داران شرکتی) نه ؛ و پارلامنتونک (بر شرکت هیئت
اداره سنه) مشابه اولماسی دکلدر . یعنی مشابهت ، بوقطه لرده دکلدر ! ..
پارلامنتونک ملته نسبتی ایله ، (شرکت هیئت اداره سی) نک حصه دارانه
نسبتی آره سنده در . اصل ، رابطه اساسیه بوایکی نسبتک مشابهتی در . شیمدی
بر اداره نک بالجله نتایج حسنه وسیئه سنک بو رابطه اساسیه یه قطعاً تابع
بولوندوغنی اثبات ایدیه بیلیرسه ، بومثالزده کی (دلیل تمثیل) نک (استقراء
تام) دن ذره قدر فرقی یوقدر ! .. اثبات ایدیه مزسه تمثیلک هیچ حکمی
یوقدر . دلیل حیثیتی حائر اوله ماز . [دیورکه زیاده سیله شایان دقت ، ویکی
بر مطالعه در . چونکه ، اسکیلرجه بوسبوتون باشقه بر شی ایتش کی تلقی
اولونان (استقراء) نک (تمثیل) اساسی اوزرینه مستند (و فقط بر رابطه
اصلیه مبنی ! ؟) برطرز استدلال اولدوغنی - ضمناً - ادعا ایتش اولویور .
(induction کله سنده تفصیلاته باقیکنز !]

(استدلال بالتثیل) بر مشابهت سطحیه و خارجیه مبنی اولورسه ،
آنحق بر (دلیل احتمالی) صایله بیلیر . بوتقدیرده (اثباتی probatif) بر
برهان عد ایدیه مز : چونکه بر شی اثبات ایتز . مع مافیه یینه (تلقینی
suggestif) در . یعنی - اول امرده حس و مشاهده اولونان - برمانلت ،
ذهنی تحقیقات و تفحصاته سوق ایدر ، ویولنی ده کوستریر . مثلاً (ورم
tuberculose) خسته لنگک سرایت ایتدیکنی . کیفیت سرائتک ، خصوصی

برمقروب انتقالیه وقوعه کلکده اولدوغنی تحقیق ایتدکن صوکره ، دیگر
امراض ساریه نکده ، طبق بویه برمقروب واسطه سیله ، انتقال ایتکده
اولدوغنی استدلال ایدیه بیلیرز . چونکه (سرایت مرض) بو کیفیتده ،
مشابهت اساسیه یی تشکیل ایدیور . ایشه بوبردلیل احتمالی درکه بزی دیگر
امراض ساریه حقنده تدقیقاته سوق ایدر . نته کیم مقروبیولوژی ده بالجله
کشفیات هپ بو سایه ده وبو وادیده اجرا ایدیه بیلمشدر . فقط یالکیز بو
مشابهت نظره قناعت ایدوبده بلاتدقیق - مثلاً : - (قودوز علتکده
مقروبی واردر !] دیمکه حقمز یوقدر . بو مثالی دکلسه ده ، ایضاحاتی یینه
(میل) ورییور وبونده منطقون هپ متفقدرلر .

(analogie de l'expérience) تعیری ده واردر ؛ بوترکی مشهور (قانت
Kant) ایجادوضع ایتشدرکه المانجه سی (Analogien der Erfahrung) دره .
بز ، بونی (ممانله تجربه) دیه ترجمه ایدیه بیلیرز . بو تعیرک ، (تدریبون
les empiristes) فرقه سنه قارش (عقلیون les rationalistes) دعواسیله
علاقه سی واردر . بالجله معلومات بشریه نک تجربه محصولی اولدوغنی ادعا ایدن
فیلسوفلره (تدریبون) دیرلر . قانت بونلرک شوا دعا سنده برخطای اصلی کورویور
وهردرلو تجربه یه تقدم ایتمه سی ضروری اولان برطاقم مبادی عقلیه مالک
بولوندوغمه قانع اولویورکه بوده (عقلیون) فرقه سنک دعوای مشهوریدر .
(بوتعبیراته باقیکنز !]

قانت ، (صرف مدرکه نک مبادیسندن بری) l'un des principes
de l'entendement pur) عد ایتدیکی بو (ممانله تجربه) یی ، بردستور
شکلنده عرض ایدیور : [تجربه ، انحق مدرکاتمز آره سنده بر (رابطه لازمه
liaison nécessaire) تصور ایتکله ممکندر . [دیور ! .. صوکره بوممانله ده
اوچ (قانون loi) تعیین ایدیور : برنجیسی شودر : [بالجله تبدلات
حوادث آره سنده ، جوهر یعنی ماده باقیدر وطیبتده مقداری نه آرتار ، نه ده
نه کسلیلر . [قانتک] بقای جوهر مبادی le principe de la permanence
de la substance] دیدیکی بودر وکیمیاده مشهور (لاووازیه) قانوننک
عینی در . ایکنجیسی ده شو ! [بالجله حادثات ، علاقه سببیت قانوننه

موافقتله وقوعه کثیر. [قانت بوکا] توالی حادئات مبدأی le principe de la succession des phénomènes [دیور . اوچونجیسی ده شودر :] بوتون موجودات ، مکانه برابر بولونه رق ادراك اولوندقلری حیثیتله ، علی العموم تأثیرات متقابله اوزره درلر . [ایسته بوده قانتک] معیت اشیا مبدأی (le principe de la simultanéité des substances) دیدیکی قانوندره بو آلمان فیلسوف شهرینک ادعاسنجه ، بو اوچ قانون هر تجربه دن مقدمدر و هر تجربه نی اداره ایدن باشلیجه شرطلردندر . بناء علیه محصول تجربه اوله مازلر . آلمان فلاسفه مشهوره سندن (لایب نیچ Leibnitz) و (وولف Wolf) (analogon rationis) تعیری قوللاندلر . بولانتینجه ترکیبی (عقل مثل) دیه ترجمه ایده بیلیرز . بزم عقلمزه نظیر اولان (عقل حیوانی) بی بویکی فیلسوف بو ترکیب ایله یاد ایدیورلردی . یعنی حیواناتک عقلی بزم کینک عینی دکل اما نظیری در ؛ دیمک اولور .

(organes analogues) اعضائی ممانله (تعیری ده واردر ؛ علم حیات اصطلاحاتندندر . تشریحاً باشقه ، فقط خدمت و وظیفه اعتباریله متشابه اولان اعضائی بو ترکیب ایله توصیف ایدرلر . بالقلرك غلصمه لری ایله بزم آق جگر لر مز بوکا مثالدر . عینی خدمت تنفسی ایفا ایدرلر ، فقط باشقه درلو تشکل ایتش اعضالدر . (homologue) کله سنه باقیکرز !]

(analogie) تعیری نیک برده الیهات وهله تفسیر بحثده اهمیت واردر . قرون وسطاده اوروپانک (مدرسه فیلسوفلری les philosophes scholastiques) ، (analogie) بی ایکی قسمه آیرمشلر و برینه (ممانله خاصه analogie propre) دیگرینه ده (ممانله مجازیه analogie métaphorique) دیمشلردی . برنجیسی ، شیمدی به قدر تعریف ایتش اولدوغم جنس ممانله در . ایکنجیسی بزم ، لسان بیانده (استعاره) دیدیکمز شیدر . ایسته اصل الیهات و تفسیرده موضوع بحث و مناقشه اولان (analogie) بودر . شرق لسان اصطلاحنده بز بوکا (متشابهات) دیرزکه تماماً (les analogies) ترجمه سی اوله بیلیر . معلومدرکه کتب مقدسه نك اسلوب بیانی اکثریا مجازی دره و غایت علوی و شاعرانه براسلوب نمونه سی تشکیل

ایدر . متن کتابده برچوق تشبیهات و استعارات ایله - اوامر و نواهی - تصریح اولونمشدر . نته کیم (مثل) دخی پک چوقدر . قرآن کریمده اسلوب اعتباریله ایکی نوع آیات جلیله واردر . برطاقی صریح و قطعی اوله رق اسلوب حقیقی اوزره وارد اولمشدر . بونلره (آیات یننات) ده نیلیر . دیگر برطاقی ده تشبیهی براسلوب ایله بیان بیورلمشدرکه بونلره دخی (متشابهات) ده نیلیر ؛ و بوکون اصطلاح اولان بوکله لر ، ذاتاً قرآن کریمک متن شریفندن آلمشدر . مثلاً [قل ! هو الله احد] بر (آیت یننه) در . (یدالله فوق ایدیم) بر [آیت متشابهه] در . زیرا جناب حقک ، الی و اعضائی اوله ماز . بو ، حقیقت الوهیه منافی برتصوردر . فقط ، او ، انجق برافاده تشبیه در و (یدالله) دن مقصد (قدرت الله) دیمکدر .

تورات و انجیل شریفده دخی - بالطبع - بوکی تشبیهی افاده لر پک چوقدر ؛ و بو یوزدن هم عالم اسلامده ، همده خرسیان عالمنده عینی مسائل ظهوره کمش و عینی صورته مناقشه نی موجب اولمشدر . مشهور فیلسوفلردن (بارکله Berkeley) و (وهتله Whateley) - که هر ایکسی ده رهبان صنفه منسوب و الهیون خرسیانیه دن ایدیلر ! - « بوکی متشابهاتی معنای لغویسی ایله تلقی ایتمه ملی در . اونلری (تأویل) ایدرک معنا ویرمه ملی در ! » دیورلر . هپ خرسیان الهیونی بوفکرده در . بزده (اهل سنت) تأویلدن قطعاً اجتناب ایدر . حالبوکه صوفیه و تکمیل باطنیه فرقه لری تأویل طرفدار ایدرلر . مع مافیه قرآن کریمده : [متشابهاتک تأویلی انجق جناب حق بیلیر . علمده راسخ اولانلر ، یالکز آمنا دیرلر !] بیورلمش اولدوغی ایچون اهل سنت علماسی - تأدباً - تأویلدن اجتناب ایتشلردر .

اسکی یونانیلر اسلوب افاده ده (analogie) تعیری بی - برحیثیت مخصوصه ایله - قوللانیلردی . قواعد صرف و نحوه موافقت و شروطنه رعایتله یازلمش اولان براتری (مشق modèle) اتخاذ ایدرلر و محررات سائره نك مستحسن براسلوب ایله ممتاز اوله بیلیمه سی ایچون - اوکا (نظیر) اولماسنی مراد ایلرلردی . بزده ده کوزل برشعری شکلاً و معنأً تنظیر ایتک - اسلافده -

عادت اولشده. (نظيره) تعيرى (analogie) نك شو خصوصى معناسنى بك اعلا افاده ايدر.

منطقه دخى (analogie بر صورتده دوشونك) تعيرى قوللا نشدر. جزئياتن كلياته ويا خود كليادن جزئياته انتقال ايتك صورتيله واقع اولان بالجه استدالات (وتيرة تفكر) procédé de penser اعتباريله بربرلينه متشابه اولدوغى ايچون بوده برنوع (analogie) صاييلمشدر. مثلا (قوندى ياق Condillac)، كله يي بومعنايله تلقى ايتمشده كه اصل معنای اصطلاحيسى بودكلدر.

[مبحث معرفت épistémologie] ده (analogie) اك مهم بر مسئله فلسفيه ايله علا دارد. (علم connaissance) ك اساسلى (وجدانيات faits de conscience) در. ذوق واهم حس ايتك كجى! حالوكه بونلر صرف شخصى طويغولردر. ديكر انسانلر ايچون بنم طويغولرم (مابه الاحتجاج) اوله ماز. يعنى بردليل اوله ماز. حالوكه بز، دائما ديكر انسانلر ك بزم كجى ذوق واهم حس ايتدكلرينه حكم ايد بيلورز. يوقسه معاملات بين البشرية ممكن اوله مازدى. بوصورتله حكم ايدشمزده نقطه استاندنه در؟.. (احوال متماثله états analogues) دكلې؟.. بن، برصانجى حس ايتديكم زمان، نصل قيورانور و فرياد ايد يورسه؛ عيني صورتله قيورانوب فرياد ايدن بر كيمسهي كورونجه، شوحال عذابندن استدلال ايد يورم كه صانجى سي واردر. بو (تمثيل ايله استدلال) دن باشقه برشى دكلدر. اكر بو طرز استدلال بر قيمت منطقيه سي يوق ايسه، يقين افاده ايدمه مك لازم كليورسه، بنم هپ كوروك احوال دخى، آنجق احتماليادن عبارت اولق لازم كله جك؟... احواله هر شيدن شبهه دوشمكده حقم اوله جق!..

ايسته بوده (نظريه معرفت théorie de la connaissance) بختده اك مهم بر مسئله فلسفيه در. بوكه نك نه قدر مهم شيلرله علاقه سي اولدوغنى كوسترمك ايچون بو قدر ايضاحات كفايت ايدر. [تكميل كلمات اصطلاحيه و على الخصوص probabilisme كله سنه باقكز!]

Analyse

تحليل Analyse

Analyse

آلمانجه

Analysis

انكليزجه

Analisi

ايتاليانجه

اصلى يونانى در. (آنا لى سيس = ἀνάλυσις)، (ἀνά + λύνειν) دن كليركه لغت معناسى، (چوزمك)؛ طولو برشنى، (آيرمق)؛ (مركب برشى عناصرينه) ارجاع ايتك ديمكدر. بونك عكسى (synthèse) دركه اودخى يونانى لسانده (سين ته سيس = σύνθεσις) لفظندن هان عينا نقل اولونمشدر. اصل معناسى (بر آزه كيتيرمك) ديمك اولور. (συν-τίθημι) ذاتا (برلشديرمك) در.

اسكى يونانيلر بوكه يي اصطلاح اوله رق - بك چوق زماندنبرى! - قوللانيورلردى؛ فقط براز باشقه معنايله تلقى ايد يورلردى؛ وبوبالخاصه رياضياته بر (اصول استدلال méthode de raisonnement) ك اسمى ايدى كه بونده مقصد، مسائل موضوعه يي يا واش يا واش چوزوب (!؟) دها بسيط برشكله افراغ ايتك وصوكره معلوم اولان قواعد عاديه يارديميله (حل؟!) ايله مكدر. اكلاشيلوركه اسكى يونان رياضيونك بوكه يه ويرديكى خصوصى معنايله، بوكون على العموم فيلسوفلر ك و علمانك بولفظندن اكلا دقلى مضمون آره سينده كى فرق (حل) ايله (تحليل) فرقيدر. شايد دقتدركه بزم لسان رياضيه زده حالا (حل) تعيرى قوللانيرز. بزه ويرلس اولان بر مسئله يي حل ايتك ايچون ده اوله بسيط برحاله ارجاع ايتمكه چاليشيرز. زيرا هر مسئله - آزچوق - (معضل complexe) در. اونده كى مجهولى معلوم فرض ايدرك (معادله équation) يه ادخال ايله دكدن صوكره نسب عدديه دلالتيله اونك - نهايت - قيمت اضافيه سنى استخراچ وتعين ايلرز. بوصورتله مسئله حل ايدلش اولور. خصوصاً (الخوارزمى algorithme) (بو تعيره باقكز!) اصولى سايه سنده (يعنى مقادير كيه يي بره اقم حروفات و اشارات مخصوصه ايله تمثيل ايتك سايه سنده) مجهولات مسائل، مقادير معلومه كى اداره ايدرك تعيينى مطلوب اولان قيمته (س)، (ع) ديرز؛

بیلدیکمز اعمال اربعه ایله معاملات حسابیه کیریشوب او (س)ك و (ع)ك
 قیمت نسیه سنی بولورز که مطلوب دخی بودر. و یا خود (برهنده دعواسنک
 اثباتنده اولدوغی کبی!) اثباتی مطلوب اولان اودعوانك (طوغرو
 و صحیح (vrai) اولدوغی - اول امرده - فرض ایدرز. صوکره، طوغرو
 فرض ایتدیکمز اودعویله سند اوله بیله جک دهها عمومی ودها بسیط
 دعوالره، و اولردن ده (عینی منوال اوزره) (متعارفه axiome) لره قدر
 واریرز؛ یعنی مبادی به قدر کیدرز. شوصورتله، اول امرده صحیح فرض
 ایتدیکمز دعویله چوزه، چوزه اکه بسیط و عموماً مسلم متعارفه لره قدر
 ارجاع ایتمش اولورز و آرده کی سلسله منطقیه تعقیب ایدرک کیدرز.
 ایشه بر دعویله (حل) ایتک بودیمکدر. و بومنده (حل)، یونان قدیم
 ریاضیوننك (analyse) دیدیکی اصول استدلالدر. یونك مقابلی ده - قدما
 اصطلاحنده - (آبوذیق سیس = ἀποδείξις = démonstration) ایدی.
 اصل (اثبات) تعیری بوکله نك معادلی در. واقعا بزده لاعلی تعیین هرایکی
 اصوله دخی اثبات ده نیله کیشدر. فقط قدیم یونان ریاضیوننك لسان
 اصطلاحیسنجه (حل = analyse) ایله (اثبات = démonstration)
 اصولاً یکریکرینك ضد مقابلی اولق اوزره قبول اولونمش برر طرز
 استدلال ایدی. برنجیسی (l'inconnu) دن (معوم le connu) ده،
 دیگرکی ایسه معلومدن مجهوله توجه ایدرک استدلال ایتک بولی ایدی. لاتینلر
 دخی بومعناری - بویله عیناً - تلقی ایدرک برنجیسنه (résolutio)، ایکنجیسنه
 (démonstratio) دیمشدری.

اگ اول (analyse) ایله (synthèse) کله لری متقابلاً استعمال ایتمش
 اولان ذات، (فلاسفه مشائیون les phil. péripatéticiens) ك اگ معروفی
 و ارسطونك اگ مشهور (مفسر commentateur) ی (آلکساندر Alexandre
 d'Aphrodisias) در. ایکنجی عصر میلادی ده شهرت آلمش و او چونجی
 عصرک اوائلی ده ادراک ایتشدی. حالبوکه ارسطو، (analyse) (مقابلنده
 (synthèse) کله سنی هیچ قولانماشدی. مع مافیه آلکساندر دخی بوکله لری
 بوگونکی فلسفی معنایله دکل، ینه اسکی ریاضی معنایله استعمال ایتشددر.

چونکه: (synthèse) مبادی دن نتایج انتقال ایتکدر؛ analyse او مبادی به
 رجوع در. دیور. نتیجه شوا اولویور که بو آدم (synthèse) کله سنی
 (analyse) مقابلنده قولانمقله تشهر ایتمش و (apodixis) لفظی
 اونوتدورمشدر. بونکله برابر (apodictique) لفظی منطوقه ینه اصطلاح
 اوله رق باقی قالمشدر (بوکله به باقیکنز!)

فیلسوف مجدد ریاضی مشهور (ده قارت Descartes) ریاضیون
 یونانیه نك (آلی یاس = ἀνάγκη یعنی حل) دیدیکی اصولی علم جبر ایله
 قیاس ایدوب ایکیسینی بربرینه بکزتمش اولدوغی ایچون (analyse) تعیری
 اسکی ریاضی معناسیله قولانمشدر. اونك ایچوندرک بوگون، اصطلاحده
 (analyse mathématique) ده نیلنجه بعضاً علی العموم (علم جبر l'algèbre)
 اکلا شیلیر. بعضاده یالکیز (جبر اعلا l'algèbre supérieur) یعنی:
 (calcul des fonctions و calcul infinitésimal) اکلا شیلیر. بومعنای
 ده قارتک تأثیرینه حل ایتک یا کلش اولماز (بو خصوصده تفصیلات ایچون
 قاموسک ریاضی قسمنه باقیکنز!)

بو تعبیراتک، بوگون اگ زیاده معروف، رایج و معتبر اولان معناسنه
 کلنجه ده کنیشدر. مرکب برشیئی عناصر اصلیه سنه ارجاع ایتک صورتیله
 (تحلیل ایتک)، (analyse) در. بونك ضدی (ترکیب = synthèse)
 درکه (عناصر مشکله éléments constitutifs) سنی طولایوب تألیف
 ایتک صورتیله، برشیئی، وجوده کتیرمکدن عبارت اوله بیلیر.

تحلیل و ترکیب (اصول عمومیه méthode général) دندر. بلا استثنا
 هر فیلسوف، هر عالم بوکا مراجعت ایدر. اکر (فعلی و حقیقی pratique
 et réelle) اولورسه. (غیر متجانس hétérogène) برکلیجه بی - صحیحاً -
 (عناصر متجانسه éléments homogènes) سنه آیرمق دیمک اولور.
 مثلاً (تحلیل کیمیوی anal. chimique) ده اولدوغی کبی: صوی
 (مولدالموضه oxigène) ایله، (مولدالم hydrogene) به؛ هوایی (آزوت
 azote) ایله (مولدالموضه) به بالفعل آیرمق، بوقیلدندر. بودرلو تحلیل،
 (کمی quantitative) اولور اکر، عناصرک مقادیر نسیه سی تعیین

اولونورسه! برخسته نك ادرارنده (شكر)ك، ياخود (آلبومين albumine)ك
مقادير نسبيه سنى (عدداً) بيان ايدوبده [يوزده شوقدر غرام آلبومين
واردر!] ديمك كې!... (كيفى qualitative) اولور؛ اكر يالكز عناصرك
جنسنى بيان ايله اكتفا ايديليرسه! مثلاً: [خسته نك ادرارنده شكر يوق فقط
آلبومين وار!] ديمك كې!...

(تركيب كيمىوى synthèse chimique) بونك ضديدر. مثلاً برجم
مولدالموضه ايله ايكي حجم مولدالمادن (صو) حاصل ايمك كې!... كيمياده
اصول تركيب، بوصوك زمانلرده فوق العاده ترقى ايتمش و برچوق محصولات
عضويه بيله وجوده كتيريله بيلمشدر.

لكن، هر شى حقنده و هر خصوصده تحليل حقيقى و فعلى اجراسى ممكن
دكلدر. مثلاً، (املاح كيمىويه sels chimiques) ويا طبيعیه دن برينى
عناصرينه آيرديغمز كې، ده ميرك سرتلكنى، رنگنى و سائر اوصاف و كيفياتى،
اوده ميرك (ماده matière) سندن بالفعل آيره مايز؛ نته كيم، بر انسانى ده
اخلاق و حسياتندن بالفعل آيره مايز. مع مافيه، بر جسمده انحق مجتمعاً
(و مشخصاً = concrètement) موجود بولونه بيلن درلو درلو خواص
و كيفياتن، انحق برينى و ياخود بر نوعى منحصرأ تتبع و ماهيتى تحقيق ايتمك
مجبوريتنده بولونديوغمز چوق اولور. اووقت، او كيفيتى - هر نه ايسه! -
خواص سائرده دن ذهنأ آيرير و انحق اونى مطالعه ايدرز. مثلاً هندسه يالكز
اجسامك اشكال منتظمه سنى نظر مطالعه يه آلهرق آره لرنده كى (نسب مختلفه
proportions diverses) نى تقدير ايدر بر علم مخصوصدر. اشكالدن
و مساحه لرندن بحث ايدر كن، هيچ ماده لرينى نظر دفته آلاز. حالبوكه
ماده سز بر شكلك وجودينى دوشونمك متمتعدر، شكلى ماده دن آيرمق ده
عينى درجه ده مستحيلدر. ايشته بويه - ذهنأ - يابيلان بر تحليله (تحليل
منطقى analyse logique) ديرلر كه، بوده (تجريد abstraction) دن
باشقه بر شى دكلدر. [بو تعبيره باقكز!] تحليل منطقى ده آلت، (مشاهده
l'observation) ايله (تجربه l'expérience) در. (تركيب منطقى
synthèse logique) انحق (تعريف définition) و (تصنيف

classification صورتيله اولور؛ چونكه بوصورتله برچوق افراد، بر
وصف مشترك ايله تركيب و بر صنفه ادخال ايدلمش بولونور. [بو تعبيرلره
دخى باقكز!]

منطقده (قياس déduction) ديه معروف اولان طرز استدلال
(تركيب) مستند، (استقرا induction) ده (تحليل) مستند عد
ايدلمشدر. فقط بونى بك طوغرو كورمه ينلر واردر، وحقلى درلر.
(تحليل روحى analyse psychologique) ديمك يالكز (مراقبه
introspection)، يعنى كندى وجدانه باقق و حالات وجدانيه سنى عناصر
ابتدائيه سنه ارجاع ايله مكدر.

(synthèse) و، - صفت اوله رق - (synthétique) كهلر
بعضاً بويوك فلسفه سيستملى حقنده قوللانيلىر كه (مابعدالطبيعات
la métaphysique) دن ماعدا روح، طبيعيات، اخلاقيات، سياسيات
و اجتماعيات فلسفه لرينى ده شامل اولمق اوزره هم آهنگ بر فلسفه شامله
نمونه سيدر. ارسطونك، قانتك، سبنسرك فلسفه لرى بوكا مثال اولور.
بو مكمل سيستملره (les grandes synthèses) ده نيلير.

(méthode analytique) و (méth. synthétique) ك نه ديمك
اوله جنى، شيمدى يه قدر ويريلن تعريفاتدن آكلاشلمش اولسه كر كدر.
[مع مافيه فضله تفصيلات ايچون (méthode) لفظه باقكز!]

(Esprit d'analyse)، (esprit de synthèse) تركيبلى ده لسان
اصطلاحده چوق كچر تعبيراتنددر. برنجيسى، بزم اسكى مؤلفينمرك (نظر
دقيق) ديديكى، ايكنجيسى دخى (نظر حكيم) تسميه ايله ديكى استعداددر.
(صحت مشاهده exactitude d'observation)، (نفوذ نظر pénétration
de vue)، (جزئيات امور ايله تقيد soin des détails)، نظر دقيق
ايچون لابد اولان اوصاف ممتازددر. بوقابلياتى حائر اولان برزكا، حادثات
طبيعيه يي تحليل ايدوب عناصرينه آيره بيلمك ايچون بك لازمدر. بناء عليه
بر (عالم savant) ايچون الزم اولان بودرلو ذكادر. (فاراده Faraday)،
(كويه Cuvier)، (داروين Darwin) كې!...

نظر حكيم ايچون يالكز بوقابليت كفايت ايتز. (استدلالات مجرد

(raisonnement abstrait) ده قطعیت؛ اشیا و حادثات آردسندہ کی مناسبات و روابط خفیه نی کشف ایدہ بیلیمک خصوصندہ فطری بر فطانت؛ اختلافات کثرتہ بر نظام وحدت بولہ بیلہ جک قدر احاطہ نظر؛ اسباب و قوعاتہ سرعت انتقال کی قابلیت ردخی لازمدر کہ (esprit de synthèse) تحقق ایدہ بیلیمک! آکلاشیلیور کہ عالمہ (esprit d'analyse) کافی در . فیلسوف اولق ایچون اوتہ کی قابلیت لک انضمامی دخی لازمدر . [ارسطو؛ ابن سینا؛ فخر الدین رازی؛ منلا صدرا؛ دہ قارت؛ لایب نیچ؛ قانت؛ قونت؛ میل؛ سبنسر، یوقالیاتک ہر ایکی در لوسندہ - مستنا بردر جہدہ! - مالک اولان نوادر دہانددر .]

(قانت Kant) لسان فلسفی سندہ (حکم تحلیلی jugement analytique) و (حکم ترکیبی jug. synthétique) تعیر لری واردر کہ، مشہور اولمشدر . بوذات، منطق مباحثندہ بو تعیراتی ایجاد و وضع ایتش، و قضیہ لری بوفر قہ کورہ ایکی بہ آیر مشہدر . بر قضیہدہ ماہیت محمول، ذاتاً، موضوعک مفہومندہ داخل ایسہ، بویلہ سنہ (قانت)، (قضیہ تحلیلی proposition analytique) دیور . مثلاً: (ہر جسم، ابعاد ثلاثی حائر در .) قضیہ سی بوقیلنددر . زیرا، بورادہ قضیہ نک موضوعی اولان (جسم) ذاتاً محمولک مفہومی، (یعنی ابعاد ثلاثی حائر اولق قابلیت!؟) نی متضمن در . چونکہ ابعاد ثلاثی حائر اولمایان بر جسم تصوری، ذاتاً ممکن دکدر . شو تقدیر جہ: (محمول predicat)، (موضوع sujet) ک معناسہ بر شی علاوہ ایتش اولویور . اولسہ اولسہ، موضوع قضیہ نک ماہیتی تفسیراً تعریف ایدیور دیمکدر . چونکہ (جسم نہدر؟) دہ نیلسہ [ابعاد ثلاثی حائر اولان شی در!] دیمکدن باشقہ جواب منطقی یوقدر . اوحالہ بوکی قضیہ لری موضوع حقندہ معلوما تمزی آرتدیرماز . بزہ فضلہ بر شیلر اوکرہ مزہ . چونکہ [جسم، جسمدر .] دیمکہ چیقار . اونک ایچون قانتک (قضایای تحلیلیہ) دیدیکی بودر لو قضیہ لری (قضایای عینیہ propositions identiques) دن باشقہ بر شی اولمادینی ادعا اولونمشدر . [ب]، [ب] در! کی!

(قضایای ترکیبی propositions synthétiques) ککنجہ، بونلردہ صفت کاشفہ، محمول ایلہ موضوعہ - حقیقتاً - بر شی حمل ایدلہ سیدر . (ہر جسم ثقیل در!) قضیہ سندہ اولدوغی کی! بورادہ آغیرلق، مطلقاً جسمک تصور ماہیتندہ داخل بر کیفیت دکدر . بناء علیہ بزہ، جہی دوشونونجہ، بالضرورہ ثقلی دہ برابر دوشونمکہ مجبور اولماز . دیمک اولور کہ، [جسم، ثقلی حائر در] قضیہ سی، جسمہ ثقلت کیفیتنی حمل ایتمکہ، بزہ یکی بر شی اوکر تمش اولویور . ایشتہ قضیہ نک ترکیبی اولماسی بورادہ در . بوندن شودہ آکلاشیلیور کہ بوایکنجی نوع قضیہ لری ہمہ حال تجربہ ایلہ مناسبتی اولق لازم کلیر . چونکہ موضوعک تصور ماہیتندہ داخل اولمایان (محمولات les prédicables)، آنجق بالتجربہ تحقیق ایدوب اوکرہ نہ بیلہ جکمز کیفیتدر . حالو کہ قضایای تحلیلیہ صرف معقولاتہ مستنددر؛ حتی اونلردن عبارتدر .

بوملاحظہ دن دہ آکلاشیلیور کہ قانتک شو تعیراتی، اکثر منطقونک (قضایای عقلیہ) و (قضایای حسیہ) سندن باشقہ بر شی اولماق لازمکہ جک!... (proposition لفظنہ باقیکنز!.. تفصیلات خصوصیہ واردر!)

شو تقدیر جہ بوقضیہ لری برنجیسی (قبلی apriorique) در . ایکنجیسی (بعدی aposteriorique) در . [بو تعیراتہ دہ باقیکنز!]

مع مافیہ (قانت)، قبلی بر طاقم قضایای ترکیبیہ اولوب اولہ مایہ جغنی تحقیق ایچون دوشونمنش و ریاضیاتدہ، بویلہ: ہم ترکیبی، ہمدہ قبلی (یعنی غیر تجربی) قضیہ لری بولمشدر . (propositions synthétiques apriori) دیدیکی بونلردر . بومستلہ جدی مناقشہ لری آچمشدر . [apriori یہ باقیکنز!]

(les analytiques) تعیری ایچون بوکلیہ آریجہ باقیکنز! [(analyse grammaticale)، جل کلامیہ نی عناصرینہ آیرمق و شو کلمہ اسمدر؛ بوفیل، بوصفتدر . الی آخرہ!... دیہ جملہ لری الفاظ، ارجاع ایتیکدن عبارتدر .

تحلیلیات متعالیہ

Analytique transcendente

بو تعیری (قانت Kant) وضع ایتمشدر . بو آلمان فیلسوف مجددی،

Analytique
transcenden-
dentale

افکار مزده (قبلی apriorique) بر طاقم (مبادی اساسیه principes fondamentaux) اولدوغنه ایناندینی ایچون، (یعنی مبادی معلومآوردن بر مهم قسمتك تجربه به سبق ایتدیکنی و بناء علیه قبل التجربنی اولدوغنی قبول ایتدیکی جهته!!)، (منطق صوری la logique formelle) نك مبادیسنه تعلق ایدن قسم فلسفییه: (منطق متعالی la logique transcendante) دیمشدی و تکرار بونی ایکی به تقسیم ایدرك برنجی قسمته (تحلیلیات analytique) ایکنجیسنه دخی: (مناظرات متعالیه dialectique transcendante) ناملرینی ویرمشدی. برنجی قسم تجربه به مفتقر اولیه رق بعضی معلومات حاصل ایده یلمك خصوصنده کی قابلیتیزی تحلیل، و او جنسدن اولان معلوماتی (تصورات و مفهومات concepts) ده یعنی، عناصرینه ارجاع ایتمكه مشغول اولان شعبه علمیه ایدی. ایشته قانتك (analytique transcendante) دیدیکی بودر. ایکنجی قسم دخی بو عناصری ترکیب ایتك یولنی کوستریر. منطق ده بو ترتیب، ارسطونکدر.

حالبوکه تعبیرك ایلک موجدی و واضی پك معلوم دکدر. شو اسی محققدركه (تحلیلیات = les analytiques = τὰ Ἀναλυτικά) کله سی طیب مشهور (جالینوس Galien) زماننده، یعنی ایکنجی عصر میلادیده ایجاد اولونمش و تأسس ایتمشد. ارسطونك (ارغون = Organon) نامیه مشهور عالم اولان منطق کتابك، ایلک ایکی قسم مستقلنه بو تعبیر تخصیص ایدیلرک برنجی کتابه: (les premiers analytiques)، ایکنجیسنه ده (les derniers analytiques) ده نیلمشدی. برنجیسی (قیاس syllogisme) ك (اشکال و ضروب formes et modes) مختلفه سنی، — اك بسیط عناصرینه ارجاع ایده یلمك ایچون — اونلری تحلیل (؟!) ایتك یولنی کوستریر. ایکنجیسی (اقامه برهان argumentation) و استدلال قواعدندن بحث ایدر. بوا یکی کتابك یکدیگر یله پك او قدر مناسبتی یوقدر. ایشته، منطق بختنده (les analytiques) ده نیلنجه (کتاب ارغون) ك بوا یلک ایکی جزئی اکلایلیر. [تعبیراته باقیکنز!]

اصلی یونانی در (a) ادات آتی (archée αρχή) مبدأ، باش معناسنه کلیر. بناء علیه لغت معناسیله باشمن یعنی انتظامسنر اطرادسنر، قارمه قاریشیق، بر حال دیمکدر. او حالده كرك (عضوی organique) اولسون، كركسه (فوق العضوی superorganique) یعنی (اجتماعی social) اولسون قارغه شه لغم، ترتیسنر لکه (حالت فوضا état anarchique) ده نیر. بو حالت، ناظم اداره و مبدأ حیات اولان جامعه کلیه و رابطه عمومیه نك انحلالی و یاخود بوسه تون اضمحلالی سببیه وقوعه کله بیلدیکی کی، هنوز ترتیسات و تشکیلاته نائل اوله مامش، یعنی لایقيله (تعضی ایتمه مش non organisée) بر کتله عضویه و یا اجتماعیه ده دخی — طبیعی ضروری اوله رق — موجود بولونه بیلرک بو تقدیرده افعال عضویه و وظایف اجتماعیه آری آری یکدیگرینی نقض و تأثیر لرینی اقتضا ایدرک صورتده وقوعه کلیر. شوندن آ کلاشیلیورکده حالت فوضا، هر هانکی بر کتله عضویه و اجتماعیه، (یکپاره بر وجود) شکلی آله بیلیمکدن منع ایدن آهنگسز لک درک او کتله نك عناصری یکدیگرینه، متقابل علاقه لرله، باغی طوتان جامعه کلیه نك اضمحلال و انحلالندن و یاخود هنوز موجود اولما سندن ایلری کلیر. بو جامعه کلیه ایستر (دین) اولسون؛ ایستر (حکومت) اولسون؛ ایسترسه بر دستور اعتقاد و یا بر مبدأ عرف و عادت اولسون؛ ایسترسه — مکمل بر جیم عضوی ده اولدینی کی — اعضای بدن آرمسند (توان ایله تقسیم اعمالك توازنندن منبعث!) بر آهنگ اولسون!.. بویه بر مبدأك یوق اولماسیله، کتله عضویه و اجتماعیه، — عناصر اصلییه سنه آریله جق قدر — انحلال ایدرك بر (حالت فوضا état d'anarchie) تولید ایدر؛ و بالتیجه حیات شخصیه و اجتماعیه نك شیرازه انتظامی بوزولور. آ کلاشیلیورکده — هانکی بر سببیه اولورسه اولسون! — انفراد رجوع ایدرك حیات اجتماعیه نك لوازمندن اولان (قیود و تکالیف متقابل) دن آزاده یاشایه یلمك میل و آرزوسی، صوك درجه شده و اریسه (حالت

اجتماعیه (état social) ممکن اولاماز . چونکه بوسبوتون افراد اوزره یاشایان افرادک بر جماعت صورتنده تشکلی ممکن اوله ماز ؛ و بناءً علیه ، (عضویت اجتماعیه organisme social) نك و (جماعت) حیاتک افراده تأمین ابتدیی فواید و منافع متقابله به - بوسبوتون افراد حالنده یاشادجه ؛ - ساحه امکان بولونه میه جفتدن ، تعاون و تقسیم اعمال سایه سنده حاصل اولان بونجه ترقیات مدنیه دخی - بو حالد - وجوده کله مز . اونک ایچوندرکه (حالت فوضا) ، مضّر انسانیت ، بر مانعه مدنیّت اوله رقی تلقی ایدلمشدر . بو کله نك صرف سیاسی معناسنی لکه لهین ملاحظه بودر .

حکومت ، دین ، عادت ، افراد جماعتی - طوعاً اولسون ، کرهآ اولسون ! - مجتمع طوتار و جماعت بشریه ی یکپاره بر عضویت شکل و حالنده محافظه ایدر برر (قوت ناظمه force régulatrice) در . بو حیثیت و بو نیله درکه افراد جماعتک - مشروع اولان حد معروف و معینی آشماق شرطیه ؛ - حریت حرکتی تحدیده ساعیدر . اونک ایچوندرکه هر حکومت ، افرادک حریت مطلقه دعواسنی بر (anarchiste) دعواسی اولمق اوزره تلقی ایتش و بو آوازه حریتی - هر وسیله ایله - بوغغه چالیشمشدر . دور اخیرک تاریخ سیاسی سی اثبات ایدیورکه ، فی الحقیقه ، آنارشیستلک دعواسی ، حکومت علیه حریت مطلقه دعوا سندن چیقمشدر . اوندن دوغمشدر .

(Godwin) نام مؤلف سیاسی ، (۱۷۹۳) ده یازمش بولوندوغی (عدالت سیاسی ، یعنی حقوق سیاسی = Political Justice) عنوانی کتاب مشهورنده ادعا ایدوب کوستریورکه صوکه دور مدینته بعض متفکرین (حکومت سیاسی نك ، بو حشین و حویراط (! brute) ما کنه نك انحلالی لزومی) (ترقیات سیاسی ده کعبه مقصود the goal of political progress) بيلمشر ، و حکومت سیاسی نك (اخلاق انسانیت ایچون دائمی و توکنمز بر منبع فساد perennial spring of the vices of mankind) اولدوغی ادعا ایتشلدور . بناءً علیه اک مضر و اختلال لکارانه آنارشیستلک مبدأ فلسفی سی بو ادعا اولمشدر .

اون طقوزنجی عصر میلادیده خیلی دن خیلی ترقی ایدوب نشوونما بولان آنارشیستلک اعتقادنده مشهور (پروودون Proudhon) (۱۸۶۵-۱۸۰۹) ک محرراتی مسئول طوتویورلر . ذکاوت و حسّات اعتباریله بختیار طوغمش ، و فقط - کندیسنه مهد نشأت اولان شرائط اجتماعیه نك سفا - لتدن نشائی - محرومیتلر ایچنده اذیتله یاشایوب یتیشمش اولان بو ذات ، کنج کلکنده بر اثر یازمشدی ؛ اونده : (ملک نه در ؟ Qu'est ce que la propriété) [سؤالی وضع ایدیور ، و بوکا (ملک خیر سز اقدر ! La propriété c'est le vol) دیه جواب ویره رک ، بو غریب و سفسطی مدعای ادله تفصیلیله ایله اثباته چالیشیوردی . بو کتاب ، فی الحقیقه چوق جاهل کیمسه لری اضلال ایتشدر . فقط بو آتشین محررک اک مشهور اثری [فلسفه سقالت la philosophie de la misère] عنوانیله یازدینی کتابدر . بونده مؤلفک بویوک بر حسن انسانیت ابراز ایتدیکنده شبه یوقدر ؛ منسوب اولدوغی صنف اسافلک حال سقالتنه درین بر مر حمله انفاذ نظر ایتدیکنده ده ترده محل قلیور . مع مافیه ، اصل بو کتابنده (پروودون) ک افکار مخصوصه سی وضوح و صراحتله تجلی ایدیور ؛ (بی حدود و بی مانعه بر حریت شخصیه une liberté individuelle sans limite et sans contrainte) دعواسی ایله آنارشیستلکک مناسبت اساسیه سی ظاهر اولویور ؛ حتی (سوسیالیست socialistes) لرله اک مهم فرقی ده بورادن آکلاشیلیور ؛ پروودون سقالت اجتماعیه اک مهم و اساسلی سبب اولمق اوزره ، سرمایه دارلرک و ارباب ثروتک قوت و امتیازات اجتماعیه سی کوستریورکه بو ادعاده سوسیالیستلر تماماً کندیسله برابردر . فقط بو سقالت اجتماعیه نك اصلاح و ازاله سی مسئله سنده پروودون سوسیالیستلردن تماماً آریلیور ؛ حتی اونلرک شدتله غیظنی فقرتی دعوت ایده جک صورتده بیان ملاحظه ایدیور ؛ [بو حالی اصلاح و ازاله ایتک ، حکومتک افراد جماعت اوزرنده حق مراقبه و تسلطنی آرتدیرمقله دکل ، افراد جماعته بی حدود و بی موانع بر حریت شخصیه تأمیننه چالشمقله اولور . بونک ایچون ده (سلطه حکومت l'autorité du gouvernement) محو ایدلمه لی در] دیور . ایشه اصل بو ادعایه سوسیالیستلر

شدت و غیض ایله معارض بولونوبورلر؛ چونكه (socialisme d'état) نك دعوايی، سفالت اجتماعی ازاله ایچون سلاطه حكومتی تقویه ایتكدر. یعنی (پرودون) ادعاسنك تماماً ضدیدر. اونك ایچون دركه آلمان سوسیالیزمك پیری صاییلان مشهور موسوی (كارل ماركس (Karl Marx) (پرودون) نك (فلسفه سفالت) نامنده کی اثرینی تزییف و تنقید خرصیله (سفالت فلسفه (La misère de la philosophie) عنوانی اثرینی یازمشدی.

شخص ایچون حریت مطلقه دعواسنی فلسفی بر شكه افراغ ایله تعلیم ایله بن، اصل (قاسپار شمید Caspar Schmidt) نامنده بر مکتب خواجه سیدر. (۱۸۵۶-۱۸۰۶). بو آلمان محررینك مطبوعات عالمده اسمی (ماقس سترینر (Max Stirner) دیه شایع اولمش بولوندوغی ایچون تاریخ فلسفه ده دخی بوکاذب اسم ایله شهرتشعار اولمشدر.

(پرودون)، فلسفه سفالتی یازدیغی سنه قاسپار شمید دخی [فرد اجتماعی و اونك مالی، ملکی. L'individu et sa propriété] عنوانیله مشهور اثرینی یازمشدی. کندیسنك برایش آدمی اولمایوب چوق دوشونمكه سرمست خیال اولمش بر متفکر اولدوغی، محررانندن اكلاشیلور.

(ماقس سترینر)، شخص ایچون حریت مطلقه ادعا ایتمش؛ فقط، دین، کی؛ انسانیت کی؛ حكومت گی؛ مؤسسا. کی؛ حریت شخصیه یی بالضروره ققیده ساعی اولان (قوای ناظمه وحافظه forces régulatrices et conservatrices) یی، شدتله رد وانكاره وارمش، بوکی شیرك هیچ برینه رعایت ایتمهك لزومنی تنیه ایله مشدر. لکن، حقوق بشریه نك منشأی ومنبعی اولق اوزره اوتهدنبری (حالت اجتماعی) اصل ومبدأ اوله رق تعلیم ایدیله كلدیكندن وبوتعلیمات، مؤسسات مدنیه وسایسه ومعنویه یی بالخاصه حالت اجتماعی نك ضرورات ولوازم طبیعه سندن کوستردیكندن، هرکس بومؤسساتك قدسینه اعتقاد ایتمه بیله!... مشروعیته اینانور و حكومه، دینه، عرف وعادته رعایتله یاشامنی وظائف اجتماعی نك اقدم واهمی عد ایدیوردی!...

ایشته [ماقس سترینر]، اصل بومهم نقطه یه، (وظائف اجتماعی ده اسالاس اولان بوعقاده) شدتله اورییور. و:

[هردرلو حق و اوحقوقك سند مشروعیتنی، بن، یالکیز کندمدن استخراج واستنباط ایدیورم؛ دنیاده هر نه تلقی ایتك، هر نه یایق قدرته مالك اوله رق یارادلمش ايسهم، اونی آلق و اونی یایق حق و صلاحیتی ایله ده طوغشم! حقوقك منشأی ومنبعی بنده در؛ خارجه دكل!...] دییور؛ وبونی كمال صلاحیت وقوتله ده یه بيلمك ایچون فكر الوهیت وانسانیتی، دینی، جماعتی، عرف وعادتی و (بالطبع!) مشروعیته حكومتی انكار ایدیور. بوافكار مفرطه سنه، واونلری فلسفی بر صورتده (یعنی اصولی بر صورتده!) نشر وتعلیم ایتمش اولماسنه رغماً بویوموشاق خویلی مکتب خواجه سنك، جمعیت بشریه یه ضرری طوقونما مشدر. چونكه بوسبوتون خیالی اولان بوملاحظات فلسفیه یی اسافل ناس بیله قبوله میال کورونمه مشدر. بوکی فكرلری، مدهش و مخرب مدنیت براختلال عمومینك ترتیبی امرنده قوللانان آدم، اصل [میخائیل باقونین Michaël Bakounine] دركه روس زادكانندن اردوده یتشمش بر ضابط ایدی. بلکه اون كره اعدامه محكوم اولوب قورتولمش؛ نهایت سیریا یه سورولمش واو، بوزلی چوللردن - بایان یورویه رك!... امریقایه قاجش و آتشین خطابیله، دیوکی وجودیله هرکسی، مقصدینه آلت ایدوب سوروكله مش؛ شقاغوده قوتلی بر آنارشیزست جمعیتی تأسیس ایدوب عظیم وقانلی بر اختلاله سببیت ویرمش؛ صوكره فرانسه یه كچوب عینی تأسیساته موفق اولمش وعینی زمانده [۱۸۷۱] قومون Communes (اختلالی) نی تشویق و اداره ایتمش؛ ده صوكره اسویچره یه كچرك اوراده بر (آنارشیزست مرکز اداره سی) وجوده كتیرمش و آنارشیزمی (بین الملل international) بر شكه صقوق ایچون چوق اوغراشمش اولان بوخارق العاده آدم؛ برخارق العاده جانواردی كه انسانیت ومدنیته ایراث مضرت ایده بيلمكده - تك بر شخصك - بودرجه قدرته مثال اولق اوزره تاریخده کندیسندن باشقه بری کوستریله من. اك بویوك دستور نصیحتی: (طاغرده کی، حبسخانه لرده کی حیدودلری سربست بر اقوب تسلیح ایتك)

و مدنیت دهنیلن بوبنای ظلم و اسارتی (؟!؟!) آتش و ده میرله ییقبوب محو ایلهمک . ایدی .

روسیه ده (نیهیلیست Nihilistes) نامیله مشهور اولان و هیچ بر مبدئه اینانامایان فرقه جنایتکارانه نك اللهی، پیغمبری باقونین در .

فلسفه اجتماعی و سیاسی ده صولک درجه اهمیت حائز اولان بوتعبیرک معناسی یا کیش تلقی ایتکدن کمال دقت و شدتله احتراز اولونماسی خاصه توصیه ایچون بوتقصیلاته لزوم کوردم . زیرا محقق درک بولکه نك معناسی چوق یا کیش اکلاشلیمغه مساعددر . حتی ، عامای جغرافیونک - زمانمزده - اک بویوکی اولان (نه لیزه ره قلو Elisée Reclus) کی عالم فاضل و فوق العاده خلوق ، حلیم ، سلیم و انسانیت پرور برآدم ، هم کندیمی ایچون ، همد انسانیت ایچون ، صولک درجه ده حریت طالبی بولوندوغندن طولای ، آنارشیت عد ایدلشدر . کندیمی نیله کندینی آنارشیت ظن ایتکده در . بونک امثالی ده نادر دکدر . یا کیشلق [فردانیه individualisme] فلسفه اجتماعی سندن ، فضله معنارو آیقیری نتیجه لر چیقارمق یوزندن وقوعه کلیور : مثلاً بوفلسفه نك معارضی اولان فرانسز محررلرندن بریسی :

L'individualisme à outrance conduit à l'anarchie c'est-à-dire à la dissolution du gouvernement

فردانیه مسلك فلسفی سندن حد اقصایه وارمق آنارشیتلکه ، یعنی حکومتک اضمحلالی تمییه واریر . [دییور .

فردانیونک مبالغه جیلری دخی :

(Les gouvernements trouveront leur perfectionnement dans leur anéantissement même)

[حکومتلر ، بالذات اضمحلاللرنده کماللرینی بولش اوله جقلردر .]

ده یه درک ، یوقاریکی معارضک ادعاسی تصدیق ایتش اولویورلر . بودعوارلک هر ایکسی ده باطلدر ؛ و [فردانیه] فلسفه سیاستک دستور حقیقیسی بودکدر . [تفصیلات ایچون individualisme سوزینه باقیکز !]

ینه عینی جهل سببیله درک (Radicalisme politique) اربابی ،

چوق کیشلر ، همد معلوماتلی مؤلفلرندن و فیلسوفلرندن بعضاری آنارشیت ظن ایتشلردر . بوغریب افترایه دوچار اولان بویوک آدملرندن بری ده فیلسوف شهیر (هربرت سپنسر H. Spencer) در . اعتقادات سیاسی سینه نظراً (individualiste-radicaliste) اولان بوذاتی ، فلاسفه مادیوندن (شارل لتورنو Dr Charles Letourneau) ، خیالی بر آنارشیت اوله رق تلقی ایتش و (تکامل سیاسی évolution politique) نام اثرنده (l'anarchie) (idéal de Mr Herbert Spencer) عنوانیله بر باب مخصوص آچارق ، انکلیز فیلسوفک احکام سیاسی سنی تنقید ایتشدر . بو طرز تلقی ذاتاً یا کیش اولدوغی ایچون تنقید واقع دخی ی اساسدر .

دیگر طرفدن ، حقیقتاً (آنارشیزم) فیلسوفی صاییلان مشهور روس پرنسی (قروپوتکین le Prince Kropotkine) ، دخی سپنسر ی آنارشیت اولمق اوزره تلقی ایتشدر . مملکتندن قاچوب لوندرده بر ملتجی سیاسی اوله رق سنه لرجه یاشامش و یک چوق اثرلریازده رق بویوک بر شهرت قازانمش اولان بوموسقوف پرنسی :

[بزم آنارشیتلرک اختلال ایله یامق و حصولی تعجیل ایتک ایسته دکلی شیئی - یعنی حکومت دهنیلن مؤسسه اجتماعی نك اضمحلالی ! - هربرت سپنسر تکاملدن بکلیور ؛ اوندن امید ایدیور . آره مزده شوقدر بر فرق واردر !]

دیورکه افترادر . یاخود ، سپنسر ی طایمماق در . زیرا آرده پک بویوک پک ده مهم برفرق واردر . نته کیم بومفتریاته و یاخود ظنون غافلانه یه قارش سپنسر کال قدرت و بلاغتله جواب و یرمش و الحق (لیبرال liberal) اولدوغی کوسترمشدر . [تفصیلات ایچون individualisme سوزینه باقیکز !]

بوکون بوتون فیلسوفلرله برابر افکار منوره اصحابجه شبهه قالمامشدر که (آنارش) ، صرف بر دستور اعتقاد اوله رق دوشونولورسه (ضلالت aberration) در . اگر فعلی و عملی اولورسه ، جتدن متولد بر جنابت سیاسی در . (پروفیسور لومبروزو Pr. Lombroso) بومسئله ی ذاتاً بونقطه

نظردن تلقی و تتبع ایدرک معتبر و بویوک اثرلر یازمشد. بویوک محققدرکه بویله عجیب و انسانییت ایچون مضر بر (ضاللت)، بر (اصول سیاست) اوله ماز. بر قوه اجتماعیه دخی اوله ماز. اولسه اولسه - روسیه کبی - عمومی عدالتسزلک و سیاسی حقسنزلق و الحاصل، جدی و اجتماعی بر (ظلم عمومی) راحتسنزلقی سبیلله قرغه شالغه و اختلالات داخلیه مستعد و مساعد اولان مملکتلرده - آره صیره - شدید اختلاجاته، حتی مدهش بحر نلره سببیت ویره بیلیر بر (صرعه epilepsie) کبی تلقی اولونه بیلیر. فقط بر بحراندن عبارت و بناء علیه دوامسزدر. حر و راحت مملکتلره کمنجه آناشستلر، اصل اورالره التجا ایدوب کوزل کوزل اوطور و یورلر و اثرلر یازیورلر. [تعبیراته باقیکنز!]

Anéantissement	فنا	Anéantissement
Annihilation	انکلیزجه	
Vernichtung	المانیجه	
Annientamento	ایتالیانجه	

بوکله، لاتینجه (ad-nihilare) اصلندن مشتق در. (nihil) هیچ دیمک اولدوغنه نظراً بر شیئی (هیچ ایتک) دیمک اولور. (néant) دخی هیچ دیمکدر. اصطلاحده: (اولا موجود اولان بر شیئک یوق اولماسی و یاخود یوق ایدلمه سی) در. عرب فیلسوفلرنجه تعریفی: (عدم بعد الوجود = وارلقدن صوکره یوقلق) در. (خلقت، ابداع = création) بونک تماماً ضدی در؛ چونکه یارادلق (وجود بعد عدم = یوقلقدن صوکره وارلق) دیمکدر.

[بویابده تفصیلات ایچون création لفظنه باقیکنز!]

(فنا) تمیزی، فلسفه ده، آلهیاده، تصوفده یک مهم مسئله لرله علاقه داردر. اولا: موجودات و کائنات خارجیه نك اصلنی تشکیل ایدن (ماده la matière) نك فناپذیر اولوب اوله میه جنی بحثی او یله اساسلی بر مسئله درکه فلسفه و بالخاصه (فلسفه مادیه philosophie matérialiste) ايله کتب

مقدسه نك (مبحث تکوین cosmogonie) یعنی (خلقت کائنات la création de l'Univers) حقنده کی تعلیماته، طابان طابانه ضد بر وضعیت و یروب بر اقمشدر. بناء علیه، نیجه عصرلردن بری دوام ایدن و هریکی طرفه ضرری طوقونان (تزارع علم و دین le conflit de la science et de la religion) ده طرفینک مخاصاتنه سببیت و یرن، مسائل اصلیه دن بری ده ایشته بودر. تعلیمات دینی، ماده نك هیچ یوقدن (خلق créer) اولوندوغنی وینه فناپذیر اوله جغنی، یوسبوتون یوق اوله جغنی تلقین ایتدیکی حالده، علوم طبیعی و [اوعلومک افکارینی بنمسه مک ایستین] فلسفه مادیه، تماماً بونک عکسنی ادعا ایدیور. مع مافیله تعلیمات دینی ايله توفیق اعتقاد ایده بیلن فلسفه سیستملری واردر. (spiritualisme و créationnisme سوزینه باقیکنز!)

ثانیاً: آخرت مسئله سنه علاقه سی اعتباریله (الهیون les théologiens) آرسنده دخی روحک فانی اولوب اولماسی بحثی آچیلمش و تزارعی موجب اوله رق بعضی مذاهب خصوصیه نك تولدینه سببیت و یرمشد. علی الاکثر الهیون، روحک مخلوق اولدوغنده متفق الرایدرلر. (لایموت immortelle) اولماسنده، دها زیاده متفق درلر. مع مافیله مخلوق اولان یعنی یوق ایکن وار اولان بر شیئک، وار ایکن نهایت یوق اولماسی دوشونمک دها زیاده منطقی کورونور ایکن، (ابدیت روح) اعتقادی، بر درجه یه قدر قیل و قاله وسیله لر یرمشد. خصوصاً روحک عاقبتی، یعنی (آخرت la vie future) بحثنده و (جزای عمل) مسئله سنده، ضروری اوله رق، بر طاقم مناقشه لر آچیلمشدرکه جمله سنده اساس روحک بعد الموت فنا سنه و یا بقا سنه تعلق ایدن اعتقاد ادر. مثلاً: [مادامک روح مخلوق اولقله برابر لایموتدر؛ او یله ایسه ازلی اولمادینی حالده ابدی در. بوندیاده واقع اولان اعماللره کوره، آخرتده (یعنی باشقه بردنیاده!)] جز او یا مکافات کوره جکیز. چونکه (عدالت الهیه la justice divine) بونی اقتضا ادر. (سیئات اعمال mauvaises actions) تقدیرنده، عقاب و عذاب - شبهه سز! روح، چکجه جکدر؛ او، طویه جکدر. چونکه جسمک حکمی یوقدر؛ او مادی در. ذاتاً موتی متعاقب محو و مضمحل اولور. مادامک روح ابدی در، (مرتکب کیره = یعنی یک بویوک کناه

ایشله مش اولان) بر آدمک روحی، الی الابد و بلافاصله عذاب طویه جقمی...؟
مثلاً (مخلد فی النار) اوله جقمی...؟ یعنی، نهایتس بر زمان امتداد نیجه جهنم
آتشنده یانوب طوره جقمی...؟ یوقسه بر مدت صوکره محو اولوب فنا
بوله جقمی...؟ [...]
ایشته الهیونی - اوتهدنبری - اک زیاده مشغول ایدن مسئله لردن بری ده
بو اولمشدر. بونک بقا و یافنای روح اعتقادینه صیقی صیقی به تابع بولوندوغنی
سویله مکّه حاجت یوقدر. بوتون ادیان منزله (الهیات théologie) نده، همان
عینی صورتله صحنه مناقشه کیرمش بر بحددرکه بوشکل اوزره تولدی پک
طبیعی اولسه کرکدر .
شرقه ، عینی مسئله ، عینی صورتله - کبار کلامیوندن و الهیوندن -
(حسن بصری) نک مجلسنده سرزده ظهور اولدی ایدی؛ (حسن بصری) نک
درسنه ملازمت ایدن (واصل بن عطا) ، خواجه سنک مرتکب کیره حقنده
بیان ایتدیکی ملاحظاتدن نمون اوله میهرق درسندن آیرمش و جامع شریفک
دیگر ستونلرندن برینه کیدوب ، کندی باشنه و کندی فکر نیجه - بر قسم
سامعینه - درس تقریر ایتمکه باشلامشدی. واصلک بواعترالی، یعنی آیرماسی
(معتزله) تعبیرینه وسیله ویرمش اولدوغنی کبی، تعلیمات خصوصیه سی ده ،
مشهور معتزله فرقه سنه وجود ویرمشدی . معتزله ایله اهل سنت فرقه سنک
(ارادت و قدر libre arbitre et fatalité) حقنده کی اعتقادات متخالفه سی ده،
ینه اومسئله اساسیه ایله علاقه داردر . نته کیم (جزای عمل) بختنده بوایکی
مذهبک احکام خصوصیه سی ینه عینی مبدادن نشأت ایتمشدر. بوبخت ، محمد
شهرستانی نک مشهور جهان اولان (ملل و نحل) نام کتابنده تفصیل اولونمشدر .
خرستیان عالمک الهیونی دخی عینی مسئله یی حل ایده بیلیمک ایچون -
قرون و طادنبری - اوغراشمشدر و کال عتف و شدتله مناقشات و حتی
مجادلاته کیریشمشلردی. معاصریمزدن (هویت White) ، (هدسن Hudson)
(ریچارد روث Richard Rothe) ، و مشهور (وهیتلی Whately)
وامثالی کی الهیون معروفه بومسئله یی بر اقایوب یکیدن احیا ایتمشدر و جدأ
اونکله مشغول اولمشلردر.

ثالثاً : (تصوف théosophie) ده (فنا فی الله ؛ anéantissement
en Dieu) تعبیری مشهوردر و بر مهم عقیده صوفیه یی متضمندر. هر شیک
مبدأ و معادی، یعنی (باشلادینی، حقیقیدینی وینه نهایت ، واره جنی و عودت
ایده جکی وارلق) ، وجود مطلقدر. هر کس ، هر شی اوندن صادر اولمش
و اوکا عودت ایده جکدر . [منه بدأ و الیه یعود] ! . . (وصال حق
communion avec Dieu) یعنی وجود مطلقه ایریشمک و قاووشمق ،
صوفیه اعتقاد نیجه (خیر اعلا le souverain bien) و (مقصد اقصا
le but suprême) در. صوفی ، بومقصده ایره بیلیمک ایچون هر شیدن
قطع علاقه و کف ید ایتلی در. بوکا [ترک] دیرلر. اولا [امساک abstinence] ایله
باشلایان بو (ریاضت ascétisme) ، [وجدواستغراق extase, absorption]
درجه سنه واریر . صوفی اوزمان او قدر کندندن کچرکه هر شیتی ترک ایتمک
امل و اعتقادینه ده ترک ایدر. بومرتبه یه ده (ترک ترک) دیرلر. ایشته بویله جه:
[ترک دنیا، ترک عقاء، ترک ترک]

ایتدکدن صوکره، ارتق اونده (عقل و فکر و هوش) قلماز. (صوفی
صافی) اولور، و بو (استغراق کلی absorption totale) حالنده - ولو
بر آن ایچون اولسون ! . . - (وصال حق ذوقی) نی - [الهام ایله ، کشف
ضمیر ایله par intuition و par inspiration] ادراک ایدر . ایشته فنا
فی الله مرتبه سنه ایرمک ؛ تولومدن اول تولمک یعنی : (موتوا قبل ان تموتوا)
سربینه واصل اولمق بودر . تولدکدن صوکره، وجود مطلقده محو اولوب
شخصیت انسانیه سنی غائب ایتمک دخی (فنا فی الله) در.
(نوفلاطونی néoplatonisme) فلسفه سنده بوبرعقیده اساسیه در .
حتی بو مذهبک اک بویوک حکیمی اولان مشهور (پلوتینوس Plotinus)
واونک شاگردی و معروف [ایساغوجی = Isagogé یعنی مدخل]
رساله منطقیه سنک مؤلفی [پورفیر Porphyre] ، مدت عمر لرنده اوچ
درت دفعه بوزوق خارق العاده یه نائل اولدقلری ایضا ایتمشلردر .

بزم صوفیه شرق لسانند [واصلین] ، بوذوقه ایرن کیمسه لر درکده اصل تور کجه ده (ارنلر) تعیری بونک تام ترجمه سیدر .

[تعیرات مهمه یه باقیکنز ! . فضله اوله رق ، abstinence, abnégation, extase, aïdéisme, absorption, mysticisme]
ده مراجعت ایدیکنز !

[بوددیزم Bouddhisme] مذهبنده ده بو اعتقاد وارددر ؛ بلکه ده اصل بو اعتقادک منشای بوددیزم در ؟ . . . بودین قدیمه کوره کاملر نهایت (نیرو آنا = Nirwânâ) مرتبه سنه واره جقلر واونده [سعادت ابدیه Bêatitute éternelle] یه نائل اوله جقلر در . (نیروانا) نک لغت معناسی (هیچلک) دیمکدر .

Anesthésie

ضیاع حس Anesthésie

Unempfindlichkeit, anästhesie	آلمانجه
Anaesthesia	انگلیزجه
Anesthesia	ایتالیانجه

وجودک بوتون سطحنده ، یاخود هر هانکی بر ناحیه سنده ویاخود بر عضو مخصوصنده (حس قابلیت) ضایع اولورسه ، بوحالته - علی الاطلاق (anesthésie) دیرلر . ایستر (مرضی pathologique) ، ایستر عارضی ویاخود خارجی ومادی بر مؤثره معطوف اولسون ! . . . ایسترسه صرف (باطنی intrinsèque) و (معنوی psychique et moral) بر سیدن ایلری کلش بولونسون ! . . . ضیاع حس ، بر چوق اسابدن نشأت ایده بیلیر . دائرة اتساعی اعتباریه دخی (عمومی générale) ، (نصف طولانی hémiplegique) ویاخود (موضعی locale) اوله بیلیر . درجاسنه کوره (تام complète) ، (جزئی partielle) اولور .

بوتون وجود مزنی احاطه ایدن جلدک حساسیتی ضایع اولورسه - اک طوغرو وعمومی معناسیله - (anesthésie) ، بوحالده نیر . اکر طویغوسزلق تام اولمازسه ، یعنی حس بوسبوتون ضایع اولما یوبده یالکیز شدتی غائب ایتش ایه ، اوقدیرده (ضعف حساسیت hypoesthésie) تعیری مرجمدر .

مع مافیه ، ضیاع حس موجب اولان اسباب وعواملک تأثیرات خصوصیه ومختلفه سنه وبوتأثیراتک درجه شدتنه کوره مختلف ومتنوع نتیجه لر حاصل اولور . بعضی احوالده یالکیز بر حس مخصوصک ضیاعی کورلدوکی کبی بمضاده سائر حسلر اویشدوغی حالده یالکیز بر حس خصوصی نک ضایع اولمادیغی واقع در . اونک ایچوندركه ضایع اولان حس مخصوصک نوعنه کوره تعیرات خصوصیه وضع اولونمشدر . [- surdité, cécité ach-]
(حس الم) یعنی آجی طویق قابلیت زائل اولورسه اوکا (analgésie) دیرلر . (حس عضلی sens musculaire) نک ضیاعی (ataxie) ده نیان حالت مرضیه نک سبی در .

(anesthésie psychique) تعیری بیله بعضی آلمان محررلری طرفندن اکثریا قوللانیلور ، و (apathie تأثر سزلک) معناسنده ایراد ایدیایورکه بوحالات ، اکثریا عصبی آدملرده (وجد واستغراق extase et absorption) ، (مالیخولیا mélancholie) کبی تأثیرات معنویه تحتده وقوعه کله بیلیر .

ضیاع حس ، (اعصاب محیطه nerfs périphériques) نک ویاخود (حجیرات مرکزیه cellules centrales) نک اضمحلالندن ، بمضاده فلج وعطالتندن حاصل اوله بیله چکنه نظراً (مرکز centrale) ویاخود (محیطی périphérique) اوله بیلیر .

وجودیمزک دریسنده منتشر بولونان (حلیمات papilles) ایله اونلره پیوسته اولان (اعصاب ناقله وواردنه nerfs afférents) نک تعیرات واضمحلالندن ایلری کلن (طویغوسزلق) لر ، هپ محیطی در ، (مخ شوکی moëlle épinière) نک (حزمه حسیه faisceau sensitif) سنه عارض اولان (جرحه lésion) لرك و تخریباتک نتیجه سنده ظهوره کلن طویغو - سزلقلر دخی محیطی در . بو حزمه حسیه ، بالذات دماغک (ماده بیضا matière blanche) سنه کیره رک (ماده سنجابی mat. grise) یه قدر واصل اولدوغی ایچون (سویق مخی pédoncule cérébrale) نک (قدم

(pied) نده و یا خود (محفظه داخلیه capsule interne) ده حصوله کن جروحك دخی محیطی طویغوسز لقلر انتاج ایله دیکی محققدر . محیطی و مرکزی طویغوسز لقلر ك نتایجی اعتباریله فرقی - پسقو لوزی نقطه نظرندن - مهم مسئله لر تولید ایدیور . محیطی اولان طویغوسز لقلر ده حس ، تماماً ضایع اولدوغی حالده ، اوجسه عائد (خیالات images) باقی در . چونکه (مرکز دماغی centre cérébral) صاغلامدر ؛ واعصاب محیطه نك نقل ایتدیکی حسیات مکرر نك شکلی محافظه ایدن ، مرکز دماغی در . اونك ایچوندركه مثلاً : باجانی یا خود قولی (بالعملیه بتر amputé par opération) ایدیلن بر آدم - عملیات جراحیه دن صوکره دخی - پارمقلرنده آجی حس ایده بیلور . حالبوکه پارمقلری یوقدر ؛ چونکه قولی و یا خود باجانی جراح طرفندن کیلوب آلمشدر . [amputé لفظنه باقیکنز !] ، بو حالده مجروحك حس ایتدیکی آجی ، بر حس حقیقی دکدر ؛ بر حس حقیقی نك انجق خیالی در . (actuelle حالی) بر طویغو دکل ، کچمش بر طویغونك انجق یادی ، خاطره سیدر . [actuel سوزینه باقیکنز !]

فیلسوفلر ، بو کیفیت غریبه بی جدیته تلقی ایدوب (مكان l'espace) بحثنده اوزون اوزادیه وسیله مناقشه اتخاذا ایتشلردر .

(مرکزی) اولان (anesthésie) لرده اعصاب محیطه ایله بو اعصاب پوسته اولدوغی (نواحی régions) واعضای سائر تماماً سالم اوله بیلیر ؛ بناء علیه تأثیرات خارجیه ، قشر دماغه یعنی طبقه سنجاییه سالملاً واصل اوله بیلیر . فقط حس اولونه ماز ؛ چونکه دماغك اوندن خبری اوله ماز . احتمالکه اونا حیه دماغیه ده کلیاً (فقر الدم anémie) واردر ؛ یا خود اثر (تسمم intoxication) اوله رق طویغوسز لق حاصل اولمشدر ؛ و یا خود اوراسی خراب اولمشدر . ایشته بوکی احوالده ، یالکیز قابلیت حس دکل ، - اوحس مخصوص هر نه ایسه ! - اوکا تعلق ایدن بالجمله خاطرات و خیالات دخی محو اولمشدر . (حافظه mémoire) امکانی قالمشدر .

مدققین متخصصین دن (پیه رزانه Pierre Janet) بو کیفیتی بر دستور قانونی شکلنده عرض ایتش و (ضیاع حافظه مرکزی طویغوسز لقلر ایله

دائماً مترافقدر حالبوکه محیطی طویغوسز لقلر ده حافظه سالمدر و باقی در . دیمشدر .

بوزاتك ادعاسنه کوره (مرکزی طویغوسز لق) ، بر (انحلال ذهنی dissolution mentale) نتیجه سنده وقوعه کله بیلیر . (طالغینلق - dis traction) ده ، بعضی خفیف تسمم لرده ، (عصبی خسته لقلر névroses) ده وهله (ایسته ری Hystérie) ده (طویغوسز لق) لر اوله بیلیر ؛ فقط خسته ، تلقی ایتدیکی تأثیراتی یکدیگرینه ربط ایده مدیکی ایچون بو حال وقوع کله بیلیر ؛ یوقسه مراکز دماغیه ده بر آفت عضویه یوقدر . یالکیز (ذهنی طویلایه ماز ! ؟) که عناصر تأثراتی بر برینه ربط و قیاس ایدوبده آ کلاویه بیلسین و طویه بیلسین ! ..

بونوع طویغوسز لقلر ، (ضیاع حافظه amnésie) قیلندندر و (اصولی systématique) درلر . خسته ، یالکیز برشیته تعلق ایدن احتساساتی وحسیاتی ادراک ایده مز ؛ طویه ماز . یا خود انجق برشیته تعلق ایدن احتساساته پیدای شعور ایده بیلیر . حالبوکه او غیر مشعور قالان احتساساتی وجوده کتیره بیلن حاسه لر خراب اولنه مش ؛ تغیر ایتمه مشدر . موجوددر . زیرا اوحاسه لر تهییج ایدیلنجه عکس عمل یاپار . بوندن طولانی درکه اکثریا بوکی (anesth.) لر متناقضدرلر . خسته [بن بویه طویغولر حس ایتیمورم] دیدیکی حالده ، او طویغولر ك موجودیتنی اثبات ایده بیله جك بعضی اعمال و حرکات اظهار ایدر . مثلاً ضیانی حس ایتیمورم دیدیکی حالده حدقه عینیه نك تغیراتی ضیادن الآن متأثر اولدیغنی و فقط بو تأثیره پیدای شعور ایده مدیکنی اثبات ایدر .

بو تعصیرات و اونلر ك تضمن و یا دلالت ایتدیکی مسئله لر طوغرودن طوغرویه فلسفه مسائلندن معدود دکدر . فقط بوکی احوال ، کیفیت ادراک مسئله سنی تنویر ایتدیکی ایچون و بومبحثده حکم اولان پسقو لوزی علمنك اك غامض مسائلنی تشکیل ایتدیکندن طولانی یاریم عصر دن بریدر ، فلسفه عمومیه مباحثنده کمال جدیته تلقی ایدلمکده در .

[تعصیرات علمییه باقیکنز !]

انیمیزم Animisme

انکلیزجه Animism

آلمانیجه Animismus

ایتالیانجه Animismo

بوتسمیر، لاتینجی (anima) کله سندن کلیر که روح دیمکدر. (تفصیلات ایچون âme لفظنه باقیکنز!) اصطلاحده معناسی، روحه و یا خود ارواحه اینانان مذهب دیمکدر. فقط (آنتروپولوژی)، (سوسیولوژی) و بالخاصه (فلسفه) نقطه نظرندن — آری آری — تلقی اولونونجه بو کله نك معنای اصطلاحه حیسنده اهمیتلیجه فرقلر کورولور. تحقیقات علمییه و تاریخیه صراحتاً کوستریور که اقوام ابتدائییه ده و (جماعات قبل التاریخیه = sociétés préhistoriques) ده اک قدیم و قویم عقیده بودر. بزمه حلاً معاصر بولونان و افریقا، آمریقا و آسترالیاده و بحر محیط اطهرلنده یاشایان نامعدود قبائل وحشییه نك اعتقادات طبیعیه سنی تدقیق و تتبع ایدن متخصصین علما بو خلقك جمله سنده (animisme) اساسنی بولویورلر. بعضی آثار قبل التاریخیه دن استنباط اولونان معنا ایله بو کونکی قبائل وحشییه نك اعتقادات طبیعیه سی توافقی ایدیور. بو خصوصده کشف حقیقه چالیشان (طایلار Tylor) و (فرازی زهر Frazer) کبی علمای مشهوره ایله (هربرت سپنسر) کبی — اجتماعاتیه زیاده سیله اهمیت ویرن — فیلسوفلر، ادعا ایدیورلر که، عوامل معنویه نك جمله سندن زیاده بو (animisme) اعتقاد ابتدائی سی معنویت انسانیه یه حاکم اولمش، عاداته، طرز معیشته، اخلاقه، عرف و قوانینه، صنایعه شعره، الحاصل مدنیته شکل اصلی و ابتدائی سنی ویرمش و حتی مدنیته وجهه استقامتی دخی تعیین ایتمشدر. نته کیم (حس دینی le sentiment religieux) نك منشأی ده بودر.

عاجز و وحشی اولان انسان ابتدائی — یاشامق احتیاجی و تولوم اندیشه سیله — برسفالت حیوانیه ایچنده حیاتی سور و کرکن بیله، (مجهول قورقوسی la peur de l'inconnu) نی کال دهشته حس ایتمش، و مقدرات حیاته حاکم اولان قدرت قاهره نك نصلشی اولدوغنی — بالضروره — دوشونمشدر.

حادثات طبیعیه میاننده نظر دقتنی اک زیاده جذب ایدرک ذهنی مشغول. ایله ین مسئله لر دخی — کندیته پک یاقیندن تعلق حسیه! — تولوم و رؤیا کیفیتلری اولمشدر.

رؤیا کورن بروحنی، کوندوزین کچیردیکی هیجانلی و تهلاکلی زمانلری، — اویقو حالنده — تکرار یاشایوبده اویاندقدن صوکره کندینی و بولوندوغنی موقعی بردنبره ادراک ایدنجه، بومعما نك تأثیر فسونه طوتولمش و حلته — عقلنک ایره بیلدیکی قدر — چالشمش اولسه کرکدر. هر حالده جسمدن آری، سیار و سرسری بروح، دها طوغروسی بر (خیالت، برجادی) اعتقادی، انوام وحشییه نك جمله سنده واردر. وحشیلر، رؤیایی، بوخیالتک سیرانه چیقاسی و تکرار عودت ایدوب مکانه یعنی بدنه کیرمه سی ایله تعریف ایدیورلر. تولومی دخی بردها عودت ایتمه سیله تفسیر ایلورلر.

بو مسئله ایله کرکی کبی مشغول اولان فیلسوف هربرت سپنسر، شو تحقیقاته مبنی بر فرضیه مشهوره ترتیب ایتمشدر که (خیالت، جادی نظریه سی Ghost-theory) نامیله معروفدر؛ بو اعتقادات ابتدائییه نك یعنی طاقیله! (animisme) اک رؤیا ایله مناسبت اساسیه سنی، حتی اوندن طوغمش اولدوغنی ادعا ایدیور. (âme کله سنده هیکل نظریه سنه و levhémérisme لفظه باقیکنز!)

سپنسرک ادعاسنجه (عبادت اجداد le culte des ancêtres)، و دفن اموات امرنده اقوام وحشیه عاداتنده کورولن غریب غریب آینلرک منشأی و (پری، fée)، (جن esprits)، (جادی)، (خور تلاق) اعتقادینک منبعی ینه بودر.

اک وحشی، اک بیرتجی حیوانلره بیله — حیللر ایله، آلات و ادوات ایله، تعاون و اتفاق ایله — تأمین غلبه ایله ین (انسانیت ابتدائییه l'humanité primitive) (پری) لردن، (جن) لردن و برچوق (ارواح سیره esprits ambulants) دن شدتله قورقش — نظردن نهان اولدقلری ایچون — اونلردن صاقینمق احتمالی اولمادیغه قناعت کامله حاصل ایتمشدر. انسانک، هر شیئی کندیته قیاس ایتمه سی طبیعی بولوندوغنی ایچون، ارادت بشریه یه رام اوله مایان

حادثات ووقوعات عالمی - انسان وحشی - بالضروره او جنلرك ، اوسيار وسر سري ارواحك ، ارادته ، كيفه ، غضبه انتقامه اسناد ايدرك تعريفه چالتمشدر. ايجابه كوره اونلره قربان كسمه سي ، ميوه هديه ايله مهي ، (خضوع وخشوع humiliation) ايله دعا و نياز ايمه سي ، واكثريا (ارواح گذشته les âmes trépassées) دن يارديم ايسته مهي ، مدداوممه سي ، سپنسر ك نظريه سي له تعريف اولونويور .

بويله ابتدائي براعتقاد ضرورينك ايجاباتندن اوله رق ، وحشي انسانلر ، نه قدر عوامل طبيعيه وارسه ، اونلري (تشخيص personnifier) ايدوب (جانلانديرمق animer !) صورتيله هر يريني انسانه بگزر برشكله تصوير ايدويور لر و طبق انسان كي ذيروح ، مرید و مختار اولد قلرينه اينانيور لر كه (مجسمه anthropomorphisme) ديدكلري عقیده ايشته بودر ؛ و (animisme) دن نصل تولد ايتديكي ده اكلاشيلور . [بوتعيره بايقكز !] بودور اجتماعيده و بولدر كه اعتقاديه ده انسانلر (عوامل طبيعيه agents naturels) يه (agent لفظه بايقكز !) نيآت مخصوصه اسناد ايدويور لر ؛ مثلاً ، كوك كورله مهنسي ، زلزله يي ، قحط و غلاي ، موت فجيئي بعضي (ارواح خيئه mauvais esprits) نك حداث و انتقامه ؛ كوزل هوايي ، فيض و بركتي ، حيوانات وحشيه قارشى فوز و موفقيتي (ارواح طيبه bons esprits) نك امداد و معاونتته عطف ايدويور لر . حتى اكثريا بومعاوتي ، ارواح اجدادك عنايتته حمل ايدويور لر و بالطبع اوندن محروم قالماق ايچون آيين مخصوص اوزره ارواح اجداده طانييور لر كه (evhémérisme) ده اساساً بوديمكدر . كذلك هر شیده ، حتى اك دكرسز بر بوجك ده بيله ، اكلاشيلماز بر قدرت خارق العاده تصور ايتدكلري زمان ، اونلره ده آيري آيري طانييور لر . فرضا انساني بر كره صوفقله تسميم ايدوب بش دقيقه ظرفنده تولدورن بر زهر لي اورو بچك بر وحشي نظرنده اسرار انكيز بر قوت قاهره يي تميل ايتديكي ايچون معبود اولويور . اوبوجكي اولامقله تغذي ايدن براهيتسز قوشجغز دخی عبادته شايدان كورولوب معبودلر صيره سنه كچوركه (fétichisme) ديدكلري دركه اعتقاديه دخی بودر .

بعضي قبائل وحشيه عندنده منحصر آبرشي ، مثلاً بر (قايارو Rocher) پارچه سي ، بر نوع آغاچ ، بر بوجك ، بر غريب حيوان ساثرلرندن زياده مبجل طوتولويور . مقدرات حيات ، باشليجه اوكا باغلي در ظن اولونويور كه (totem) ديدكلري بودر ؛ واعتقادات وحشيه نك بودر لوسنه (طوته ميزم totémisme) ديرلر . (فره ي زهر Fraser) بوني لايقيه تتبع ايتمكده بولونمشدر .

(غلطات حسيه les illusions de sens) ، (امراض عصبيه maladies nerveuses) (جنّت folie) ، (صرعه epilepsie) و ساثر (نه وروز Nevrose) لر ، - اسباب مرضك كيزلي قالماسندن ، كوروله - مه مسندن ناشي - جنلره اسناد اولونويور . ذاتاً (بخون) ، لغت معناسيله (جنّتمش) ديمكدر كه بونظريه نك اصابتي اثبات ايدر . بو ، اعتقاددن دخی (سحر بازلق sorcellerie) ، (اوفور و كجلك) ، (بايقجيلق) ، (جنجيك) كي غريب مسلكر و مشغله لر تولد ايدويور ؛ بونلرك جمله سني (سپنسر) ، (فته شيزم) اعتقاديله علاقه دار كورويور و اونك لوازمندن عد ايدويور . الى آخره ...!

(طايلاز Tylor) بوابتدائي عقايد باطله يي اطرافيله واسبابيله تحقيق ايتمش و حكمت ظهور يني ايضاح و تعريف ايچون ايكي بويوك جلد يازمشد . بو كي خرافات اعتقاديه نك ، بوكونكي جماعات متمدنه ده بيله حالاً ياشامقده بولوندوغني ونه كي شكللره كيروب حكم سوردوكني غايت متنوع مثاللره كستانبنده كوسترييور و بوتون بوشيلرك (سپريتيزما spiritisme) شارلاطانلي ايله نه غريب ، فقط نه قدر طبيعي بر علاقه سي بولوندوغني - بر فطانت مستشا ايله - آكلاتيور . حتى ضروب امثالدن ، چوجق اويونلرندن معنار چيقارهرق بودعواسني تحكيم ايدويور . هر مملكت متمدنه ده تربيه دن محروم قالدن عوام ناسك ، صيتمه ، صرعه ، نظر ، ودها بو كي آفتلره قارشى - كمال اهتمام ايله - قولنه طاقديني برسيجيم پارچه مسندن ، بوينه آصديني بر چاتال آغاچ دالجغزندن (يعنى بزده كي چيته نيك دالي !) مدد و صيانت اومه سني ، بعضي

علل دماغیه و اختلاجات عصبیه یی ، (ارواح بیگانه) به (یعنی بزم اسکی)
تعبیر میزجه : (ای ساعتده اولسونلر ، اونلره : پری لره !) [عطف
ایدرک - بو حادثات طبیعی یی - برطاقم احوال غریبه (یعنی طیشدار یلق
علامتی !)] ظن ایتمه سنی ، طایلار ، او باطل و ابتدائی اولان عقاید
قبل التاریخیه نك حالا جماعت مزله برابر یا شامقده اولدوغنه مثال و دلیل اتخاذ
ایدیور .

زده ، علمای عثمانیه نك - اعتقاد بجه - سربلندی اولان مشهور حاجی
خلیفه یعنی کاتب چلبی ، بوکچی (عادات نا مرضیه) یی و خرافات قدیمه یی
اسلامیت احکامنه وسنت پیغمبری به تماماً منافی کورمش ، و (میزان الحق)
نام رساله مهم سنده موضوع بحث ایدوب شدله قدح ایتشدرکه شایان
تحسین و شایان دقتدر .

ایشته (علوم اجتماعیه) ده ، (آنتروپولوژی) ده ، (تاریخ ادیان) ده
(animisme) سوزی کچینجه ، بومعنا آکلاسیلیر و انسانیتک بو (دور اعتقاد) ی
مراد ایدلمش اولور . (اوجاق باشی پریمی) ، (چشمه باشی پریمی) ،
اینجیر آغاجی پریمی) ، (سوپرونتولک پریمی) ودها بونک کچی درلودرلو
پریرله اینانمق و دنیانک هر گوشه سنی اونلرله اسکان ایتک ، دور اعتقادیدر .
صنایع نفیسه ده و ادبیاتده (animisme) ک نه بویوک تأثیری اولدوغنی
اثبات ایتک ایچون متعددو بک مهم اثرلریازلمشدرکه ملاحظاتی بورایه
- مختصراً اولسون - نقل ایتک اوزون سورر و آرتق لازمده دکلدر .
ویردیکم ایضاحات کافیدر . یالکز شوقدر عرض ایدیم که ، بو (animisme)
دوری ، بر خیلی تکامل ایتدکدن صوکره (symbolisme) شکلنه کیرمش
و (دور اساطیر (Période mythologique) ی وجوده کتیرمشدر . بو
دورده (دین religion) ، (تعدد آله polythéisme) صورتی آلیور . بوکا
(عبادت اوئان paganisme) دخی دیرلر . بودورده انسانلر ، عوامل و قوای
طبیعیه یی شخصیتله تمثیل ایدیورلر . مثلاً : (عکس صدا) ، (فورطنه -
روزکار) ، (عشق) ، (عقل) ، (حسن) ، (حرب) ، (برکت) الی آخره
هپ انسان شکلنده تمثیل ایدیورلر ؛ و مرتبه لرینه کوره مظهر رعایت

و شایسته عبادت اولویور . مدنیت و صناعت هنوز پک آشای بر در کده
ایسه ، بومشخصات مقدسه نك هر برینی تمثیل ایچون - لوله چی چامورندن
- غایت قبا ، غایت غلیظ و چیرکین ، هله بوسبوتون عجیب - (بت = پوط =
idole) یاییلیور . افریقا ده (آشانتی Achanti) و (یام - یام Niam-Niam)
قبائل وحشیه لرنده اولدوغنی کچی !... مدنیت پک ایلریله مش ایسه خارق العاده
کوزل هیکلر و جرده کتیریلیور . یونان قدیمده اولدوغنی کچی که موزه -
خانه لریمزده فسونکار نمونه لری کوروله بیلیر . ایشه قوای طبیعی یی بوصورتله
تمثیل ایدیش (symbolisme) در . فقط بوسبوتونیم ، چاموردن پوطلر
واوپوطلر ایچون معبدلر یا بمق مجبوریتی و معرفتی الهام ایتش و صنایع نفیسه نك
ترقیسندک بویوک عامل بولونمش اولدوغنی سببله فیلسوفلر ، « صنایع نفیسه ،
(animisme) دن طوعمشدر ! » دیورلر .

شعرده (انطاق) اسکی (animisme) ایله علاقه داردر ! دهنیلیور .
مثلاً طاغلرده ، طاشلرده اغاچلرده روح و بناء علیه نطق اسناد ایدوبده - فرضه
عاشق کرمک ، معشوقه سی اصلی خانی اونلره صورمه سی - و :

اولو طاغلر !.. اصلیم بورادن کچدیمی ؟

دیمه سی کچی !..

فلسفی و بوسبوتون خصوصی معناسنه کلنجه ، (animisme) ، روحک
استقلال وجودینه و ابدیتنه قانع اولان مذهب مشهوره دیرلرکه ادیان
منزله نك حکمت اساسیه سنده بو اعتقاد تمل طاشیدر . [ame کله سننک
نهایتلرینه باقیکز !] بو عقیده ده اساس ، روحک مدبر حقیقی و فاعل مختار
اولماسی ، بدنی بر آلت کچی قوللانمیه سی ، و او آلت خراب اولونجه روحک
لایموت قالماسیدر . [immortalité کله سننه باقیکز !] .

ارسطونک وسقولا ستیقلرک بو خصوصده کی اعتقاداتی ایچون (ame و
intellect کله لرینه باقیکز !]

(راقیون les stoïciens) دخی (animisme) . قائل ایدیلر ؛ حتی
بوتون کائناتی ذی حیات و یکپاره بروجودعد ایدرلردی . [ماده نك بالذات

کننده قدرت حیات وارد را [ده یوب عوالم موجودین، طاقیله، بر (جسم عضوی) کبی تلقی ایدرلردی. بومذهبه تاریخ فلسفه ده (hylozoïsme) دیرلر که نهایت ماده مذهب منجر اولمشدر. [تفصیلات ایچون matérialisme سوزینه باقیکز !]

(Leibnitz لایب نیچ) ک بو باده کی فکری اکلایم ایچون [monade] لفظه باقیکز !

(فان هلمونت Van-Helmont) ک نظریه سی حتمه تفصیلات لازمه ، [archée و vitalisme] کله لرینه متعلق ایضاحاته ذیل ایدلشدر .

تناسخ اعتقادی ایله (animisme) ک مناسبتی ایچون [métempsychose] لفظه مراجعت ایدیکز !

Anomalie

عروف عاده Anomalie

Anomaly	انکلیزجه
Abnormität	آلمانیجه
Anomalía	ایتالیانجه

یونان ده (نوموس νόμος = قانون دیمکدر. عربلر بونی عیناً آلوب (ناموس) دیمشدر و (نوامیس) شکلنده جمع مکسر یی ده یامشدر. (ناموس اکبر la plus grande loi) و (نوامیس طبیعی) کبی! ایشته بوتعیر، عینی اصلدن مشتق در؛ و (قانون طبیعه مغایر) برشی، بر حال دیمکدر. بونک صفتی (anomal) در؛ فقط قولاً نلاز. اوکا بدل (anormal) تعیری مشهور اولمشدر. بوده (a) ادات نفی ایله (norma) لغتدن مرکبدر. بولغتك معناسی (قاعده) دیمکدر. شو تقدیرجه (anormal)، قاعده یه مخالف اولان بر شیئه وصف اوله رق ایراد اولونور .

اصطلاحده، (احوال و کیفیات استثنائیه cas exceptionnels) یه ده نیر. مثلاً: اتی پارماقلی طوغان بر چو جوق ودها بویه بر جوق (قصور) لر، عضویت نقطه نظرندن (anomalie) تشکیل ایدر؛ چونکه، اوده دنبری بیلدیکمز قانون طبیعه قارشی مستثنا بر حالدر. بوعضوی (anomalie) لره

عربلر (عیب) دیرلردی که اصل معناسی بزم لسان عادی مزده (قصور) دیدیکمز شیرلدر؛ کله بومعنا ایله لسان فته ده حالا مستعملدر .

عالم غیرعضویده (anomalie) لر، - یک نظرده - قوانین طبیعییه مغایر کورونن حادثات و امور غریبه در. (حکمت طبیعیه la scien. physique) ده (غریبه موازنه المایعات) ودها بر جوق امثالی کبی !

تحقیقات و تجربه ایله علومک ترقی سی، (خلاف عاده) ظن اولونان و (قانونه مغایر) کورونن حادثات و امورک، (قانون مخصوصه توفیقاً تفسیر و تعریفی) صورتند و واقع اوله ککش در؛ بناء علیه، (anomalie) دیدیکمز احوال غریبه نک، حقیقه خلاف قانون اولمادیغه و اولمماسی لازمکله چکنه دائر - کیتدکجه - قناعت می آریدر مشدر . صحنه طبیعه سطحی بر نظره باقوب قالدینی مدتیجه، انسانیت بر جوق (خوارق عادات!) کورمش و (خارق عاده) یه اعتقاد ایتشدی؛ فقط ظاهرده غریب و فسوونکار بر قارغاشه لقدن عبارت کورونن بوجمعه کائناتک (شیرازه قوام) و (قانون آهنگ و انتظام) نی کشف ایتدکجه او اسکی اعتقادینه کلیاً ضعف ککش، و شیمدیک حالده خارق عاده کورونن شیرک، قوانین طبیعیه دن خارج برطاقم (امور کیفیه faits arbitraires) دن صایلماسی لازمکله چکنه اینانه ماز اولمشدر .

(عجائب طبیعت!) دن و (امور فوق العاده) دن صاییلان بر جوق حادثاتک - ترقیات علمییه و تدقیقات تجربیه سایه سنده ! - قوانین طبیعییه ایله کیزی رابطه لری کشف اولوندکجه اوکی احوال استثنائیه، (معقول بر صورتده d'une façon rationnelle) تعریف اولونه رق (امور عادییه faits ordinaires) صره سنه کیرمشدر . کشفیاتک دائماً بو وادیده و بو طرزده موفقیته ایلر یله مسمی، ذهن متجسس بر فکر ویرامید ویرمش، وهنوز بر قانونه ربط ایله تعریف ایدیه ممش بولونان حادثات خارق عاده نک - حالا - قوانین عاده و خصوصیه سی ایله جهت رابطه سی کشف اولونه مدیغه و معافییه، او احوال استثنائیه نک ده همه حال بر قانونه مربوطیتی اولماسی لازم کله چکنه دائر قوی بر ظن، بلکه بر اعتقاد تولید ایتمشدر .

بوکون (روح علم l'esprit de la science) بو اعتقاد ایله یاشیور؛

خارق عاده‌ی قبول ایده‌بیلن بر (علم صحیح science exacte) یوقدر. بویه
براعتقادی قرین احتمال کوره‌بیلن بر علم، کندی لزوم و حیثیتی، کندی
وارلغی، بالذات انکار ایش اولور. علمک باشلیجه وظیفه‌سی، [جاهل
وغافل نظرلره بر (هرج و مرج) حالنده معروض اولان] بو عالم حوادثک
— بالعکس — (آهنکدار بر منظومه un système harmonieux) تشکیل
ایتدیکنی اساساً تسلیم ایلک، یعنی بر (chaos) دکل بر (! cosmos) اولدوغنه،
اول امرده، اینانمق در. قارغه شالقدن عبارت کورونن بو حادثاتک محور جریانی
اولان قوانین (قیمه و مطرده les loi immuables et uniformes) ی
کشف ایتمکدر. ترقیات علمیه بو کشفک درجه‌سیله اولچولور. مدنیت فکریه
دخی تماماً اونکله متناسبدر.

بومسئله دخی، سائر بر چوقلری کبی، (نزاع علم و دین) ه سبیب
ویرنردن باشلیجه بری در. (religion, loi, anéantissement, création)
سوزلرینه باقیکز!

علمک نقطه نظریه و عقیده اساسیه‌سنه کوره، قانون خارجنده هیچ بر وقعه
اوله ماز، هیچ بر حادثه ظهورده کله من. قانونک معهود استثنالی بیله — حقیله
تدقیق اولونورسه! — او قانون ایله تصدیق و تحکیم اولونه بیلیر. و یا خود،
اوقانونک شمول حکمنی شبهه دوشور و یورسه، نتیجه دهدها عمومی، (دها زیاده
حادثاتی محیط) بر قانونک کشف اولونما سنه دلالت ایده‌بیلیر. او وقت آکلاشیلیر که
استثنا آتی تعریفه مقتدر اوله مایان اوقانون، دهه عمومی بر قانونک ضمتنده
مندرج و (جزئی partielle) بر (قانون استقرائی une loi inductive)
ایش! ... او حالده یکی کشف اولونان قانون عمومی، خارق عاده کورونن
حادثه غریبه‌نی معقول بر وجهه تعریف ایدرک امور عادیه صیره‌سنه قید
ایش اولور. اکثر کشفیات علمیه بوکا مثالدر.

بناء علیه، برقانون، اگر حقیقی و طبیعی ایسه، کندی دائرة
شمولنده بر حادثه مستثنا بولوندوره ماز. اوقانون ایله تعریف اولونه مایان
برتک وقعه استثنایه بیله حقیقتی رد ایتک ایچون کافی بر دلیل اوله بیلیر.
بونکده امثالی تاریخ علمده پک چوقدر.

طبیعت غیر عضویه ده خارق العاده کورونن بعضی حادثاتی تتبع ایتک
وقوانین عاده‌سیله جهت ارتباطی کشف ایده‌بیلیمک، نسبتاً دهه قولایدر.
(علوم حکمیه sciences physiques) و (میکانیکیه mécaniques) نک
(علوم حیاتیه و غریزه‌یه sciences biologiques et physiologiques) دن
چوق اول ودها چابوق ترقی ایده‌بیلیمش اولماسنه — فکرجه! — باشلیجه
سببده بودر. کائنات غیر عضویه صحنه‌سنده وقوعه کلن حادثات — نسبتاً —
بسیط اولدوغی ایچون اونلر آردن سنه کی (علاقه سببیت rapport de causalité)
دها قولای کشف اولونه بیلیمشدر. اوسبیلهدر که علمک اساسی، روحی
اولان (ایجابیه = déterminisme) اصولی، دهه چابوق ودها قطعی
اوله رق کائنات غیر عضویه دهه تحقق و تأسس ایتیمشدر. بناء علیه بوداژده
خارق عاده کورونن امور مستثنا، حقیقی اولمقدن زیاده ظامری بر طاقم
استثنا آدن عبارتدر؛ یاواش یاواش ماهیتلری تعین ایدرک هانکی قانون
مخصوصه عايد اولدقلری آکلاشیله جق وامور عادیه صیره‌سنه قید اولونه جقدر.
عالم عضوی (le monde organique) یه کلنجه — شبهه یوقدر که —
اونده ده (ایجابیه) اعتقادی طوغرودر. چونکه حیاتک دخی (شرائط
مخصوصه conditions spéciales) سی اولدوغی محقق در. شرائط
مذکورہ‌نک بر قانونی اولماسی لازمکه جکی ده ضروریدر. نته کیم بر چوقلری ده
کشف ایدلیمشدر و ایدلیمکده در. لکن حادثات عضویه — ماهیتی اعتباریله —
دها زیاده (معضل complexe)، (کرفت enchevêtrés) واسرارانکیز
اولدوغی ایچون بوسبوتون خصوصی قانونلری بولونمق کرکدر. بوقانونلر
کشف اولونما دجه بر چوق حادثات، (اسباب موجهه les causes efficientes)
سیله یعنی معقل بر صورتده تعریف اولونه مایه جنی ایچون، خلاف عاده بر طاقم
(غریبه) لر کبی تلقی اولونه بیلیر. بو درلو حادثاتک پک کرفت اولماسی،
(یعنی نامعدود و نامعلوم بر سوری اسباب مختلفه نک (محصله résultante) سی
بولونماسی)، ذاتاً غریبه لر تشکیلنه پک مساعددر.

اوندن ماعداء (یعنی حادثات عضویه ده مختلف اسباب موجهه آریوب،
کیفیتی بر قانونه ربط ایتک مجبوریتدن ماعدا!...) اجناس وانواع

وصف معینہ نظر دقتہ آملق و هر جنس و نوعك (اوصاف ذاتیه و مشتركه propriétés essentielles et communes) سنی مقیاس اتخاذ ایتك مجبوری ده و اردر كه آیرجه مشكلات نظریه یی موجب اولویور. بونی بر مثال ایله اكلاتهیم :

انسان ، علی العاده ، ایکی الی ، ایکی آباقلی در . هر النده ، هر آاغنده بشر پارماق و اردر . صاغلام طوغمش قصور و هر انسان بویه اولور . بك اندر اوله رق بعضی آدملر كوره بیلیر كه بونمونه یی مل حیه موافق اولماسین !! اوسبیلهدر كه بش مارماقلی اولان انسانلری (مقیاس) ، و بونمونه یی (قاعده norme) عدایدیورز . اوکا (normal) دییورز . فی الحقیقه ، كورو یورز كه انسانیتك عظیم برا کثرتی هب بویه بش پارماقلی در .

شیمدی - عمر مزده ایلک دفعه اوله رق! - الی پارماقلی بر آدم كورسه كه ، فوق العاده بر حیرته دوشرز . بو حادثه عضه - ویه یی بر (غریبه خلقت anomalie de la Nature) عد ایدرز ؛ چونكه اندر برشیدر . اونی (عادت طبیعتہ ؟) مغایر كورورز . (خارق عاده) ، (خلاف عاده) بر حالدر ؛ دیرز !!... كذلك :

شیمدی به قدر كورمش اولدوغمز قوشلری ، هب غاغالی بیلیرز . درت آباقلی حیواناتدن دخی - مملکت مزده ! - بر دانه كورمه مشزدر كه غاغالی اولسون !! فقط دوداقلی بر قوش كورسه كه ، و بو غریب حیوانك اینك مه سنه یاپیشوب سوت نه ممكنه یاشادیغنی بزه تعریف ایتسه لر ؛ شاشارقالیرز . صوكره برده درت آباقلی و طبقی (نورده كه کی!) غاغالی دیگر بر حیوان كوسترسه لر ، بو (عجیبه) لری برر (غلط طبیعت) اولمق اوزره تلقی ایدرز . حالبوكه بوتشكلات عضویه بر طاقم اسباب غریزه و تشریحیه ك نتیجه سی اولدوغنی جهته - كندنجه - بك طبیعی در ؛ و طبیعت ده غلط اوله ماز . غلط بزم محدودیت نظر مزده در ؛ اونمونه لری بر استثنا اوله رق تلقی ایدیشمزده در . او غلطات ، بر جوق افرادده عینی وجه اوزره تحقق ایتسه یدی ، حیوانات آره سنده یکی بر نوع ، یکی بر صنف تشکیل ایده بیلیر و او وقت هیچ خارق عاده صایلمازدی . مثلاً منطقه بارده و حاره اهالیسی ، علی العموم و علی السویه ، هب الی پارماقلی اولسه یدی .

بوقصور ، جنس بشرك بر نوع مخصوصی تعیین ایچون ، اك مهم و اساسی بروصف مشترك ، بر (خاصه ممتازده) صاییلردی . حتی اسباب موجب سنی ، قانونی كشف ایده مه سه كه بيله یته اونی (خارق عاده) عد ایتزدك . نته کیم ده مین ذکر ایتدیكم (سوت نه من قوش) و (غاغالی چارپا) ، حیوانات آره سنده بر رصنف مخصوص تشکیل ایدر ؛ چونكه حالا یجه افرادی و اردر . بوتشكلات غریبه بك قانونی كشف ایتسه كده ، ایتسه كده ، او افراد متشابهه بر رصنف مخصوص تشکیل ایدر . افریقا زنجیری ایلک دفعه اوله رق بر بیاض آدم كوردكلی زمان ، اونی شیطان ظن ایدرك ، اطرافندن قاشلردی . اوروپاده ایلک زنجیری كورن کویولر دخی عینی صورتله متحس اولشلردی . بو غریب شی ، او قدر خلاف عاده كورونمشدی . بیاض آدملره ، سباه آدملرك جنس بشر انواعندن اولدقلری اكلالشدن صوكره (anomalie) قلمادی .

بوكون (علم حیات biologie) اصلاحنده (anomalie) تعبیری دهها خصوصی ودها معین بر طاقم غرائب تشكالاته وصف اوله رق قوللا نمقده در . یرتیق دوداقلی ، یاخود سیوری قولاقلی ، و یاخود آلتی پارماقلی اولمق کی تشریحی قصورلره بو تعبیر تخصیص اولونمقده در . بوده ، یا بك اندر كوروله بیلن بر (سجیه عضویه caractère organique) ك بر فردده ظهورندن ایلری كله بیلیر ؛ [الی پارماقلی طوغمق کی!] و یاخود بك عمومی ، بك عادی بر عضوك فقدانندن نشأت ایدر ؛ [قولاقسز و یاخود دوداغی یرتیق طوغمق کی!] فقط ، بویه اولمقله برابر بوسؤ تشكالاتك اسباب موجب سنی یوق دیمك دكلدر !! علمای متخصصین بونلری (كسبی acquises) و (ولادی congénitales) اولمق اوزره ایکی صنفه آیریورلر . ولادی اولان سؤ تشكالات ، اكثراً - حیات جنیه - ائنا - سنده بر عضو مخصوصك تكامل ایده میوب قالماسندن و (جدائی = ancestral = atavique) بر شكل آلماسندن ایلری کلیوركه بو حاله (وقفه نمو arrêt de développement) دیرلر . (یرتیق - دوداق bec-de-lièvre = طاوشان دوداغی !) ، (حیات داخل رحمی - vie in

(tra-utérine) ده (فك اعلا maxilaire supérieure) ده نیلن اوست چكه كيككك تماميله تكمّل ایده مه سندن ایلری كله بر قصور دركه عضویتك بر شكل طبیعی ابتدائی سنی عرض ایدر. (عمای الوان (cécité des couleurs) (شبكة عینه rétiné) نك ناقص بر درجه تكاملندن نشأت ایدر. دیمك اولویوركه بو نوع قصور لر، یاجدانی بر شكل عضویتك بوكون یكی دن ظهوری در؛ و یا خود (دوره جنینی période embryogénique) حیاتنده بعضی (احوال عارضیه circonstances accidentelles) سببیه وقوعه كمش بر (وقفه نمو) نتیجه سی در. بعضاً (حال ابتدائی یه رجوع retour à l'état primitif) ده بو دیمكدر.

(مبحث جنین embryologie) ده نیلن، اوهم شعبه علمیه تأسیس و ترقی ایتدكدن صوكره، عضویت عالنده (خلاف عاده) كورونن احوال، معقول بر صورتده تعریف اولونه یلمشدر. مشهور (داروین) كاك بو یوك معقبی و شاگردی (پروفیسور هككل Prof. Heäckel) بو خصوصده بر كتاب یازمشدر.

(اصطفای صناعی sélection artificielle) بر (anomalie) یی بر بر صنفه تشمیل ایده یلمش و انواع جدیده وجوده كتیر مشدر. [sélection كله سنه باقیكز!]

(پروفیسور لومبروزو Prof. Lombroso)، بو نظریاتی احوال جنائیه و اخلاقه دخی تطبیق ایتش و مزاج جنایتکارانه یی (حال ابتدائی یه رجوع) صو تیه تعریف ایده مشدر. (جانی طوغش criminel-né) بر آدم، انسان ابتدائی و وحشی نك دركه معنویتنده قالمش اوله رق كوسترلیوركه وقفه نموك معنویاتده مثالی ده بودر.

خسته لقلر دخی - جمله - (anomalie) صنفده داخلدر. شوا اعتبار ايله (مرضی pathologique) تعبیری، (normal) كله سنك ضدّ مقابلی اولور. فقط (anomalie) نك مرضی اوله یلمه سی ایچون وظائف حیاتییه یی سكتهدار ایده بيله جك درجه یه و ارماسی شرطدر.

آچلق حسّك ضعفه و یا خود فقدانیه، بو كله، اصطلاح اولمشدر. اصلی یونانی در؛ (a ادات نفی)، (orexia، اشتها، آرزه) دیمكدر. ارسطونك مباحث اخلاقیه ده چوق قوللاندینی بو (اوره قسیس) تعبیری حکمای اسلامیه (شهوت) كله سیله ترجمه و نقل ایتمشلر و كتب اخلاقیه ده - علی الاطلاق - (مشتهايات) معناسنده قوللانتمشلر در.

اشتهاسزلو، پسقولوج لرجه، بر نوع (ضیاع حس anesthésie) كی قبول اولنقمده در. (حدّ اشباع) دن، یعنی طوقلقدن صوكره طبیعی اوله رق حاصل اولان بو حس، غذایه قارشى رت طویغوسندن عبارتدر. بالجمله (حمّا fièvre) لرده بو حال دائمی در. اشتها سزلقلرك فلسفه ايله او قدر علاقه سی یوقدر. فقط (ایستهری hystérie) خسته لغنده كشی الوقوع اولان بوفرت، خارق عاده احواله باعث اوله بیلیر. مثلاً بویله بر مرض عصبییه مبتلا اولان كیمسه لر، آیلرجه، حتی سنه لرجه یك یه منزله؛ یا خود يك جزئی برشيله كفافی نفس ایدر لرده ینه ضعیف دوشمنلر. یعنی بو اشتها سز لغه، و اوزون مدت آچاغه رغماً (désassimilation انحلال عضوی) غایت بطی اوله بیلیر. بو کیفیت غربیه اكثر ارباب ریاضتده و (تارك دنیا) اولانلرده كورولمشدر. هله هند فقیرلری سنه لرجه آچ یاشایه بیلورلر و ینه بر عصر قدر یاشایانلری واردر. بو (غربیه غریزه anomalie physiologique) یی، مشهور (دوقتور شارقو Dr Charcot) و تابعینی، (ایستهری) یه عطف ايله تعریف ایدیورلر. [تفصیلات ایچون analgesie, rationalisme, anesthésie كله لرینه باقیكز!]

قووقو حس ایتك قابلیتك ضیاعنه دیرلر. بر چوق سببلرله وقوعه كله بیلیر. (محیطی périphérique) و (مرکزی centrale) اوله بیلیر. تفصیلات ایچون (anesthésie) كله سنه باقیكز!]

بوکله هم ریاضیاتده وبالخاصه علم ماکنهده، همده (تشریح anatomie) و (غریزات physiologie) ده قوللانیلیر بر تعبیر اصلاحی درکه بالتمثل علوم اجتماعییه دخی توسیع معنا ایله نقل اولمشدر. تشریحده عضلاته وصف اوله رق ذکری کچر. بعضی (عضله muscle) لر واردرکه (تقلص contraction) ایدنجه بربرینک تماماً عکسی حرکتی حصوله کتیررلر. عینی زمانده تقلص ایده جک اولورلرسه بر عضوی موازنه اوزره طوته جق وضعیتده بولوندورورلر. بودرلو عضلاته (muscles antagonistes) دیرلر. (عضله قابضه و باسطه) کبی، که بولردن بری منلوج اولدوغی تقدیرده اعضای عانده، برطرفه چاریلیرقالیر.

اجتماعیات و سیاسیاتده دخی بوتعبیر قوللانیلیر و اداره امورده موازنه لازمی تأمین ایچون (قوای متعاکسه forces antagonistes) نک وجوبیه قناعت حاصل اولمشدر. سوسیولوژی بو عوامل اجتماعی و سیاسییه نک انواعی و قیمتلرینی تحقیق ایدر. ریاضیاتده (antagonisme)، (synergie) نک ضد مقابلی در. [بوخصوصده تفصیلات ایچون قاموس عمومی نک ریاضی قسمیه مراجعت ایدیکز !]

(conséquent) مقابلی در. اصلی لاتینجه در (ante cedo) ایلری کیتمک دیمکدر. بربرینه مربوط اولان ایکی حادثه نک اولکی سنه (مقدم) و ایکنجیسنه (تالی conséquent) دیرلر. ایستر بو تقدم منطقی اولسون یعنی ذهنده، حین تفکرده اولسون؛ ایسترنه (زمانی) اولسون یعنی بالفعل بر حادثه زماناً دیکرینه حائز سبق اولسون! حادثات متعاقبه آره سنده کی رابطه، علاقه سبیت شکلنده اولورسه، (antécédent)، (سبب) مرادفی اولور؛ (conséquent) ده (مسبب) و یا (نتیجه) مقامنده در. برشیئک، سببتدن اول و قوعی تصور اولونه میه جنی جهته (سبب) منطقاً یعنی تصورده مقدم در. زماناً دخی بالفعل وبالطبع مقدمدر. ایکی حادثه متعاقبه دن مطلقاً مقدم اولانی تالی اولانه سبب عد ایتمک، بعضی

کره باعث خطا اولویور؛ زیرا حادثه نک سبب حقیقی چوق دفعه لر کیزی قالدینی ایچون، سببله مترافق و (ملتف concomittent) اولان بعضی وقوعاتی سبب ظن ایتمک ممکن اولویور. اونک ایچوندرکه مسئله فیلسوفلر آره سنده موجب مناقشه اولمش و سبب حقیقییه (ant. invariable) ده نیلمشدر. (سبب cause) سوزینه باقیکنز.

بوتعبیر منطقده قوللانیلیر و (مقدم) لفظیه ترجمه ایدیلیر. قضایای شرطیه ده برنجی قسمه، یعنی مشروطیه اولان قسمه مقدم دیرلر؛ ایکنجیسنه تالی دیرلر.

(انسان ایسه ک، انسانجه طاوور انمالی یز.) قضیه سنده (انسان ایسه ک) مقدمدر. (ان کانت الشمس طالعه فالتهار (موجود) ده برنجیسی مقدمدر. (فالتهار موجود) تالی در. (قضیه شرطیه Prop. hypothétique) یه باقیکنز.

برسلسله ده اوکجه کلک، تقدمدر؛ اوکجه کنه، ایلک واقع اولانه دخی متقدم دیرلر. بونک مقابلی (تالی) و یا خود (مؤخر) اوله بیلیر. اکلاشیلیورکه بو تعبیرک (تسلسل حادثات enchainement des phénomènes) ایله، یعنی (زمان le temps) ایله مناسبتی وار. [rapport, relation, temps] و continuité کله لرینه باقیکنز !]

فقط، تقدم بالکز (زمانی chronologique) اولماز؛ (منطقی logique) دخی اوله بیلیر. اگر برشی حقیقتاً و بالفعل دیکر بر حادثه دن اول کلیرسه بوتقدم، (زمانی) در. فی الواقع تقدمدر. اگر بربرینه مربوط ایکی شی دوشونولورکن برینی دیکرندن مطلقاً اولدوشونمکده و متقدم فرض ایتمکده بر مجبوریته منطقیه وارسه بوکاده (تقدم منطقی) دیرلر. (سبب cause ی) (مسبب effet) دن اول فرض ایدوب دوشونمکده کی مجبوریته منطقیه کی! کورولیورکه عقلاً اول فرض اولونان برشی منطقاً مقدم صایلیور؛ تصورده اوکا تابع اولان شی ده مؤخر و یا خود تالی عد ایدیلور. مثلاً: (مبادی les principes)، (نتایج les conséquences) ه تقدم ایدر! دیدیکمز

زمان، معنای تقدم (منطقی) اوله رق اکلا شیلما لی در . چونکه مبادی دیدیکمز شیلر اکثریا (مفهومات عمومیه notions générales) قیلنددر . بناء علیه خارجه اونلرک وجودی یوقدرکه بالفعل، یعنی (زمانی) اوله رق متقدم اولمالرینه احتمال تصورایدیه بیلسین . شوقدر وارکه مبادی بی نتایج ایله برابر دوشونورسه که نتایجدن اقدم تصور ایتمکده مضطر قالیرز . او حالده تقدم منطقی، همان دایما (تعبیرات متضایفه termes connotatifs) ده واقع اولور . [terme سوزلرینه باقیکز !]

اصطلاحات فلسفیه ایله مشغول اولوب برکوزل اوافق قاموس ترتیب ایدن (غوبلو Goblot)، (حکم تقدم judgement d'antériorité) تعبیری وضع ایتشدروایی در . ذاتاً - طلاح فلسفه ده (jugement d'exteriorité) واردر ، و پیسیقولوی تعبیراتندن در . تماس ایله ادرك ایتش اولدوغمز برشیک زدن غیری وخارجه موجود بر ماده اولدوغنی دفعه بیلر واکلارزظن ایدیوردق . صوکره اکلا شلادی که بزواماده نك خارجه بولوندوغنی، انحق برقیاس خفی ایله حکم ایتدکن صوکره ، اکلایه بیلورمشز . یالکز (تماس contact) کافی دکل ایش ؛ تعقل ومحا که دخی شرط ایش ؛ ایشته (j. d'exteriorité) بوکا دیرلر . غوبلو بوکیفته تمثیلاً (حکم تقدم) تعبیری وضع ایتشددرکه بر حادثه نك دیکرندن اول وقوعه لیش اولدوغنی تسلیم ایدرکن ویردیکمز حکمدر . بالخاصه حافظه ایله علاقه سی واردر . زیرا زمانی ادراك ایچون اک برنجی شرط وواسطه (حافظه la mémoire) در . حافظه، کچمش بر وقعه یی یاد ایتک ، یعنی احیا ایدوب (حالی actuel) بر صورتده صحنه شعوره دعوت ایتمکدر . مع مافیله اووقعه نك متقدم اولدوغنه حکم ایتدکجه ، انسان بوکونی مدرکاتی دونکی خاطراتندن فرق ایده مز وذهن ، محفوظات ومحسوساتی تشویشن قورتوله ماز . زمان ترتیبی - ذهنتده - قارما قاریشیق اولور . بر حادثه نك (حالی actuel) یعنی شو آنده ادراك اولومش بر شی اولمایوب (خاطرات) قیلندن اولدوغنی تمیز ایده بیلماک ایچون، اونک (متقدم) اولدوغنه وسلسله زمانیه اعتباریه اول کش وکچمش بولوندوغنه حکم ایده بیلمه لیدر . ایشته (jugem. d'antériorité)

بودر . بو حکمده یا کشلق اولورده بر (وقعه ماضیه) بر (حادثه حالیه) کی تلقی ایدیلیرسه بو (غلط حافظه illusion de la mémoire) یه (fause mémoire) دیرلر . [actuel, antécédent, amnésie تعبیرلرینه دخی باقیکز !]

Anthropocentrique

للشبه Anthropocentrique

انسانی اشرف موجودات ومركز کائنات عد ایدن عقیده یه بواسمی ویریرلر . تعبیر، یونانی دن آلمش و صوکر زمانلرده وضع ایدلمشدر . (انثروپوس = άνθρωπος = انسان) (کهندروس = κέντρος = مرکز) دیمکدر . بواعتقاد ، (géocentrisme) ایله صیقی صیقیه علاقه داردر . اوده، شویم ساکن بولوندوغمز کره ارضی مرکز عوالم عد ایتک اعتقادیدر . یاقین زمانه قدر بوطن اذهان عمومییه حاکم ایدی . علم نقطه نظرندن مردود وباطلدر . فقط (تزع علم ودین) سیبیت ویرنک مهم مسئله لردن بری ده بودر . کتب مقدسه نك جمله سنده انسان تکریم ایدلمش اولدوغنی کی، بوتون مخلوقاتک انسان ایچون یارادلمش بولوندوغنی ده یک چوق دفعه لر صراحتاً بیان بیورلمشدر . بو طرز بیانده ظاهر اولان مقصد دینی ، رحمن ورحیم اولان خالق کائناتک انسانه احسان بیوردوغنی نعمتلی تذکار ودایما شکران نعمت وظیفه سنی اخطاردر . نته کیم قرآن کریم ده همان هر سورة جلیله ده نعماء الهیه ذکر و اخطار بیوریلور و : (فای آلاء ربکما تکذبان !) آیت کریمه سی چوق دفعه لر تکرر ایدیورکه معنای منفی (ربکمزک هانکی نعمتلی انکار ایده بیلیرسکز !) تقدیرنده در . بناء علیه هر دینده بواعتقاد ، بر مهم اساسدر . لکن علم ، اصول متخذه سی اعتباریه حسیاتدن ، نعمت ، وشکر نعمت ملاحظه سندن صرف نظر ایدرک مطلوبی انحق تتبع حادثاته قصر و حصر ایله مک مجبور بولوندوغنی ایچون، طبیعی و ضروری درکه علومک حوزه بحث ودائرة صلاحیته بودرلو ملاحظات دینه کیره مز . اجرام سماویه یی موضوع بحث ایدن (هیئت astronomie) ، کائنات عضویه یی تتبع ایدن (علم نباتات Botanique) و (علم حیوانات zoologie) ، کونشک، ییلدزلرک، واثمار واشجار وحیواناتک (نه ایچون

وکیکم ایچون! یارادلمش اولدوغنی آراماز. (نصل؟!) یارادلمش اولدوغنی تحقیق ایدر. علمک وظیفه مقصوره و صحیحه سی انجق بودر. بود اثره خارجه چیقارسه اصولنی اخلال و موضوع بحثنی افساد ایتش اولور. حقیق مادجه دخی حسیه و دینی ملاحظاته یول بوله ماز. علمک بو خصوصده ابکم قلمسه سبب بودر. اک مشروع معذرتی ده ینه بو مجبوری در. تعلیمات دینیه ایله تدقیقات علمیه نک - ماهیتاً و اصولاً - نه قدر متباین شیلر اولدوغنی - بدایت امرده! - تعقل ایدیه بیللمش بولونسه یدی، نه بومسئله ده نه ده امثال سائر سنده نزاع علم و دینه بروسيله ظهور ایدیه بیلیردی!! مع التأسف بومنازعته مشهوره و مضره، قرون وسطاده (یعنی علمک و دینک یاکلش تلقی ایدلکی بردور جهالنده!!) اوروپاده ظهوره کلش وزمانزه قدر سور و کلنمشدر. بوکون روح علمه حقیقه آشنا اولان بویوک عالم، قطعاً بوکی مسئله حرمت ایدر لر و علم ساحه سندن اونلری خارج طوتار لر. بودقت، بر لازمه اصول عدا ایدلمشدر. [géocentrisme لفظنه باقیکنز!]

تصوفده (anthropocentrisme) فوق العاده اهمیتلی بر عقیده در. ده یه بیلیرم که حکمت صوفیه ده (عمده base) بودر.

تصوف نظر نده انسان بر (عالم صغرا microcosme) در. حتی معنویت جامعه سی اعتبار یله اصل (عالم کبرا macrocosme) اودر. چونکه (صورت رحمن و احسن تقویم) اوزره یارادلمشدر. اونک ایچون (نسخه کبرا le grand texte) در. (اسم اعظمک مظهری) در. (برزخ جامع trait d'union qui embrasse tout) در. (حقیقت انسانیه نک بو علوشانی) فی الکلا دینی ایچوندر که کبار صوفیه دن (ابایزید بسطامی): (سبحانی!!). ما اعظم شانی!! دیمشدی؛ معنایی: (کندیمه سبحان اوقویورم؛ بنم شانم نه قدر بویوک ایش!!) دیمکدر.

مولانا جلال الدین رومی؛ انسانک حقیقته خطاباً:

ای نسخه اسرار آیی، که تویی!!

وی آینه جمال شاهی، که تویی!!

بیرون ز تو نیست، هر چه در عالم هست: در خود بطلب، هر آنچه خواهی، که تویی!! دیمشدر.

بوکوزل رباعی نک معنایی شودر: (ای اسرار الهیه نک نسخه می. اولان انسان!! وای سلطانلق جانک آینه سی اولان انسان، (یعنی صورت رحمن اوزره خلق ایدلمش و سلطان عوالم اولان ربک جانیه معکس اولمش اولان انسان!!) عالمده هر نه وارسه، اولردن هینچ بری سندن خارج دکدر. نه ایسترسه کنگدن ایسته، چونکه هپسی سن سک!! بزم مشهور شیخ غالب مرحوم، ینه انسانه خطاباً:

خوشبجه باق ذاتکه کیم زیده عالم سین سن!!

مردم دیده اکوان اولان آدم سین سن!!

دیمشدر. [فضله تفصیلات ایچون: mysticisme, çoufisme و خصوصاً microcosme و macrocosme لفظلرینه باقیکنز!]

بزم صوفیه عثمانیه و علی الخصوص ملامیه بو عقیده یه بک بویوک بر اهمیت عطف ایتشلر و بو وادیده بک چوق منظومه لر یازمشدر. بولردن مثال ایراد ایتک تطویل مقالی موجب اولور. یالکز زمانزدن تقریباً ایکی عصر اول یاشامش و بویوک بر نفوذ معنوی اجرا ایتش اولان (غیبی بابا) نک بر تورکجه منظومه سندن شوایی اوچ سطری عرض ایله اکتفا ایدیورم:

زاهد!! بیل بو عالمی!! - نه در انسان، ایچنده!!

آدم، عالم یوغیکن، - طوغدی بر آن ایچنده!!

بیلدک ایسه بودمی، - حق، بیله کور آدمی؛

اول، عالمک سلطانی!! - قالمه کان ایچنده!!

ملکی در آنک جهان - الی آخره!!

قدمای فلاسفه علی الاطلاق بو اعتقاده میال ایدیلر. رومالی مشهور (چیچرون Cicero)، بو عقیده یی تحکیم ایچون غریب برطرز استدلال ایجاد ایتمشدر: (دنیا ده نه وارسه، اونلری کندی منفعتنه موافق بر صورتده استعمال ایتمه سنی بیلن یالکز انساندر. هرشی اونک ایچون یارادلمشدر؛

چونکه انجق او، هرشیدن استفاده ایتک یولنی بیلور. زیتون، اوزوم (الی آخره!) کبی شیلردن حیوانات استفاده ایده مز؛ احتمالکه سرقت ایدر. فقط بونلر و حیوانات یالکیز انسانک مالی در.) دیور.

بشریات (مبحث انسانه) Anthropologie

فرانسزجه و المانجه Anthropologie

انگلیزجه Anthropology

ایتالیانجه Anthropologia

Anthropologie

یونانی ده (آنثروپوس = *άνθρωπος*) انسان، (لوغوس = *λόγος*) دخی کلام، بحث دیمکدر؛ صوک زمانلرده احیا ایدلمش اولان بواسکی تعبیر، اوایی کلمدن ترکیب ایدلمشدر. (علم انسان و انسانیتک تاریخ طبیعی سی) دیمکدر.

ارسطو، بو کلمنی قولانمش، فقط تامایله موضوعنه توفیق ایده مه مشدی؛ بوکون بیله بو تعبیر مختلف معنالره تلقی ایدیلور. هر انسان مدنی، حتی باشلیجه علمای متخصصین بیله بونی درلو درلو آکلیور و اکلا دقاری کبی استعمال ایدیورلر.

اون آلتنجی واون سکزنجی عصر میلادیده (آنثروپولوژی) تشریح و فیزیولوژی دیمکدی. مع مافیه دیگر بر فرقه علما بونی علم روح و اخلاق ایله بر طوتمقده ایدی. (قانت Kant) بومبحثه داتر بر کتاب یازمش و فقط انسال بشریه نك وعرفلرك منشأنی تحقیق ایدرکن، مسئلهنی منحصر آ پسیقولوژی نقطه نظرندن مناقشه ایتمشدر. اوزون مدتدن بری بو علم، انسانیتک تاریخ طبیعی سی اوله رق تلقی ایدلمش اولدوغی حالده، بو تعریف، (نظریه *théorique*) قالمش واون طوقوزنجی عصر میلادینک بدایتلرینه قدر، انسانیتک تاریخ طبیعی سی اصولی دائره سنده - تدقیق ایدلمه مشدی. فرانسر علماسندن (پول بروقا Paul Broca) آنثروپولوژی به بر علم مخصوص حیثیتی ویرمکه شهرت شعار اولمش، و بو وادی ده یک مهم کشفیاتده ظفر بولمشدر. بو عالمک فکر نجه، آنثروپولوژی نك موضوعاتی، اول (انسال بشریه نی تتبع *l'étude des races humaines*)؛ صوکره انسال مذکورده نك تشریح،

فیزیولوژی و پسیقولوژی سنی بر برینه قیاساً مطالعه ایتک و فضله اوله رق، عینی زمانده (مدنیت انسانیه نك منشألری *les origines de la civilisation humaine*) حقدنه تحقیقاته کیریشمکدر. فرانسرلر حالا بو علمی بو معنا ایله تاقی ایدیورلر و دائره تعلقی خیلی کدیش طونویورلر؛ شو تقدیره کوره (آنثروپولوژی) - معنای قطعیمی ایله - بر علم اولمقدن زیاده بر مبحث مخصوص (*monographie*) اولمش اولویور. انسانه و انسانیته - اوزاقدن، یاقیندن - علاقه سی و ارتباطی اولان بر جوق مسائل حل ایده بیلیمک ایچون بر جوق علومک دائره اختصاصنده اجرای تحقیقاته مجبور و محتاج بولونویور. فی الحقیقه انسال مختلفه نك (شماثل ممتازه *caractères distinctifs*) سنی تعیین ایده بیلیمک ایچون (تشریح تطبیقی *anatomie comparée*) ایله مشغول اولمق، و نتایج تحقیقاتندن استفاده ایتک لازم کلیور. حتی بوتبعات، (مبحث قحف *crâniologie*) نامایله بر شعبه علمیه نك تولد و تشکله سبب اولویور. اوندن صوکره، مدنیتک منشألری تحقیق ایتک ایچون (قبل التاريخ *la préhistorique*) نامایله دیگر بر شعبه علمیه تشکیل ایدیلور. حالبوکه بونک دخی (علم مستحاثات *paléontologie*) ایله، (تاریخ *histoire*) ایله (علم اقوام *ethnographie*) ایله حتی (علم سجانیا *éthologie*) و (پسیقولوژی تطبیقی *psychologie comparée*) ایله صمیمی علاقه لری وارد.

مدنیت انسانیه نك منشألری تدقیق خصوصنده فوق العاده چالیشان و بویوزدن (آنثروپولوژی) یه بویوک خدمت لر ایدن مشهور (طایلار Tylor)، بو علمدن بحث ایدرکن:

[اونک وظیفه سی، انسانه دائر بالجله علومک عرض و ابراز ایتدیکی معلوماتی جمع و تلفیق ایدرک - انسانک یر یوزنده ظهورندن بو آنه قدر کچن حیات تاریخیه سنه و طبیعت جسمانیه و معنویه سنه دائر - ممکن اوله بیلدیکی قدر مکمل بر نظریه ترتیب ایله مکدر. فقط بالخاصه تشریحدن، تاریخندن پسیقولوژی دن، فلانندن بحث ایتک دکدر.] دیورکه طوغر و سی ده بودر!.. تاریخ علم و فلسفه ده تحقیقات جدید و وسیعه سی مسلم اولان (سرو بیلیم هاملتن) بو کلمه حقدنه شو معلوماتی ویریور:

((اوتو قاصمان Otto Cassmann)) نام مؤلف - تقریباً (۱۵۹۶)

سنه ميلاديه سنده ! - على الاطلاق علم بشر ايجون بواسمی وضع ايتشدرد .
 بوذات ، اونی ايکيه تقسيم ايدیور : برنجیسی (psychologia) درکه
 ذهن بشر حقهده تدقیقات اجر اسيله موظفدر . ايکنجیسی دخی (somatologia)
 یعنی مبحث جسم (درکه انسانک منحصرأ بدننه تعلق ایدن بالمله خصوصاتی
 موضوع بحث ايدر . بو علم حالا بوکون آانیاده بوتقسیماته کوره قبول
 ایدلش وهرایکی قسمی ده عینی اسملرله یاد اولونمقده بولونمشدر . }

بوکله نك معناسنده و - بر علم مخصوص اسمی اوله رق - وجه تلقی سنده
 کوروان شواختلافات ، آز چوق طبیعی در . چونکه اسمی اسکیدن بری
 موجود اولمله برابر علم یکی در ؛ هریکی علم ده واقع اولدوغی کی ، آنزوپولوژی
 دخی ، هنوز دائره تعلقی قطعاً تعیین ایده مه مش ، کندي حقيله طوپلايه مامش ،
 و همیماً علاقه دار بولوندوغی برچوق علوم سائر ايله حدود متقابله سنی
 صریح بر صورتده هنوز چیزه مه مشدر . يالکر بالمله علما شو معناده
 متفق درلرکه بوعلمک موضوعی - بالمله حیثیاتی ايله - انساندر . بناء علیه آنزو -
 پولوژی ، [انسان حقهده هر درلو معلومات لازمه یی جمع وتلفیق ايدرک اونک
 تاریخ طبیعی سنی وجوده کتیرمک] ايله مکلفدر . اونک ايجوندرکه :
 (C'est une étude synoptique de l'homme physique et moral)
 تعريفنده بوتون علما اتفاق ایدیورلر .

Anthropo -
morphisme

مشبه ، مجسمه Anthropomorfisme

Anthropomorphisme فرانسزجه

Anthropomorphismus المانجه

Anthropomorphism انگلیزجه

Anthropomorfismo ایتالیانجه

یونانی ده (آنثروپوس = άνθρωπος) انسان ، (مورفی morphé)
 شکل دیمکدر . بوتعیر ، بوايکی کله یونانی دن ترکیب اولونمشدر ، و (تاریخ
 ادیان (l'histoire des religions) اصطلاحاتنددر .

(animisme) کله سنده ویردیکم تفصیلات ايله (حسن دینی le sentiment
 x) irleu نك منشأ ظهیدی وادیانک مهوری حقهده سوسیولوژی علماسنک



ملاحظات مخصوصه و فرضیات علمیه سنی عرض ایتشدم [اوکله یه یاقیکز !]
 (قوای طبیعی یی تشخیص وتألیه ایتک diviniser et personnifier les
 forces de la Nature) میل جبلی سندن (مجسمه) عقیده باطله سنک سبب
 وصورت تولدی اومقاله ده کوسترلمشدی . بونک بوکونی اقوام وحشیه وقبائل
 قبل التاریخیه ده (دین) حکمنی حائر اولدوغی وعاداته ، اخلاقه ، قواعد
 و اصول معاشرته ، ضایعه وبالاخره مدنیه پک بیوک بر تأثیر عمومی اجرا
 یتش بولوندوغی ده ایضاح ایدلش ایدی .

فی الحقیقه (آنثروپومورفیزم) ، انسانیتک مراتب اعتقاداتنده
 (animisme) دن صوکره کلیر بردور معنوبت در ؛ کندينه مخصوص برمدنیت
 دخی تولید ایتشدرد . بومدنیتک الکالی مثالی یونان قدیمده کوره بیلپورز .
 بوکا (civilisation paganiste) دیمشدر درکه بز اونی (مدنیت وثیه) ده
 ترجمه ایده بیلپرز . آوروپا علماسی دییورکه بویله بر مدنیت ، صنایع نفیسه نك
 انکشافات وترقیات فوق العاده سیله ممتازدور . زیرا (هیکل تراشلق sculpture) ،
 (معماری architecture) ، (رسم dessin) ، (نقش peinture) ، (رقص danse)
 و (موسیقی musique) ، هپ بو اعتقاد الجاسیله طوغمش و اوسایه ده ترقی
 ایتشدرد . بومسئله لری پک جدی وفیله وفانه برنظرله تتبع ایتش اولان
 (هربرت سبنسر) بو ادعاده بولونویور ، و صنایع نفیسه نك (anthropo-
 morphisme) ايله صیق ، اساسی وتاریخی برمناسبتی اولدوغی بیان وایضاح
 ایلپور .

مدنیت اسلامیه ده معمارلق ، قلمکارلق و صرف تزیناته عائد نقوش
 حیرت بخش بر درجه کماله واصل اولش بولوندوغی حالده ، صنعت تصویر
 وهله هیکل تراشاغک پک ابتدائی بر درکده قلمش اولماسنی (عرب مدنیتی
 تاریخی مؤلفی) دو قنور (کوستا ولوبون Guş. Lebon) احکام جلیله
 اسلامیه نك تأثیرینه و - عبده اصنامه تقلید حرکندن ! - امتناع گفیتنه
 عطفأ تعریف ایدیورکه طوغشو کورونور و (سبنسر) ک بوبابده کی
 ملاحظاتی تصدیق ايدر بر فکر در .
 کذلک ، (آوروپاده سکر عصر سورن بردور تعصبی متعاقب - ینه یونان

قدیم مدنیته رجوع ایله - (دور انتباه = Renaissance) ی فتح ایدن یی ایتالیان مدنیته، صنایع نفیسه ده و علوم طبیعی ده خارق العاده انکشافات و ترقیات ایله ممتاز اولماسی عینی دعوائی اثبات ایده بیلیر بر دلیل صایلیسه کر کدر .) ده بن مورخ لر پک چو قدر .

فی الحقیقه دین مبین اسلامک - هر درلو ترقیات مدنیته یی تشویق ایتیمکه برابر - بالخاصه تصویر و هیكل تراشلق صنعتلرینی منع ایتمه سنده کی حکمت ، (مجسمه) دن اجتناب نه مینی در ؛ ده نیله بیلیر .

تاریخ ادیانده (مجسمه) و (مشبهه) تعبیرلرینک پک بویوک بر اهمیتی واردر . هر دینده بو عقیده ضالّه اربابنک ظهوری و بر مذهب مخصوص تشکیل ایتدیکی کور و لمشدر .

بشنجی عصر هجری علمای بنامندن (محمد شهرستانی) مرحوم (ملل و نحل) نام کتاب مهمنده، دین اسلامک یتیمش اوچ فرقه یه انقسامی - مشهور بر حدیث شریفه عطفاً - تشریح ایتدکدن صوکره (فرقه ناجیه اهل سنت) دن ماعدا یتیمش ایکی فرق ضالّه یی صنفلرینه تقسیم ایدوب ، هر بری حقنده یکان یکان معلومات و ایضاحات نافع و یرییور . بوصیره ده (مجسمه) و (مشبهه) فرقه لرینه دأثر ملاحظاتی پک مهم و شایان دقتدر . اسلامیه ادعای منسوبیت ایله بن بر طاقم مذاهب ضالّه ده بو (anthropomorphisme) اعتقاد باطنک نه شکل اوزره جلوه ایتیمش بولوندوغنی کو سترمک ایچون ، مؤلف مشارالیهک تورکجه یه مترجم اولان اثرندن بورایه بعضی سطر لر نقل ایدیورم، واک غریب اولانلرینی ده مثال گتیریورم . فرضا :

«... بونلردن بری مغیره در ؛ و بونلر (مغیره ابن سعید العجلی) نام برکسینه نك اصحابی در . و اول ملعون بی دین دیدی که : حق تعالی نوردن بر رَجُل صورتنده در ، و باشند نوردن تاجی واردر . الخ »

محمد شهرستانی ، (فرق شیعیه les sectes schiites) میاننده ده بعضیلرینک بو اعتقاد متمسک اولدقلرینی ذکر ایدیورم؛ حالوکه بو آریجه بر فرقه دکل عمومی بر (دور اعتقادی) صایلیر .

«... و بریسی (هشام ابن سالم الجوالیقی) در ؛ و انلر، خدائک - تعالی عمّا یقوله المشرکون !! - جسد اولندوغنده اتفاق ایتدکدن صوکره ، اختلاف ایتدیلر . (ابن حکم) دیدی که الله ، طول و عرض و عمق برابر در ؛ ولکن اول ، مخلوقاتدن برینه بکزه مز ؛ و دخی مخلوقاتدن بری اکا مشابه دکلدر . و آندن نقل اولوندی که اول [یعنی جناب حق !] کندی قاریشی ایله دیدی قاریشدر ؛ و اول مکان مخصوصده در ، و جهت مخصوصده در ؛ و متحرک اولور ؛ و حرکتی فعلی در ؛ بر مکاندن بر مکانه نقلی دکلدر ؛ و اول ، ذات ایله [یعنی ذاتی اعتباریله !] متناهی در ؛ و قدرت ایله متناهی دکلدر ؛ و عرشیی مماسدر . [یعنی عرشه تماس ایدر ؛ و طورور !] الی آخره !..

«... بر دیکری بنانیه در و بونلر (بنان ابن سمعان الهندی) نام کسینه منسوبلردر ؛ و اول ، دیدی که : خدای انسان صورتی اوزره در ؛ و ذاتندن غیر ی باقی یوقدر . » الی آخره !..

(گرامیه) و ده ها بر چوق فرقه لرده واردر که هپ بو عقیده باطله یه باغلا نمیشلدر و حاشاء اللهی (لحم و شحم و دم دن مرکب بر جسد مجسم) اولمق اوزره تصور ایتمشلدر . موافقه دخی اذکری کچر .

الهیاتده ایقاع ایتدیکی مسائل مختلفه ایله ، برقات ده اهمیتی آرتدیرمش اولان بو عقیده سخیفه نك یالکز (دین اسلام تاریخی) ایله دکل هر دینک تاریخ تکاملی ایله صیقی صیقی به علاقه سی واردر . مثلاً خرسیتیانلقد دخی مجسمه و مشبهه فرقه لری پیدا اولمش و بونلر دخی اعتقادات باطله لرینی طبقی شرقلیلرکی ، عینی دستورلرله ادا ایتمشلدر .

اوچ بویوک جلددن مرکب ، مکمل بر قاموس فلسفی وجوده کتیرمش اولان بر امریقا هیئت علمیه سنک طبع ایتدیرمش اولدوغنی بو اثرده شوسوزلر شایان نظر در .

«بومسئله نك تاریخی پک مشوش در . بناء علیه بوراده مختصر آتلخیص ایدیله مز . یالکز شوقدر ده نیله بیلیر که (مجسمه) اعتقادی ، (فهقی شیزم) = fétichisme = یعنی بو جکله طاش بارچه لرینه طایمق ! ، (طبیعه طایمق) = Nature Worship) و (شامانیزم chamanisme) یعنی ماغول و تیت

اهالیسنک اعتقادی) نه بر درجه فائق اولمق اوزره، تاریخ ادیانده بر صفحه مخصوصه تشکیل ایدر. خرسیتیان دینک تاریخ تکاملنده (غلاة مجسمه)، (آندی یهـ = Andians) دیدکری فرقه ایدی که در دنجی و بشنجی عصر میلادی ده ظهور ایدوب قوت بولمشدر. بونلر، تورانی، حرفیاً تفسیر (یعنی معنایی ظاهره حمل ایله تعبیر!) ایدرلر، و کتب مقدسه ده کچن (یدالله) ودها بو کبی تعبیراتک (یعنی متشابهاتک!) حرفیاً ترجمه وتلقی ایدلمه سی، لزومنده اصرار ایلرلردی!...

مجسمه اعتقاد ابتدائی سی، انسانیت غافله ایچون پک طبیعی بر تصور باطل اولمق حیثیتیه، (مطلقاً متشابهاتی حرفیاً تلقی ایتمکدن تولد ایتمشدر!) ده نیله منر ایسه ده، شبهه یوقدر که متشابهاته معنا ویرمک میلی ایله - بر طرفدن تأویلک، دیگر طرفدن مجسمه اعتقادینک - صحیحاً علاقه سی واردر. مجسمه فرقه لرندن همان جمله سی بواعتقاد سخیفی مدافعه ضمنتده متشابهات ایله استدلال ایتیش لردر؛ حالبوکه (ملل ونحل) ترجمه سنده بو بحثه تعلق ایدن شوایکی سطر، فوق العاده جائز اهمیت اوله رق، مندرج بولونویور:

«... متشابهاتده سلفک وائمه اربعه تک مذهبلری بودر که: آنلری ظاهرلری اوزره ابقا ایدرلر وانلرده تشبیه و تأویلدن اجتناب ایدرلر!...»

اوروپا الهیوتنک چوغنی بو فکرده در. حالبوکه (وهیت لی Whately) [بونلر تشبیهاتدر.] دیر. کتاب کریمک امر صریحنه مطاوعتاً، متشابهات بحثده توقف ایدن علمای اهل سنتک، شو حرکتنده کی حکمت ایشته بوا اساسه مبنی در. زیرا متشابهات مذکورده یی حرفیاً تلقی ایتمک، مجسمه اعتقادینه پیوسته اوله جفی کبی، تأویل جهتنه کیتمک دخی بهمه حال باطنیه وادیسنه واره جفی جهته اجله علما، تنبیها قرآنییه تامی رعایتده طریق سلامت ونجاتی بولمشلر ومتشابهاتدن بحث آچامشلردر.

حکما و الهیون (معتزله les mo'tazalites) بو طور احترازده غلو درجه سنه وارمشلر و مجسمه و مشبهیه بکزمه مک تقیدیه (صفات الهیه les attributs divins) نک مستقلاً موجود اوله بیلمه سنی دخی شدته انکار ایتیشلردر. بو سببیه در که بو فرقه عاماسی جناب واجب

الوجوده آریجه (حیات)، (قدرت)، (علم)، (سمع)، (بصر) کبی صفاتر اسناد ایتمکدن چکینیرلر ویا لکنز: (سمیع وبصیر وعلیم در!) دیمکه اکتفا ایدرلردی. (التوحید اسقاط الاضافات) دیدکری ایچون کنیدلری (موحد unitarien) تسمیه ایلرلردی. (کندی صفاتمزی جناب حقه اسناد ایدرکن اونلری واقعا نامتناهی بر درجه کالده تصور ایدوب، اوندن سوکره اسناد ایدیوروز. مع مافیه بودخی صرف انسانی وغندی بر دوشونجه در. خالق کائنات هر دلرو اوصاف وتصوراتدن منزهدر.) دییورلردی. بوا دعا (agnosticisme) فلسفه سنه طایانیر. [بو کلهیه باقیکنز!] صوفیه دخی (نفی صفات) بحثنده معتزله ایله متفق در. بو طورک سببی، علی العموم مجسمه و مشبهیه بکزمه مکدن اجتناب خصوصنده افراط تقیددر. مفسرین اسلامیه تک اک مشهوری و (کشاف) نام تفسیر کیرک مؤلفی (علامه زمخشری) بو خصوصده شدت تقیدیه معروفدر. مومی الهیک (رؤیت الله) مسئله سننده افکار و اوضاعی الهیات اسلامیه ده عظیم مناسقاتی و ولوله یی موجب اولمشدر.

عثمانی شاعر مشهوری عبدالحق حامد، (تولو) نام اثرنده:

اویوب بلاهتیه، بن، نه تسلیت بولدم،

خدایه عز و صفت برله خود صفا تمدن

دیمش، بو بوم مسئله ده معتزله کبی شدت تقید کو سترمشدر.

اللهه صفات اسناد ایتمک مجبوریتنک مجسمه و مشبهه اعتقادینه پیوسته اوله جفی، بعضی اوروپا حکما سی ادعا ایتمشلر و مع مافیه الهیاتده صفات بحثندن صرف نظر ایتمک ممکن اوله مایه جفی ده علاوه ایله مشلردر. بواللهیون: (ذات الوهیت personnalité divine) ده اساساً صفات مندمجر؛ اونک ایچوندر که ذات ایله صفاتی بر برندن آیرمق قابل اوله ماز!.. دییورلر که اهل سنتک اوتهدنبری: (صفات، ذاتک نه عینی در؛ نه ده غیری در!) دیدیکی بودر. یالکنز اوروپا الهیون حاضره سی بو بحثک (وجودیه panthéisme) و (الهیه théisme) مسئله لریه پک مهم و اساسی بر رابطه سنی بولوب ابراز

ایتمشدر در . (تفصیلات ایچون immanent و transcendental سوزلرینه باقیکنز !)

کورولویورکه بوتون بویوک فیلسوفلر عقائد دینیّه بحثنده - کیتدکجه - مجسمه و مشبه دن تباعد ایتمه و حتی (agnosticisme) حدودینه یا قلاشمغه چالیشیورلر . برچوق کشیلر ادعا ایدیورلرکه عقاید دینیّه نك مرتبه کالی ، مجسمه دن درجه تباعدیه متناسبدر .

علوم اجتماعیه دائره سنده فلسفه ایله تقید ایدن متفکرین ، مجسمه و مشبه اعتقادی کمال دقت و اهمیتله تتبع ایدرک ، بونك منشائی آرامشلر . بالخاصه (هربرت سپنسر) بومسئله ایله چوق اوغراشمش و حقیقه بر فرضیه ترتیب ایتشدرکه سوسیولوژی ده مشهوردر . سپنسر ك ظنجه مجسمه دركه اعتقادی سنده قالان اقوام ، الهی دائما بر رئیس مستبد و بر حاکم مطلق کی تصور ایدیورلر . [عثمانلی شاعر لرینك الکبلی اولان مرحوم توفیق فکرتك ، علی الاطلاق مجسمه اعتقادی تزییفاً یازمش اولدوغی منظومه تاریخیه ، سپنسر ك فرضیه مشهوره سنی تحکیم ایدر بر آبدشه شعریه دركه باشقه لسانلرده نظیری کوچ بولونور .

Anticipation سابقه ، سبق

Anticipation

Anticipation	فرانسوزجه و انکلیزجه
Anticipazione	ایتالیانجه
Erwartung	المانجه

بوکله ، لاتینجه (anticipatio) دن آلمشدر . بوده (ante capere)

لفظ لرندن کلیرکه (اولدن آلق ، یعنی برشی هنوز واقع اولمده دن اونی تلقی ایتک) دیمکدر . فقط بوتعبیری اك اول اصطلاح اوله رق وضع واستعمال ایدن ذات (فلسفه ماده Ph. matérialiste) نك مؤسسی (نه پیکور Epicure = قبل المیلاد (۳۷۰ - ۳۴۱) در . یوفیل سوفک (پرولیپسیس = πρόληψις) دیدیکی (anticipation) ، (ماد یون les matérialistes) ایله (رواقیون les stoïciens) عندنده بك مشهور و مهم بر تعبیر فلسفی اولمش و رومالی (جیچهر وون Cicéron) ، اوکا قیمت ویره رك لاتین لساننه نقل ایله مشدی .

بوکون بوکله یی ، فلسفه لسانی ، اقلی اوچ وجهله تلقی ایدیور . نه پیکورك تعریفی ، معنای تاریخیسی در . اولا اونی ایضاح ایده می :

(بول Buhle) ، (فلسفه حاضره تاریخی his. de la phil. mod.) نك برنجی جلدنده تعبیر مذکوره دائر شو معلوماتی ویریور :

« اشیانك حواسمز اوزرینه اجرا ایتدیکی تأثیرات ، ذهنمزده بر طاقم (ایزلر traces) بر اقیق ؛ و او شیلر بزه یکی باشند معروض اولونجه - اونلر ك ینه اسکی بیلدی کمز شیلر اولدوغی - او ایزلر سایه سنده اکلارز . یکی کوردو کمز شیلر ، اسکی خاطر اتمزه قیاساً ملاحظه ایدرک فرقلرینی دخی ادراك ایدرز . مثلاً ایلک دفعه اوله رق بر حیوان کورسه ك ، بوحیوانك حواسمز اوزرینه اجرا ایتدیکی تأثیرات ، ذهنمزده بر طاقم ایزلر بر اقیقکه اونلر بزم ایچون بر (انموزج type) اولغه خادمدر . بالاخره عینی حیوانی تکرار کورونجه - بویکی مشاهده مزی - ذهنمزده محفوظ بولونان اواسکی نمونه تطبیق ایدرک طایرز ؛ وینه عینی حیوانی کورمش اولدوغمزه حکم ایدرز . ایشته ، بویالک نمونه و صوکره کی تأثیر اتمزك اوکانسبته ، (نه پیکور) ، (سابقه فکرت l'anticipation d'une idée) دیر ایدی . ایشته (مشاهدات حاضره observations actuelles) مزك اسکی نمونه فکریه سیله (مشابهت ressemblance) نی ، (فرق différence) نی (عینیت identité) نی بوسایه ده تقدیر ایدوب آکلارز . »

نه پیکوره عطفاً تصریح اولونان شو تعریفه کوره (anticipation) دیمک ، عینی جنسیدن اولان افراد متعدده یی ایلک نمونه فکریسینه قیاساً طایقی ؛ و آرده کی اوصاف متشابه یی تعیین ایتک ؛ و بو (سابقه علم) سایه سنده ، تجربه دن اول برشی حقیقه حکم ایده بیلیمك دیمکدر . مثلاً بر بالیغك نصل بر حیوان اولدوغی بالتجربه کوردو کدن و (بالیق) حقیقه بر فکر حاصل ایتدکدن صوکره - هنوز هیچ کورمه دیکمز - دیگر بر بالیق حقیقه حکم ایتک و فرضاً : (صوده یا سایه بیلیم سی ایچون همه حال (غلصه) لری اوله جقدر ؛ یوزه بیلیمك ایچون (مسبحه) لری اوله جقدر . الخ ! .) دیمک (anticipation) در . چونکه برشی هنوز کورمه دن او شیثك (نمونه

جنسی (type générique) سی حقنده اولجه حاصل ایتش بولوندوغمز بر فکر سایه‌سند، تجربه‌نی (anticiper سبق) ایده ک بر حکم ویرمکدر. بویک مهم بر قابلیتدر. زیرا اولجه (analogie تمثیل)، ثانیاً (مقایسه comparaison)، ثالثاً (تصنیف classification) بو سایه‌ده ممکن اوله‌بیلیر؛ وجه‌دن اهم اولان کیفیت شوکه، (استقرا induction)، بو اساسله مستنددر. لکن دوشونولورسه جمله‌سک نقطه استنادی (حافظه la mémoire) در. زیرا حواس‌سملزه تلقی ایتدیکمز (ایلك تأثرات les premières impressions) ی، ضبط و قید ایتک خصوصده عضویتک بر استعداد جبلی سی اولماسه‌یدی، نه تمثیل و مقایسه‌یه، نه‌ده تصنیف و استقرایه مقتدر اوله‌بیلیردک! اونک ایچوندرکه نپیکورک احداث و وضع ایتدیکی بو تعیر اصطلاحی کمال اهمیتله تلقی اولونمش، حتی یالکیز بو کله ایچون رساله یازانلر بولونمشدر.

[بوتون بو تعیراته باقیکنز!]

احکام فلسفیه و (نظریه معرفت. théorie de la connais) اعتباریه دکل، انجق (مبادی اخلاق principes moraux) اعتباریه مادیوندن فرقی طاورانان رواقیون، بو تعیری آلمش و (بر ماهیت کلیه‌ک بر تصور طبیعی سی conception naturelle de l'universel =) دیه تعریف ایتشدر؛ دستور یونانی سنی (Κοινὰ ἐννοιαὶ, φυσικὰ προλήψεις) جمله‌سیله مضبوطدر. شو تقدیرجه (anticipation) جزئی به باقوبده کلی به انتقال ایتک دیمک اولور؛ و بوراده (انتقال) کله سی، (پروایپ سیس) تعیر یونانی سنی حقیله ادا ایدر. بو صورتله تلقی ایدیلنجه (anticipation) بر (استقرا induction) دن عبارت قالیر؛ زیرا استقراده (و تیرداستدلال procédé de raisonnement)، جزئی‌آدن کلیاته انتقال صورتیه تشمیل حکمدر.

مع مافیه بعضی بویوک فیلسوفلر بو کله‌ک معناسنی نپیکورک اکلا دینی کبی تلقی ایتمه‌مشلردر. (جزئی‌ده کلی‌نی کشف ایتمکدر) ظن ایله‌مشلردر. بو ممکن در؛ بوکا برشی ده‌نیله‌مز! چونکه بر فیلسوف، بر تعیری کندی

دوشونجه‌سنه کوره بر حیثیت معنا ایله تلقی ایدرسه معذوردر. فقط بر کله‌ک واضع حقیقی سی اونی نه‌معنا اوزره وضع ایتش ایسه، کله‌ک تاریخ فلسفه‌جه معنای اصلی سی ایشته اودر. اسکمی معناسی ایله یکی سنی قاریشدیر مق، مضر و فاحش بریا کشلوق در. خطا، تاریخ فلسفه‌یه تعلق ایده‌جکی جهته تصحیحه شایاندر. (سرویلیام هاملتن) بونی نظردقته عرض ایدیور؛ و: «رواقیونک، هله (نپیکوریون les épicuristes یعنی اسکمی مادیون!) ک

(conception naturelle de l'universel) دیدیکی، بر (تعمیم بعدی généralisation a posteriori) دن یعنی بر (استدلال استقرائی) دن عبارتدر. بو سوزک معناسی باشقه برشی فرض ایتمه‌لی در. حالبوکه بر چوق کشیلر ازان جمله (لیپ‌سیوز Lipsius) و (لایب‌نیچ Leibnitz) رواقیونک بو تعیری تفسیرده بویه بر خطایه دوشمشلردر. «دیور. بن ظن ایدیورم که بو خطا، افلاطونک (ماهیات و مثل idées prototypes) حقنده کی ملاحظاتی (anticipation) ایله بر طوتمقدن ایلری کمشدر. معلومدرکه افلاطون، (یالکیز بر فردی، برشیئی کورمکه، اوشیده، او فردده بر جنسک ماهیت کلیه‌سنی، حتی مثال‌کالی کشف ایتک) امکانه قائلدی، و کویا نظر حکیم بونی کشف ایتمکه مکلفدی! ایشته افلاطونک بو فکرینی، نپیکورک (پروایپ سیس) دیدیکی (سابقه تجربه) ایله بر طوتمق، بو خصوصده واقع اولان خطانک منشای در؛ صانیرم.

سرویلیام هاملتن حقی در؛ و ابراز ایتدیکی خطا چوق مهبدر؛ چونکه افلاطون کبی دوشونولورسه (قبلی apriori) بعضی مبادی به اینامق و اونلری منشأ معلومات اوله‌رق قبول ایتک ضروری در. حالبوکه (anticipation) ی نپیکورک تعریفی و رواقیونک تلقی سی وجهله قبول ایدنجه، (مبادی قبلیه principes aprioriques) نی تماماً و اساساً انکار ایتک و تجربه‌نی منشأ معلومات اوله‌رق تلقی ایتک اقتضا ایدر. یعنی - او تقدیرده (anticipation) ک انجق (بعدی a posteriori)، (بر طرز استدلال un mode de raisonnement) اولدوغنی تسلیم ایتک لازم‌کلیر. بوده عینی تعیری تمامیه متناقض ایکی معنا ایله تفسیر ایتک دیمک اولور. چونکه (apriori)

ایله (aposteriori) تمامیه بربرینه ضد ایکی طرز استدلالدر. [بوتعبیراته باقیکنز؛ تفصیلات واردرد !]

(قانت Kant) دخی بوکا پک زیاده اهمیت ویرمش و تنقید عقل صرف anticipation de (critique de la Raison Pure) نام اثر مشهورنده (l'expérience = anticipation der Wahrnehmung) ترکیبی قوللا- نهرق تشهیر ایتشدرد. بوفلسوف مجدد، بوتون معلومات بشریه نک تجربه دن منبعث واوندن متولد اولمش بولونماسی حقنده (فلسفه تدریبه phil. empirique) نک ایلری سورمکده اولدوغی ادعای قبول ایده مه مشدی . بالعکس، قوتله ادعا ایدیوردی که انسانده، هر درلو تجربه یه (متقدم antérieur) بعضی (مبادی* عقلیه principes rationnels) واردرد . تجربه لزومی الهام ایدن، تجربه یی ترتیب واداره ایله بن، اصل اونلردرد . بناء علیه اونلر تجربه یه (سبقت anticiper) ایدر؛ وایتمک لازمکلیر ! مثلاً : [ماده نک آنحق تبدلاته اوغرایه بیله جکنی و فقط قطعاً محو و مضمحل اولمایوب عینی مقدارده قاله جغنی؛ - تسلسل حادثاتک بر جریان مطرده تابع اولدوغنی وایله اولماسی لازم کله جکنی؛ بر (عقیده اساسیه)، بر (مبدأ تجربه) اوله رق قبول ایتهدکجه تجربه ممکن اوله ماز . بناء علیه بوکبی عقائد اساسیه برطاقم مبادی* عقلیه نک دستورلری در . بز اونلره استناداً و اعتماداً تجربه یه تشبث ایدرز وایددیغمز تجربه لر، اودستورلرک حقیقتی هر دفعه سنده اثبات و تحکیم ایدرلر . بناء علیه اونلر (قبلی apriori) در . یعنی تجربه یه متقدم برطاقم حقایق عقلیه در . [دیوردی . قانت بونلری تدقیق و تصنیف ایتشدرد . بومبادی* نظریه نک بری (Analogien der Erfahrung = analogie) - کله سنده معنای ایضاح de l'expérience تمثیل تجربه) در که (analogie) کله سنده معنای ایضاح اولونمشدر . ایکنجیسی ده - بحثی صد دنده بولوندوغمز - (سابقه تجربه - les anti-cipations de l'expérience) در . قانت، بونک دستورینی ویریور : (هر حادثه - نک شدت اعتباریه بر کمیتی، یعنی بر درجه سی و اودرد . (Tout phénomène a une quantité intensive; c. a. d. un degré) دیور؛ و دیمک ایستورکه : [بونی بویه بیلمک و قبول ایتک اول امرده لازمدر که تجربه

یایله بیلسین واداره ایدیله بیلسین .! چونکه بوفکر، تجربه ایله اکتساب اولونه ماز . قبل التجربة ذهنزده موجود بر عتقادرد . بونلری قانت، (صرف مدر که نک مبادیسی Grundsätzen des reinen Denkens) عدا ایتشدرد . علم لساننده دخی بوتعبیر مشهوردر . چونکه اک پارلاق (کشفیات علمیه découvertes scientifiques) تجربه یه سبق ایتش ملاحظاتک بعد التجربة تحققة اک کوزل مثال لر تشکیل ایدر . حتی او ملاحظاتک تجربه یی نصل ترتیب واداره ایتدیکنی ده کوستریر . بوتون ترقیات علمیه تاریخی بوکا مثلدرد؛ ده نیله بیلیر . فقط (سرهفیری دهی وی Sir Humphry Davy) نک کیمیا ده (قلیات les alcalis) ی تجربه دایتمه سی؛ (لووه ریه Leverrier) نک هیئت ده . نه پتون Neptune) سیاره سنی کشف ایله مه سی، تاریخ علمده (anticipation) نک اک پارلاق مثال لرندرد .

زمانزدن تقریباً یتش سکسان سنه اول، کیمیا ده (اجسام بسیطه corps simples) لیسته سی پک معدود ایدی . حتی بعضی مواد مرکبه دخی بسیط ظن اولونویوردی . (صود la soude) (پوتاس la potasse)، (کلس la chaux) کی اجسام دخی عناصر بسیطه میاننده ذکر اولونویوردی . (قلیات) بوصفده داخل اولان عناصرک اسم عمومیی در . بونلره (آربه معدنیه les terres minérales) دخی دیرلردی . (دهی وی Davy) (حامضات les acides) نک (معادن les métaux) ایله بالاتحاد (املاح les sels) وجوده کتیرمه لری ایچون لازمکلر (شرائط کیمیویه conditions chimiques) یی تتبع ایدرکن، اکلامشدی که بویه براتحاد کیمیوی ایچون عناصر معدنیه (صاف pur) اولمایوب (حمض حالنده à l'état d'oxide) بولوننی ایجاب ایدر . بوبرقانون کیمیوی حکمنی حائز ایدی . مع مافیه قلیات بوکافارشی استثنائشکیل ایدیور، و مثلاً : (حامض کبریت acide sulfurique) (پوتاس) و (صود) ایله طوغرودن طوغرویه اتحاد ایدرک (کبریت پوتاس) و (کبریت صود) نامیه معروف اولان املاحی وجوده کتیریوردی . بوکیمیا کر داهی، شوکیفته قارشی درین دوشوندی . شبه ایتدی . ملاحظاتی

بر (قیاس مقسم dilemme) شکله قویدی : [یا بوقانون، عمومی دکدر ؛ و بناء علیه یا کلددر ... یا خود بسیط ظن ایندیکم (قلیات) حقیقت حاله بسیط دکدره مولدالموضه ایله متحد بر حاله در !] دیدی ؛ فقط قانوندن زیاده قلیان شیهه ایتش ایدی ؛ چونکه کیمیانک ترقیسی همان دایما بسیط ظن اولونان شیلرک مرکب اولدوغنی اثبات صورتیه واقع اوله کلددی . او حاله : [قلیات ، بسیط اولماسه کر کدر واحتمالکه مولدالموضهیه شدتله علاقه دار بر طاقم معدنیاتدر . بونلری مولدالموضه دن آیره یلمک ایچون بویوک بر قوت و حرارت ایستر ؛ بونی ده انجق قوتلی برئه لیک تریق منظومه سی ویره ییلر !] دیه حکم ایدوب تحقیقاته کیریشمش و اوکا کوره تجربیه یی ترتیب واداره ایتشدی . تجربه تماماً بوکاشفک دوشوندکاری تصدیق ایتش و (صود) ک (حمض سودیوم) ، (پوطاس) ک (حمض پوطاسیوم) دن عبارت اولدوغنی تحقیق ایله مشدر .

(لووه ریه) ، (اورانوس Uranus) محرکنده مشاهده اولونان غرب اعوجاجات اوزرینه بعضی ملاحظاته قویوله رق ، بوغریبه یی ، دیگر برچرم سماونک تأثیر جاذبه سنه عطف ایتش و بعضی معلومات رصدیه و (معطایات données) اوزرینه حساباته کیریشه رک (نهپتون Neptune) سیاره سنی - اوطوردوغنی یرده - کشف ایتش ؛ کتله سنی ، محرکنی وفلان زمانده فلان نقطه ده کوزوله بیله جکنی ده خیر ویرمشدی . فی الحقیقه بوکهاات علمیه یی متعاقب آلمان هیئتشناسلرندن (غاله Galle) (بالرصد par observation) اوسیاره یی (لووه ریه) نک تعیین ایتدیکی نقطه یه الی ایکی دقیقه مسافه ده کورمشدر . ایشه بوده مشاهده رصدیه سنی ایتش برکشف نمونه سیدر .

تنافی اقوال Antilogie

(حسانیون les sceptiques) ده نیلن فرقه فلاسفه ، (ایقانیون les dogmatiques) ک افکارینه اعتقادانه دایما اعتراض ایدیورلردی . ایکنجی آقاده می دورنده ارباب شک ، بواعتراضانی بررستور شکله قویدلر واونلره (tropes) دیدیلر که ایقانیونک ادعاسنه قارشیه اله جقلری (طورلر)

دیمکدر . ایشه (antilogie) بو (tropes) لردن بری در . تنافی احکام و اقوال دیمکدر . شبهه اربابی ادعا ایدیورلردی که [حقیقت بحثنده بر جوق فیلسوفلر و بر جوق مذاهب فلسفیه یکدیگرینک قول و ادعاسنی نقض ایده جک صورتده بیان فکر ایتشلردر . بو (تنافی اقوال) صراحة اثبات ایدر که حقیقت یوقدر ، اولسه بیله اونی بیلیمک ممکن دکدر . او حاله هرشیدن شبهه ایتکده حقمن واردر ؛ چونکه حقیقت دعواسنده بولونانلر هر درلو سوزلریله بر برینک ادعاسنی نقض ایدیورلر . واقعا هر حکمی ، هر ادعای بر دیگر حکم و ادعا ایله نقض ایتک ، یعنی بر (مدعا) یه (عکس نقیض) ی ایله مقابله ایتک ممکندر . بناء علیه عینی مسئله ده ، بویله یکدیگرینه تماماً ضد وعینی قوتده دلیللر ایراد ایدیه ییلر . او یله ایسه حقیقت بحثنده (تنافی اقوال) واردر . بو حاله کوره (αὐτῶν) یعنی (نه بری ، نه ده دیگری) شایان اعتماددر ! .. بناء علیه جمله سندن ده شبهه ایتکدن باشقه چاره یوقدر !] دیرلردی . [(tropes) ، (antinomies) ، (sceptiques) ، (dogmatiques) سوزلرینه باقیکنز .] شایان دقتدر که ، زمانمز ، حقایق تجربیه ده یعنی علوم مثبتده تنافی اقوال اوله میه جغنی و بعضی نظریات علمیه ده اولسه بیله نتیجه ده ده ائی تحقیقات تجربیه ایله بوتناقضک رفع اولونه جغنی تسلیم ایتشدر . فقط (antinomie) بحثنده تعریف ایتدیکم کیی ، نتیجه ده بوتون معلومات بشریه نک ارکان اصلیه سی و اساساتی یکدیگرینه تماماً ضد وعینی قوتده دلیللره پیوسته اولدوغنی جهته متافیزیک مسئله لرنده (تنافی اقوال) واردر . بناء علیه (sceptique) لک دعواسی علوم تجربیه مسائلنده باطل اولقله برابر مابعدالطبیعیات مسائلنده حقدر . ذاتاً زمانمز متفکرینی (آغوستیسیمز agnosticisme) فلسفه سنه سوق ایدن قوت مجبره بو اولمشدر . یعنی اساسات علمیه ده (تساوی نقیضین) دعواسنک رفع اوله نه میه جق درجه ده بدیهی و صریح اولدوغنی اکلایشمز اولمشدر . [آغوستیسیمز سوزینه ده باقیکنز !]

(تقیض)، تساوی تقیض Antinomie

Antinomie

آلمانی و فرانسوی

Antinomy

انگلیزی

بوتعبیر یونانی دن آلمشدر. (ضد، قارشی) و (νόμος قانون)
معنانه کدیکنه نظراً (قانونه قارشی اولان شیر) دیمکدر . اصطلاحده
متعارفه قیلندن اولان ایکی قضیه کلیه نیکدیگرینه قارشی، حکماً متناقض
اولماسیدرکه بوتقدیرجه اوقضیه لک برینه (thèse مدعا)، ضد تقیضه دخی
(antithèse تقیض مدعا) ده نیلیر . فقط بویله ، یکدیگرینی اساساً نقض
ایدن مدعالرک - فلسفی معناسیله ! - (antinomie) تشکیل ایده بیلمه لری
ایچون، کرک (مدعا)، کرکسه اونک تقیضی حقنده ابراز واقامه اولونه بیلن
بالجمله براهین وادله نیک قیمت اقناعیه جه متساوی اولماسی برنجی شرطدر .
زیرا برطرفک دلیلی قوی وغالب کلیرده ذهنی اقناع ونقیض قضیه نیک حکمی
ابطال ایدرسه ، (تساوی تقیضین antinomie) تحقق ایده من ؛ حتی آرده ده
تناقض بیله قالماز . شایان دقتدرکه بویله متناقض الحکم ایکی قضیه حقنده قوت
و قیمتجه تماماً متساوی دلیلر اقامه ایدیه بیلمه سی ایچون ، اوقضیه لک مفاد
حکمی (یعنی ادعای) هر درلو تحقیقات تجربیه وعقلیه فوقده بولونمالی ! -
خلاصه ، تعبیر اصطلاحیسی ایله - (متعال transcendant) اولمالی در . مثلاً
مدعا اوله رق : [عالمک حدودی واردر !] ده نیلسه ، بونک تقیض : [عالمک
حدودی بوقدر !] قضیه سی اولور . ایشته بوقضیه لک مفاد حکمی ، (متعال) در ؛
چونکه بوخصوصده هیچ بر تجربه امکانی اولمادینی شویله طورسون ، مسئله ،
ماهیتی اعتباریله عقلک ایره میه جکی بر ساحده موضوع بولوندوغندن ، ذهن ،
مطلقاً بر طرفه میل ایله حکم ایده بیلمک ایچون - مدار استناد اوله بیله جک -
هیچ بر دلیل بوله مازکه ، عینی قوتده بر برهان ایله اوکا مقابله ممکن اولماسین !
فضله اوله رق ، بوایکی قضیه ذاتاً متناقض اولدوغندن ، ایکسینی بردن قبول
وتألیف ایتک دخی عقلاً متنع در . براوچونخی احتمال تصور اولونه میه جنی
سببیه دخی شو ایکی قضیه نیک همه حال برینی تسلیم ایتک ضروری کورونور .

زیرا کیفیتک ایکی احتمالدن خالی اولماسی ده قطعاً مستحیل در . اکلاشیلورکه
(antinomie) تشکیل ایدن قضیه لر - بزم شرق منطقینک تعبیر معروفیجه -
هم (مانعه الجمع)، همده (مانعه الخلو) اوصافی حائز اولان قضایای کلیه در .
آلمان فیلسوف شهرری ، صاحب مسلک (قانت Emmanuel Kant)
بودرلو قضایای متناقضیه (antinomie de la Raison pure) دیمشدی که
بوندن : (تجربه فوقنده و صرف عقلک ماهیتندن منبعث تناقضلر) معناسی
مراد ایتمشدر . (قانت) بویله بر تناقضک (فساد محاکمه vice de raisonnement)
نتیجه سی اولمادیغنی ، یعنی بر عیب استدلال صایبله میه جفی ادعا ایدیور ؛ کرک
علم بشرک ، کرکسه بالذات عقلک حدودینی تعیین ایدن اقصای مواقف
تفکیرده - طبیعی اوله رق ! - بویله (رفی ناقابل) تناقضلر بولویور وبونی
ضروری عد ایلور . انسان ، بر حقیقت مطلقیه کسب اطلاع ایده بیلمک
امیدیه ، هر نه زمان کندی حدود قابلیاتی تجاوز ایدرسه - عملیات فکریه یی
تنظیم واداره ایدن قوانین عقلیه ایجاباتندن اوله رق - ذهن ، همه حال ،
بوکریوه تناقضه دوشویور . بوتقدیرده ایکی مجبورت آرده سنده محصور
بولونویور ؛ وهر ایکی طرفدن باطل بدیهی به پیوسته اولوب قالیور . احوالده :
یا تحقیقات و ملاحظاتمزدن ادراک ایده بیلدیکمز نتیجه ، (مطلق absolu)
تعبیرینک متضمن بولوندوغنی معنایه توافق ایده میور ؛ (یعنی صرف اضافی
بر فکرندن عبارت قالیور !) یا خود منحصراً حادثات دائره سنده محبوس وقابلیات
ذاتیه سیله مقید اولان عقل بشر ، حدود طبعیه سی تجاوز ایتسکه بویله
ضالانلره دوشدوکنی آکلیور . بناء علیه کرکی کی تحقق ایدیورکه عالم
حادثات و قیود عقلیه و اضافات دائره سندن جیقوبده حقیقت مطلقیه
یول بولوق ، ذهن بشر ایچون - هیچ بروقت ! - میسر و ممکن اوله میه جقدر ! ..
دیمک که (antinomie) لر عجز فطریمیزک اقتضاسیدر . لدنیات حوادثه
انفاذ نظر ایده مهین ، کندی بنلکننک دائره سنی کجوب ایلری کیده مهین
انسانک ، حدی - بونقیضه لر - بیلدیریور . علم اضافی بشرک هم اساسلری
همده حدود مانعه سنی تشکیل وتعیین ایدیور .
(Relativité de la connaissance) علم بشرک اضافیتی

(humaine) دعوائی اوزرینہ فلسفہ سنی بنا ایدن (کانت Kant) کو خصوصاً زبدهٔ ملاحظاتی بودر؛ و کورولو یورکه (حقیقت مطلقه vérité absolue) و (لدنیات noumènes) حوادثه، کسب اطلاع ایدہ بیلمک قدرتندن فطرتاً محروم و ممنوع بولند و غمزی ادعا ایدن (آگنوستیسزم agnosticism) فلسفہ سی، ساحهٔ معقولاتده (antinomie) لره استناد ایدیور. بکون علم بشرک اضافی اولدوغنی تصدیقه محبور اولمایان جدی بر فیلسوف قالماشدر. [یوقاریده کی تعبیراته با فکرن!]

قائدتك، (اضافيت علم) فلسفه سنی ترویج و تشہیر اپدن بویوک انکلیز
فلسوفلارندن (سر ویلیام هاملتن Sir William Hamilton)، اثرلرندہ،
بالخاصہ بومہم نقطہ لری تشریح ایتمش وعقل بشرک - صوک مرحلہ تدقیقہ!
بوتنا قضیہ نصل دوشدوکنی - تحلیل برصورتندہ - کوسر مشددہ

(مابعدالطبیعیات (métaphysique) مباحثه (سر ویلیام هاملتن) ك
تأثیرندن قور توله مامش اولان (هربرت اسپنسر (Herbert Spencer)
دخی (اضافیت علم) (عقیده doctrine) سنی بك توتلی دلیل لاله مدافعه
ایتمشدر ، (تکامل évolution) ، فلسفه سنك مؤسسی اولان بو ذات دخی
[عقل بشر ایچون لدنیات اموره انقاد نظر ممکن اوله میه جغنی !] ، (مبادی
اولی (Les premiers principes) نام کتابك بر باب مخصوصنده ادعا ،
وبوكا دلائل عیدیه ابراز ایلدكن صوكره کوستریورکه : (عقل ، تجربه
و حادثات دائره سنی آشوب ده ، لدنیات مسئله سنی تحقیقه باشلادیمی ؟ . .
در حال او یله بر (قیاس مقسم dilemma) کردانسه دوشویورکه اونك
ایکی حدینی تشکیل ایدن قضیه لك هریکی سیده باطل بدیهی در . مع مافیه
بر او چنجی درلو دوشونوش احتمالی اولمادیغی ایچون ده بهمه حال برندن برینی
قبول و تسلیم ایتمکده اضطرار وارد در . مثلا (زمان) و (مکان) متناهی می در ؟ . .
نامتناهی می در ؟ . . سوآله قارشی ویریه ییله جك جواب : [یا متناهی در ؟
یا نامتناهی در !] قیاس مقسمنده مندر جدر . [متناهی در !] ده نیلسه ، باطل
بر (ادعای مجرد) اولور . زیرا بالتجربه حدودینی تعیین ایده بیلمك بزم
ایچون هر درلو امکانك فوقنده در ؟ اوندن صوكره زمان امله مکان كمات

مقوله سندن معدود اولق حیثیتله، الی غیر النهایه ضمیماته مستعده در. بناءً علیه
متنهای اوله ماماسی لازمکلیز. لکن [نامتاهی در!] ده دییه مهیز!.. زیرا
هیچ بروجله بونی تحقیقه بزجه امکان اولمادیغی شوبله طورسون، زمان نامتاهی
تصوری بیله محالدر. [نه متنهای در نه ده نامتاهی در!] ؛ [هم متنهای در؛ همده
نامتاهی در!] دخی ده نیله من. بوده معناسز برتناقض صریح اولور. مع مافیه
شوايکی (قضیه متناویه alternatives) دن برینی همه حال قبوله مجبورز ؛
حالبوکه دعوانک بری لهنده نه قدر قوتلی ونه درلو دلائل ابراز ایتک ممکنسه،
اونلرک جمله سی، نقیض دعوا لهنده ده عیناً و تماماً قابل تطبیق در. اوله اولونجه
صاغه صول میل ایچون سبب ترجیح قالمیور. بناءً علیه بوقیاس مقسمک
حدینی آرهنده محبوس قالان عقل بشر بر حکم ویرمکده عاجز ، متردد
ومتحیر بولونوبور. ،

میںسرک برنجی کتابنک بر مهم قسمنی تلخیصاً عرض ایتدیکم شو
ملاحظات، بوفیلسوفک - سرویلیام هاملتن طولایسیله ! - قانتک فلسفه سندن
و (antinomie) نظریه سندن نه قدر متأثر اولش بولوندوغی حقنده برظن
قوی حاصل ایتدیریر؛ نصل که (آلفرهدفوییه Alfred Fouillé) بوادعاده
بولونمشدر.

دہ قارتک فلسفہ سنی درجہ کمالہ کتیرن (قانت) (تنقید عقل صرف
Critique de la Raison Pure) نام کتاب مہمنک (مسائل متعالیہ
محاضراتہ dialectique transcendental) مخصوص اولان بابندہ بو
(تساوی نقیضین) مسئلہ سنی موضوع بحث ایتمش و (cosmologique
تکوینی) اولانلرنی جدول آتی اوزره تعین ایله مشدر .

ریاضیات اساسی ندری نقیضین

Antinomies mathématiques

(مدعا Thèse)	(نقیض مدعا Antithèse)
(۱) عالمك زمانده و مكانده بر مبدأی وارد.	عالمك مبدأی یوقدر؛ حدودیده یوقدر. زمان و مكان اعتباریه. عالم نامناهی در.
(۲) هر ماده مرکه اجزای بسیطه دن مرکدر. ماده ده الی غیر النهایه انقسامه قابلیت یوقدر.	هیچ بر ماده مطلقا بسیط دکدر. هر ماده الی غیر النهایه قابل انقسامدر.

تجلیات قرای عالم بنده ندری نقیضین

Antinomies dynamiques

(۱) حادثات طبیعتده مشهود اولان (déterminisme) یعنی سلسله قیود و اسباب موجب، مطلق دکدر. علل مستقله وارد.	حریت و ارادت یوقدر. هر شی قوانین طبیعی اقتضاسنجه وقوعه کلیر.
کرك عالمك بر جزئی اولسون کركسه علت ایجاد ی اولسون بر (واجب الوجود) وارد. بر (واجب الوجود) یوقدر.	کرك عالمك بر جزئی اوله رق، کركسه علت ایجاد ی اوله رق هیچ بونلر، منشألری اعتباریه نظری (antinomie) لردر. چونکه عقل صرفه عائددرلر. تعلق اعتباریه دخی (cosmologique) درلر؛ یعنی مبحث تکوین مسائلیه علاقه دارددرلر.
بونلردن ماعدا برده عملی (antinomie) وارکه، اخلاق بحثه عائددر. اوکا (قانت) (antinomie de la Raison Pratique) دیور. بوده (خیر محض، خیر اعلا) (summum Bonum = souverain bien) نظریه سنك بالعمل تحقیقی تمتع اولماسندن تولد ایدیور. باقیکنز نصل:	

(قانت) اسکی (رواقیون stoiciens) کی: [خیر محض یالکزر فضیلت ده در!] دیور. اسکی (مدرسه قیروانیه Ecole cyrénaïque) اربابی کی: [خیر محض، ذوق و سعادته در!] ده دیور. اوایی اسکی مذهبك، خیر محض نامنه تعیین ایتش اولدینی ایکی مختلف و حتی ضد مطلبی برلشدیریور: [خیر محض، فضیلت ایله سعادتك هم آهنگ اولماسنده در!] دیور. فقط ینه کندی تعبیرنجه؛ بو [دنی دنیا به ici bas] بونك قطعاً ممکن اولمادیغنی، یعنی تمامیه فضیلتكار یاشامق، وعینی زمانده ذوق سورمك میسر اولمادیغنی تصدیق ایدیور. صوکره، - ماهیت اعتباریه! - فضیلت ایله ذوق و سعادته آره سنده هیچ بر مناسبت اساسیه و منطقیه، هیچ بر مشابهنه و ملائمت طبیعیه بوله میورکه بوایکی مطلب آره سنده لزومی ادعا ایتدیکی آهنگ وفاق، بالطبیعه حاصل اولسونده - ادعایی وجهله - (خیر محض) بالفعل تحقق ایده بیلسین! .. حالبوکه قانتك اعتقادنجه - خیر محض آرامق (مرید و مختار اولان libre) اولان روح بشرک (تمایلات فطریه inclinations naturelles) و مطالب انیه سندندر. یعنی تجربه ایله تحقیق ایدوب بالاخره کشف ایتش اولدوغنی شیلردن دکدر. روحك جبلت ذاتیه سنده، خیر محض ایچون بر میل ازلی وارکه وهی در؛ فطریدر. بویه اولقله برابر، - بومیل جبلتی به رغماً - بو دنیاده خیر محضه ایریشمك ممکن اوله میور؛ چونکه بو (مطلب اعلا) یکدیگرینه ضده ایکی عنصرک (یعنی ذوق ایله فضیلتك!) هم آهنگ اولسیله تحقیق ایده بیلیرکه ایشته اصل تناقض و امتناع عملی بوراده در.

(قانت)، عقل صرفك تناقضلرینه قارشی هیچ بر چاره دوشونه میور. فقط عقل عملی (Raison pratique) نك شو تناقضندن نومید اولیور. (آخرته ایمان croyance à la vie future) ایله بو تناقضی رفع ایدیور. [شو تقدیر جه انسان، فضیلتله یاشایه حق؛ بلکه محرومیتلر ایچنده یاشایه حق؛ لکن، عالم آخرتده بو حیات فضیلتكارانه نك بهمه حال مکافات ی ادراك ایده جکنه - ایمان قوی ایله - مطمئن بولوندوغنی ایچون، عینی زمانده ده مسعود اوله بیله جکدر.] دیمك ایستیور. بالطبع، بویه بر عقیده: (رحمن و رحیم، عادل و کریم بر ذات الهیه) نك وجودینی مستلزم بولونه جنی ایچون،

(قانت)، بو [Antinomie de la Raison pratique] ی، اثبات واجب بحثده یکی بر دلیل کی قولانیور؛ اوکا بویه بر حیثیت ویریور. چونکه روح انسانی نك ارادت ذاتیه سی ایله بقای روحه و آخرت ایمان ایتک مسئله لری نك نه صورتله مناسب و علاقہ سی اولدوغی و بویما نك، نه کی ضرورات منطقیه ایله عقیده الوهیتی ایجاب و استلزام ایتدیکی میدانه چقیور.

قانتہ اقتدا ایتش اولان (سرویلیام هاملتن) بوعقاید آره سنده موجود اولان مناسبات و روابطی عیناً فقط دها صریح بر صورتده ابراز ایتمشدرکه قانتك معقبی اولدوغی بوده کوستیر.

علم بشرک اضافی اولدوغی قبول و تسلیم ایدنلر، (antinomie) نظریه سی قبوله مجبور بولونقلری ایچون تسلیم ایدیورلر. معلومات بشریه بی تحلیلاً تدقیق ایدنجه، اساسلارنده هپ تساوی تقیضین بولویورلر، و بوتحقیقده نه قدرایلی کیده بیلیرسه کیتسین، نهایت عقلمزك بهمه حال عینی کرداب تناقضه دوشه چکنی و حیرتلا اینجده اعتراف عجزه مجبورقاله جغنی ادعا ایدیورلر. مع مافیه اساساً طوغرو اولان بوادعا مطلقاً قانتك (antinomie) جدولنی عیناً قبول مجبوریتی ایجاب ایتمز. نته کیم اوجدولده کی دستورلری و ترتیبی بر چوق فیلسوفلر تنقید ایتشلر و اوانده فساد نقطه لری بولمشلردر. بناء علیه بودستورلر هر متفکر طرفدن عینی شکل و صورت اوزره قبول ایدله مشدر. حتی قانتك معقبی عداولونه بیان (سرویلیام هاملتن) بیله کندنجه بر (antinomie) جدولی یا پمشدرکه اونیده بر طرفدن (جون ستونه ت میل John Stuart Mill) و دیگر طرفدن ریاضی شهر (پروفیسور مورغان Prof. Morgan) شدتله تنقید ایتشلردر. حتی (نامشاهی) تعبیر نك معنای عادسی ایله معنای ریاضیسی فرق ایدمه مش اولان هاملتنك بوخطاسنی (ستورات میل)، (هاملتنك فلسفه سی تدقیق Examen de la phil. de Ham.) ایچون یازدینی کتاب مهمده شهر ایلدکن صوکره بویه چوروك بر اساس اوزرینه بنا ایدیلن احکام متناقضه آره سنده (حقیقی بر تناقض) اولیه بیله چکنی بیله ادعا و اثبات ایتمشدر.

فی الحقیقه، (تاریخ فلسفه) دخی بوکا پك چوق مثاللر عرض ایدیور: اسکی فیلسوفلر هله تجربه بی دکل، منطقی عمده و اساس اتخاذ ایتش اولان

سقولاستیق لر - هر یحی، نهایت بر قیاس مقسمه ارجاع ایدرلر، و اونك حدلری تشکیل ایدن ایکی متناقض قضیه لردن بریخی بالابطال، دیگر یی قبولده ذهنی مضطر بر افعی سورلردی. فقط [اکثر دعوالرینك نقطه استنادی، یا بر لفظ مجردك مفهوم موهومی و یا خود بر فرضیه باطله نك دستور مضمونی اولدوغی ایچون] مسئله، ذاتاً و وضعاً طبیعی دکل ایدی. بناء علیه، آرانیلان حقیقت، اومسئله مجعوله بی حبس ایدن قیاس مقسمك بوسوتون خارجنده قالیردی. مثلاً: [(معدوم)، (شی) می در؟، دکلی در؟ ...]

ده نینجه، انسان، معدوم لفظنك ایچی بوش بر قوری سوزدن عبارت اولدوغی، و بو حیثیتله خارجده (عالم حقیقی ده!) بوجود صحیحه دلالت ایدمه چکنی دوشونه مزسه، کندینی در حال بر قیاس مقسم اینجده محصور کورور. چونکه، دوشونه مدیکی تقدیرده: [(معدوم)، یا رشی در؟ یا دکلدر. اگر برشی ایله، فصل شیدر؟ ... مقولاتك هانکی قسمنده داخلدر؟ ... برشی دکلسه، ندر؟ ...] سواللری کندیلکندن تولد و ترتب ایده چکدر. حالبوکه (معدوم) لفظ مجردینك هیچ برشی افاده ایتدیکی و خارجده مقابل حقیقیسی اولمه جنی تأمل ایدیلیرسه، بومسئله نك (غیر طبیعی) اولدوغی در حال اکلایشیلر و اوکا تعلق ایدن قیاس مقسمله برابر تکمیل دعوالر، طافیه بیقیلوب مضمحل اولور کیدر. کیفیت بویه اولدوغی حالده سقولاستیقلر بوکی غیر طبیعی وجعلی مسائلی حل ایتک غیرتیه عصرلرجه مناقشه ایتشلر و اونلری (antinomies) شکلنه قویوب بر ایتشلردر؛ یعنی قطعاً حل اولونه میه جغنی کوستر مشلردر. مع مافیه حقیقده اولیه مسئله لر اوله میه جغنی بوکون ثابت اولمش و ارتق هر کسجه مسلم بولونمشدر. کذلک باطل فرضیه لر اوزرینه مؤسس اولان بوتون سقولاستیق مسائلنه متعلق دعوالر ده دخی عینی ضلالت غریبه بی کوره بیلیرز؛ مثلاً: (افلاک les sphères) هانکی مقوله ده داخلدر! ... جوهر می در؟، عرضی در؟ ... دیه صاچه بر سوال وضع اولونجه، انسان - غافل طاوورانیرسه، - بر قیاس مقسم کر دابنده بولوندوغی حس ایدر. چونکه یا جوهر، یا عرض اولق لازمکه چکنه بالضروره قرار ویریور. [باشقه درلو اوله ماز؛ زیراجوهر و اعراض خارجنده قالان هیچ برشی بو قدر.

لكن، ايشك حقيقتنه و بوكونكي معلوماً تمزه باقيليرسه، (افلاك، نه جوهر در؛ نه ده عرض در؛) چونكه اويله برشي يوقدر. او اسكي بطليموس فرضيه سنك بطلاني، بوكون - ارتق هر درلو شبه دن وارسته اوله رق - ثابت اولمشر. بناءً عليه اويله بر مسئله اوله ماز. اوندن صوكره ارسطونك مقولاتي دخي بر حقيقت مطلقه افاده ايمز؛ چونكه عندي بر تصنيفدن عبارتدر. (scholastique سوزينه باقيلير؛)

خلاصه، معلوماً تمز اضافي در؛ تجربه وحادثات دائره سني آشوب ده وجود مطلق و حقيقت اشياي، لذيئات اموري تحقيقيه قالفشيرس، صلاحيت طبيعيه مزي تجاوز ايمش اولورز، و در حال اويله تناقضلره دوشه رزكه عقل ايله حل اولونوركي دكلدر. بو طوغرو؛ لکن اوتناقضلرك اك اساسلي دستورلري اولمق اوزره بعض فيلسوفلرك عرض اينديكي (antinomies) لر، هر درلو تنقيده طابانه بيله جك درجه ده طوغرو و متين دكل، هيسي ده عندي و انساني دستورلدر. تناقض اساسي نك ماهيتي دخي (متنع التصور inconceivable) اولماسي در. حالو كه بوكون بز لرحه تصوري ممتنع اولان بر شيك، يارين دخي (تصوري ممتنع) قاله جغه دائر هيچ بر دليل قوي يوقدر. بله بوكون عكسنه دليل جو قدر. اونك ايچون زمانمرك اك بويوك فيلسوفلري، بر شيك بوكون بزجه (متنع التصور) اولماسي، اوشيك بطلاننه و حقيقتده امتناع ذاتيسنه بر دليل اولمق اوزره قبول ايتيورلر. بزم قابليت تصور وادرا كمرك محدود، عندي و اضافي اولماسنه حكيم ايتيورلركه طوغروسي بودر.

بناءً عليه، بز حقيقت مطلقه يي، سر خلقي، وجوب خالقي اكلامق خصوصنده تناقضه دوشو بورس، قباح و قصور بزده دكل، بزم باراديلشمزده و عجز طبيعي مزده در؛ يوقسه بر حقيقت مطلقه نك موجود اولماسندن دكلدر. او حالده معلومات و اعتقادات بشريه نك تمللرني تشكيل ايدن احكام متناقضه بر «حق تعالي verité suprême» نك وارلغي تصديق ايدر؛ و انجق بزم كندي علم اضافي مزك درجه عجزني كوسترير. «ديورلر» (فلسفه ماديه phil. matérialiste) و (لايسيه nihilisme) «

و (حسبانيه scepticisme) طرفدارلرندن ماعدا، بوكون، همان بوتون فلسفه حاضر نك اعتقادي بودر. (بو تعبيراته باقيلير؛)

(antinomies) مسئله سي، اسكيدر. ارسطونك (مابعدالطبيعات) نام اثر مشهورينك برنجي كتابنده و بشنعي بابنده روايت اينديكنه كوره (فيثاغور Pythagoras) ك اك اسكي شا كر دلرندن (قروطوني آلقمه ثون Alcméon de Crotoné) ميلاددن بش عصر اول، مبادي علميه ده كي تناقض اساسي يي كورمش و: [معلومات بشريه نك اساسلي تحقيق اولونجه يكيديكريله متناقض بر طاقم احكام معدوده منجر اوله جغني] ادعا ايلمشر؛ حتي كندنجيه برده (antinomies) جدولي ترتيب ايتمشر كه ارسطونك روايتي سايه سنده زمانمزه قدر محفوظ قالمشر. جدول مذكور ايسته شودر:

متناهي	نامتاهي
جفت	تك
كثرت	وحدت
صاغ	صول
ديشي	اركك
سكون	حركت
خط مستقيم	خط منحنى
ظلمت	نور
شر	خير

مربع الاضلاع اضلاعي غير متساوي اولان وساير بالجمله اشكال هندسيه. كورولويور كه بوجداول غايت ساده دلانه بر فكرك محصولي در. فقط مبادي معلوماً تمرك، نتيجه تحليلده، بالضروره برقاج قضيه متناقضيه منجر اولمسي دعواسني متضمن بولونمق اعتباريله، بوكونكي فيلسوفلرك ادعاسندن هيچ فرقلي دكلدر. چونكه قانتك جدول مشهور يي دخي تنقيد ايدلمش و اعتراضات محقيه هدف اولمشر.

افکار association d'idées « دن حاصل اولدوغنی ادعا ایتشدی . زمانمز متفکرینی بر « استعداد ارثی predisposition héréditaire » اولمق اوزره تلقی ایدیورلر . بن ظن ایدرم که مزاج وعادت ایله دخی علاقہ سی آزدکلدر . « نفرت aversion » ایله فرقی پک تعیین ایدیله یور . یالکز « نفرت aversion » ک اسباب موجبہ سی دها زیاده واضح و بللی در . حالوکه (antipathie) نک اسباب وجدانیہ سی دها زیاده مبهم و دها درین در ؛ وهله صرف باطنی در . [اصطلاحاته باقیکنز !]

Antithèse مدعا نقیضه

Antithèse

[thèse مدعا کله سنه باقیکنز !]

Antitypie مقاومت

Antitypie

آلمان فیلسوف مشهوری « لایب نیچ Leibnitz » ک ایجاد و وضع ایتش اولدوغنی بر تعبیردر ؛ فقط تعمیم ایده مه مش و متروک قالمشدر . او فیلسوف ک بو کله دن مرادی « عدم تنافذ impénétrabilité » و « مقاومت résistance » ایدی . مقاومت ، ماده نک و دها طوغروسی (جوهریت ماده substantialité) یعنی نک (کیفیت ذاتیه qualitative) سی در . یعنی ماده — بو خاصیت اصلیه اولمادجه — دوشونه له من ؛ ماده اوله ماز ؟ .. [primaires تعبیرینه باقیکنز !]

« ده قارت Descartes » ، ماده نی « جوهر متمد Substance étendue » دیه تعریف ایتش و « امتداد étendue » کیفیتنی ، یعنی (ابعادثله les trois dimensions) نی حائر اولمق قابلیتنی ، مادیتک صفت ذاتیه سی کبی قبول ایتشدی . « لایب نیچ » ، بحق ادعا ایدیورکه یالکز « امتداد » ماهیت ماده نی تشکیله (یعنی تصویره !) کافی دکلدر . بوکا (مقاومت = antitypie) ده علاوه ایتله در . زیرا مکان ایله « ماده » نک اک مهم فرقی ، برنجیسنک یالکز « متمد » اولماسنده ، ایکنجیسنک هم ابعادثله همده مقاومت قابل بولونماسنده در .

[l'espace, la matière سوزلرنده تفصیلاته باقیکنز !]

Apagogique

قياس منہف (Apagogique (raisonnement)

اک اول بو « آپاغونی = ἀπαγωγή » تعبیرنی وضع واستعمال ایدن ارسطودر . فقط استاد یونانی « بر مسئلہ نی دیگر بر مسئلہ ارجاع ایتک صورتیله واقع اولان طرز استدلال » (apagogie) دیرایدی . بو کون کاه (اثبات بالنقیض démonstration par l'absurde) کاه « قیاس شبہ abduction » مقامنده قوللانیلیدینی اولویور . مع مافیہ استعمالی نادر در . [absurde و abduction کله لرینه باقیکنز !]

عدم تأثر ، قایغوسزلو ، عطالت ، کسل

Apathie

Apathie

یونانی ده (α ادات نفی + πάθος = passion) تأثر و اختراص دیمکدر . بناء علیہ بوتعبیرک معنای لغویسی : (هر درلو تأثرات و اختراصاتک فقدانی) در . فقط کله نک مضمونی یاواش یاواش توسع وبالاخره تبدل ایتش ونهایت : (حرکتسزلک وقایغوسزلق) معناسنده قوللانیلشدر . لسان عادی ده (ارادتسزلک) ، (قدرتسزلک) ، (حسسزلک) و (عطالت معنویه) دیمک اولور . تاریخ فلسفه ، (حکمت اخلاقیه phil. morale) و (حکمت صوفیه ph. mystique) ایله علاقہ دار بر کله اصطلاحیه در . اخلاق بحثنده (apathie) نی هم (عطالت) ، همدہ (قایغوسزلق) کله لرله ترجمه ایتله در . اگر (apathie) جسمانی بر حال ایسه ، یعنی تنبلک کبی برشی ایسه ، اوکا عطالت دیرز . بو حاله کرفتار اولانلر قیملدامق دن پک اوقدر خوشلانمازلر . اگر فضلہ یورغونلق دن صوکره عارض اولان (کوشه کلک) ، رخاوت ، مراد اولونه یورسه (کسل) دیمک اولادر . اگر معنوی بر طویغوسزلق دن ایلری کلش بر حال لاقیدی ایسه ، اوقدیرده (قایغوسزلق) تعبیری مرجح در .

امر تربیه ده برچو جوغک عطالتی ، قایغوسزلنی شایان دقتدر ؛ اغلب احتمالہ کوره (ضعف عصبي) دن متولد برنوع (ارادتسزلک aboulie) در . هر حاله (غوغای حیات la lutte pour la vie) ده (فعالیت activité)

مبدأ موفقیت عدد ایدلمکده اولدوغی ایچون مربی لر عطالتی محض فلاکت بیلرک اسبابی تحری و بو مرض معنوی نی دقتله تداری ایتمک چالشیورلر .
بالخاصه تاریخ فلسفه ده بوکله نك (رواقیه stoicism) مذهبی ایله
علاقه صمیمیه سی واردر . (مبحث معرفت épistémologie) مسئله لرنده
(ئه پیکوریون épicuristes) یعنی اسکی (مادیون matérialistes) دن
فرقی اولمایان (رواقیون les stoïciens) ، یالکز (حکمت اخلاقیه
ph. morale) ده آریلورلردی . (سعادت bonheur) مبدأ نه زیاده سیله
اهمیت ویرمش و (خیر و شر le bien et le mal) مسئله سنی لایقوله
قورجالامش اولان بواکی فرقه فلاسفه ، (حکمتدن مقصد نائل سعادت اولمقدردر !)
ادعاسنده اتفاق ایتمشلردی . فقط (سعادت حقیقیه le vrai bonheur) نك
ماهیتی تعیین مسئله سنده تماماً یکدیگرینه ضد اعتقاد باغلانوب قالمشلردی .
(ئه پیکوریون) اعتقادنجه سعادت حقیقیه ، (ذوق le plaisir) ده در .
(قیروانیه مدرسه سی école cyrénaïque) بونك دستورینی ویرمشدی .
[cyrénaïque تعبیینه باقیکز !]

(رواقیون) اعتقادنجه سعادت حقیقیه (فضیلت ایشله مك la pratique
de la vertu) ده در . فضیلت ایسه ، (ذوق و الم le plaisir et la douleur)
مواجهه سنده (تأثرسنلك apathie) در . بزم شرق حکما سنك (فراغ بال) ،
(صفای خاطر) (لایقیدی) دیدیکی حالت روحیه ، تمامیه بو (تأثرسنلك)
ایدی .

احوال عالمك نيك و بدینه قارشى تأثر ، (تكدر خاطر) ی یعنی (وجدانك
بولانماسی) موجب اوله جنى ایچون ، هر درلو حسیاته (ارادت volonté)
ایله غلبه چالهرق (صفای خاطر pureté de la conscience) ی محافظه
ایتمک ، و بناء علیه (کردش دورانك هیچ برکونه وضع ناپسند و طور
ناشیسته سینه قارشى دلکیر و مغبر خاطر اولماق روش حکیم اقتضاسی) ،
یعنی فیلسوفلر شانندن ایدی .

فیلسوف نمونه سنی ، بتون عالم (رواقیه) حکما سنك چهره سیله طائیش
، واونی مشق اتخاذ ایتمش اولدوغی ایچون شرق ده دخی (فیلسوف) ده نیجه ،

اولا بویله (تأثرسنز) بر (رندلابالی) ا کلاشیلیر . هر حاله بو (دستور عمل
formule de Conduite) رواقیونك اعتقادیدرو بونده زیاده سیله مهم وشایان
دقت اولان نقطه شودرکه ، (تأثرسنلك) ، حسسنز لکدن ، طویغوسز لکدن ،
اناییتدن ، فکرسنز لکدن ، مسکنتدن ، الحاصل (قابلیتسنلك incapacité) ،
دن دکل ، (قوت ارادت force de volonté) دن منبعث بر حال ازادکی در .
حسیاته حاکم اولمق وکندینی ضبط ایده بیلمك قدرتی در .
[تعبیرات مهمه به وبالخاصه Ataraxie, adiaphorie, stoïcisme
کله لرینه مراجعت ایدیکز !]

A Parte Ante	(اوقونملی در .	ازل	A Parte Ante	آ پارتیه آنته
A Parte Poste		ایر	A Parte Poste	آ پارتیه پوسته

بو ترکیلر ، لاینجه در ؛ زمانز لسانه سقولاستیق فلسفه سندن انتقال
ایتمشدر . اونك ایچوندرکه آوروپا السنه متمدنه سنك جمله سنده هپ بولاینجه
شکلی اوزره قوللانمقدردر . بو تعبیراتك برنجیسی بزم کتب اسه لامیه ده
(ازل) ، ایکنجیسی (ابد) کله لرینك تماماً مقابلی در . بونلر (تعبیرات
متضایفه termes correlatifs) دندر . یعنی برینی دوشونمك ، دیکرینی
بهمه حال خاطره کتیریر . بو تعبییرلرک (زمان le temps) ایله علاقہ سی
واردر ؛ ده طوغروسى زمانك اوصافدن در . (سرمدیت éternité) ازل
ایله ابدی شامل (لاتناهیته infinité) در .

(سرمدیت) دوشونولدوکی وقت ، بهمه حال ، (زمان) شککنده
دوشونوله بیلیر . زمان اولچوله بیلدیکی ایچون (کمیات quantités) نوعندندر .
بالجمله کمیات (نامتناهی l'infini) یه واریر . اوسبیلله اولسه کرکدرکه زمان
دخی نامتناهی یه قاجیور . زمانك آنجیق (ماضی le passé) و (استقبال
l'avenir, le futur) اولمق اوزره ایکی وجهه استقامتی اولدوغی ایچون
ماضی به ده نهایت تصور ایدیه میور ، استقباله ده ... ایشته (ازل) ماضیده ،
(ابد) استقباله سرمدیت دیمکدر .

قرون وسطی (مدرسه فیلسوفلری les scholastiques) وهر دین

و ملتك (الهيون = les théologiens) ی، بواكلره بويوك بر اهميت عطف ايتمشلر واونلری جناب حقلك (صفات ذاتيه attributs essentiels) سندن عد ايتمشلر در . شو تقدیرجه ذات الهیه، هم بدايتسز هم نهايتسز بروجود مطلق در . سرمدي و صمداني بر (وارلق) در .

بزم شرقده برفرقه فلاسفه پيدا اولمشدي كه (دهريه) ناميله تاريخ فلسفهده مشهوردر . بوفيلسوفلر (دهر) ی، (اصل قديم) و (مبدأ كل principe universel) اولق اوزره تلقی ايدرلر، و [كائناتی (زمان) خلق ايتمشدر، ينه هر شئي زمان محو ايدجكدر. زمان هر شئي محیطدر.] ديرلردی. (دهر)، علی الاطلاق (زمان غير معين temps indéterminé) ديمكدر. بومعنايه كوره (دهريه)، زمانك، خارجده باشلی باشنه ومستقلاً موجود بر (شي) اولدوغنه قناعت ايدرلر اوکا - حاشا - الوهيت اسناد ايدميورلردی. بو غريب اعتقاد، اساطير يونانيهده (خرونوس = Χρόνος) یعنی (دهر، زمان) ماصالمدن قالمش اولسه كر كدر. معلوم اولدوغی اوزره يونان قديم (خرونوس) ی خالق كائنات طانيردی .

اهل سنت ايله واقع اولان مجادله لرنده، دهريه زمانك بالجله موجوداته سبق ايتمش بولوندوغی ادعا ايدرلر، قرآن كريمی اشهاد ايلورلر و: (هل اتي علی الانسان حين من الدهر لم يكن شيئاً مذكوراً) آيت جليله سنی دليل اتخاذ ايدوب ايلری سورويورلر ایدی . حالبوكه اهل دين و حكماء متشرعين عندنده زمان، بالجله موجوداته تقدم ايتمكله برابر ينه مخلوقاتدن معدوددر؛ چونكه اصلاً يوق ايكن (مشيت الهیه par la volonté de Dieu) ايله خلق اولومشدر . او تقدیرجه (ابدي) اولسه بيله (ازلی) دكلدر . بناء عليه (دهريه)، زمانی (ازلی) و (ابدي) تلقی ايتمكله سرمديت و صمدانيت الهیه بحثنده كریوه شرکه دوشمش و (الحاد athéisme) ايله اتهام ايدلمشیدی . چونكه اهل سنت و علی العموم الهیون و متشرعون (ايکی اصل قديم، ايکی ذات مستديم، ايکی وجود مطلق اوله ماز . بويه ايکی مبدأ قبول ايتمك شرك در!) ديه ادعا ايله مشلر و (دهريه) فرقه سنی (ملاحده مشرکين) صنفندن

صايمشلر در . باقيلسه (دهريون) مطلقاً الهی انكار ايتمه مش، فقط دهري الله ظن ايتمكله برضالات خطيره يه دوشمشدر . آروپا مورخين فلاسفه سی، دهريه بی عالم اسلامك (ماديون matérialistes) ی عد ايدميورلر . حالبوكه بوايکی فرقه آره سنده مهم برفرق اعتقاد واردر . [matérialisme تعبيرينه بايکيز !]

دهريه دعواسی زمانك (ازلی - ابدي) بر وجود مستقل اولماسی اعتقادينه مستددر . بناء عليه زمانی بويه (objectif آفاقی) بر شی عد ايتميوبده (انفسی subjectif) اوله رق تلقی ايتمك دهريه مذهبی تملدن بيقار . نته کيم صوفيه نظرنده زمان و مکان (اکوان مستقله) و (ايعان ثابتة entités positives) دن دكلدر . كائنات ماديه ديدکمز بو عالم فسونك اوصاف لازمه سينددر . [mysticisme و coufisme تعبيرلرنده زمان مسئله سنه متعلق تفصيلاته بايکيز !]

الهيون و متشرعونك روح حقنده کی اعتقادی ده (زمان) حقنده کی اعتقادينك عینی در . یعنی طبقی زمان کی روح دخی مخلوقدر . بناء عليه (ازلی) اولمادینی حالده (ابدي) در . [âme و immortalité تعبيرلرينه مراجعت ايدکيز !]

Aperception

(استحضار) ادراك دقيقه Aperception

Aperception فرانسزجه

Aperception انگليزجه و آلمانجه

Apperception ايتاليانجه

لاتينجه (ad percipere) دن کليز و معنای لغویسی (برشی باطناً ادراك ايتمك و طائيق) ديمكدر . بوايکی لسان فلسفی يه (بر تعبير اصطلاحی اوله رق) اك اول ادخال ایدن (لايب نيچ Leibnitz) در . لسان عادی ده، (aperception)، صحیحاً بر (ادراك دقیق)، بر (انجه کوروش) درکه بوقابلتده يالکيز (حدت حواس acuité des sens) کفایت ايتمز؛ (دقت l'attention) دخی شرطدر؛ چونکه اک مهم رولی اويتايان اودر . مثلاً قارشيمزده طوران ديوارى کورورز؛ بو قدری

(ادراك perception) در . صرف حواسمذك (تهيج انفعالی excitation passive) ، بو (فعل ادراك acte de perception) حصوله كفايت ايدر . فقط نظريمزی يالکيز بر نقطهيه توجيه ايدرد لايقيه دقت ايلرسهك - فرضا - ديوارك او نقطهسنده غايت كوچوك بر شينك حركت ايتكمده بولوندوغنی (واونك مثلاً بر قرنجه اولدوغنی) كورورز وطانيرز .

مع مافيه (لايب نيچ) ك (aperception) كلسنه تخصيص ايتديكي معنا ، بو دكلدر . بو فيلسوف (موناد monades) ناميله بر طاقم عناصر بسيطه تصور ايتمشدي كه بونلر ، نوعما ، عقل وحيات صاحبي آتوملردر . (بوكليه باقيكز تعريفات و تفصيلات واردر !) بناءً عليه بونلرده (perception) قابليتي ده وار ؛ (aperception) قدرتي ده وار ! . . . (مونادك) ، اشياي خارجيه يي ادراك ايتمه سنه (لايب نيچ) (l'acte de perception) دييور ؛ بوكي مدركاتي ، بالتصور (استحضار représenter) ايدم بيلمه سنده (l'acte d'aperception) دييور .

(سرويليام هاملتن) ك تعريفی ده ا و انخودر :

« (لايب نيچ) و (وولف Wolf) طرفدارلری ، روحك (بلا واسطه immédiatement) (استحضارات ذهنيه - les représentations mentales) يه كسب اطلاع ايتمه سنه (aperception) ديرلردی . اعتقاد لر نجه ، روح انساني اولا وبلا واسطه ، انجق (صور علميه) يه يعنی ، استحضارات ذهنيه مطمع اولور واونلر دلالاتي ايله خارجه كي اشيايه انتقال ايدم بيلير ایدی . » دييور .

بو فكر ، اساساً (ده قارت Descartes) كدر ؛ و (قارته زيانيزم cartésianisme) يعنی ده قارت مسلك فلسفي سنك اساسات مهمه سندن بريني تشكيل ايدر . في الحقيقه (نظريه معرفت théorie de la connaissance) بحثنده ده قارتك اعتقادی بو ایدی : [هر شيدن شبهه ايدم بيليرز . فقط (افكار idées) مزدن شبهه ايدمه يز . زيرا شبهه ايتك بيله بر فكردر . فكر ، بر روح متفكری استلزام واثبات ايدر . فكر ايله روح آرمه سنده حيولت واسطه يه حاجت يوقدر . روح ، طوغرودن طوغرويه واك اول

كندنده حاصل اولان افكا ه مطاع اولور . صوكره اوافكارك - عالم خارجي ده ممثلري اولماسی لازمكه چكني محاكمه ايدر ، دوشونور ؛ وبونك اوزرينه عالم خارجينك وجودينه حكم ايدر . بناءً عليه كائنات خارجيه نك وارلغنه اعتقادمز ، برحاكمه نتيجه سيدر . يوقسه كائنات مادي يي طوغرودن طوغرويه ادراك وتلقی ايدمه يز . طوغرودن طوغرويه تلقی واستشعار ايدم بيلديكمز شيلر ، افكار مزدر . [دييوردي .

ده قارتك ايزندن پك آرييله ماين (لايب نيچ Leibnitz) ، شو دعوايي بر تعبير فلسفي ايله اخطار وبيان ايچون (aperception) كلسني ايجاد ايتمش اولويور . (موناد) ديديكی ده (روح) دن باشقه بر شي دكلدر . اوحالده روحك كندی حالات نفسانيه يي طوغرودن طوغرويه ادراك ايتمه سنه (aperception) تعبير يي وضع و تخصيص ايتمش اولويور ديمكدر . بوتقديرجه شوتعبير صرف (انفي subjectif) اولان نوع شعور معناسني افاده ايدويور . اونك ايچون بوكا (استشعار) ديمك لازم كلير . ذاتاً بولفظ اسلام محررات فلسفيه - نده چوق كچر وهان عيني معنای ادا ايدر . (ادراك دقيق) تركيبي بو معنايه ذره قدر اويماز .

سليمان قانونی دورينه شرف ويرن علمای عثمانيه دن (قينالی زاده علي افندی) مرخومك (اخلاق علائي) ناميسله مشهور اولان اثرندن نقل ايتديكم شو ملاخطات ، بو عثمانی فيلسوفنك طبق (ده قارت) و (لايب نيچ) كيبي دوشوندوكني اثبات ايتدكدن ماعدا (استشعار) تعبير يي (aperception) مقامنده قوللايش اولدوغنی ده واضحا كوستير :

« معلوم اوله كه نفس انسانيه نك وجودی (بديه اولی) در ؛ و بديه اولی ، دليل بيان و حجت و برهان كتورمكدن مستغنی در . زيرا اظهار اشيا انسانه ، كندی حقيقت ذاتی دركه بر آن و بر ساعت مخفی و نا معلوم اولمق يوقدر . كرك خفته ، كرك بيدار ، كرك مست و كرك هشيار ، جميع احوال و احوارده نفس انسانيه كندی ذاتنه شعور و استشعار (؟) دن خالی دكلدر زيرا بر شي ايله نفس مايننده تخیل واسطه محالدر . »

کودولو یورکه بوراده که استشعار، تماماً (لایب نیچ) ك (apercep- tion) دیدیکی شیدر. بودوشونوش دخی تماماً و عیناً (ده قارت) دوشونوشی در. حتی روحك بلا واسطه کندی ذاته و حالاتنه شعوری (قارته زیانیزم = cartésianisme) ك تمل طاشیدر.

قینالی زاده (ده قارت) ك معاصری ایدی؛ حتی علی التقریب حساب ایدییرسه بویکی حکیم، همان عینی زمانده اثر لرینی یازمشلردر؛ دهیه بیلیم؛ فقط شوراسی محققدر که قطعاً یکدیگرینك وجودندن خبردار دکلردی. قینالی زاده بوتون افکار فلسفیه سنی (خواجه نصیرالدین طوسی) دن آلمشدر. Aperception تعیرینك متضمن اولدوغی اهمیت مسئله، (روحك افکاره طوغرودن طوغرویه مطلع اولماسی و اشیای خارجییه انحق - بالواسطه - انتقال ایده بیلیمه سی) کیفیتهدار اولان دعوادر. بوادعا جدی مناقشاته سیدیت ویرمش و (مبحث معرفت) مسئله سنده مذاهب متضاده و متخالفه نك ظهورینی موجب اولمشدر.

[بوخصوصده تفصیلات ایچون intuitionisme، representationisme، کله لر یله connaissance médiate و con. immédiate تعیر لرینه باقیکز!]

ضیاع کلام Aphasie

Aphasie	فرانسوزجه و المانجه
Aphasia	انگلیزجه
Afasia	ایتالیانجه

Aphasie

سوزسویلهیه بیلیمك قابلیت، برچوق اسباب و عوارضدن طولانی ضایع اوله بیلیر. سبی هر نه اولورسه اولسون، بوقابلیتسزلکه (aphasie) ده نیلیور. یالکز بونده باشلیجه شایان دقت اولان کیفیت، قوای ذهنیه نك هیچ برینه ضرر کیه رك قابلیت تکلمك ضیاعیدر. کله، یکی اولقله برابر - اکثر امثالی کبی - لسان یونانی دن آلمشدر. (اادات نفی + فانه = φάσις = تکلم) دیمکدر.

بوعارضیه یی - اطر فیله - تتبع ایدن پسیقولوج طیبیلر، برچوق اسبابه عطف ایدیورلر. بناء علیه، اسباب موجبیه سی نس - بنتده، بوقصورك،

تنوعاتی واردر. اوله بونی (aphonie) دن فرق ایتمه لی در. زیرا اداره کلام ایچون مؤکل اولان (مراکز عصیه ايله اعصاب وارده، centres nerveux, et nerfs afférents) ده قطعاً بر بوزو قلق اولمادینی حالده، تکلمه آلت اولان اعضای لازمه ده بر بوزو قلق اوله بیلیر؛ مثلاً (حول صوتیه cordes vocales) مفلوج و یا خود بر عارضه ايله معلول اوله بیلیر ده سس چیقماز. ایشته (آفونی = سس سزلک!) بودر. حالوکه حقیقی (aphasie) لر، حله عصیه ده بعضی تخریبات وقوعندن ایلری کلیر.

(آنتروپولوژی = anthropologie = بشریات) عالم شهری (بول بروقا Paul Broca)، (۱۸۶۱ تاریخ میلادی سنده!) (کلامك مرکزی centre de la parole) اولق اوزره دماغك صول طرفده (اوچونجی تلفیف جبهی troisième circonvolution frontale) یی کشف ایتیش و بو تلفیفك (قدم pied) نده وقوعه ککن تخریباتك قابلیت کلامی محوایتدیکنی بیلدیرمشدی. فقط اوزماندنبری انواع مختلفه سی کشف و تعیین ایدلمشدر. متخصصین مدققین دن (لیختایم Lichtheim) ايله (وه رنی که Wer-nicke) بوعوارض تکلمی درت صنفه تقسیم ایدیورلر؛ بوقسیم، عوارضك تعلق ایتدیکی مراکز دماغیه یه نسبتله یاپیلمش اولدوغی ایچون بر (تصنیف طبیعی classification naturelle) صاییلیر.

برنجی صنفده (aphasies corticales) داخلدر؛ یعنی قشر دماغده وقوعه ککن تخریباتدن ناشی حاصل اولان عوارض کلامیه واردر. بو حالده کلمات مسموعه نك (خیالات سمعیه les images auditives) لری مضمحل اولمشدر. یعنی، انسان بر کله ایشیدیرسه اوکله، ذهنده بر خیال مخصوص احضار ایدر. مثلاً (یازی ماصه سی) سوزینی ایشیدیر ایشیتمز، اونك خیالی ذهنمزده ترسم ایدر. فی الحقیقه ماصه یی کورمکه حاجت یوقدر. ایشته بوبرنجی صنف دن اولان (aphasie) لرده یالکز بو خیال، ضایع و مضمحل اولمشدر دیمکدر؛ یوقسه بو حاله مبتلا اولانلر، سویله نیلن کله لر یك اعلا ایشیدیرلر؛ لکن اوکله لر، متضمن اولدقلری معانی مخصوصه یی ذهنده بر خیال ايله تمثیل ایده مزلر. شو تقدیرده - طبیعی درکه! - کله لرک معناسی اکلایلیمیور

دیکدر. چونکه برکله نك معناسنی آکلامق، اونك ایقاع ایده بیله جکی خیال مخصوصی، ذهنه، (استحضار *représenter*) ایده بیللمکله انجق ممکن اوله بیلیر. اونك ایچوندرکه بوقصوره (کلام صاغیرلنی *surdité verbale*) دیمش لردر. خسته، اصوات کلامیه نی ایشیتدیکی حالدله اونلرک معناسنی ایشیده. میور، واولکلردن بر فکر حاصل ایده میور دیکدر. بوحاله دوچار اولونجه بالضروره سسده چیقاره من؛ چونکه بر فکر ایدینه میورکه اوکا کوره تبلیغات کلامیه ده بولونه بیلین. بوقصور ناقص و جزئی اوله بیلدیکی بی تام دخی اوله بیلیر. ناقص اولونجه بعضی کله لر ویا خود بر لسان مخصوص تکلم ایدیه من اولور. بونك (موسیقی صاغیرلنی *surdité musicale*) ایله مترافق اولوب اولمادیغی ده واقمدر.

تام اولدوغی تقدیرده قابلیت کلام بوسبوتون ضایع اولور. حالبوکه خسته ده سوز سویله مک ایچون بر میل شدید واردر. بوکا (روحی کلام صاغیرلنی *surdité psychique verbale*) دیرلر. بعضاً تلفظ اعتباریه کلامه علی العموم فسادطاری اولور. بودرلوسنه دخی (*paraphasie*) دیرلر. بوحال، دائمی (*alexie* و *agraphie*) ایله برابردر. یعنی بوحاله دوچار اولانلر اوقومغه، یازمغه ده مقتدر اوله مازلر. ایشیدیلن کله لر، (خیالات سمعیه *images auditives*) او یاندر مدقه افکاره انتقال امکانی اولماز؛ افکار اولماینجه ده، اوقومق و یازمق ایچون حرکت ممکن دکدر. بناءً علیه بو مختلف راحتسزقلرک مترافق اولماسی طبیعی و ضروری در. مع مافیه (وه رنی که) و (شارکو *Charcot*) ادعا ایدیورلرکه، چوق اوقومنی اعتیاد ایتیش اولان بعضی کیمسه لرده بو (روحی کلام صاغیرلنی) (قابلیت قرائت و کتابت) ک ضیاعنی مستلزم اولمیه بیلیر.

بوراحتسزلق، بعضاده پک خفیف در. بوتقدیرده، خسته اولان ذات، بعضی اشیانک اسملری تله ظ اولونورسه ویا خود یازیلیرسه، اشیای مذکوریه نی طانیه بیلیر. بودرجه سنی (ضیاع حافظه *amnésie*) نوعدن عد ایدرلر، و (ضیاع حافظه سمعیه *amnésie verbale auditive*) دیرلر. (وه رنی که)، (۱۸۷۴ تاریخ میلادیسنده) اثبات ایتشدرکه دماغک

صول طرفنده کی (برنجی تلفیف صدغی *première circonvolution* *temporale*) ده، (یعنی صول شاقاغمزه مقابل دوشن قسم دماغزک برنجی گیرینی سنده) تخریبات وقوعی بوراحتسزلقک باشلیجه سبی در. بوصفده (*aphasies corticales motrices*) انواعی ده داخلدر. اسمندن ده اکلاشیله جغه کوره محل تخریبات ینه قشر دماغده در؛ فقط قصور، قابلیت حرکت (یعنی قابلیت انتقال) نوعنددر. بوحاله دوچار اولان خسته، کلماتی، ایشیدیر، و معنارینی دخی آکلار؛ اعضای صوتیه سی، یعنی ادوات تکلمی دخی مفلوج دکل، سالمدر. لکن ینه تکلم ایده من. چونکه ایشیتدیکی کله لرک (خیالات سمعیه) سنی لایقیه ذهنده استحضار ایده بیلدیکی حالدله؛ یعنی معنارینی اکلا دیغی حالدله، (خیالات محرکه *les images motrices*) لرینی استحضار ایده من. تاقی ایده بیلدیکی معانی مخصوصه نی لفظاً ادا ایده بیللمک ایچون (اعضای صوتیه *organes vocaux*) سنی نصل اداره ایتیه سی لازمکله جکنی بیله من؛ بجره من. ایشه (بول بروکا *P. Broca*) نك اصل کشف ایتیش اولدوغی (*aphasie*) بودر؛ دوققور شارقونک (*aphasie motrice*) (کوسماول *Küsmaul*) ک (*aph. ataxique*) دیدیکی راحتسزلق ینه بودر. (تلفیف بروکا *circonvolution de Broca*) دنیلن (اوچونجی تلفیف جبهی *trois. circonvolution frontale*) ده تخریبات وقوعی بوکا سیددر. بوتلفیف (صولاق اولانلر *les gauchers*) ده، دماغک نصف ایتمنده در. (صاغ الینی قوللانانلر *les droitiers*) ده، نصف ایسرنده در. بوده یا تام یا ناقص اولور؛ تام اولورسه هیچ تکلمه قابلیت اولماز؛ جزئی اولورسه بو قابلیتسزک بعضی کلماتک تلفظ ایدیه مه مسنه ویا خود بر لسان اجنبی نك تکلم اولونه مامسنه منحصر قالیر.

ویریان ایضا حاددن اکلاشیله جغه کوره خسته لغک بو نوعی برنجیسندن بدرجه اهنودر. شارقونک ادعاسنجه بوراحتسزلق مطلقا کتاب و قرائت قابلیتسزک سنی مستلزم دکدر. فقط بوتون بو قابلیاتک مراکز عصیه سی یکدیگرینه پک یاقین بولوندوغی ایچون اکثریا برینسک آقزده اولماسی

دیگر لرخی ده اضرار ایتدیکندن ، بالنتیجه ، کتابت و قرائت قابلیت ده محو اولویور .

ایکنجی صنفده (aphasies subcorticales) دنیلن انواع واردر . بونلری (مادون القشریه) دیه ترجمه ایده بیلیر که ضیاع کلامه سبب اولان آفات تشریحیه قشر دماغی ده دکل ، اونک آلتنددر ، دیمک معناسی اکلاشیلیر . بوده ایکی درلو اولویور . (حرکی motrice) و (احساسی sensorielle) .

بونلرده آفت ، دماغک قشرنده منتشر اولان (حجیراب عصبیه cellulæ nervus) ده دکل ، یعنی (ماده سنجاویه matière grise) ده دکل ، (الیاف عصبیه fibres nervus) ده یعنی (ماده بیضا matière blanche) ده در . کلامک اصل مرکزی اولان اوچنجی تلفیف جبهی نک (قدم) ندن صدور ایدن الیاف عصبیه نک بر نقطه سنده بر بوزوقلق ، بر قوبوقلق اولدوغی زمان (aphasie motrice) حصوله کلیر . بو حالده خسته یازده بیلیر ، اوقویه بیلیر ، (خیالات سمعیه) مضمحل اولامشدر ؛ فقط قونوشه ماز . (احساسی sensorielle) اولان نوعنده خسته نک علقجه بر قصوری یوقدر . یازمغه اوقومغه ده مقتدر در . فقط (سندن آکلاماز!) ؛ کله لری پک اعلا ایشیدیر . یعنی - عادی معناسیله - صاغیر دکدر . فقط ایشیتدیکی کله لردن معنا چیقارده ماز . تکلمه دخی قابلیت واردر . لکن هنوز تکلم ایتمه سنی اوکرده نه مش اولان بر کوچوک چوجوق کبی ابکم طورور . (وهرنی که) ، ظن ایدیور که (عصب سمعی nerf auditif) ده (اصوات کلامیه sons verbaux) بی ادراکه مخصوص بعضی الیاف عصبیه واردر ؛ و بو الیافک آفت زده اولماسی بوراحتسزلفک سببی در . حالبوکه بر جوق علما بونی قبول ایتهدکلی کبی ، بویله (sensorielle) بر ضیاع کلامه بیله وجود ویرمک ایسته میورلر .

اوچونجی صنفده (aphasies transcorticales) دنیلن انواع واردر . یعنی قشر دماغده منتشر اولان حجیرات آره سنده کی الیاف عصبیه ده بر بوزوقلق ، بر رابطه سزلق واردر . بو حالده ، خسته ، تلفظ و تحریر ایچون لازم کلن

حرکات مخصوصه بی اداره ایده من . فقط بریازی بی استسناخ ایده بیلیر ؛ بر آدم املا ایدنجه یازده بیلیر ؛ سویله نیلن سوزلری تکرار ایده بیلیر ؛ باشقه سنک یازدیغنی اوقور و آکلایه بیلیر . آکلاشیلیور که بو حالت مرضیه ده (فکر idée) ایله ، اوفکرک شفاهاً و یا تحریراً تبلیغ اولونه بیلیمه سی ایچون لازم کلن حرکات مخصوصه آره سنده رابطه بوزولمشدر .

(aphasie transcorticale motrice) دیدکلی ایشته بودرلوسیدر . بونک برده (sensorielle) نوعی وار : خسته ایشیدیر ، وایشیتدیکی کله لری تکرار ایده بیلیر ؛ فقط آکلاماز . (کله نک خیالی l'image verbale) ، فکر مقابلی اوایندیره میور ؛ دیمکدر .

دردنجی صنفی ده (aphasie de conductibilité) تشکیل ایدیور . بو حاله کرفتار اولانلر ، کله لری ایشیدیرلر و آکلارلر . یعنی نه مآدتاً ، نه ده معنا صاغیردرلر .

مع مافیه ینه یا تماماً ، یا خود قسمماً کلامه قابلیت سزدرلر . کله لرک (خیالات سمعیه) سی ، (خیالات محرکه im. motrices) لرخی احضار و تهییج ایده من . حالبوکه هر ایکی نوع خیال دخی ذهنده موجود اوله بیلیر . تکلم ایچون اقتضا ایدن حرکت قابلیت ایله سامعه نک رابطه سی بوزو قدر ، دیمک اولویور .

وهرنی که بوراحتسزلفک سببی اولق اوزره محل آفتی تعیین ایتمش و دماغده (جزیره ریل Insula de Reil) دنیلن مرکزده اولدوغنی ادعا ایله مشدر . (agraphie, alexie, allalie, amnésie) کله لرینه ده باقیکیز !

بوتعیرات ، (پسیقوفیزیولوژی Psycho-physiologie) لساننه عأددر . بناء علیه فلسفه عمومیه ایله طوغرودن طوغروه علاقه دار دکدر . لکن ، (نفس ناطقه l'âme, la raison) نک وعلی الخصوص تفکروتکلمک میخانیزماسنی و شرائط تشریحیه و فیزیولوژیه سنی کشف و اظهار ایتدیکی ایچون غایتله مهمدر . روحک وحدانیتی ، عینتی وهله بر (جوهر بسیط و مستقل une substance simple et indépendante) اولوب

اولمافاسی بحث شده ، دلائل قویه عرض ایدرك (حقیقت روح la réalité de l'âme) مسئله سنی تکرار موقع مناقشه دعوت ایتدیکی ایچون - بالوسیه - فلسفه ایله علاقه دارد . (âme و localisation کله لرینه ده باقیکنز !)

بومسئله (روحیون les spiritualistes) ایله (مادیون les matérialistes) آره سنده شدتلی مناقشاتلی موجب اولمش و بر دعوا شکللی آلمشدر . Aphasie نك ابراز ایتدیکی دلائل (مادیون) ك ادعاسنه حق ویریور . چونكه (وظیفه fonction) نك (عضویت organisme) ه تابع اولدوغنی کوستریور و مراکز دماغیه نك بر چوقلرخی ده تعیین ایدیور .
[بو خصوصده تفصیلات ایچون (spiritualisme) و (matérialisme) تعبیرلرنده روح مسئله سنه عائد نظریات خصوصیه باقیکنز !]

درمیزه Aphorisme

Aphorisme	فرانسزجه
Aphorism	انگلیزجه
Lehrspruch	آلمانجه

Aphorisme

یونانی ده (آفوری زو = ἀφορίῳ) ، برشیئی چویروب تحدید ایتمك دیمكدر . فرانسزجه نك (horizon یعنی افق) لغتی دخی بواصلدن مشتقدر و (حدود) معناسنه موضوعدر . اصطلاحده (موجز فقط جامع الکلم) یعنی مختصر فقط چوق معنایی متضمن اولان جمل دستورییه (aphorisme) ده نیلیركه اونلرك هر بری بر عقیده مخصوصه نی ناطق در ؛ یاخود عمومی بر قاعده نك بللوری بر دستور افاده سیدر .

مدنیتك ایلک دورلرنده بر طاقم افکار و ملاحظات حکیمانه بویله وجیزه لر صورتنده بیان ایدیلیردی . بونلره اصطلاحده (gnomes) ده نیلیر . اونك ایچوندركه ابتدای مدنیتك بو دور حکمتنه تاریخ فلسفه ده (la période gnomique) دیرلر . اصولی دائره سنده منتظم کتابلر یازه مایوب ده افکار حکیمانه سنی بویله وجیزه لرله بیان ایتمش اولان حکمایه دخی (les gnomiques)

دیمك اصطلاح اولمشدر . یونان قدیم ده مشهور (ثالزس Thales de Milet) دن اول كن حكما (gnomique) لردن صاییلیر . مع مافیه ابتدای امرده هر علم (gnomes) شکلنده بعضی حقایق اساسیه و یاخود بعضی عقائد عنیدییه ضبط و ربطه آملقه باشلار . چونكه هنوز معلومات طولیانه مامش و (بعضی organiser) ایده مه مش بولونوز ؛ سبی بودر . مثلاً هندقدیمك اك مشهور فیلسوفلرندن (غوتاما Gotâma) نك اثر فلسفی سی بویله در : بواثر - ماهیتی اعتباریه - بر (منطق) کتابندن عبارتدر ، و (ارسطو) نك (organon) نامیه معروف جهان اولان منطقندن چوق اول تدوین ایدلمشدر . بو کتابده قواعد منطقیه (۵۲۵) وجیزه شکلنده مضبوط و مقیددر . بونلره (سانسقریت) لساننده (Soûtras = سوترا) دیورلر كه (وجیزه لر) دیمكدر .

كذلك ، هنوز طبه دائر منتظم و مرتب هیچ بر کتاب یازمامش ایكن بعضی قواعد عملیه و تنبیها صحیه وجیزه لر شکلنده بیان ایدلمش و او یله جه مضبوط قلمشدی . ابوالاطبا (بقراط Hyppocrate) ك طی وجیزه لری : (les maximes d'Hyppocrate) نامیه مشهور و آلان موجوددر .

بزده هنوز تصوف حقنده مکمل اثرلر یازلمه دن اول ، اعتقاد صوفیه وجیزه لر صورتنده ضبط اولومش ایدی . قدما صوفیه نك تراجم احوالندن و بعضی (کلمات حکمیه) سندن بحث ایدن (رساله قشیرییه) ده اسملری ذکر اولونان کبار متصوفینك اکثریسی هیچ بر کتاب یازمامش و بر طاقم وجیزه لرله حکمت تصوفك عقائد اساسیه سنی بیان ایتمشدر . (بایزید بسطامی) ، (معروف کرخی) ودها بر چوق امثالی کبی ! .

هرملتك ضرور امثالی ، اخلاقی وجیزه لرلر اك قدیم و حتی اك كوزل مثاللرخی عرض ایدر .

عربلرك اشعار قدیمه سنده (الحکمة) دیدکلری جمله لر ، درین وقیصه ملاحظه لری ناطق سوزلر ، ینه بو قیلدن بر طاقم وجیزه لر در .
بك اسکی زمانلردن بری بزله انتقال ایتمش بویله بر چوق قیمتلی وجیزه لر

وارد در که اوزمانلر خلقنك (عقائد مُحْكَمَه) سى حَقْدَه بر فكر صريح و برير و بك مهم وثيقه لردن معدود در . بزه بوراده لازم اولان ، منحصر آ فلسفى و جيزه لردر . بونلرده شرط اصلى ، يالكز (قيصه سوز) اولماسى دكل ، عيى زمانده درين و - اولجه عرض ايتديكم كى - بر عقيدة مخصوصه يى ناطق بر (دستور شامل) حيثيتى حائز بولونماسيدر .

اسكىلر وبالخاصه يونانيلايله عربلر (و جيزه) صورتنده بيان ملاحظه ايتكمه بك مراقبلى ايديلر . على الخصوص اسلاف يونانيه دن (هراقليت (Héraclite) ، بو موفقيتيله بر شهرت شايعه يه مظهر اولمشدى . شو مشهور و جيزه لر اونك در و كندى عقائد فلسفيه سنى ، تميز بر بلور شكندنه عرض ايدر :
۱ - ($\epsilon\nu\ \pi\acute{\alpha}\nu\tau\alpha\ \epsilon\acute{\iota}\nu\alpha\iota$ = بر ، هر شى در .) يعنى هر شىك اصلى بر در ديمك ايسته مشدر . بو و جيزه (وحدت وجود) دستوريدر .

۲ - ($\pi\acute{o}\lambda\epsilon\mu\omicron\varsigma\ \pi\acute{\alpha}\nu\tau\omega\upsilon\upsilon\ \pi\alpha\tau\acute{\eta}\rho\ \epsilon\acute{\sigma}\tau\iota$ = حرب هر شىك باباسى در) يعنى عناصر وجود آره سنده ضديت ، هر شىك مبدأى در ، ديمك اولور . بودستورى كائنات عضويه به تطبيق ايدرسهك (داروينيزم Darwinism) ي تصديق ايدر .

۳ - ($\pi\acute{\alpha}\nu\tau\alpha\ \rho\epsilon\acute{\iota}\ \kappa\alpha\acute{\iota}\ \omicron\upsilon\delta\grave{\epsilon}\nu\ \mu\acute{\epsilon}\nu\eta\iota$ = هر شى آقوب كيديور . هيچ بر شى قالميور .) يعنى عالم حادثات ، لاينقطع بر جريان دائمى ايچنده آقوب كيديور ، هيچ بر شى ثبات ايتيور ؛ ديمكدر . (انقلاب عالم) دستورى عد اولونان بوجمله ، هراقليتك اهمم و جيزه سى اولق اوزره تلقى ايدلمشدر . عيى زمانده (قوانيه Dynamisme) و (حادثيه phénoménisme) اعتقادى ده مستلزم و متضمن اولدوغى ايچون بر قات ده شايان اعتباردر . ذاتاً بوفكرى ، هراقليت بر چوق و جيزه لرله تكرار تكرار بيان ايتمشدى . سقراطك شو ايكي و جيزه سى اك قيمتلى جل حكيمه دندر .

۱ - ($\gamma\acute{\nu}\omega\theta\iota\ \sigma\alpha\upsilon\tau\acute{o}\nu$ = كنديكى بيل !) يعنى اك اول كندى ماهيتكه نظر ايت و حقيقتكى بيل ديمكدر . مشهور (دهلف معبدى le temple de Delphes) نك قوسى اوزرنده يازيلي اولان بو مهم سوزى سقراط ،

بك بكنمش و بنسه مشدى . بو و جيزه (من عرف نفسه فقط عرف ربه) حديث شريفنك منطق منيفه تماماً موافق در . تصوفده عادتاً بر دستور حكمت اولمش و بالجله متصوفين بونك معناسنى شرح ايتكمه اوغراشمشدر .
۲ - ($\epsilon\acute{\iota}\delta\alpha\ \omicron\upsilon\delta\grave{\epsilon}\nu\ \epsilon\acute{\iota}\delta\alpha$ = شونى بيلدم كه هيچ بر شى بيلمه مشم .)

يعنى حقايق اشيا بختنده هيچ بر شى بيلمه ديكى اوكرندم ؛ ديمكدر . (لاادريه agnosticism) نك دستور اساسى سى بودر . اك بويوك فيلسوفلر بو سوزى مشق اتخا ايدرك تكرار ايتمكدن اوصانما مشلدر . بزده (فخرالدين رازى) (ابن سينا) ، (عمر خيام) و امثالى كى اك بويوك متفكرين بو معنائى متضمن حكيمانه (رباعى) لر يازمشلدر . [agnosticism سوزينه بايكنز !] سقراطك معاصر يندن اولوب (سوفسطاييه les sophistes) فرقه مشهوره سندن صاييلان (پروتاگوراس Protagoras) ، (اضافيه relativisme) مذهبك مؤسسى در . بونك (مبدأ اساسى principe fondamental) سنى بر و جيزه شكندنه عرض ايتمشدر كه اونى بوتون فلسفه كتابلرى حالا ذكر ايتك ايچون مناسب و وسيله بولويورلر .

($\pi\acute{\alpha}\nu\tau\omega\upsilon\upsilon\ \chi\alpha\iota\ \mu\epsilon\tau\acute{\rho}\omicron\upsilon\varsigma\ \alpha\acute{\nu}\theta\upsilon\pi\omega\upsilon\upsilon\ \epsilon\acute{\iota}\nu\alpha\iota$; $\tau\acute{\omega}\nu\ \mu\acute{\epsilon}\nu\ \omicron\upsilon\tau\omega\upsilon\upsilon$, $\acute{\omega}\varsigma\ \epsilon\acute{\sigma}\tau\iota$; $\tau\acute{\omega}\nu\ \delta\grave{\epsilon}\ \mu\eta\ \omicron\upsilon\tau\omega\upsilon\upsilon$, $\acute{\omega}\varsigma\ \omicron\upsilon\kappa\ \epsilon\acute{\sigma}\tau\iota$. $\pi\acute{\alpha}\nu\tau\alpha\ \pi\acute{\rho}\omicron\varsigma\ \tau\acute{\iota}$ هر شىي تقدير ايچون ، معيار ! انساندر . اولان شيلر ايچونده اولمايان شيلر ايچونده .. هر شى اضافى در ! ..) ديمكدر . اكثرياً بوضوك جمله : (هر شى اضافى در !) قضيه سى برو جيزه اوله رق ذكر اولونور كه فلسفه ده بر مهم حكمتى ناطقدر . عرب فيلسوفلرى (العلم اضافه محضة) ديمشدر ، وعيى معنائى متضمندر .

[relativisme كله سنه بايكنز !]

(رواقيون les stoïciens) دن مشهور (تهيقوت Epictète) : ($\alpha\nu\acute{\epsilon}\chi\omicron\upsilon\varsigma\ \kappa\alpha\iota\ \alpha\pi\acute{\epsilon}\chi\omicron\upsilon\varsigma$! = امساك و تحمل ايت !) ديمش و رواقيه فلسفه سنك اك مهم دستور عملى ، بواچ كله ايله ، بيان ايله مشدر . [abstinence كله سنه بايكنز !]

(مدرسه قيروانيه école cyrénaïque) مؤسسى (آريستيب Aristippe) ،

($\eta\delta\omicron\nu\eta\ \acute{\epsilon}\nu\ \kappa\iota\nu\eta\sigma\epsilon\iota$ = ذوق، حرکتده در .) دیمشدرکه بواعتماد،
(مادیون les matérialistes) ك اخلاق بختده دستور معتبریدر .
[cyrénaïque سوزینه باقیکنز].

مشهور لاتین شاعری (ویرژیل Virgile)، ($Mens\ agit\ molem$) =
روح ماده‌نی تحریک ایدر (جمله‌سیله باشلایه رق بر اوزون شعر یازمشدی .
بوجه، (روحیون les spiritualistes) ك عمده اعتقادی ناطق بروجیزه
معتبره اولمشدر . [spiritualisme لفظه باقیکنز !]

فلاسفه متأخرین دخی، دأب اسلافه اقتدا ایدرک، عقاید مخصوصه‌لرینی
برروجیزه صورتده عرض ایتمشلردر . یونلر ك مشهوری (دهقارت
Descartes) ك : ($Dubito, cogito; ergo sum$) = شبهه ایدیورم،
دوشونویورم؛ اویله ایسه موجودم !) دستوری در . بوجه
(subjectivisme انفسیه) مذهب فلسفی سنك (تمل - طاشی) در .
[subjectivisme لفظه باقیکنز] كذلك، اون سکنجی عصر میلادینك
اك بویوك فیلسوفلرندن (Berkeley بارقله)، ($esse\ est\ percipi$) = وارلق
ادراك در .) دستورینی عرض ایتمكه (انفسیه) مسلکده درجه قصوایه
وارمشدر .

($Nihil\ est\ in\ intellectu\ quod\ non\ fuerit\ prior\ in\ sensu$) =
عقلده هیچ برشی یوقدرکه اولجه حسده بولونمش اولماسین .) جمله‌سیله
مضبوط اولان دستور، (حسیون les sensualistes) ك مبدأ اعتقادی در .
حکمای اسلام میاننده (ابوحسن الاشعری)، (من فقد حساً، فقد علماً)
دیمکه عینی ادعاده بولونمشدر. بودستور معروفه، آلمان فیلسوفی (لایبنیچ
Leibnitz)، ($nisi\ ipse\ intellectu$ = عقلک کندیسنندن ماعدا)
سوزلرینی علاوه ایدرک اون بنمسه مش وحسیونه معارض اولان (عقلیون
les rationalistes) ك دستور حکمتی اوله رق تشهر ایلده مشدر .

علمای مجربین دخی، برحقیقتی ویاخود برنظریه علمیه‌نی وجیزه‌شکلده
بیان ایتك مراقندن قورنوله مامشلردر . کیمیا به علم حقیقی حیثیتی بخش
ایدن (لاووازیه Lavoisier) ك : ($Rien\ ne\ se\ perd, rien\ ne\ se\$)

$crée, tout\ change$ = هیچ برشی محو اولویور، هیچ برشی یوقایکن
وار اولویور، هرشی تبدل ایدیور .) جمله‌سی وجیزه شکلده در وپك
مهم بر حقیقت علمیه‌نی ناطق در . بونی (قلازومن لی آناقساغور
Anaxagore de Clazomène) بکرمی بش عصر اول سویله مش وقرون
وسطی فیلسوفلری، بومعنای ($ex\ nihilo\ nihil\ fit$) جمله وجیزه سیله ادا
ایتمشلردی .

حیات علمنده (Biologie) عصر مزك اك بویوك کاشفلرندن اولان
متوفی (پروفیسور ویرخوو Prof. Virchow) هر جسم عضویونك
بریومورطه‌دن نشأت ایتدیکنی برحقیقت عمومی اولق اوزره عرض ایتش
و: ($omne\ vivum\ ex\ ovo$) = هر جانی بریومورطه‌دن نشأت ایتمشدر؛
دیهرك بویکیقتی بروجیزه شکلده سویله یوب قیسه برسوزله اسکی برمعنای
قطعاً حل ایلده مشدر؛ یعنی: (طاووق می یومورطه‌دن، یومورطه می طاووقدن
چیقمشدر؟) سؤاله قطعی جواب ویرمشدر .
الی آخره ...!

شرقه فلسفی و اخلاقی وجیزه‌لر پك چوقدر؛ پك ای لری ده آزدکلدر.
حتی بعضلری واردرکه برمذهب مخصوصك عقیده حکمتی برجه‌ده تلخیص
ایدر؛ مثلاً (ارادت و مختاریت نفس) دعواسند (question du libre arbitre)
مختاریت طرفداری اولان فلاسفه معاصرین (ان شاء ترك = ایسترسه ترك
ایدر) وجیزه‌سنی پك بکنیرلر . (معتزله les mo'tazalites) فرقه سنك
دستور اعتقادی اولان بوجه‌نی اوروپا مستشرقینی (مختاریت غیر مقیده =
liberté d'indifférence) دعواسنك اك موجر وبلغ بردستوری اولق
اوزره تلقی ایدیورلر. كذلك، (التوحید اسقاط الاضافات) و (ترك دنیا،
ترك عقباء، ترك ترك) کبی سوزلر، تصوفده برحکمت اعتقادیه ویا اخلاقیه‌نی
ناطق وجیزه‌لردر وامثالی چوقدر .

احکامده وجیزه‌لر پك کوزلرینی بزم (مجله) ده بوله بیلیز: (برائت
ذمت اصلدر)، (امانت مضمون دکلدرد)، (شك ایله یقین زائل اولماز).
ودها برچوقلری کبی ...!

وجیزه لر بر (قاعده عملیه دستوری) اولورسه اونلره (maximes) ده نیر . بونلرک حفظ صحته متعلق اولانلری ده واردر . مثلاً ، عربجه ده (تغدی ، تمّدی ؛ تعشی ، تمشی) کی که (اوکله یکنندن صوکره اوزان؛ اقشام یکنندن صوکره که زین !) دیمکدر . بزم تورجه مزده :

آیاغک صیجاق طوت ؛ باشکی سرین ،

معه کی خفیف طوت ؛ دوشونه درین .

بیاتی بوقیلدندر . مشهور بقراطک (maxime) لرینی آ کدیر بر .

(apophthegme) ، (gnome) ، (maxime) تعبیرلرینک نه دیمک اولدوغی ونه صورتله یکندیکنندن فرقلیجه معناله موضوع بولوندوغی ، ایضاحات سابقه دن آکلاشلمش اولسه کرکدر . بونلرک جمله سی ده حد ذاتنده برر (دستور) در . فقط بوکون (formule) تعبیر اصطلاحی سی ، منحصر آ حقایق علمیه نک عمومی اولانلرینه ده نیلیر ؛ بر (نسبت ثابتة relation constante) نک ، بر (قانون طبیعی loi naturelle) نک ریاضی و قطعی بر شکل افاده سیدر . (قاعده règle) تعبیری ایسه (صنعت و صناعات art et industries) ایشلرنده مرجح در . حیثیاً بر قانون درجه سنده قطعی و صریح بر دستور دکدر .

برده (adage) واردر که (ad + age) اصلندن کلیر ؛ عصر لردن انتقال ایتش حکیمانه بروجیزه معناسنه موضوعدر . مضمونی اکثری (اخلاقی) اولور . (حکمت عوام = Folk-lore) ده نیلن (ضروب امثال proverbes) ، هپ بوقیلدندر .

(apophthegmes) تعبیری ده واردر . بونلر غایت مختصر بعضی سوزلردر که وجیزه لرله بر طومالی در ؛ چونکه بونلرده هیچ بر فکر حکمت مضمون دکدر . مشهور (ژول سزار J. Cesar) ک (کلام ، کوردم ، مغلوب ایتدم) جمله سیله تاریخده مضبوط اولان سوزلرینی بروجیزه دکل بر (apophthegme) عدا یتلی در ؛ چونکه مختصر ، قاطی و کسکین بر اسلوب ایله بیان ایدلمش عادی بر سوزدر . اسکی (لاکده مونیا لیلر les lacédémoniens) یونان قدیمک اک وقور بر قومی ایدیلر ؛ وغایت آز وقیصه سوز سوزیلرلدی .

(laconique) تعبیری اونلره نسبتله وضع اولونمش بر کله اصطلاحیه در . ایشته (apophthegme) بویله (laconique) سوزلره دیرلر . بوسوزلرک اک مشهورلری دفعات ایله جمع ونشر ایدلمشدر . (Drusius) ، (۱۶۱۲) سنه میلادیه سنده عربی و عبرانی لساننده مشهور اولانلرینی طویلا مش و بر کتاب شکنده باصدیرمشدی . [تعبیرات مهمه یه باقیکنز !]

ضروریه مطلقه

فرانسجه	Apodictique
انگلیزجه	Apodictical
آلمانجه	Apodictisch
ایتالیانجه	Apodittico

یونانی ده (آپودیقتی می = ἀποδείκνυμι) کله سی ؛ (کوستریورم ؛ اثبات ایدیورم) دیمکدر . تعبیر ، بوکله دن مشتقد و منطق اصطلاحاتندندر ؛ بعضی قضایایه وصف اوله رق قوللانیلیر .

بو تعبیری اک اول قوللانان ارسطودر . استاد یونانی ، (Organon) نامیله مشهور اولان منطق کتابنک (تحلیلیات les analytiques) قسمنده ؛ (آپودیقتی قوس = apodictique = ἀποδεικτικός) و (آپودیقت سلس = apodixis = ἀποδείξις) کله لرینی معین بر معنا ایله قوللانیلمشدی . بوکله لر زمانمزه قدر یا شامش و (قانت) طرفندن احیا ایدلمشدر .

بعضی قضیه لر واردر که اونلرده (موضوع le sujet) ایله (محمول l'attribut) اره سنده کی (حکم jugement) ، عقل ایچون ضروری دکدر . مثلاً صرف تجربه دن استنباط اولونان حقایق افاده ایدن قضایای حسیه ، بویله در ؛ فرضا [لیون اکشی در !] دیدیکمز زمان ویردیکمز شو حکم بالتجربه تحصیل ایده بیلدیکمز بر علمه استناد ایدر . یوقسه تجربه یه حاجت قالمه دن ، لیونک نصل برشی اولدوغنی بیلمه دن ، یالکز لیون لفظی تأمل ایتکله ، بونک اکشی بر میوه اولماسی ایجاب ایده جکنی تعقل ایده مه یز . حتی بعد التجربة اکشی اولدوغنی تحقیق ایتسه ک بیله بویله بر ماده نک ، بوشکده بر میوه نک بهمه حال اکشی اولماسی لازمکله چکنه دائر بر ضرورت منطقیه دوشونه مه یز . چونکه طاتلی

اولمائی احتمالی ده تصور ایده بیلیمک ایچون منطقی بر مانعه یوقدر. نته کیم طائلی لیمون ده واردر. بزم اسکی منطقونمزه تعبیر نجه (اکشیلک) دیدیکمز صفت معلومه ایله (لیمون) اولمق، آره سنده بر ضرورت منطقیه یوقدر. اوصفت، لیمونک (تصور ماهیتده داخل) اوله بیلن اوصاف و کیفیات اصلیه دن دکلدر. بعضی قضیه لرده واردر که اولورده موضوعه حمل اولونان اوصاف، اوموضوعک تصور ماهیتده ذاتاً داخل بولونان کیفیات اساسیه دن اولدوغی جهته حکم قضیه عقل ایچون ضروری، یعنی (واجب nécessaire) در. مثلاً، بوتون قضایای عقلیه، بوقییلنددر. (جسم متحیزدر!) کبی!.. (تحیز) کیفیتی ذاتاً ماهیت جسمیه ده داخل اوصاف ذاتیه دن بولوندوغی ایچون، جسمی انحق متحیز اوله رق تصور ایده بیلیر. عکسکی دوشونه بیلیمک محالدر. بناء علیه بوقضیه لرک حکمنی شبهه دوشورده رک مناقشه یه میدان آحق ممکن دکلدر. حکم واقعک صحتی تحقیق ایتک ایچون تجربه ده حاجت یوقدر؛ زیرایالکر تصور طرفین، یعنی موضوع ایله محمولی دوشونمک، حکم قضیه نک بدهتنی اثباته کافی در. هر عقل سلیم صاحبی یکدن تسلیم ایدر که فی الحقیقه (جسمک متحیز اولمائی ضروریدر!)..

ایشته ارسطونک (apodictique) دیدیکی قضیه لر بو صنفدن اولان (حقایق معقوله) ایدی. بزم شرق منطقونی بولورده (اولیات) دیرلر و (یقینیات) ک برنجی قسمی اولمق اوزره تلقی ایدرلردی. بو قضایای معقوله (برهان argument) ده عمده و اساس اولدوغی ایچون اولیات نامیله تسمیه ایدلمشدی. بولر، حکمی واجب و ضروری اولمایان سائر برچوق قضایانک صحت و یا بطلاننی (اثبات ایدوب کوسترمک؟!) ایچون حجت اوله رق ایراد ایدیه بیله جکندن طولانی درکه ارسطو، اولورده (آپودیک تی قوس) وصفی شایان کورمشدی. چونکه بر دعوائی رد و اثبات ایتک، اودعوائی - ذاتاً مسلم اولان - بوکبی اولیاته ارجاع ایله مک دیمکدر. بوتقدیرجه (apodictique)، (ماهیه الاحتجاج) اولان (قضایای محکمه) معناسنه کلیر. ارسطو بوطرز احتجاجه (آپودیک سیس) دیمشدی. (قانت)، بالخاصه (apodictique) لفظنی ارسطودن آلمش وبر

اصطلاح منطقی اوله رق احیایتمشدر. بوفیلسوف نظرنده (apodictique) وصفه شایان اولان قضیه لر (بالذات بدیهی évidente par elle-même) و بناء علیه (حکمی واجب nécessaire) اولانلریدر. اولر، شبهه کورتورمز؛ مباحثه یه مناقشه یه دخی حاجت براقاز. دهمین ذکر ایتدیکم قضیه کبی!... نته کیم (حقایق ریاضیه vérités mathématiques) افاده ایدن قضایانک جمله سی ده بوقییلنددر. بولرک صحتی تحقیق ایتک تجربه یه مفتقر دکلدر. اوقضیه لرک اصابت حکمنی تصدیق و تسلیم ایتک ایچون - منطقون شرق تعبیری وجهله - (بجود توجه عقل) کفایت ایدر. مثلاً: (ایکی نقطه آره سنده اک قیصه یول انحق برخط مستقیم اوله بیلیر.) و یاخود: (ایکی خط مستقیم بر مکان تحدید ایده مز.) دیدیکمز زمان بودعوالرسوز کورتورمز. اولرک صحتی تسلیم ایچون تجربه ده حاجت یوقدر. یالکر دوشونمک کافی در. بناء علیه بعضی منطقونک (قضایای عقلیه) دیدیکی، بو (apodictique) قضیه لر دن باشقه برشی دکلدر. نته کیم ینه قانتک (قضایای تحلیلیه propositions analytiques) دیدیکی قضیه لر دخی بوزمرده ده داخل اولمق کرکدر. بزم منطقون شرقک (قضایا قیاساتهامعها) تعبیریه تمیز ایتدیکی قضیه لر، ایشه بوصفه کیرر.

[فضله تفصیلات ایچون proposition کله سنه باقیکر. (analytique transcend.) تعبیرنده قضایای تحلیلیه عائد تفصیلاته مراجعت ایدیکز.]
قضیه لری بو حیثله تصنیف ایتک (ضروب modes) نه نظراً تقسیم ایله مکدر. (mode کله سنه باقیکر!]

(apodictique) مقابلی اولمق اوزره (assertorique) و (problématique) تعبیرلری ده واردر. (تفصیلات ایچون بو کله لره آریجه مراجعت ایدیکز!]

(نظریه علم théorie de la conn.) اعتباریه بالجمله مذاهب فلسفیه یی اوچ نوعه ارجاع ایدوب (یقینیّه = dogmatisme)، (تدریسیه = empirisme) و (حسبانیّه = scepticisme) دن عبارت صایانلر اولمشدر. بو متفکرینک اعتقادینه کوره (یقینون les dogmatiques)، حقیقتک

(واجب certain) اولدوغنی ادا ایدرلر ؛ و بناء علیه دستور اعتقادلری (apodictique) بر قضیه شکلی آیر . (تدرییون = les empiriques) حقیقتک انجق (ممکن possible) اولدوغنه قناعت ایدرلر ؛ بناء علیه دستور اعتقادلری انجق (assertorique) بر قضیه شکلی آیر . (حسابیون = les sceptiques) حقیقتک ، (مختلف فیه problématique) اولدوغنی ظن ایدرلر ؛ بناء علیه دستور اعتقادلری (احتمالی = problématique) بر قضیه ایله عرض ایدرلر . یعنی : [بر حقیقت اولسه بیله ، اونک موجودیتی اثبات ایتک ممکن دکدر . اونک ایچون هر شی عینی درجه ده مشابه حقیقتدر . او یله اولماسی ده محتملدر ؛ بویله اولماسی ده محتملدر . بو خصوصده علم یقین حاصل ایتک و قطعاً بر حکم ویرمک انسان ایچون ممکن دکدر !] دیرلر . (académie) تعیرنده تفصیلاته و probabilisme ایله scepticisme کله لرینه باقیکنز !]

آلمان فلاسفه معاصریندن (فرده ده ریق بوتهر و مق = Fr. Bouterweck) (۱۷۹۹) سنه میلادیه سنده (l'apodictique) نامیله بر کتاب نشر ایتشدی . بو اثر ، (ارباب شک) اولان حسابیون و احتمالیون علیه یازمش و اونلرک دعوالرینی رد و ابطال ایتک غیرتیه ملهم بولونمشدی . بو کتابده مؤلف ، حقیقتک وجودی اثبات ایده بیلیمک ایچون ، عموم انسانلرجه بداهه مسلّم و مقبول بر (مبدأ principe) اولدوغنه قناعتی کوسترمش و اونی عمده احتجاج و نقطه حرکت اتخاذ ایله مشدی ؛ یعنی : [بر حقیقت واردر ؛ و او حقیقتی اثبات ایتک ممکندر ؛ چونکه هر کسجه بدیهی اوله رق قبول ایدمش بر مبدأ قویم واردر .] دیمک ایسته مشدی . شو تقدیرجه (apodictique) تعیرینی ارسطونک قوللاندینی معنا ایله تلقی و استعمال ایتمش دیمکدر .

اشتها Appetit فرانسزجه

Appetite انگلیزجه

Verlangen آلمانیجه

Appetito ایتالیانجه

Appetit

بو کله لاتینجه (appetere) لفظندن آلمشدر . معنای لغویسی (ارزو

ایتمک) دیمکدر ؛ حالبوکه اصطلاح اوله رق بوتعیرک اصل واضعی ارسطودر . قرون وسطی (سقولاستیک) یعنی مدرسه فیلسوفلری معلم اول عد ایتدکلی استاد یونانی دن بوتعیری آلوب - دها بر جوق امثالی کیی - لاتینجه یه نقل ایتشدر . حتی قرون وسطی آتارنده (appetit sensitif = appetitus sensitivus) و (appetit rationnel = appetitus rationalis) تعیرلری کورولور ؛ فقط بوتقسیم دخی ارسطونک در : (اوره کسپس = ὁρεξίς) و (اوره قتی قون = ὁρεκτικόν) کله لرینک عیناً ترجمه سی در .

سقولاستیکلر ، برنجی سنی (اشته) معناسنده قوللانیلر و بو کیفیتی (طبیعت بهیمیه) مزک تمایلات فطریه سنندن عد ایدرلردی . بونی تکرار ایکی یه آیروب برینه (appetit irrascible) ، ایکنجیسنه دخی (appetit concupiscible) دیرلردی .

بوتعیرات ، شرق عالمده - بالواسطه - ارسطودن انتقال ایتمش ، واسلافز برنجیسنه (قوت غضبیه) ، ایکنجیسنه ده (قوت شهویه) دیمشدر . اسکی اخلاق کتابلر مزده ، علی العموم (appetit) نک مقابلی (شهوت) در . حتی قینالی زاده علی افندی مرحومک (اخلاق علائی) نام اثر معروفده (شهوت نکاح) تعیری واردر که اوروا سقولاستیکلرنجه مشهور اولان (appetit concupiscible) ترکیبک عیناً ترجمه سی . ر . لکن ، صوکره بزم عثمانی لساننده بو (شهوت) کله سی ، یالکز (بقای نسل) د خادم اولان میلان طبیعی به مختص اولوب قالمش ؛ (اشته) لفظی ده منحصر آ (بقای شخص) ی تأمین ایدن میلان فطرینک اسمی اولمشدر . یمک ایچمک کیی ! .. (appetit rationnel) تعیر کهنه سنه کلنجه ، سقولاستیکلرک بوندن مراد ایتدکلی معنا (ارادت volonté) ایدی . قرون وسطی فیلسوفلری ، ارادی اشتباه تشبیه ایدرلردی ؛ فقط بو نوع اشتباهی (عقل = ratio) بالذات تنویر وادره ایدر و - شهوت بهیمیه نک تولید ایتدیکی - حسیه اشتباه انجق اونک واسطه سیله غلبه چالاییلر ظننده بولندقلری ایچون (rationnel) یعنی (عقلی) صفتیه بونی دیگر نوع شهوتدن فرق و تمیز ایتشدر . بوکون بو خصوصده فکرلر بوسوتون باشقه در ، و بوتعیر تماماً متروک و منسی قالمشدر .

زمانی فیلسوفی (اشتها) و (شهوت) ی حیاتک لوازم طبیعیه سندن اولان (میلان لر inclinations) دن عد ایدرلر . بومیلانلر درحال (طیب نفس bien être) و دفع احتیاج و تأمین راحت ایتمکله ممتازدر . یک ، ایچمک ، او یقو و استراحت میل طبیعی مزکی . . .

بوطیعی میلانلر ، نهایت ایکی صنفه منجر اولور . برنجی صنفده (بقای شخصی conservation individuelle) یه خادم اولان میلانلر واردر . (اشتها) تعیری بز ، بونلره تخصیص ایتمشدر . ایکنجی صنفده (بقای جنس conservation de l'espèce) ی تأمین ایدن میل طبیعی واردر که (توالدوتناسل génération) بوسایه ده ممکن اولور . بز - لسانمزدده - انجق بوکا (شهوت) دیرز .

بونلرک جمله سی ده (غریزی physiologique و instinctif) در . عقل و فکره ، تربیه یه ، تعلیم و تعلمه محتاج دکلدرد . حیات تشخیص و اجتماعیه نک برنجی درجه ده مهم وسائرلرندن اقدام اولان شرائط طبیعیه سندنرد . بواهمیتی درک و اذعان ایدن فیلسوفلردن پک چوغی ادعا ایدیورکه حسیات انسانیه نک باشلیجه منشألری شهوت و اشتها در . مثلاً (altruisme) یعنی دیگر کاملق حسیاتنک شهوتله ، (égoïsme) یعنی خود کاملق حسیاتنک اشتها ایله مناسبتی ادعا اولونمشدر . [بوتعیراته باقیکنز !]

Appetition نشری

Appetence انگلیزجه

دور اخیره شرف ویرن بویوک فیلسوفلردن مشهور (لایب نیچ Leibnitz)، انسانده (روحک جسمه صورت تعالی) مسئله سنی - کویا - حل ایده بیلمک ایچون (مونادلر monades) فرضیه سنی ایجاد و تشهر ایتمشدی . [monade تعیری نه باقیکنز !]

(موناد) ، عینی زمانده موجودیت جسمانیه و روحانییه مزی تمثیل ایدن بر (آتوم atome) یعنی ذره اولق اوزره تصور ایدلمشدی . بناء علیه

ذیشعور و ذی حیات بر ذره اولان مونادلر ، بالذات وبالطبع فعال فرض اولونمشدی . (لایب نیچ) ، بوقعالتی بر تعمیر و جیز ایله بیان ایده بیلمک ایچون ، (appetition) کله سنی ایجاد و وضع ایتمشدر .

مکمل اولان مونادلر انسانی تمثیل ایدرلر ؛ بوتقدیرده مونادک خارجی و باطنی اولق اوزره ایکی درلو (appetition) ی واردر . عالم خارجی ایله مناسبتی موجب اولان (تشیعی) ، عادتاً (قوت طبیعیه force naturelle) معناسنه کلیرکه بومیل خارجی سایه سنده موناد (ادراک perception) ایدرو عالم خارجی نک وجودندن خبردار اولور . فقط (انفسی subjectif) معناسیله مفهوم اولونجه موجودات حقنده تصوراً و (استحضاراً par re-présentation) بر فکر و بر علم حاصل ایده بیلمک دیمک اولور . (لایب نیچ) ک تعریفه کوره : [تشیی ، مونادک باشلیجه فعالیت روحیه سیدر . موناد ، مدرکاتک برندن دیکرینه انجق بوسایه ده انتقال ایده بیلیر .]

Apprehension تصور ساده Apprehension فرانسیزجه و انگلیزجه

Auffassung آلمانجه

Apprendre to ایتالیانجه

لاتینجه ده (ad + prehendere) طوتمق ، یا قلا مق معناسنه کلیر . تعیر ، بو اصلدن مشتقدرد . فقط اساساً یونانی دن ترجمه ایدیلوب لاتینجه یه آلمشدر ؛ چونکه اصل بو کله اصطلاحیه نک واضی ارسطودر .

بو حکیم یونانی ، (علم connaissance) بحثنده باشلیجه ایکی صورت قبول ایدیور و بونلری یکدیگرنندن تمیز ایلوردی . طوغرودن طوغرویه تلقی ایتدیکمز (مدرکات perceptions) ی بالمحا که تحصیل ایتدیکمز معلوماتدن بوسوتون فرقی بولوبوردی : [مدرکات ، بالمحا که و بلاملاحظه بر آنده تلقی اولونه بیلیر . هیچ تلقی ایدیه من بعضی احوال دخی اوله بیلیر . ادراک ایده مدیکمز شیلر بزم ایچون معدومدر . فقط ادراک ایده بیلیدیکمز شیلرده خطا امکانی اوله ماز . خطا ، انجق محاکمه ایله تحصیل ایده بیلیدیکمز معلوماتده واقع اوله بیلیر] دیوردی . بناء علیه : [سالم الحس اولق شرطیه ادراکده خطا وقوعی ممکن دکلدرد . خطا ، انجق محاکمه یه عارض اوله بیلیر .]

Appetition

دیمك ایستوردی . حواسمز واسطه سی ایله طوغرودن طوغروه تلیقی ایدوب برآنده قاورادیغمز معلوماتی ارسطو ، بر تعیر تشبیهی ایله - سائر معلوماتزدن فرقیاتمش و (ادراك perception) کیفیتنه (ثی بین = Θινεῖν) دیمشدی که لغت معناسیله (تماس) دیمکدر . یعنی ادراك ایله حاصل اولان علم ایچون یالکز تماس کافی در؛ دوشونمک واستدلال ایتمک لازم دکادر دیمك ایسته دیکی ظاهر در .

ارسطو ، بو نوع علمی ، کورکویه بکزمش ایدی . مثلاً بر شینک رنگی حقنده بر علم حاصل ایده بیلیمک ایچون کوزینی آچوب ، او شینک رنگی یالکز کورمک کافی در؛ دوشونوب استدلال ایله کشف واستخراج حاجت یوقدر . بو درلو بیلگی ، ساده وبسیط اولدوغی کی آنی در ، وخطادن سالمدر . ایشه (ثی بین = Θινεῖν) کله ی بو خصوصیتی افهام ایچون وضع اولونمش وبو تعیر تشبیهی ، کیت کیده بر اصطلاح اوله رق تمایز وتقرر ایتمشدر . اصول علم و معلومات فلسفیه یی طوغرودن طوغروه یونانی لردن اخذ ایتمش اولان لاتین لر، ارسطونک بو تعیری عیناً ترجمه ایدرک (apprehensio) کله سیله ادا ایله مشلردی . فقط بو کله ، ذاتاً لاتین لسان عادیسنده (آلق) معناسنه موضوع وهر کسجه مستعمل اولدوغندن ، لسان فلسفی ده مقصود اولان معنای خصوصی یی تبلیغ ایچون (apprehensio simplex) یعنی (ساده جه تلیقی) ترکیبی قوللانمشلر؛ حتی (prima apprehensio objecti) دیهرک ایضاح بیله ایتمشدری که (اشیانک ایلک تلیقی سی) دیمکدر ؛ حصول علمده ، ایلک قدمه یی تشکیل ایدن (عملیه ذهنیه operation mentale) بوندن عبارت عد ایدیلیر ، وبو عملیه ده (محاکمه jugement) نك قطعاً واصلاً دخلی یوقدر ، ظن اولونوردی .

ارسطویی معلم اول اتخاذ ایدن واوکا زیاده سیله مدیون بولونان قرون وسطی (مدرسه فلسفه سی la philo. scholastique) ، (apprehensio) تعیری تشبیهی ایتدی . عرب فیلسوفلری ، بونی - بالواسطه - آلوب نقل ایتمشدر در، ظن ایدرم . چونکه (تصور سازج) ترکیبی ، اولافارسی قاعده سی اوزره مرتبدر ، و (سازج) کله سی ، فارسی الاصل اولان (ساده) لفظنک

تعیرب ایدلمش بر صورتی درکه (simple = simplex) معادلی اولور . اوندن ماعدا متقدمینک آثارنده بو ترکیبه قولای قولای تصادف اولونه ماز . (قاضی عضدالایحی) بیله اونی عیناً قوللانمور . حالبوکه (موافق) نامیله مشهور اولان کتابنده بومسئله دن بحث ایدیور . برنجی موقفک مرصد ثانی ، اقسام علم ایله تصور وتصدیقه متعلق مباحثی شاملدر . بوفصلده مؤلف :

(العلم بمعنى الادراك يتناول الظنيات ايضاً) یعنی (علم ، ادراك معناسیله تلیقی اولونتجه طنیاتی ده شامل اولمش اولور ؛) دیه بحثه کیریشدکدن صوکره :

(بو حیثیته تلیقی اولونان علم ، ایکی به تقسیم اولونویور : بریسی حکمدن خالی [خالی عن الحكم] اولان معلوماتدر . بونلره (تصورات) ده نیلیر . دیگرکی حکمه مقارن اولان ادراکدر (هو الادراك مقارن للحكم) ؛ بنده برنسبتک وقوعی ویاخود لاوقوعی ایله حکم اولونور . ایشه بودرلومعلوماته دخی (تصدیقات) دیرلر . دیور . فقط کتابک شارحی (سید شریف جرحانی) اصل تعیر مخصوصی قوللانهرق بعضی ایضاحات ویریور که ، بو ترکیب اصطلاحی نك بالآخره وبالواسطه انتقال وتقرر ایتمش اولما یی احتمالی تأیید ایدر . سید ، - موضوع بحثی ایضاح صدندده - دیور که :

[فالصواب ، ان يقسم العلم الى (تصور سازج) و (تصور معه تصدیق) ؛ کما ورد فی بعض الكتب المعبره] یعنی : [ایشک طوغروسی ، علمک (ساده تصور) و (تصدیق ایله برابر تصور) اولمق اوزره ایکی به تقسیم اولونماسیدر . نته کیم بعضی کتب معتبرده بو وجهله وارد اولمشدر .]

اکلا شیلیور که بحثی صدندده اولدوغمز تعیر ، او وقتلر هنوز پک شایع اولامش ایتمش ؛ چونکه قاضی عضد ، بو ترکیبی قوللانمادینی حالده شارحی بعضی کتب معتبردن آلوب نقل وایراد ایدیور . فقط بوتون قرون وسطی فیلسوفلری کبی طاورانیور : (ساده جه تصور ممکن می ؟ .. دکلی ؟ ..) بو خصوصه دائر جزئی برشبه بیله احساس ایتیمور . اوزمانلر (بسیقو لوزی) علمی ، پک ابتدائی وبسیط بر درکده بولوندوغی سببله عملیات ذهنیه واحوال

روحیه به انفاذ نظر ایده بیه جک صورتده تدقیقات یابیه مادی ایچون سید شریف و معاصر لری معذور ایدیلر . اوزمانلر ، علی الاطلاق حاکم اولان علم ، (منطق) ایدی و هر مسئله منطقی بر نقطه نظر دن تلقی ایدیلردی . اونک ایچوندرکه فلاسفه اسلام (apprehension) کله سنی (تصور) لفظیه ادا ایتشلردر . زیرا منطق نقطه نظر دن باقیلنجه ، بر حکمه مقارن اولان قضایایه (تصدیقات) دیرلر ؛ حکمه مقارن اولمایان معقولاته انجق (تصورات) دیرلر . متقدمین و متوسطین حکما ظن ایدرلردی که حکمه مقارن اولمایان تصورات ده ذهنک فعالیت یوقدر . (اوتصورت ، حقایق اشیانک ، لوحه اندیشه به عکس ایدن صورتلری در) صانیرلردی ، و بوانعکاساته (صور علمیه) دیرلردی . بوکون بومسئله ده فکرلر بوسوتون باشقه در .

[conception, concept تعیرلرینه باقیکنز !]

بناء علیه بوتعیر ، ارتق استعمالدن ساقط اولمش و تاریخ فلسفه به ترک ایدلشدر . شیمدی اوکا بدل ، (perception ادراک) کله سنی قوللانیلور . [بوکله به باقیکنز !] زیرا ، زمانمزد خیلیدن خیلی ترقی ایتش اولان (علم روح = psychologie) تدقیقاتیه اکلانیلورکه ، اویله بوتون بوتون حکمدن آزاده بر (ادراک بسیط) یعنی بر (تصور سازج) یوقدر . بز ، ادراک ایتدیکمز اشیا حضورنده بر (فوطوغراف جامی) کبی طور هیورز . اک بسیط بر (فعل ادراک acte de perception) بیه - خفی اولسون ، جلی اولسون ؛ مشعور و یاغیر مشعور اولسون - بهمه حال بر حکمه مقارن اوله رق واقع اولیور . مثلاً بر (رنگ couleur) ادراک ایتدیکمز وقت ، و یاخود بر دیواره چارپوب (مقاومت résistance) حس ایتدیکمز زمان - واقعا - نفسمزک وضعی بوادراک ابتدائی ده تماماً (انفعالی passif) در ؛ چونکه خارجدن کلن بوتأثیرات و احساساتی (اخذ و تلقی) ایتمکده ارادتمزک ذره قدر دخل و تأثیری اولیور . فقط ماداکه تأثیرات مذکور نک - خارجدن کلمکده اولدوغنی - در حال آکلیورز ، بیلورز ؛ اویله ایسه بو ، انجق (قیاس خفی inférence) ایل ویردیکمز بر (حکم jugement) نتیجه سیدر . کذلک (احساسات باطنیه sensations internes) مزی دخی ادراک ایتدیکمز زمان ، بو (عملیه

ادراک) - ظن اولوندوغنی کبی - بسیط وساده بر تلقی دن عبارت قالمیور . بوکون محقق درکه بر حال روحیه به پیدای شعور ایده بیلیمک ایچون ، کیفیات وجدانیه آره سنده - بهمه حال - بر (فرق différence) حس ایتک اقتضا ایدر . بوده (تمیز discernement) ، (مقایسه comparaison) (حکم jugement) اولمادجه ممکن اوله ماز . بر (فکر idée) ، انجق بو عملیات ذهنیه دن سوکره تولد ایده بیلیر . اوحالده هیچ بر فکر یوقدرکه بر (تصور ساده) نمونه سی اوله بیلین ! . افکارک جمله سی ده بر سوری عملیات ذهنیه محصولی در . اک بسیط کیفیت ادراکده بیه هیچ اولمازسه بر (jugement d'extériorité) و بر (jugem. d'antériorité) واردرکه مکان وزمانله علاقه سنی تعیین ایدر . طوغرودن طوغر ویه تلقی ایتدیکمز بر تأثیر بسیطک (انفسی subjectif) و یاخود (آفاقی objectif spatial) یعنی (باطنی intrinsèque) و یاخود (خارجی extrinsèque) اولدوغنی در حال وهان عینی زمانده ادراک واذمان ایدرز . نته کیم ، اوتأثیرک (خاطره reminiscence) اولمایوب (حالی actuel) بر (امر واقع) اولدوغنی ده تسلیم ایدرز . بو بر حکمدرکه کیفیت ادراک لاهق اولور .

[بوتون بو تعیرات اصطلاحیه به و بالخاصه actuel, antérieur کله لرینه باقیکنز !]

بوکونکی فلسفه لساننده بوکا (ادراک perception) و (تحدس intuition) دیرلر . بودرلو بیلکی به ده (علم تحدسی connaissance intuitive) ده نیلیر . بزم فلاسفه اسلامک (علم ضروری) دیدیکی تماماً بودر . بودرلو بیلکی طوغرودن طوغر ویه تماس ایله تلقی ایدیلوب عملیه فکریه نک وساطته محتاج اولمادی ایچون دخی معلوما تمزک اودرلوسنی تمیز ایچون (علم بلا واسطه connaissance immédiate) تعیری چوق دفعه لر ترجیح ایدیلیر .

[تعیرلرینه باقیکنز !]

اسکی تعیرات فلسفیه نک یک جوغنی احیا ایدرک یکی منارله قوللانان (قانت Kant) بوکله به دخی (تنقید عقل صرف critique de la Raison)

Pure) نام اثرنده استعمال ایتشدرد. بوفلسوف مجده، (کیفیت علم) بحثنده دائماً (عقل *raison*) . ه برای چیقاردینی ایچون، علمده، (محصول تجربه *produit de l'expérience*) اولان (عناصر محسوسه *éléments sensitifs*) یی، یعنی (مدرکات حواس *perceptions des sens*) ی، (عناصر معقوله *éléments rationnels*) دن دقله تفریق ایتکه چالیشردی. اونک ایچوندرکه معلوما تمزده (تجربه به تقدم ایدن *apriorique*) مبادی واحکامی، (تجربه ایله حاصل اولان *apostérieur*) مدرکات حسیه دن آیری طوتاردی؛ حتی بوتقسیمی پک ایلری سورمشدی. ایشه بوسبیلهدرکه (*appréhension*) تعیرینی دخی اوکا کوره تلقی وتعریف ایتشدرد. حواسک فعالیتنده، قانت ایکی کیفیت ملاحظه ایدیوردی: بریسی خارجدن (بلا واسطه *immédiatement*) تلقی اولونان (احساسات *sensations*) در؛ مثلاً: رنگ، مقاومت، امتداد، شکل کی مدرکاتدرکه بونلر علممزنک ماده اصلیه سنی تشکیل ایدر. لکن بوکی طویغولری ترکیب ایدوبده اونلره بر (صورت *forme*) ویرمه دجه (علم *connaissance*) ممکن دکلدر. ایشه بو عناصر علمیه یی ترکیب ایدوب اونلره بر شکل ویرن (عقل) در. مثلاً، (رنگ، مقاومت، امتداد) کی طاغینق طویغولری ذهنتده تألیف ایدوبده [بوکور دوکم شی خارجده کائن بر یازی - ماصه سی در!] ده ین عقلدر. حواس دکل! . چونکه بو حکم تجربه دن منبعث اوله ماز. بومعرفت انجق (تخیله *l'imagination*) نک هنر ترتیبی در. ایشه (قانت) بوکا: (*Synthèse pure de l'appréhension*) = صرف تصورک اثر ترکیبی (دیور .

اکلاشیلیورکه اسکی معناده بر (تصور ساده) قبول ایتیمور. عناصر حسیه یی، انجق ذهنک ترتیب و ترکیب ایتکده اولدوغنی تصدیق وتسلیم ایلیمور. شوقدر وارکه بوقابلیتی صرف عقله عطف واسناد ایدرک، تجربه نک بو خصوصده قطعاً واصلاً دخلی اولمادیغنی ادعا ایتش اولیور. (*aposteriori*, *criticisme*, *rationalisme apriori*) تعیرلرنده ایضاحات مخصوصه واردر. اورایه باقیکنز!]

تملك وامراز اتمك Appropriier

هیچ کیسه نک مالی، ملکی اولمایان بر شیئی بر آدمک ملک مشروعی عد ایتدیره بیله جک افعالك جمله سنه وهردرلوسنه بوکله تطبیق اولونه بیلیر. حتی نسبت استعمالی مطلقامادی شیلره منحصر دکلدر. بر (عنوان *titre*)، بر (شرف *honneur*) دخی احراز اولونه بیلیر.

بوتعیرک فلسفه حقوق واجتماعیاته اهمیت واردر؛ زیرا [هیچ کیسه نک مالی اولمایان بر شیئی، فصل ونه کی شرطلرله بر کیسه نک مالی اوله بیلیور... یعنی بر شیئی (احراز) ایدوب بنمسه بیلمک ایچون رعایتی واجب اولان (شرائط طبیعی ووسائل مشروعه *conditions naturelles et moyens*) (لگال *légaux*) نه در؟...] سؤالی (حق ملک *droit de propriété*) ک (منشأ *l'origine*) نه تعلق ایدن بالجمله مسائل حقوقیه ایله علاقه داردر. بو حق اساسدر؛ و حیات اجتماعیه دهده عمده در. (*communisme* یعنی اشتراکیه و جمعانیه) نامرلیه مشهور اولان مذاهب اختلالکارانه، هپ او یوقاریکی سؤاله مختلف، مختلف جوابلر ویره بیلمک امکانندن طوغمشدر؛ هپسنگ نظرندهده اک مهم مسئله (کیفیت احراز) ک شرائط مشروعه سنی تعیین ایده بیلمکدر.

شبه یوقدرکه بو خصوصده برنجی شرط (سعی و عمل *le travail*) در؛ بزم (مجله احکام) ده ایراد اولونان بر مثال بونی پک کوزل ابراز وتعریف ایدر؛ مثلاً:

یاغور صونی کیسه نک مالی دکلدر؛ فقط بیهوده یره آقوب کیدرکن وکیسه یه فائده سی طوقونمایوب هدر اولورکن، نیم قومشوم، اختیار زحمت ایدوبده بر طرفه بر قازان وضع ایدرک یاغور صونی طویلارسه، اونی - سعی و عملی سایه سنده - احراز ایتش اولور. آرتق، بن، کیدوبده اوصونی - یاغور صونی در دیبه!... آلهام. آلیرسم، بر باشقه سنک حقنه تجاوز ومانی غصب ایتش اولورم. سعی و عملک، (احراز) کیفیتنده شرط اساسی اولدوغنی هان هرکس قبول وتسلیمده متفق الرأیدر. بناء علیه (*anarchie*) تعیرینه دائر ویرمش اولدوغم ایضاحاتده مشهور (پرودون

Proudhon (ك [ملك ، خيرسزلق در ! la propriété c'est le vol)
 دیمش اولماسی، یا اثر غفلت در : یا سفسطه در؛ یا تهمت در !...، تملك ، دائما
 بر باشقه سنك - اولجه - احراز ایتش بولوندوغی بر شیئی غصب ایتك دیمك
 اولسه یدی و احراز ، انحق بوشرط ایله تحقق ایده بیلسه یدی ، (پرودون) ك
 یا كلش سوزی بردستور عمومی صایله بیلیردی . حالبوکه تاریخ انسانیت و حقوق
 کوستریور و اثبات ایدیور که (حق تملك) منشأی (احراز) در؛ احراز دخی
 باشقه سنك مالی، ملکئی (غصب) ایتك ، یعنی (فضولی بر صورتده بنمسه مك)
 دکلدر .

بناء علیه (احراز) بر شیئه مالك اوله بیلیمك حقنده اساسی بر شرط
 مشر و عدر . اولاسی و عملی مستلزمدر . اونسز اولماز ؛ چوق دفعه زحمتی
 و حتی تهاکلی بر سعی و عمل ایستر که انسان بر شیئی احراز ایده بیلین !..
 بعضاده قهر مانلق مرتبه سنده بر علو همت ، جسارت و غیرت ایستر که برشی
 احراز اولونه بیلین !. علی اطلاق انسانلره و انسانیته فوائد عظیمه سی تحقق
 ایدن کشفیات نافعه ده شرف احراز ایدنلردن بك چوغی اونی - جان بهاسنه -
 احراز ایده بیلیمشلردر .

(علم اقتصاد économie politique) ، سعی و عملی منبع ثروت عد
 ایتدیکی ایچون ، هنوز احراز اولونماش بولونان شیلره (ثروت bien, richesse)
 دیمز ؛ ولو که او شیلر حیات بشر ایچون برنجی درجه ده لوازم طبیعه دن
 بولونسون !... .

مثلا ، هوا ی نسیمی ، کونش ضیایی ، دکز و یا غمور صولری و هنوز
 کشف اولونه مایان قطعات اراضی ، بزجه مجهول اولان دفائن معدنیه ، هپ
 یو قیلندردر . یعنی (ثروت) دن معدود دکلدر . چونکه احراز اولونماش
 شیلردر . حالبوکه هوا صو و کونش ضیایی حیات ایچون برنجی درجه ده
 الزم و حتی (لابد indispensable) شیلردر . بناء علیه بزجه بك قیمتلی درلر .
 مع مافیه انحق قیمت طبیعه لری وارددر . قیمت تجاریه لری یوقدر . کیسه
 هوا آلوب صاتماز . کونش ضیایی تجارتك امتیازینی ده آلفه قالفان کوروله مشدر .
 اولنری کیسه احراز ایتمه مشدر ، و ایتمکه ده لزوم کورمه مشدر .

ا کلاشیلیور که احرازی سعی و عمله وابسته بیلیمك و حق مالکی اونکله
 مشروط قیلیمك اعتقادنده علم حقوق ایله علم ثروت اصلاً متفق الرأیدر .
 [anarchie ، communism ، socialisme کله لرینه باقیکنز !]
 فقط ، سعی و عملك (احراز) کیفیتنده شرط اساسی اولدوغنی هر مذهب
 قبولده متفق بولوندوغنی حالده احراز حقك (وراثت ایله انتقال) ایتمه سنده
 بر جهت مشروعه و معقوله بولونوب بولونماماسی ، شدتله موجب اختلاف
 اولمشدر . سوسیالیزمك الك مهم دعوالرندن بری ده (حق موروثك غیر مشروع)
 اولماسیدر . [تعبیراهه باقیکنز !]

عمای انطال Apraxie

یکی تشکیل ایدیلن کلمات اصطلاحیه دندر . یونانی دن آلمشدر . بك نادر
 و فقط بك عجیب بر مرض عصبي نك اسمی در . بوخسته لغه مبتلا اولانلر
 اشیای خارجی نك رنگلرینی ادراك ایدرلر ؛ فقط اشکال مخصوصه سنی
 کوره مزلر . دها طوغروسی ، تغلیط ایدوب یا كلش تلقی ایدرلر . مثلاً
 مرکب حقه سنی ، الما یا خود پاره چانطه سی کی کوره بیلیرلر . حالبوکه ذهنلرنده
 قطعاً بوز و قلق اولمادیفی کی آلات بصریه لرنده دخی بر قصور تشریحی یوقدر ؛
 یعنی کوزلری دخی حال طبیعی ده در . بوغریبه مرضیه نك اسباب موجب سنی
 تدقیق ایدن (یسیقو - فیزیولوژیست) لر ، ظن ایدیورلر که ، بو (ضلالت
 باصره) بر آفت عضویه نتیجه سیدر ؛ و آفت ، بالخاصه کوزلری تحریك
 ایدن (خیالات عضویه images musculaires) نك مرکز دماغی سنده
 اولمق کرکدر !.. .

نادر اولمقله برابر ، بو بر حالت مشهوده در که فلسفه ده بر مهم مسئله
 اساسیه به خصوصی بوجهله علاقه دار کورونور : فیلسوفلر اوتده نبری
 (خواص اجسام les propriétés des corps) ی باشلیجه ایکی صنفه
 تقسیم ایتمکه مجبوری کور مشلر : بر قسمنه (کیفیات اولی qualités
 premières) دیمش و بونلرک ، اجسامه خاص کیفیات ذاتیه و مستقله دن
 اولدوغنی ادعا ایتمشلر . (مقاومت résistance) و (شکل forme) ایشته

او کیفیتانند. بناءً عليه (بزاوماسه ق، دنياه كورمه مقتدر بر كوزدخی اولماسه
ینه اجسامك مقاومت ذاتیه سی و كندینه مخصوص بر شكلی اولق لازمكلیر.)
دیشلر. حالبوكه اشیاك شكلی ادراك ایدیه یلمك - شو عمای اشكال مثاله
كوره - تماماً بعضی شرائط غریزه و روحیه تابع اولق لازم كلیور.
یعنی شكلك، صرف (انفسی subjectif) برشی اولدوغنی و بزم بنیه عضوتمز
ایله طوغروندن طوغرویه علاقه دار بولوندوغنی تسلیم ایتك اقتضا ایدیور.
اوحالده (اجسامك اشكال ذاتیه سی یوقدر) دیمك چیقار. بویه دوشونمكه
مجبور اولان (انفسیون les subjectivistes) ایله (افتكاریون
les idéalistes) در. عكسفی ادعا ایدن، یعنی [کیفیات اولی اجسامك
خواص ذاتیه و مستقله سندن در. شكل دخی بو قیلدن در. بناءً علیه
اشیاك كندی ذاته عائد بر کیفیت مخصوصه در. بزده (فعل ادراكك
برطور مخصوصی une modalite de l'acte de perception) دكدر.
الحاصل، شكل، (بالذات و بالاستقلال en soi et indépendemment)
موجود در! [دینلر، (حقیقیون les réalistes) و (جوهریون،
les substantialistes) در. ده مین اسمنی ذكر ایتدیكم فرقلر ایله بونلر
آره سنده - بومستله اساسیه اوزرینه - شدتلی مناقشه لر اولمش و حالا دخی
دوام ایتكده بولونمشدر. حالبوكه بحثی صدندن بولوندوغمز (غلط حس)،
انفسیون ادعاسنه حق و یریور، کیبی كورونویور.
[تفصیلات ایچون secondaires, primaires كله لرینه باقیكز!]

انی، قبلی (قبل التجربی) Apriori

لمی، بعری (بعد التجربی) Aposteriori

لاتینجه ده (prior) و (prius) كله لری مقدم دیمك در. (posterior)
لفظی ده مؤخر معناسنه كلیر. تعریفی صدندن اولدوغمز تعیرات اصطلاحیه
ایشته بو اصللردن مشتق در.

بو كله لر قرون وسطی (سقولاستیق scholastique =) یعنی مدرسه
فلسفه سنجه معلوم و پك مهمدی. زمانزه دخی اساساً او دورك لسان

عرفانندن انتقال ایتشددر. مع مافیه (طرز استدلال - mode de raison
nément) ك ایکی (وتیره اساسیه procédé essentiel) سنی كوسترن
بوفرقی، ارسطو، صراحة تعیین و تعریف ایتشدی. لکن بولاتین كله لرینی؛
اك اول ایجاد ایدوب اصطلاح اوله رق وضع ایله یں - اون دردنجی عصر
میلادی حكمای آلهیونندن - (ساقسونیالی بویوك آلبر Albert le
Grand de Saxe) در.

ارسطو، مؤثر دن اثره و یاخود بر (مبدأ کلی principe universel) دن-
اونك تحتنده مندرج اولان - جزئیاته انتقال ایتك صورتیله واقع اولان
وتیره استدلالی، بر (argument apriori) اولق اوزره قبول ایدردی.
بالعكس اثر دن مؤثره، یاخود جزئیات متشته دن بر (ماهیت کلیه notion
générale) به انتقال صورتیله واقع اولان وتیره استدلالی ده بر (argument
aposteriori) اولق اوزره تلقی ایدردی.

بویکی طرز محاکمه یکدیگرینه تماماً ضد بر حرکت ذهنیه استلزام ایدره.
چونكه برنده ذهن، كندی معقولانندن اولان بر ماهیت کلیه یی مبدأ اتخا
ایدرك اوندن، جزئیاتنه انتقال ایدیور و نتیجه لر چیقاریور، دیمكدر.
بو حالده حواسك، و بناءً علیه تجربه نك بو طرز استدلالده قطعاً دخی یوقدر.
بناءً علیه بوراده حرکت فکریه بر (استدلال تملیلی raisonnement déductif)
شکلنده واقع اوله بیایر. حالبوكه جزئیات اموردن بر ماهیت کلیه استخراج
ایتك ایجاب ایدنبجه حواس، محاکمه ده برنجی درجه ده ذی مدخل بولونور؛
زیرا جزئیات امور دیدیکمز (وقایع مشخصه faits concrets) یی
ادراك ایدن انجق حواس در. حواسك بویه حادثات متنوعه یی علی الانفراد
تلقی ایتیه سی (تجربه expérience) دیمكدر؛ زیرا حواسك وساطت ادراکی
اولمادجه تجربه اولق احتمالی یوقدر. بناءً علیه بویه جه جزئیاتی ادراك ایدوب
کلیاته طوغرو حرکت ایتك (استقرا induction) در. اونك ایچون
بو طرز استدلال دخی - حد ذاتنده بر (استدلال استقرائی raison. inductif)

دن عبارتندر. [deduction و induction تعمیرلرینه باقیكز!]

طرز استدلالك بویکی نوع اساسی سی حقنده و یردیكم شو ایضاحات، براهیت

مخصوصه‌ی حائردر . زیرا تاریخ فلسفه‌ده (تدریبیون les empiristes) ایله (عقلیون les rationalistes) آره‌سنده تحدت ایدن وزمانزه قدر سوروكله‌نوب كلن مجادلات واومباحثات شدیده‌نك قیمتی ایله‌باشلیجه سبی، بوايضاحات ایله تظاهر ایدر .

(مبحث اصول methodologie) ه عائد اولان بو اوزون مجادله‌نك مدنیت فكريه وحقیقه‌ده اوقدر تأثیری اولمشدرکه سقولاستیق (کیدیشنی) ده کیشدیرن عواملدن بری‌ده (اصول تجربیه methode experimentale) نك صوك دورفلسفی فتوحاتندن اولماسی‌در . اکر بواصول ، تحقیقات علمی‌ده اساس اوله‌رق قبول ایدیلوب قطعی برصورتده تأسس ایتمه‌سیدی ، بوکون اسکی فلسفه‌نك سقامتندن کندیزی قورتاره‌مازدق . بالتجربه تحقیقاته کیریشدکن صوکره قوانین طبیعی‌ی‌وحتی قوانین موضوعه‌ی کشف‌وتعیین ایتمك ، بوکون معتبر اولان (اصول) اقتضاسنددر . حالبوکه قرون وسطاده تجربه‌یه اهمیت ویرلمزدی . بعضی (نصوص dogmes) ، وبعضی احکام معقوله (اساس base) عد ایدیلیر وبوزمین اوزرینه - منطق معرفتیه - بربنای محاکمه قورولور، بالضروره حاصل اولان نتیجه (محض حقیقت) دیه تلقی اولونوردی . دیمك که تجربه دكل، بعضی مبادی (قسطاس criterium) ومعیار حقیقت اوله‌رق قبول ایدیلردی . ایشه بوضورتله ویریلن حکملر هپ (قبلی apriori) در . حقیقتك - حد ذاتنده - نه اولدوغنی کشف ایتدیره‌مز . انجق - بزم کیفی‌مزه وظنمزه کوره - حقیقتك نصل اولماسی لازم کله‌جک‌نه‌دائر بر فکر ویریرکه نفس الامر ه البته (مطابق adéquate) دکلددر . طوغرو دکلددر؛ چونکه بر ادعای مجرددر .

(in abstracto) تعیرینه عائد تفصیلاتده عرض ایتمش اولدوغم مثال، (apriori) حکملرک نه قدر حقیقتدن اوزاق قالدیغنی کوستره‌بیایر . (بوتون بوتعیراته و in abstracto کله‌سنده کی تفصیلاته باقی‌کز !)

بز ، انسانلر ، حقیقتك نه اولدوغنی اوکرتمك ایچون ، طبیعی استنطاق ایتمکه مجبورر . معنای صحیحی ایله علمك یکانه اصولی بودر . کتاب طبیعتدن استغنا ایدوب ذهنیزی زورلایه‌رق منطق قوتیله حقیقتی ایلااد ایتمك طوغرو

دکلددر . حالبوکه قرون وسطاده معتبر اولان یکانه اصول ، بوایدی . ایشه (استدلال قبلی raisonnement apriorique) دخی بوکا دیرلر . بو طرز استدلالك سقامتی اثبات ایتمك ایچون ، دنیانك اك بویوك آدمیری ، متخصص ومستنا داهی‌لری ال برلکی ایله‌چالیشمش ونیجه‌تهلکه‌لرله تصحیح اصوله موفق اوله‌بیلمشلردی . اولا (غالیه Galileo Galilei) ، حکمت طبیعی‌ده تجربه‌ی اصول اتخاذ ایدرك (سقوط اجسام قانونلری les lois de la chute des corps) ، (رقاص قانونلری les lois de la pendule) کبی - برنجی درجه‌ده مهم - حقیقتلر کشف ایتشدی . (سطح مائل plan incliné) اوزرنده تجربه‌لر یاپه‌رق قوتترول اجرا ایتمش ، و (تعجیل accélération) مسئله‌سنی‌ده حل ایله‌مشدی نته‌کیم کندیسندن چوق اول مشهور (سیرا کوز الی آرشمید Archimède de Syracuse) بته عینی اصول تجربیه ایله بر قانون مهم کشف ایتشدی که کندی اسمنه نسبتله معروفدر . آرشمیددن اول كلن (اسکندریه‌لی هه‌رون Hérone d'Alexandrie) ك موفقیتی‌ده انجق تجربه‌سایه‌سنده ممکن اولمشدی . نته‌کیم بوتون بوکشفات ، تجربه‌نك مکافات سعی‌در .

ینه‌غالیه زمانی مشاهیرندن (هاروهی Harvey) ، (دوران دم circulation du sang) کیفیتنی بالتجربه کشف وتعلیم ایتشدی . الی‌اخیره ... ایشه عرفان حقیق‌نك (دور انتباه la renaissance) ی عد اولونان او عصرده فیلسوف مجدد (فره‌نسیس بهی قن Francis Bacon) دخی یتیشمش بولونویوردی . (فلسفه تدریبه phil. empirique) یعنی (فلسفه تجربیه phil. experimentale) نك مؤسس حقیقی‌سی اولان بو ذات ، اسلافدن ارسطونی شدتله تنقیده کیریشه‌رك نظر اعتباردن دوشورمکه‌غیرت ایتشدی ؛ نهایتده موفق‌ده اولدی . اوزمانه قدر عرفان انسانیته سلطنتله تحکم ایدن ارسطو ، (عقلیه rationalisme) فلسفه‌سنك پیری عد اولونویوردی . (راسیونالیزم) ، (apriori) اصولنی اساس طوتوب تجربه‌ی اهامال ایتمکه ممتازدر . یالکز مبادی عقلیه‌یه اعتبار ایدر واو مبادیدن استخراج وکشف حقایقه‌چالیشیر . بونك ضدی (تدریبه empirisme) فلسفه‌سیدرکه

معقولانی دکل محسوساتی اساس اوله رق قبول ایدر . اونك ایچوندرکه بوفلسفه (حسیه sensualisme) زمینه استناد ایدر . بوده تجربه‌یی مستلزمدر ؛ حتی تجربه‌یه مفتقر و محتاجدر . نته‌کیم بر از یوقاریده سببی ایضاح ایتشدم .

بوندن اکلاشیلورکه فلسفه‌ده دور انتباهی فتح ایدن (بهی قن) ک اوزمانلر آچش اولدوغی اک مهم بحث (rationalisme) فلسفه‌سنه قارشی (empirisme) دعواسی ایدی . بوده (apriori) طرفدارانسه قارشی (aposteriori) طرفدارلنی دیمکدر . چونکه بویکی فلسفه‌نک اصولی، اساسی بودر ؛ فرقی‌ده بودر . دیمک که دعوا (apriori), (aposteriori) دعواسندن باشقه برشی دکلدی .

اوزمانلر ، استبداد فکری دوری اولدوغی ایچون بهمه‌حال ، اسکی استادلردن برینک اسمنه نسبتله بر حقیقت ، یاخود بر اصول مدافعه اولونه‌بیلیردی . اوسبیله اولسه کرکدرکه (بهی قن) ، ارسطونک سلطنت مغنویه‌سنی ده‌ویرمک ایچون حیثیتی ییقمغه قالدیش‌دینی زمان ، بو استاد یونانی‌یه قارشی (دموقریت Démocrites) ی شدتله التزام و تحسین ایتشدی . تاریخ فلسفه‌ده ارسطودن اول کش اولان بوفیلسوف یونانی (ذره atome) نظریه‌سنک مؤسسی اولدوغی کی (sensualisme) فلسفه‌سنک‌ده اک بویوک مثلی صاییلیردی . بناء‌علیه تجددی بر (بدعت سینّه) عد ایدن اودور خلقنه مرام اکلاته‌بلمک ایچون ، (بهی قن) دموقریتک اسم و شهرتی کندی مقصد تجدد پرورانه‌سنه سپر ایتش (وسقولاستیق) مرضی ایله ذاتاً حال احتضاره دوشمش اولان (راسیونالیزم) یعنی (apriori) اصولانی بوسبوتون سوندورمک ایچون تام وقت مناسبی بولمشدی .

(لورد ورولام Lord Verulam) عنوانیه تاریخده شهر تشعار اولان (فرانسیس بهی قن) ک بو فطانت و غیرتی سایه‌سنده فلسفه بر دور جدید فتح ایتش اولدی .

بویوک فیلسوف (۱۵۶۱) سنّه میلادی‌سنده طوغمش و (۱۶۲۹) ده وفات ایتشدر . اوندن بر آز صوکره کلن (ده قارت Descartes) ،

(۱۵۹۶) ده طوغمش ، (۱۶۵۰) ده وفات ایتشدر . بودخی دور جدیدک اکایلری کلن فاتحلر ننددر . تجربه‌یی ، ده قارت دخی تجویز و توصیه ایله مش فقط بوتون بوتون بو اصوله طرفدار اوله‌مامشدر . کندیسنک فطرتاً (ریاضی mathématicien) و (مابعدالطبیعی métaphysicien) اولماسی اک مهم مانعه‌لردن بری ایدی ظن ایدرم .

ده قارت — مزاج ذهنی سی اعتباریه — (تجرید absrtaction) ه مائل و ذهن بشرده بعضی (حقایق مجردة vérités abstraites) بولوندوغنه قائل ایدی . افکار منزی اوج قسمه تقسیم ایدیوردی : (افکار واصله idées adventices) ، حواسک تجربه سایه‌سنده قازاندینی فکرلردی . (افکار معموله idées factices) ، ذهنک کندی کندینه اویدوروب ابداع و ایجاد ایتدیکی فکرلردی . فقط برده (افکار وهیه idées innées) واردی که بونلر تجربه‌دن حاصل اولماش و بزم ایله برابر طوغماش (افکار قیّمه) دیمکدی . ذهنمزک اصل سرمایه‌سنی و معتقداتمزک مبادی اصلیه‌سنی تشکیل ایدن بونوع فکرلر ، (وجوب nécessité) صفی ایله ممتازدر . ده قارت اصل بونلره اینانیور و بو (حقایق مسلمّه vérités admises) دن (بالتعلیل par déduction) حقایق سائرینی استخراج ایدیوردی . تجربه‌یه حاجت کور میوردی . مثلاً (جزؤ کلدن اصغردر ؛) قضیه‌سی (apriorique) بر حقیقت مسلمه‌در . چونکه بواعقاده وجوب وار . ذاتاً باشقه درلو اوله‌ماز ؛ اوله‌مامق لازمکیر . چونکه اساساً (جزئیّت) معناسنده (اصغریت) فکری‌ده مند مجدر . بودعوانک حقیقتی کندی کندینه ثابتدر ؛ تجربه‌یه حاجت یوق ؛ زیرا تجربه بونی ده‌ا زیاده اثبات ایده‌منز . بویکی حقایق مجردده دن برچوق حقایق جزئیّه استخراج ایده‌بلمک تعلیل و قیاس ایله اولور . ده قارت — مبادی علمیه بحثنده — ایشته بواصوله طرفدار ایدی . مابعدالطبیعیات ، ریاضیات ، الهیات و اخلاق مسائلنده بویله بر طاقم افکار وهیه‌یه مالک بولوندوغمنزی ادعا ایدیوردی . اونک ایچون بویکی مباحثه تجربه‌یه اعتبار ایتیه‌رک تکمیل احکام و قواعد اخلاقیه‌یی (افکار وهیه) دیدیکی او (مبادی principes) دن استخراج ایلیردی . حالبوکه (بهی قن) علی‌العموم تجربه طرفداری ایدی .

[بوتون بوتعیراته یکان یکان باقیکنزو بالخاصه methode لفظه مراجعت ایدیکنز.]

(بهی قن) ك تعلیماتی انکلتزده قطعاً حکمفرما اولدی، و بالآخره (جون لوق John Locke) (۱۷۰۴ - ۱۶۳۲ میلادی!) فلسفه تدرییهی متین اساسلاروزرینه بنالیتدی. [empirisme بحثده بوجریان فلسفی به دائر تفصیلات ویرلمشدر.]

بوکون (راسیونالیزم) بوسبوتون متروک و مردود اولماقوله برابر، علومده عموماً معتبر و مقبول اولان اصول، (تجربه) در. اونک ایچوندرکه (aposteriori) یعنی بعدالتجربه تحقیق ایدن احکام و قوانینه اعتماد اولنمقده در. بوتون معلومات بشریه نك، حتی (apriori) ظن اولونان معقولات کلیه نك بیهله تجربه انسانیه محصولی اولدوغی قوتله ادعا ایدلمکده در. بناء علیه ذهن بشرده هیچ بز (idée innée) اولمادیغی و هر درلو افکارک بعدالتجربه کسب ایدلمش بولوندیغی زمانمزك اک بویوک فیلسوفلری بز (عقیده اساسیه doctrine fondamentale) اولمق اوزره تلقی ایتشلردر.

ده قارتک ایزندن بوسبوتون آریله مامش اولان (ئمانوئل قانت Emmanuel Kant) علومده تجربیهی اک صاغلام اصول اتخاذ ایتمکه برابر بعضی (مبادی) قبله (principes aprioriques) لزومنه قانع ایدی. چونکه مدرکات حواسی ترکیب و ترتیب ایتک و اوسایهده محسوساته بر معنایر مک، حاصلی تجربیهی بالذات اداره ایلهمک ایچون انسانده بر قابلیت مخصوصه اولمق لازمکه چکنی دوشونویور، وفی الحقیقه موجود اولان بو قابیلی، تجربه ایلهم اکتساب ایدلمش استعدادات کسبیه دن عدایده میوردی. بناء علیه [ذهن بشرده موجود بر طاقم مبادی عقلیه واردرکه تجربه محصولی دکدر واوله ماز؛ چونکه هر درلو تجاربی بو حقایق مجرد اداره ایتدیکی ایچون اولنر (apriori یعنی تجربهیه متقدم) اولمق کرکدر!] دیمشدی. بوالمان فیلسوف شهیری تجربه نك شرائط اساسیه سنی تشکیل ایدن (apriorique) قوانین فکریه یی ده تعیین ایتشدر. [analogie کله سنده (مماثله تجربه) بحثنه عائد تفصیلاته مراجعت ایدیکنز. appréhension

تعیرنده دخی بومسئلهیه متعلق وقانته عائد ایضاحات واردر؛ اوکاده باقیکنز!] ده قارتک (idées innées) فرضیه سنی، قانت دخی - لوق دن خیل زمان سوکره - رد وابطال ایتشدی؛ فقط اوکابدل (principes apriori) فرضیه سنی وضع و تشهر ایشدر. بنم اعتقاد بجه، بونک ایکسی ده بر یوله چیقار و عینی دعوایه منجر اولور. حالبوکه (تاریخ فلسفه مادیه histoire du matérialisme) محرری فیلسوف (آلبرت لانکه A. Lange) بو ایکی فرضیه آره سنده مهم بر فرق کوروپور، و کندیسی دخی (افکار وهیه) بی انکار ایتدیکی حالده قانتک (مبادی قبله = prin. apriori) سنی صراحتاً قبول و جسورانه مدافعه ایدیور.

بو معلوماتی و فطین فیلسوفک ادعاسنه کوره فرق شودرکه: (مبادی) قبله تجربه دن طوغمش اولماقوله برابر، انجق تجربه سایه سنده تحقق ایده بیلیر. بناء علیه اولنرک وجودنی کشف ایتدیرن انجق تجربه در. یعنی [idées innées) طرفداری اولان فیلسوفلر تجربه یی اهل حتی رد ایده بیلدکلری حالده (apriori) طرفداری اولانلر، تجربه یی دخی عینی درجه ده طرفداردرلر؛ چونکه ذهنمزه بویله بر طاقم حقایق مجرد نك وجودنی انجق تجربه کوستره بیلیر. زمانمزك اصولی، تجربه در. علوم و مدنیت بو سایه ده ترقی ایتشدر. قانت و طرفدارانی (اصول تجربیه) بی ذم و قدح ویا اهل ایتهمدکن ماعدا کمال اهمیتله تلقی و توصیه ایدیورلر!] دیمک چیقارکه زمانک اصول متخذ سنه قارشی کلش اولماق اندیشه سندن متولد بر حس احتیاطکارانه یی متضمن بر دعوادر.

بوکا قارشی مشاهیر معاصریندن (آلکساندر بهین Alexander Bain) یک معقول بر جواب ویرمشدر.

زمانمزك اعظم (تدرییبیون les empiristes) ندن اولان بو انکلیز فیلسوفی، (منطق) کتابنده بو بحث قدیم و مشهورک ماهیتنی - مختصراً - عرض ایتدکن سوکره قانت طرفدارلرینه توجیه خطاب ایدرک:

[اویله ایسه، (یعنی ذهنمزه موجودتی ادعا اولونان «apriori» حقیقتلر، انجق تجربه سایه سنده کشف اولونوب تحقق ایدیورسه، اولنرک

صرف تجربه محصولی اولان حقایق علمیه دن حیثاً نه فرقی قالیر ؟ . . .
دیور .

مع مافیه بو دعوا حالا سور و کله نیور . چونکه اصوله تعلق ایدن بالجه مسائل ایله طوغر و دن طوغر ویه و صمیمی بر صورتده علاقه داردر . (معلوماتمیزك منشأی l'origine de nos connaissances) بحقی ، اصول فلسفه نك الك مهم مسائلنی شاملدر . بوتون معلوماتمیزك ، محصول تجربه اولدوغی حقیقت ایسه ، (نصوص قاطعه dogmes décisifs) و (مبادی قیمه principes immuables) قبول ایدیه مزر . ایدیه مه یخه معتبر و مسلم و حتی مقدس طوتولان بر چوق احکام اخلاقیه و معتقدات دینه قوت و حیثیتی ضایع ایدر . چونکه یکی یکی شرائط تحتده اجرا اولونان یکی یکی تجربه لر ، او احکام مسلمیه یی تعدیل و تبدیله میالدر .

بناءً علیه (aprioristes قبلون) ك اندیشه سی بلکه اصل بوملا حظه دن نشأت ایدیور . اونك ایچون مبادی اخلاقیه و نصوص دینه یی ، طبق (حقایق ریاضیه vérités mathématiques) کی عد ایدیورلر . (اونلر ذهنزده موجود حقایق مجرددندر . تجربه دن طوغر مش معلومات حسیه قیلندن دکلدرلر !)

دیه ادعا ایدیورلر .
حالبوکه (تدریینون) یعنی (بعدیون les aposterioristes) ، جمله معلوماتك ، حتی حقایق ریاضیه نك بیله تجارب مؤکده محصولی اولدوغی ادعاده اصرار ایدیورلر .

تاریخ فلسفه ده کورولدیکی اوزره - یانارطاغ کی - زمان زمان فوران ایدن بو مناقشه بو صوك زمانلرده حکیم و منطقی مشهور (دوقتور یووهل Dr Whewell) ایله ریاضی شهر (سرجون هرشل Sir John Hershell) آره سننده یکی دن آچیلیمشدی . انکلتزه نك الك بنام الیه ونندن و فلسفه خواجه لرندن اولان (راهب یووهل) قانت طرفداری ایدی . هرشل بودعواده قانتك علیهداری ایدی . (جون ستوارت میل J. S. Mill) و (سپنسر Spencer) کی اعظم دخی بحثه قاریشوب هرشل طرفی التزام ایتدیله . نته کیمدها چکنلرده متوفی (پوانقاره Poincaré) تکرار بوبخشی تازه له یه رك بوتون حقایق

ریاضیه نك محصول تجربه اولدوغی ادعا ایندی و بوکا بر چوق دلیللر ابراز ایلهدی ایدی .

(empirisme لفظده بوکا دائر تفصیلات واردر . باقیکزر !)

بویحک مذاهب فلسفیه یه دخی بر چوق جهت تماسی واردر . معلوماتمیزك تجربه دن نشأت ایتش اولدوغی ادعا ایدنلر ، انجق (حسیه sensualisme) فلسفه سنه استناد ایدیه بیلیرلر . (عقلیه rationalisme) مذهبه طایماند قه دخی (apriori) دعوا سی نقطه استناد بوله ماز . کلاسیلیورکه بوا یکی ادعا هر وجهله متناقض دوشوبور . اونك ایچوندرکه مناقشه سی شدتلی و سورکلی اولوبور ، واک اساسلی اعتقاداتی صارصیور .

منطق ساحه سننده تاثیر مهم و نافذدر . (راسیونالیزم) اصولانده (منطق صوری logique formelle) یعنی قیاس و تعلیل قسمی اهمیتجه تقدم ایدر . قیاسده ده اساس بر مقدمه موضوعه و مسلمده دن نتیجه چیقارمق و اوتیجه نك تحقیقات تجربیه یه تطابق ایدوب اتمیه چکنی نظر اعتباره آلمانقدر . (استدلال قبلای raisonnement apriorique) ایشه بودر . ارسطونك حکمنه منقاد اولان سقولاستیق فلسفه سنكده باشلیجه اصولی بوایدی .

حالبوکه (empirisme) اصولانده (منطق استقرائی logique inductive) اهمیتجه تقدم ایدر . چونکه (استقرا induction) اساساً بر (استدلال بعدی raisonnement aposteriorique) در .

مجددین متأخرین بواصولی تقدیم و حکمنی تأمین و تعمیم ایتك صورتیه ارسطونك نفوذ معنویسنی اسقاط ایدرك قرون وسطا عرفانه نهایت ویردیله دی . بوتون بواوزون مناقشه نك خلاصه سی وهله حقیقی شودر :

اگر وجدانمیزك شو حالنی ، ذهنمیزك بوکونکی درجه کالنی نظر دفته آلیسه ق ، هیچ شبهه یوقدرکه سرمایه معلوماتمیز ، عینی قیمته افکار و اعتقاداتن عبارت دکلدر . ذهنمیزی یوقلارسق بعضی معقولات ، بعضی معتقدات کورورزکه عکسنی تصور ایتك محالدر . مثلاً (جزو کلدن اصغر در) (ایکی نقطه آره سننده الك قیسه بول خط مستقیمدر) : (عینی شی عینی زمانده هم وار ، همده یوق اوله ماز) ودها بوکی بر چوق قضیه لر بوقیلدندر .

بونلرك حقیقتی تسلیم ایتك ایچون تجربه به محتاج اولمادیغمیزی درحال
اكلارز؛ چونكه بوقضیه لر بالذات بدیهی در . دوشونورسهك بوحقیقتلری
كندی تجربه شخصیه مزله ادراك و تحصيل ایتش بولوندوغزه دخی قناعت
ایده مه یز . چونكه (ایکی نقطه آره سنده اك قیصه یولك برخط مستقیم
اولدوغنی) بالتجربه تعیین ایدوب اكلامق لازمكسهیدی ، هیچ بویله بر
حقیقت ریاضیه به مطلع اوله مازدق . زیرا بوتون مسافات ممكنه نی آیری
آیری مساحه ایله تكمیل تجربه ایتك لازمكیردی . بوكاده انسان ایچون
احتمال یوقدر . حالبوكه بز بوقضیهك مفهومی دوشونمكه اكلیورزكه
(انحق اولیله اولمق لازم كلیر !) . ایشه فیلسوفلرك (وجوب *nécessité*)
(بوصف وجوب قبلی *apriorique*) حقیقتلرك ضمان صحتی در . تجربه
دكل ! . . . بز ، بوجوبه بناء هندسه دعوالرنده او (متعارفه *axione*) نی
دلیل اوله رق کتیریورز وبو دلیلك صحت وقوته دخی عینی زمانده قناعت
کتیریورز . اکر بوهندسه دعوالرینی بالتجربه اثبات ایتك لازمكسهیدی
هیچ بر دعوا اثبات ایده مزرك وهندسه علمی ده اوله مازدی . چونكه
بوخصوصده تجربه تامه وکامله احتمالی یوقدر .

ایشته (*aprioriste*) لرك خلاصه ادعای بودر ؛ فضله اوله رق
بوداعای حقایق دینه ومبادئ اخلاقیه وبدیهیه دخی تشمیل ایدیورلر .
فقط معلوماتك بر بویوك قسمی دها واردركه - ینه انحق بوكونکی
حال کالمزه نظراً - اولکی قسمك یوسبوتون عکسی وضدی کورونور. مثلاً:
ماء مقطرک صفر درجه ده نصب ابتدیکی ؛ دلك وتماسك حرارت
حصوله کتیردیکی ؛ خلاده هر جسمك عینی صورته وعینی سرعتله سقوط ابتدیکی ،
انحق بعدالتجربه تحصيل ایدلش معلوماتدندر. لیمونك اکشی برمیوه اولدوغنی ؛
التونك قابل تطرق بر معدن اولدوغنی ؛ انقیهك انسانی آقصر تدینی ده ینه
بو قیلدن ، یعنی بعدالتجربه تحقیق ایدوب بیلدیكمز شیلردندر . بودرلو
بیلکی لرمزه (*apostériorique*) وصفی مناسب کوروشمزه یگانه سبب
بودر . فقط دوشونورسهك اكلارزكه بودرلو معلوماتی ایدینه بیلمك ایچون
حادثات خصوصیه نی و جزئیات اموری یکان یکان تجربه و تحقیق ایتكه

مجبورز . (انقیه) نبادن یاپیلش بر ماده در ؛ دیه هر نباتی مادهك بز
آقصر تماسی لازم كله جكنه حكم ایده مه یز . كذلک آلتون قابل تطرق بر ماده در ؛
دیه (جام) و (قایا طوزی) دخی اولیله اولمق لازم کلیر ، چونكه اونلر دخی
ماده جنسندندر .) دیه مه یز . ایشه فیلسوفلرك : (تجربه محصولی اولان
فكرلرده وجوب یوقدر) دیه سندن مقصد بودر .

اكلاشیلوركه بوتون بودعوانك اساسی (وجوب *nécessité*) و (امکان
contingence) مسئله سینه منجر اولویور . [بو تعیرلره باقیكر تفصیلات
واردر .]

فی الحقیقه بوبحثك جریان مناقشه سی فیلسوفلری او مسئله به کورتورمش
و (وجوب) ایله امکانك ماهیتنی تحقیقه سوق ایله مشدر . میل ، منطق
کتابنده اوزون اوزادی به بونی تدقیق ایله مشدر . دها پك چوق فیلسوفلرده
عینی مسئله به صرف ذهن ایتمكدن امتناع ایده مه مشلردر .

صوكره بر ایكنجی مسئله اساسیه دخی واردركه بوتون بودعوانك ،
براستناد نقطه سنی ده او تشكیل ایدر : (عجبا حقیقتاً ذهنمزه بعض (حقایق
واجبه *vérités nécessaires*) وعمومیه وارمیدركه تجربه دن حاصل اولمامش
بولونسون ؟ . . . صحیحاً (*innée* وهی) اولسون ؟ . . .)

ایشته بومهم مسئله به شیمدی به قدر معقول بر جواب ویریه مامشدی .
فقط انسانك شیمدیکی درجه کالنه باقوبده حكم ایتدکلری ایچون اکثربویوك
فیلسوفلر بزده بویله بعضی حقایق واجبه وافكار وهیه بولوندوغنی وبونلرك
تجربه دن متولد اوله مایه جقلرینی تسلیمده مضطر قالمشلردی . چونكه بوكون
فی الحقیقه اولیله بر طاقم مبادئ واردر وعلوم ریاضیه و (منطق تعلیلی
logique déductive) ایله برابر علوم اخلاقیه هپ بوكی مبادئه استناد
ایدر .

لكن تكامل فلسفه سی بوكونکی كالاتی ، انسانیتك تاریخ ترقیاتی ایله
تفسیر وتعریفه چالیشدی ایچون هر ایکی طرفك ادعاسنی ده قصورلی
بولش مسئله اصلی به افراط وتفریط کریوده لرینه دوشورمیه رك - كندی
سیاق نظرنجه حل ایتمشدر .

(تکامل فلسفه سی la phil. évolutioniste) نك مؤسسی وبانی سی
اولان، متوفی (هربرت سپنسر H. Spencer)، بوباده کی فکر و اعتقادی
بر دستور صورتنده عرض ایتش، و :

(Innée pour l'individu, acquise par l'espèce)

دیشدر. یعنی (وهی inné) اوله رق تلق ایتکده بولوندوغمز بوتون افکار
واصلیه و حقایق واجبه و ماهیات مجردة، حتی (ارثی héréditaire) اولان
بالجمله قابلیات عضویه و روحیه - شخص ایچون ! - فی الحقیقه (وهی) در .
بونلری شخص کندی تجارتی ایله قازانامشدر و قازانمه سنه ده امکان یوقدر.
فقط او شخصک منسوب اولدینی جنس ر (عرق race) نظر اعتباره آلیرده
انسانک بو کونکی درجه کماله ایره بیلیمسی ایچون میلیونلرجه سنه لرده کچیردیکی
ادوار تکامل دوشونولورسه، ادعا اولونه بیلیرکه معلومات و قابلیات بشریه ده
(کسی acquis) اولمایان برشی یوقدر. ابتدائی، شرائط نامعدوده سنی
و مدتی تعیین خصوصنده قطعاً عاجز قالدیغمز، ادوار تکامل، انسانیتک
اک واسع، اک سورکلی تجربه سیدر. بو تجربه نامحدوده ائساننده تأید و تحکم
ایدن حقیقتلر، افکار مجردة و حقایق واجبه شکلنده ارثاً انتقال ایتش
و بطندن بطنه میراث قالدیجه (وجوب) حیثی قازانمشدر. شو تقدیرجه
بو مهم مسئله، عرقک حیاته نسبت اولونورسه، (هرشی کسی در. هرشی
تجربه محصولی در!) دیه حکم ایتک ضروریدر. لکن شخک حیاته
اضافته بر حکم ویرمک لازمکیرسه، (انسانده بو کون برطاق افکار و معلومات
واردرکه وهی در. چونکه کندی تجربه سنک محصولی دکلدر. بناءً علیه
apriori بعضی حقیقتلر واردر.) دیمک طوغرو اولور.

نته کیم (ماده نك قابل افدا اوله ماماسی، indestructibilité de la
matière) بحثنده ینه سپنسر، بو دعوانک (apriori) بر مبدئه مستند
اولدوغنی و تجربه ایله اثبات ایدیه میه جکنی ادعا ایدرک طبقی (قانت Kant)
کی دوشونویور.

ایشته تکمیل مسئله نك اک مهم جهتلری بونلردر؛ و بونلردن ده درجه
اهمیتی اکلایشیلیر. (apriorique) و (aposteriorique) تعبیرلری ارتق

ایضاحه حاجت یوقدر. بونلر تماماً عینی معناده (صفت) لردر. عینی موضعده،
عینی صورت و حیثیه قوللانیلیر.

[بوتون اصطلاحات مهمه یه باقیکنز و علی الخصوص empirisme, rationalisme, axiome, contingent, nécessaire, expérimentalisme
کله لینه مراجعت ایدیکز !]

کیمی، غری Arbitraire

Arbitraire

قانوناً، حکمی تحدید ایدلمه مش بولونان بر قدرته (pouvoir arbitraire)
دیرلر. اسکی زمانلرده بوتون پادشاهلر، حتی بوتون دره بکری بویه بر قدرته
مالک ایدیلر. هر یاپدقلری، کندی کیفلرینه و ارادتلرینه کوره اجرا ایدرلردی.
بو معنایه نظراً (arbitraire) کله سنی (کیفی) لفظیه ترجمه ایتلی در.
چونکه هیچ بر قانونه موافقت و انقیادی اولمایان بر قدرت دیمک اولور.
مثلاً: (حکومت بن ایم L'Etat, c'est moi!) یعنی (قانون نم کیفمدر!)
دهین مشهور (اون دردنجی لوئی Louis XIV) بو معنای شخصاً تمثیل
ایدر. بناءً علیه (عندی) کله سی بورایه اویماز.

شو مثال بر مهم نکته یی ایضاح و تفسیر ایدیور و کوستریورکه (اداره
کیفی) مطلقاً قانونسز بر اداره دیمک اولمایه بیلجک !... چونکه بر آدمک
کندی کیفی (قانون loi) صاییه بیلدیکی مدتجه و صاییه بیلدیکی یرلرده مطلقاً
قانون یوق دیمک دکلدر؛ واردر اما کیفی در؛ دیمک اولور. نته کیم، مصر
قدیمده فرعونلر؛ ایران قدیمده (کی لر = یعنی قیصر لر = César لر)
دورنده ده قانونلر واردی، تشریفات واردی؛ نصلکه روسیه ده (مدهش
ایوان Ivan le terrible)، و فرانسه ده برنجی ناپولیون زماننده دخی
قانونلر واردی؛ بونکله برابر (اداره)، تمامیه (arbitraire کیفی) ایدی؛
زیرا او قانونلر، یا (فعال لمایرید، یعنی هر ایسته دیکنی یابه بیلن) بر مستبدک
کیفندن صادر اولمش بر (مجموعه اوامر و نواهی) دن عبارت ایدی. فرعون
ایله کی کاووس زماننده کی کبی !... و یا خود، هیچ اولمازه، بر مستبدک
کیفه تابع آلات اجراییه دن معدود ایدی؛ بناءً علیه قانونک وجودی

اداره نك مطلقا (arbitraire) اولمادیغنی اثبات ایتمز. رومانك صولك دورنده یاشامش واسباب انحطاطنی یازمش اولان مورخ شهر (تاسیت Tacite)، وینه اودور مشاهیرندن فیلسوف (پلوتارخ Plutarch) نقل ایدیورلرکه (اصل اوزمانلر، روماده چوق قانونلر واردی وهر کون بش اون دانه سی یاپیلیر، نشر اولونوردی. فقط ینه هرشی کیفی ایدی. انکلیزلرک ابن خلدونی عد ایدیلن (به قل Buckle)، اوروپاده تکمل معنوی تاریخی = Histoire du développement intellectuel de l'Europe نامنده کی اثر معتبرینک برنجی جلدنده بو مسئله لری اوزون اوزادی به تشریح و تتبع ایتمش و ملاحظات ذاتیه سنی بالخاصه (Tacite) ک سوزلریله تأیید و تحکیم ایله مشدر.

بوئکله برابر (قدرت کیفیه pouvoir arbitraire)، ینه (قدرت مطلقه P. absolu) دیمک دکدر. (قدرت مطلقه)، هیچ حدودی اولمایان بر قوتدر. (قدرت کیفیه)، حدود طبیعی سی دائره سنده کیف مایشا اجرا آتیه مقتدر اولان بر قوتدر. یعنی اجرا آتنده ینه کیفی اولقله برابر، دائره اجرا آتی محدود، معین و اضافی در. بناء علیه بر حکومت، بر قانون اساسی به، وقواعد مشروطیه، ویاخود بر عنعنه مشروطیت و روانیه به توفیق حرکتله اجرا آتیه بولونمازسه، هنوز بوکبی بر طاقم قیود قانونیه و احکام عادات موجود اولمازسه، اوکا (اداره کیفیه) دیرلر. کذلک بر دعوا ده طرفین مختصمین اوزره حکم ایتمک مجبوریتنده بولونان بر (حاکم juge)، دستور و مجله قوانین ده مدار استناد و مابه الاحتجاج اوله جق بر (ماده مخصوصه) بوله ماز، و مسئله یی عرف و عاده دخی توفیقاً حل ایده مزده، کندی وجدانه مراجعت، واونک الهامنه تبعیت ایله بر حکم ویر مکده مضطر قالیرسه بویه بر حکمه دخی (کیفی) ده نیلیر. نته کیم (حاکم منفرد) اصولنده و علی الخصوص انکله ده تمیز رئیس لرینک ویر دکلری حکم، اکثریا بویه در. بوندن ا کلاسیله جغه کوره، کیفی بر حکمک مطلقاً فنا و حق سر اولماسی لازم کلز. اونک ایی وفا اولماسی، قانونه ویا عرفه موافقتندن زیاده حاکمک عصمت و استقامته، عفت و حیثیتنه تابعدر. ایشته بوکبی احوالده (arbitraire)

کله سنی (وجدانی) دیه ترجمه ایده بیلیرز. حتی (عندی) دخی دیه بیلیرز. لکن (عندی) تعیری سائر احوال کیفیه ده دها زیاده یاقیشیق آلیر. مثلاً، بر آدم: [ا کوزل رنک یشیل در!] دیه ادعا ایتسه، بوادعا (arbitraire) در؛ چونکه بونک بویه اولدوغنه، هرکسی اقناع ایده بیله جک هیچ بر قانون یوقدر. بوراده او کله یی (عندی) لفظیه ترجمه ایده بیلیرز؛ زیرا ادعا ایده نك کندی غندنه ا ک کوزل رنک اودر. (کیفی) سوزیله دخی ادا ایده بیلیرز؛ زیرا کیفجه، ا ک کوزل رنک ینه اودر.

منطق ده بر (قضیه proposition)، (arbitraire) اولور، اکر قضیه نك نقیضی ویاخود ضدی ده قبول و تسلیم ایده بیلمک ممکن اولورسه، یعنی ذهن، قوانین منطقیه نك حکمنه مجبور بولونورق او قضیه یی مطلقاً تسلیمده مضطر قالمازسه، مثلاً (فقراق سلطانق در!) کبی که تماماً عکسنی دخی ادعا ایده بیلیرز. زیرا او قضیه یی تسلیمده هیچ بر مجبوریت منطقیه یوقدر.

(غوبلو Goblot) دیورکه [قانونه تجاوز ایتمک ویاخود مؤسسه موضوعیه تجاوز ایده بیلمک ایچون بالذات او قوانینی آلت اتخاذا یله مک دخی (arbitraire) توصیفنه شایاندر.]

(arbitration) یعنی (حکم تعیینی اصولی)، حقوق اصطلاحاتندن در. منازعیه اولان بر مسئله ده مستقلاً حکم ایده بیلمک صلاحیتله، طرفین مختصمین بر شخص ثالثی طوعاً حکم تعیین ایتمسه دیرلر.

(arbitrage internationale) ترکیبی ده (حقوق بین الملل droit internationale) اصطلاحاتندن در. معناه یوقاریکندن فرقی یوقدر، فقط شکلاً فرقی اوله بیلیر. [تقصیلاً ایچون قاموس اصطلاحاتک حقوق قسمنه مراجعت ایدیکنز!]

(libre arbitre) تعیری (L) حرفنده آراییکز.

اسی (اس الحیات) اول الارائل Archée

بو تعبیر ارسطونك (ἀρχή = آرهی) لفظدن آئمشدر . بو کلهی ، حکیم یونانی ، (پرنسپ) یعنی مبدأ معناسنده قوللانیردی . حتی جمع ایله (τὰς ἀρχὰς = تاس آرخاس) تعبیری ارسطونك آثارنده چوق کچر و عربلر طرفندن بالخاصه (مبادی) کله سیله ترجمه و نقل ایدلمشدر (principe) لفظی دخی ، لاتینجه (ایلك یعنی برنجی) دیمکدر ؛ نته کیم (Prince) کده اصل معناسی بودر . تورکله ، کندی پرنسلینه ، بکلیینه : (ایلك) دیرلردی که جماعتده ایلك و برنجی کلن ذات دیمکدر . مشهور تورک آثار مخلده سندن (قوداتقوبیلک) نام کتاب منظومه ، دائماً (ایلك) کله می (پرنس) و (پادشاه) معناسنده قوللانیلمشدر .

اسکی یونان فیلسوفلری ، عالمده هر شئیك متحول و بناءً علیه حادث اولدوغنی نظر دفته آلمشدر و لایق قطع دوام ایدن بوتبدلات نامتناهیده اصل اولان وارلنی تحقیقه قالدیشمشلر ایدی . بوده کیشیکلکده اساس اولان وماهیته ده کیشمه ن ماده اصلیه نی آرامق و آ کلامق مراقبه دوشمشلردی . دیمک اولویورکه دائماً طالعه لانه رق آقوب کیدن شو (عمان حادثات) ک ضمنتده برووجود قدیم و مستدیم آریورلردی . (وجود مطلق) تعبیری ایجاد اولونمازدن اول ، فیلسوفلر بویه دوشونویورلردی . سقراط دورینه ککنجه یه قدر ، فلسفه ده اک بویوک واک مهم مسئله مابعدالطبیعه بویه بر (جوهر قدیم) اثبات ایده بیلیمک اولدی . ایشه بوکا (ئی آرهی = ἡ ἀρχή) دیرلردی که عربلر بوکله یی (اول الاوائل) تعبیریه نقل و ترجمه ایتشلردر .

میلاددن تقریباً آلتی یوزسنه اول یاشامش اولان (Thalès de Milet) اعتقادنجه (archée) یعنی هر ماده نك هر شئیك اصل قدیمی (صو) ایدی هر شی اونك تحولاتندن وجوده کیوردی . (Anaximandre) آناسیماندرک ظننجه (هوا) ایدی . (Héraclites) هراقلیت (ک ادعاسنجه (آتش) ایدی . (Pythagores) فیثاغور (نظرنده (واحد) ، یعنی (۲) عددی ایدی . هر شی (بر عددی) ندن صادر اولویوردی . الی آخره ! . . .

(۱۴۹۳) سنه میلادیه سنده اسویچرده طوغمش اولان مشهور (پاراسه لس Paracelse) - که طبابتی الکیما و (قابالیزم cabalisme) اساسلینه بنا ایتمش بر حکیم صوفی ایدی ! - بو (archée) تعبیری بنمسه مش و (مبدأ حیات = principe vital) معناسنده قوللانه رق تشهرایله مشدر . بو غریب آدمک فکرنجه (archée) ، ذوی الحیاتک معده سنده بولونور ، بر جوهر ایدی که دوام حیاتی تأمین ایتک وظیفه سیله مکلف بولونوردی : مواد غذائی (matières alimentaires) میاننده (عناصر مغذیه éléments nutritifs) (ی زهر poison) لردن آیریر ، غذا اوله بیله جک ماده لری بر (مایع مخصوص fluide particulier) ایله اشباع ایدر و انحق اوندن صوکرده وجود ، عناصر غذائی یی (استمثال assimiler) ایلردی . [assimilation تعبیریه باقیکنز !] (پاراسه لس) بو سیاله مخصوصیه (صبغ teinture) نامنی ویرمشدی . بناءً علیه شو تعریفه کوره (اس الحیات = archée) ، روح دیمک دکدر . روحانی برشی ده دکدر . بر (جسم corps) درکه هر کسک معده سنده بولونور و مواد غذائی یی (سوموم یعنی زهرلر) دن آیردقدن صوکرده ، کندینه خاص برمایع افراز ایدرک عناصر مفیده یی حل ایدر و قابل استمثال بر حاله قویار . بو سایه ده حیات دوام ایده بیلدیکی ایچون ، اوکا (اس الحیات) ده نیلمشدر . معافیه بو جسم ، عادی بر ماده دکدر ؛ بر (جسم نجومی corps astral) دره . یعنی ستاره لرک ، ییلدیزلرک ماده سندن صدور ایدوب بزم وجود مزه انتقال ایتمش و معده لری مزده یرلشمش بر (جوهر مخصوص substance spéciale) دره . عوامل خارجی نك تأثیرات و تخریب اتندن وجود مزی - تولونجیه قدر - محافظه ایدن اودر . (عناصر اربعه les quatre éléments) یعنی (آتش ، هوا ، صو ، طوپراق) فوقنده بر (عنصر خامس quintessence) در . [بو تعبیریه باقیکنز !] (پاراسه لس) ک (هرمزی hermétique) (بو کله یه باقیکنز !] اولان شو غریب فرضیه سی ، [قرون وسطا طبابتندن ، علم جفر ، علم سیمیا ، علم نجوم ، علم خواص حروف] کبی (علوم غریبه sciences occultes) ده [بو تعبیریه باقیکنز !] بویوک بر رول اوینامش و کلیاً ذیمدخل بولونمشدر .

(۱۵۷۷) سنه میلادیه سنده (بروکسل Bruxelles) شهرنده طوغمش اولان طیب شهر (فان هلمونت Jean-Baptiste Van Helmont) (پاراسه لس) ك (archée) سنی تکرار احیا ایدرک اونی دهها واسع بر فرضیه شکلنده نشر ایله مشدی . (فان هلمونت) ك ادعاسنه کوره ، (archée) اجسام عضویه نك جمله سنده، حتی بر جسم عضویك اعضای مهمه سنده بیله آیری آیری موجود بر (مبدأفعال principe actif) در. یالکز (وظائف حیاتیه fonctions vitales) یی اداره ایتمکله قلماز؛ هر جسم عضویه، کندی شکل مخصوصی افاضه ایدر؛ و بو (شکل عضویت forme de l'organisme) ذاتاً (تخم semence) ده اوتهدنبری واردر. (اس حیات) ده نیلن او (مبدأفعال)، جسم عضویك تغذی و تنمی سنی اداره ایدرکن، یاواش یاواش، (تخم اصلی) ده مندیج اولان او قابلیت اظهار ایدرک، جسم عضویه شکل مخصوصی ویرر. (تخم) ده مندیج اولان و تنمی ایله تحقق ایدوب میدانه چیقان بو (شکل کامن forme latente) ه (فان هلمونت) ، (خیال منوی imago seminalis) دیوردی که بونك (نفحه حیاتیه aura vitalis) ایله اتحادندن (اس حیات archée) وجود بولیوردی . بناء علیه (خیال منوی) جسمك صورتی، (نفحه حیاتیه) دخی (هیولا یعنی ماده-نی) تشکیل ایدیوردی . شو تقدیرجه نه قدر اجسام عضویه وارسه، حتی بر جسم عضویه نه قدر اعضای مهمه وارسه، او نسبتده دخی (archée) لر واردی .

شو تعریفدن اکلاشیلورکه (فان هلمونت) ك (archée) فرضیه سی ده بوسوتون یکی برشی دکادر . ارسطو، ذاتاً حیاتی، روحی، تنمی یی تعریف ایده بیلیمك ایچون (کمال اول entéléchie) فرضیه مشهوره سنی ایجاد و وضع ایله مشدی . هر جسم عضویك شکل کالنی ویرن قابلیت ذاتیه یه (entéléchie) دیوردی و بونی (هیولا) دن، ماده اصلیه دن آیرمیوردی . صوکره-غالبا (نوفلاطونی néoplatoniste) فیلسوفلردن انتقال ایتمش بر (لوغوس سپهرماتیکوس = λόγος σπερματικός) فرضیه سی ده واردی که قرون و سطانك (مدرسه فلسفه سی philosophie scholastique) نه، (سن

طومادا کن S^t Thomas d'Aquin) طرفدن نقل اولونوب (raison) کوره، افراد واشخاض عضویه نك اختلافانده مشهود اولان (سبب حکمت) ? (raison) شو ایدی که، خالق مطلق اولان جناب حق، اولاً هرشی (بلاواسطه immédiatement) یاراتمش و فقط اجسام عضویه نك (تخملری semences) نه بر استعداد مخصوص افاضه ایتمشدی؛ او استعداد، نشوونما ساییه سنده، جسم عضویه یه شکلی افاضه ایدیوردی . ایشته هر جسم عضویك استعداد ذاتی سنه کوره بر صورت باغلاماسنده کی حکمته (raison séminale) ده نیلیور ایدی . بو فرضیه، ذاتاً ارسطونك (entéléchie) سندن بوزمه برشی اولسه کرکدر . (قان هلمونت) ك (اس الحیات) فرضیه سی ایسه ارسطونك (کمال اول) فرضیه سیله سقولاستیق فیلسوفلرینك (raison séminale) فرضیه سندن مرکب، عندی بر عقیده در . بوگون بزه پك غریب کورینن بو فرضیات، اجسام عضویه یه تعلق ایدن بر مسئله نك سر حکمتی - بدرجه یه قدر! - تعریف وایضاح ایچون ترتیب وایجاد اولونمشدر . ذهن بشرک کندی بو درجه زورلاماسنه رغما، عضویك سر تشکلی هنوز آکلاشیله مامشدر . آنجق میقر و سقوب واسطه سیله مشاهده اولونه بیلن تخملرده او قابلیت غریبه نه درکه، (القاح اولونمش بر بیضه une ovule fécondée) همه حال جناسنه چکیور؛ بر چوق تأثیرات مخربه یه رغماً انسانك کی انسان، طاوشانك کی طاوشان، قیلانك کی قیلان شکلی آلیور . حالبوکه - علمای محققینك ادعاسنه کوره - طاوشانك، انسانك، قیلومبغه نك، قوشلرک الحاصل بوتون حیوانانك (بیضه) سنده - اول امرده! - کرک کیمیوی، کرک عضوی هیچ بفرق تعین اولونه مامشدر . بو فرق نشوونما ایله باشلیور . (وراثت hérédité) ك سری ده بوراده در . واقعا (مبحث جنین embryologie) علماسی بو خصوصده غایت معنادار بعضی کشفیاته موفق اولمشلر سنده، ینه عضویت ایله صورت جنسیه نك مناسبی، اسکی سی کی بر (سرغامض) در . ایشته (پاراسه لس) (فان هلمونت) و بونلردن اول (ارسطو) هپ بو سری افشا و تعریف ایچون بویله آز چوق

غریب فرضیه‌ها ترتیبی مجبور بولونمیشلردی؛ و معذوردرلر . سقولاستیق دورینک-بیتمک توکنمک بیلمه‌ین - (nominalisme اسمیه، réalisme حقیقه) مناقشه‌لری ینه عینی مسئله‌یه یعنی صورت شخصیه ایله (صورت نوعیه) و (جنسیه) مسئله‌سنه تعلق ایدر بر طاقم فرضیات مبنی در . [scholastique, raison, intellect, âme تعبی‌لرینه باقیکنز!]

انموذج اول Archétype (ارک‌تیب اوقونمالی در)

Archétype

فرانسزجه Archétype

انکایزجه Archétype

المانجه Archetyp, urbil

ایتالیانجه Archetipo

بوتعی‌ر قدیم‌ایکی کله یونانی‌دن مرکبدر : αρχή = archée (آرهی) اول، ایلك، برنجی دیمکدر؛ (τύπος type تی‌پوس) دخی (شکل) معناسنی افاده ایدر. شو تقدیرجه بوتعی‌رک معنای لغویسی (ایلك شکل) دیمک اولور. اصطلاحده (انموذج اول) دیه لسانزده نقل اولونمیشدر. (انموذج) نمونه کله‌سنک تعرب ایدلمش بر صورتی در. فی الحقیقه فارسی لسانی اوزره یازلمش بعضی آثار صوفیه‌ده (نمونه نخستین) تعیری کچرکه تماماً (archétype) ک فارسی‌یه ترجمه‌سیدر.

بو کله اصطلاحیه (فلسفه فلاطونیه phil. platonicienne) نک اساسنی تشکیل ایدن بر فرضیه مشهوره‌نی متضمندر؛ و او قدر مهمدرکه بوتون قرون وسطی فیلسوفلرینک اک بیوک وسورکلی مشغله‌سی بو (archétype) دعواسنه متعلق مناقشات شدیدده ایله ایله نفس توکنمک اولمیشدی. (universeaux) تعبی‌رنده تفصیلاته باقیکنز!

افلاطون، هنوز کنج بر طالب علم ایکن سقراطک درسنه ملازمت ایتمک باشلامشدی. او وقتلر، اک مهم مباحث فلسفیه‌دن بری بلکه برنجیسی (منشأ علم l'origine de la connaissance) مسئله‌سی ایدی. [معلومات شرعیه عجبا (حواس les sens) واسطه‌سیله عالم خارجیدن می‌کیور؟.. یوقسه عقل بشرک معرفت ذاتیه‌سندمی تولد ایدیور؟] ایشته بوسؤال یونان قدیم حکماسنی ایکی بیوک فرقه فلاسفه‌یه تقسیم ایش و بر برینه قاپیشدیرمشدی.

او زمانلر (بیوک یونانستان la grande Grèce) نامیله یاد اولونان ایتالیه قطعه‌سی، آتنه‌نک بر مستملک‌ه‌سی ایدی اوراده ایکی مهم (مدرسه école) تأسس ایشدی. (ایتالیا مدرسه‌سی l'école italique) نک مؤسس (پیثاغور Pythagoras)، ایله (هله آ مدرسه‌سی l'école d'Elée) مؤسس (قسه‌نوفانهس Xénophanes) و بو ایکی صاحب مسلک حکیمک بوتون شاگردانی و پیروانی، حصول علمده حواسک باشلیجه خدمتی انکار ایدیورلر و بو وضعیت فکریه‌لریله (مدرسه یونانیه école Ionique) اربابنک بو خصوصده کی تعلیماته تماماً ضد و معارض بر اعتقاده متمسک بولونویورلردی.

[arg. d'achilles = برهان آخیله‌فس و academie تعبی‌رلرنده بو مدرسه‌لرک رقابت و معارضه‌سنه دأثر ایچه تفصیلات واردر؛ او کله‌لره باقیکنز!] علمک منشأ و قیمتی حقنده بو صورتله آچیلان دعوی پک مهمدی. نه‌کیم زمانزده بیله قطعاً حل و فصل اولونه‌مامش و (عقلیون rationalistes) ایله (حسبون sensualistes) فرقه‌لرینه وجود ویره‌رک مناقشه‌سی حالا دوام ایتمکده بولونمیشدر. [بو تعبی‌رانه باقیکنز!]

اهمیت بحث شو نقطه‌ده تجلی ایدیور:

اکر، حقیقتاً (واسطه علم moyen de connaissance) حس ایسه، بوتون معلوماًتمز (عالم خارجی le monde externe) دن نکش اوله‌جقدر. فقط حواس ایله ادراک ایده‌بیرا، بکمز شیلر آنجق (مشخصات les choses objectives) درکه بونلره عرب حکماسی (هویات) دیرلر. شواغچ، بو آدم کی!... بونلر عالم خارجی‌ده مستقلاً موجود بر طاقم شیلردر.

بوشیلرک، یعنی هویات ماده‌نک جمله‌سی‌ده (ناقص imparfait) در؛ چونکه اونلرک هپسی‌ده (هردم - متحول) بر طاقم (ظواهر = apparences) بر طاقم (حادثات phénomènes = فه‌نومه‌نا = φαινόμενα) دن عبارتدر. مثلاً طانی‌دیغمز بر آدمی، کوردو کمز بر آغاجی، بزدها کوزل، ده‌ا مکمل بر صورتده تصور ایده‌بیلیرز. حتی بزم اعتقاد مزجه (مکمل آدم) خارجدن کوردو کمز (مشخص concret) انسانلر دکل، علی‌الطلاق

دوشوندو کمز (انسان) در . افلاطونک کندی تعبیرنجه (آفتو - آثروپوس
 αυτο-άνθρωπος) یعنی (بالذات انسان) در؛ (ماهیت انسان) در .
 بوماهیتده بوتون افرادانسانیه مشارکدر . کذلک بردیکرینک حیاتی قورتارمق
 ایچون کندی نفسی تهلکیه القا ایتک (قالون = καλόν) ای در؛ یعنی
 مستحسن و ممدوح بر عملدر که اوکا (فضیلت = vertu) دیرز . وطن ایچون
 فدای نفس ایتک، مدافعه حق و حقیقت اوغرنده ضرره، تهلکیه کوکوس
 کرمک دخی فضیلتدر . مرحمت، عفت، شجاعت، هپ فضیلتدر . مع مافیه
 بوتون بوعمال ممدوحه و مستحسنه بر برینه بکزمه دیکی حالده (ای لک جمله سنک
 اساسی تشکیل ایدن (ماهیت مشترکه) در . او حالده بالذات ای یعنی
 افلاطونک تعبیرنجه (آفتو - تو - قالون = αὐτὸ τὸ καλόν) ندر؛ ...
 ایشته افلاطون، (او آنجق بر فکر = idée) در؛ وهرشیئک بویه
 بر (idée) سی وارددر که اوشیئک ماهیت اصلیه سنی تشکیل ایدر . بوماهیات
 مکمل در!) دیور .

تاریخ فلسفه ده بو حکیمک اسمنه نسبتله مشهور اولان (théorie des
 idées platoniciennes) بودر . [idée کله سنده اطرافیه تفصیلات وارددر .
 اورایه مراجعت ایدیکز .]

بو صورتله تصور و تلقی اولونان (ماهیات)، بزه البته عالم خارجیدن
 کلش، یعنی (مدرکات حسیه = perception des sens) واسطه سیله کلش اوله ماز .
 چونکه عالم خارجیده هر نه کوروپور وهر نه ادراک ایدیورسه ق اونلرک
 جمله سی ده ناقصدر . هیچ بریسنده (کمال = perfection) یوقدر . کمال
 (idée) لرک شانی در . (idée) لر آنجق عقل ده بولونور . حقیقتاً موجود یعنی
 بالذات و مستقلاً و سرمدیاً موجود اولان آنجق ماهیاتدر . چونکه آنجق اونلر
 (کامل) در . موجودات مادیه و (مکونات مشخصه = les êtres concrets)
 هپ ناقص شیلدر . بویه شیلر قدیم و مستدیم اوله ماز . بناء علیه (عالم حسی
 le monde sensible) بر خیالدر؛ بر (شعبده = phantasmagorie) در .
 اونک وجود حقیقی سی یوقدر . بو عالمی تشکیل ایدن شیلرک ماهیات حقیقیه سی
 (عالم عقلی = le monde intelligible) ده مستقلاً و ازلیاً موجود بولونان

(صورکامله = formes parfaites) لریدر . (برخیال مغفل) اولان شوکائات
 مادیه ده کوردو کمز بوتون شیلرک اصل قالبیری، ازلی و مکمل نمونه لری
 آنجق ماهیاتدر که عالم حسی ده اونلرک تحقیقنه امکان اوله ماز . مثلاً بز مادتا
 بر (دائرة = cercle)، بر (کره = sphère)، بر (منشور = prisme)
 یاپه مایز که تمامیه تعریف هندسی سنه موافق، یعنی مکمل اولسون . حالبوکه
 دنیا ده موجود اولان مادی دائرة لرک کره لرک و منشور لرک جمله سی ده محو
 و نابود اولسه، ینه ماهیتلری باقیدر؛ و او ماهیاته نظرله علم هندسه یکیدن
 وضع و تأسیس اولونه بیلیر . کذلک (خیر = le bien) ک مختلف و جزئی
 صورتلری مضمحل اولسه ینه (خیر محض = le bien-même) یعنی (ماهیت
 خیر)، عالم عقلی ده بالذات و بالاستقلال موجوددر .

بویه اولونجه (ماهیات) سرمدی در . یارادلمش شیلردن دکلدر . ازلی
 ابدی در . عالم حسی ده نه وارسه، عالم عقلی ده اونک بر ماهیت مکمله سی
 وارددر . بونلر، عالم امکانده کوردو کمز ناقص شیلرک (ایلک نمونه = archétype)
 لریدر . دنیا ده کی موجودات، بو مکمل نمونه لرک قابا طاسلاق تقلید لریدر .
 بناء علیه (ماهیات حقایق اشیا در .)

افلاطونک بو (idée) لر نظریه سی تصوفده اساس در . بو تعبیری صوفیه
 شرق بالواسطه آلمش و (ایمان ثابت = entités immuables) دیه ترجمه
 ایتشدرد . (عین)، عربجه ده بالذات موجود اولان شیلره دیرلر؛ فرنک
 لسان اصطلاحیسنده (entité) تماماً او معنایی افاده ایدر . [coufisme
 سوزنده تفصیلاته باقیکنز]

فلاسفه اسلام بو تعبیری (ماهیات) و (مثل فلاطونیه) دیه ترجمه
 و تلقی ایتشلر و بو نظریه مهم و مدید مناقشه سبب اولمشدر . [idée کله سنده
 حکمای اسلامک مناقشات بسط و تنقید ایدلشدرد . باقیکنز!]

افلاطون ماهیاتک بالذات موجود اولدوغنی و بناء علیه اصل موجودات
 حقیقیه نک بونلردن عبارت بولوندوغنی ادعا ایتدیکی ایچون بومسلکه (حقیقه
 réalisme) ده نیلمشدر . [بو تعبیره باقیکنز، اوکا دائر ایضاحات وارددر .]
 ماهیاتک عالم عقلی ده موجود بولوندوغنی آریجه ادعا ایله دیکی ایچون دخی
 افلاطونک بومسلکنه (عقلیه = rationalisme) ده نیلمشدر . [بو تعبیره ده باقیکنز!]

معماری علم Architectonique آلمانجه

Architectonik انکابزجه
Architectonic فرانسهزجه

Architectonique

بوتعبیر، قانت طرفدن اویدورولمش و (art de système) یعنی (سیستم بنا ایتک هنری) معناسنده قوللانلشدی. بونک ده اخصوصی و فلسفی معناسی: معلومات متخالفه و متنوعه بی اصولنه توفیقاً ضبط و ربطه آلهرق تشکیل ایتک و او پراکنده معلوماته بر (علم science) قدر و حیثیتی ویرمکدر. بالطبع بو معرفتده (منطق logique) ک برنجی درجهده دخلی واردر. فقط (l'architectonique) بالخاصه منطق دیمک دکلددر. معلومات متنوعه آره سنده رابطه منطقیه بولهرق اونلری او رابطه یه کوره تنسیق و تألیف ایتک هنریدر. شو تقدیر جه بالخاصه علمدن زیاده صنعت قیلندن برقابلیت صایلسه کرکدر. فلسفه بی علمدن زیاده - ماهیتاً - صنعت بکنزه تنلرک شو تقدیری طوغرو ایسه، ده نیله بیلیر که بر فیلسوفک هنری (architectonique) ده کی قابلیتی ایله متناسبدر. بوده منطق بیلیمکه اولماز. چونکه (افکار معمارلنی) استعدادی بر شیدر. مع مافیه لاعلی التعین هر علمک - تأسیس اصول واکال تشکیلات خصوصنده - منطقک معاوتته افتقار و احتیاجی طبیعی اولدوغی ایچون - قانتک تلقی ایتدیکی معنا اوزره - معماری علم، منطقک بر قسمی صایبیلیر، و (methodologie علم اصول) کبی بر شی اولور. بناء علیه منحصرأ بر علمک موضوعاتی تشکیل ایده بیلجک اولان حادثات مخصوصه بی ترتیب ایتک، اونلرک قوانین خصوصیه و عمومیه سنی بولوب چیقاردقدن صوکره قوانین جزئییه بی قوانین کلیه تحتنه درج ایدرک او علم مخصوصه بر (صورت مشکله forme organisée) ویرمک، البته تنسیق معلومات ایتک دیمکدر. ایشه قانتک (معماری علم) دیدیکی معرفت بودر.

ا کلاسیلیورکه بونده اساس بر، ویا بر طاقم (مبادی principes) قبول ایتدکدن صوکره، او مبادی اوزرینه بر بنای معلومات قورارکن ایجابات منطقیه تبعاً حرکت ایدرک هیئت معلوماته اک اهنکدار اولان شکل معقولی افاضه ایده بیلیمکدر. مثلاً: (اجهزه حسیه appareils sensitifs) مزک

(عوامل خارجیه facteurs extrinsèques) تأثیریه تشکل و فعالیت متمادیه ایله کیت کیده تکمل ایتمش اولدوغنی قبول ایتمش اولسهق، همه حال تکامل قانونتی ده تسلیم ایتمش اولورز. عینی زمانده sensualisme حسیه) مذهب فلسفی سنه حق ویرمککمز لازمکلیر. چونکه معلوماتمکز منبعی و منشأ اصلی سی (مدرکات حسیه perception des sens) اولمش اولورکه بوده خارجه بر عالمک وجودینه اعتقاد ایتیهی قطعياً مستلزمدر؛ زیرا معلوماتمکز خارجدن تلقی ایتدیکمز مدرکات حسیه ایله باشلیور ایسه، البته وجدانمکز خارجه بر عالم مستقل اولمق ایجاب ایدر. بونی - بر حقیقت اولهرق - تسلیم و اعترافه مجبور اولدقی؟.. او وقت (اصول methode) بخنده (تدرییه empirisme) مذهبیه کرکی کی حق ویروب بوتون معلومات بشریه نک عمومی و (عرقی racial) بر تجربه محصولی اولدوغنی قبول ایتکده مضطر بولونورز. اویله ایسه (طبع سلیم فلسفه سی philosophie du sens commun) نی ده رد ایده مه یز. چونکه (sens sommun) دیدیکمز شی، بوتون انسانیتک - کیم بیلیر نه قدر عصر لردنبری - کچیرمش اولدوغنی تجربه عمومی و عرقینک اک اشاغی، فقصد اک صاعلام ساحه سنی تشکیل ایدن سویه عادییه دیرلر. بوتون مبنای اعتقادتمکز زمین استنادی بودر. بوده - باقیلیرسه - تجربه عمومی مزله قازانمش اولدوغمز افکار ایله معلومات صحیح و قیمة نک عمومی و مشترک بر بیلاجوسی در. عینی زمانده بزم ایچون یکانه (قسطاس حقیقت criterium de la vérité) در!... چونکه یکی دن یکی یه اجرا ایده جکمز تجارب شخصییه ایله قازانه جغمز معلوماتی تصحیح و تقدیر ایچون، انجیق (sens commun) ی محک و معیار اتخاذایده جکز. باشقه چاره یوقدر. اونک ایچوندکر که تجربه عمومی دعواسنی تسلیم ایتدکدن صوکره (sens commun) فلسفه سی علینده بولونه مایز. زیرا بو ایکی تعبیر، عینی شینک ایکی مختلف اسمی در.

بو حده کلدکدن صوکره (عقلیه rationalisme) دعواسنی رد ایتک مجبوریتنه دوشرز. چونکه (افکار وهیه idées innées) دیدیکمز

معلوماتی، و یا خود (مبادی قلیه principes aprioriques) تعبیریه یاد و توصیف ایتدی کمز کلیاتی، تجربه فوقنده بر طاقم حقایق معقوله اوله رق تلقی ایتک ممکن اوله ماز. اولسه اولسه، [اونلر، تجربه عمومیه نتیجه سنده تحقق، و وراثتله انتقال ایدرک ذهنم زده تحکم و تأید ایدن معلوما مازدر] ده یه بیلیرز. یوتون بو محاکمات، نتیجه ده، روحک - بر جوهر بسیط و مستقل اوله رق - وجودینی انکاره وایر. زیرا بزده یوتون جهاز عصبی بعضی عوامل طبیعی تأثیریه وجوده کلش و یاواش یاواش تکمل ایتش اولونجه، ادراک، حس و عقل دخی او جهازک (وظیفه عضویه fonction organique) سی عد ایدیلنجه، (روح l'âme) - ماهیتی اعتباریه - (وظیفه وی fonction-nelle) بر جلوه حیات اولمش اولور. باشقه درلو تصور و تعریف ایدیه مز. مکرکه طاقیله بو بنای ملاحظاتی یقمالی و باشقه اساسلر قبول ایدرک یکنی دن یر بنای اعتقاد قورمالی !...

ایشته - اصطلاح معناسیله - (معماری علم) بوکا دیرلر. فیلسوفلرده هنر اوله رق آرانیلان اک مهم استعداد بودر. (ارسطو)، (بهی قن)، (ده قارت)، (قانت)، (سپنسر) کی اعظم بو معرفتده مستثنا بر قدرت دها اثبات ایتشلردر. هله سپنسرک (synthetic philosophy) نامیله وجوده کتیرمش اولدوغی آثار فلسفیه، معماری علمک اک حیرت بخش بر نمونه سیدر. یوتون بو کتابلر بر بویوک بانک هیئت مجموعه سنی آکدیریر بر دانه سنی حذف ایتک تکامل فلسفه سنک آهنکنی بوزار؛ ممکن دکلدرد. سپنسر بو (مهندسلک) ی ایه افتخار ایتکدن بیله کندینی آله مامشدر.

[تعبیرات مهمه یه آریجه مراجعت ایدیکز !]

علم حساب Arithmétique

Arithmétique

(علوم مجرده sciences abstraites) دن در. (کیات صرفه quantité pure) علمی در؛ فقط (کیات معینه quantités définies) ایه مشغول اولور. [فضله تفصیلات ایچون قاموسک قسم ریاضی سنه مراجعت ایدیکز و بوراده کچن تعبیرات ایه برابر algèbre, algorithme] کله لرینه باقیکنز !]

Argument

برهان Argument فرانسوزجه و انگلیزجه

Argument, (beweis) المانیجه

Argomento ایتالیانجه

لاتینجه (argumentum) کله (arguo) اصلندن مشتقدرد؛ اوده یونانی نک (آرغوس = ἀργος) لفظندن آلمشدر که معناسی (ظاهر، آچیق، بدیهی) دیمکدر. اصطلاح معناسنه کلنجه: (مختلف فیه بر مسئله یی بر قضیه مسئله دلائله ایضاح، اظهار و اثبات ایه مک) دیمک اولور. شو تقدیرجه (دلیل)، بر قضیه درکه اثبات و تحقیق مطلوب اولان قضایای غیر بدیهیه یی ایضاح و شرح ایدرک اونلرک بدیهیات و مسلمات ایه رابطه منطقیه سنی افشا و اظهار ایلر.

او حالده (argumentation = اقامه دلیل) دیمک بر (قیاس ترتیب ایتک) دیمک اولور. فقط (syllogisme قیاس) ده (مقدمات = prémisses) ی تشکیل ایدن قضایای مسئله ایه مطلوب اولان (نتیجه = conséquence) ارده سنده کی رابطه منطقیه یی، انجق (حد اوسط = le moyen terme) افشا ایتدیکی ایچون، بر دعواده دلیل ابراز ایتک - مقدمه ایه نتیجه یی بر برینه باغلایان - حد اوسطی بولوب تعیین ایتک دیمک اولور. ایشته بوندن طولانی درکه هر هانکی بر قیاسده (حد اوسط) بالذات دلیل اوله رق تلقی ایدلمشدر. زیرا حد اوسط قیاسک دیگر ایکی حدلری آرده سند بر (حد مشترک terme commun) در. بر دعواده دلیل ابراز ایتکده بووجه اشتراکی اظهار ایتکدن عبارتدر. جزئیات امور - انجق بو صورته و بو سایه ده - کلیات مسئله یه ربط ایدلمش اولور.

آمریقای شمالی ده بویوک بر (قاموس فلسفی) ترتیب و طبع ایدن هیئت علمانک رئیسی (میستر بولدوین J. M. Baldwin) ک، (syllogisme) بحثنده دیدیکی کی:

(دلیل، بر [کیفیت جزئی cas particulier, cas spécial] یی بر (قانون عمومی loi générale) یه اسناد ایتک و او جزئی نک او قانون

کلی تحتند مندرج بولونديغی کوسترمکدر . بوده انجق قیاس ترتیبی ایله اولور . زیرا اوکیفیت جزئیتهك تحقیق انجق مبدأ قیاسه منوط واکا نابعدر . قرون اولی ووسطاده (تجربه l'expérience) یه اعتبار ایدلمه یوب منطق اهمیت ویریلیر و قیاس ، اك قطعی بر علم نمونه سی عد اولونوردی . اونك ایچون اك صاغلام دلیل انجق قیاس ایدی .

[شرح موافقك برنجی موقفك مقصد تاسعنده ، مؤلف کتاب (قاضی عضدالایچی) ، حکیم ومنطقی مشهور ابن سینانك بو خصوصده کی ملاحظاتی تدقیق وتنقید ایچون بر فصل مخصوص آچیور : (قال ابن سینا شرط افاده النظر للعلم ، التفطن لكيفية الاندراج) جمله سیله خاصه بودلیل مسئله سنی تحقیقه کیریشیور . ابن سینانك (کیفیت اندراجی تفطن ایتك) دیدیکی شی : بر قیاسده (صفرا) ایله (کبرانك) ارتباطی و (جزئی) نك (کلی) تحتند نه صورتله مندرج بولوندوغنی تفطن ایتك یعنی بر آنده سه زوب کشف ایدیور مرکدر . بو بحث ، بزده ومنطقی عمده اتخاذ ایدن بوتون سقولاستیق فلسفه سنده پك تفصیل ایدلمشدر .

علمده معیار و (قسطاس criterium) اوله رق منطقی دکل تجربه یی قبول ایدن دور اخیر فلسفه سی قیاسی علی الاطلاق واجب الاعتماد بر دلیل عدایمه یور . چونکه (سفسطه sophisme) دخی بر قیاسدر ؛ واقعا مقدماتی مسلم دکلدر . فقط مسلم اوله بیلیمك ایچون اومقدمات تجربه یه استناد ایتله ای واونك صحتی انجق تجربه ضامن وكافل اولمالی در . اولیات بیله محصول تجربه عد ایدیلیور .

[بو خصوصده تفصیلات ایچون apriori و aposteriori لغتله rationalisme و empirisme کله لرنده کی ایضاحاته باقیکنز !] معاصرین منطقیوندن (ویتله Whateley) برهان حقنده شوسوزلری سویلیور :

(هر برهان ، ایکی قسمدن مرکدر . بریسی اثبات اولونان شی ؛ دیگر ی ده اونی اثباته واسطه اولان شی . برنجی قسم ، هنوز اثبات اولونمادن اول ، مسئله question) نامنی آلیر . اثبات اولوندقدن صوکره دخی واکا

(نتیجه conclusion) ویاخود (مستدل اولان شی inférence) ده نیلیر . اکر مسئله یی اثباته واسطه اولان قضیه ترتیب استدلالده صوکره ذکر ایدیلیر سه واکا (سبب raison) دیرلر و (زیرا) اداتی ایله اوسبب تصریح اولونور . عادی مباحثه لرده اکثرا استدالات بو ترتیب اوزره جاریدر ؛ مثلاً (سه زار César تولدور وملكه شایاندی ؛ زیرا ، جبار بر آدمی . بوتون جبارلر تولدور وملكه شایاندر) کی . اکر بویله اولمایوبده نتیجه استدلالی افاده ایدن قضیه ترتیبده صوکره کلیر سه او وقت مدار احتجاج اولان ایلك قضیه لره (مقدمات prémisses) دیرلر . او تقدیرده (زیرا) یرینه (بناء علیه) ترکیبی ترجیح اولنور . (قیاس منطقی) نك شکل مرغوب وقطعی سی بودر . مثلاً : (بالجملة جبارلر تولدور وملكه شایاندر . سه زار جبار بر آدمی ؛ بناء علیه تولدور وملكه شایاندی .) قیاسی کی ! . . . لسان عادیده (برهان) همان دائماً نتیجه نك ثبوتی ایچون مابه الاحتجاج اولان مقدماته دیرلر . علی العموم منطقی بر نقطه نظردن تلقی ایدلیدیکی تقدیرده . بر طاقم مقدمات مسئله ایله نتیجه آره سنده نوعما بر خط اتصال تعییننه منجر اوله جنی جهتله . برهان ، ماهیت حقیقه سینه نظراً بر قیاسده حد اوسطی تشکیل ایدن قضیه اولمش اولور . (اقامه برهان argumentation) ، ایشه اوقضیه یی بولوب چیقارمق در . براهینك - زمان ایله - بر جوق انواعی تعیین اولونه بیلیمشدر . لکن بو تقسیم او براهینك قیمت منطقیه سینه دکل اشکالنه نظرله در . چونکه بونلرك پك چوغی (سفسطه) انواعنددر . همان هپسی ده اوروپانك سقولاستیق فلسفه سندن زمانمزه انتقال ایتمش اولدوغی ایچون حالا شکل اصلیلریله لایتنجه اوله رق مشهور ومذکوردر ؛ بناء علیه بزده اکثر یسنگ عریجه مقابللری یوقدر . نته کیم اسلام عالمده ده بعضی براهین ترتیب ایدلمش وشرقه مشهور اولمش اولدوغی حالده غرب منطقیونجه بونلر مجهول قالمشدر . اونلرك اك مهم واك معروف اولانلریخی بوراده ذکر وایضاح ایدیورم :

(۱) (argumentum ad hominem) انساندن ، یعنی خصمك کندیسندن آلتان برهان دیمکدر . بونوع برهان خصم عندنده مسلم اولان بعضی مبادی ومقدماتی اله آله رقینه اونك علیهنده قولالانمق وبر مسئله خصوصیه ده

خصمی الزام ایتمکدر . بزم اسکی (اصول واداب (methode dialectique) کتابلرنده معروفدر . بوکا عرب منطقیونی (دلیل الزامی) دیرلردی . مقبول وصاغلام بر دلیل دکلدر . چونکه بر آدم عندنده معتبر اولان بر عقیده ، یاخود بر فکر ، عندی اوله بیلیر . اونو علی الاطلاق بر حقیقت مسلمه ایش کی — ولوکه کندیسنه قارشی اولسون — برهان اوله رق اقامه ایتمک قوی بر دلیل دکلدر .

(۲) (argumentum ex concessio) ، (concession) مساعدات متقابله دیمکدر . اولجه طرفین عندنده مقرون اعتبار اولمش بولونان بر حقیقتی یاخود بر قضیه وبردستوری بردعواده برهان اوله رق قوللانمقدرد . بونکده حکمی یالکیز او ایکی کیشی یه نافذ اوله بیلیر ؛ وانحق بعضی احوالده ، مثلاً تعهدات متقابله ده (سند) اوله بیلیر . [Concesso سوزینه آریجه باقیکنز !]

(۴) (argumentum afortiori) بردعوایی اولویت صورتیله اثبات ایتمکدر که بوندن اول آریجه بحثی یکمشدرد (afortiori کله سنه باقیکنز !)

(۴) (argumentum ad judiciam) بردعوایی اثبات ایچون بوتون انسانیتک حس مشترک وطبع سلیمنه مراجعت ایدرک اونو برهان کی قوللانمقدرد . (کونش انکار اولونورمی یا ؟) کی . بو برهان حسیون عندنده معتبر اوله بیلیر ؛ فقط (افتکاریون (idéalistes) و (انفیسون (subjectivistes) نظرنده سفسطه صاییلیر . (بوایی کله ده تفصیلاته باقیکنز !) (انسان ، طبیعی منفعتنه کوره حرکت ایدر !) دستوری ده بوقیلدندرد . یعنی (sens commun) بونی اقتضا ایدر . فقط بو دستور مستثنا مزاجلر حقنده دلیل اوله ماز .

(۵) (argumentum ad verecundiam) مظهر حرمت ورعایت اولان بر شیئی دعواده دلیل اتخاذ ایتمکدر . آخرتی انکار ایدن خصمی الزام ایچون کتب مقدسه دن دلیل کتیرمک کی . آخرتی انکار ایدن ذات ، کتب مقدسه یه حرمت واعتقاد ایدیورسه بودلیل معتبر (valable) در یعنی ایشه یارار ؛ فقط اساساً کتب مقدسه نک متنه ونقله قطعاً حرمت واعتقاد ایتدیکندن طولانی آخرتی انکار ایدیورسه ، اوله بر آدمه قارشی بودلیل بوسبوتون حکمسز اوله جفتندن سفسطه نوعندن اولمش اولور .

(۶) (argumentum ad populum) ، (خلقدن دلیل) دیمکدر . یعنی اکثریت خلقت وعوام ناسک اختراصات وعقائد باطله سنی دلیل اوله رق اقامه ایتمکدر . (Démagogue) لرك یعنی عوام ناسی سور وکله ین اختلاجلیرک بوتون شارلاطانلقرنده اساس اولان سفسطه بودر . سیاسی خطیلر دخی هر زمان بو دلیلدن استعانه یه تنزل ایدرلر .

(۷) (argumentum ad ignorantiam) (جهلدن دلیل) دیمکدر . یعنی خصمک بر خصوصده جهلندن بالاستفاده وینه جهانه بناء علیه بر دلیل ترتیب ایتمکدر . بوده — طبیعی — پک معتبر بر برهان صاییله ماز ؛ چونکه عینی مسئله ده بیله باشقوسی علیه قوللانیه ماز .

(۸) (argumentum per impossibile) ، بوده عکس قضیه نک امتناعی اثبات ایتمک طولانیسیله ، (یعنی بالواسطه !) قضیه یی اثبات ایتمکدر . بوکا (reductio ad absurdum) دخی دیرلر که منطقیون اسلامک (اثبات بالنقض) دیدیکی طرز استدلالدر . (تفصیلات ایچون (absurde) کله سنده نهایتلره طوغرو باقیکنز !) بوکا (برهان النقض) دخی دیرلردی .

بونلردن ماعدا (برهان آخيله فس (argum. d'Achilles) دخی واردر که (achilles) کله سنده بوکادائر پک چوق تفصیلات ویرلشدی . (اورایه باقیکنز !) بونک امثالی چوقدر .

برده (argumentum baculinarum) تعبیری واردر که مشهور اولوب قالمش بر مناقشه فلسفیه مناسبتیله ایجاد ووض اولونمشدی : انگلین پیسقوپوسلرندن فیلسوف شهر (جیورج بارقله (George Berkeley =) (۱۷۵۳ — ۱۶۸۵) ، معاصرینندن (دوقتور جونسن (Dr Johnson) ایله فلسفی بر مباحثیه طوتوشمش ؛ (بارقله) عالم مادی نک حقیقته اینانمادیی ایچون کائنات محسوسه یی انکار ایش ؛ چونکه (idéalisme subjective) (افتکاریه انفسیه) مذهبک سیاق نظری بودر ، و (بارقله) نک مذهب فلسفی سی دخی بو ایدی . (بو تعبیره باقیکنز !) یعنی بو فیلسوف ، (عالم شهود (le monde visible) ک صرف مدرکات انفسیه مزدن عبارت اولدوغنی ادعا ایدیوردی ؛ فقط او عالمی حسمه معروض بولوندوغنی صورت اوزره

قبول و تسلیم ایتیمور دکلدی . بناءً علیه شو . و کورد و کز کائناتک صورت ظاهره سنی انکار ایتیمش اولموردی . پک اوقدر درین فیلسوف اولمایان (دوقنور جونسن) ، (بارقله) نک نه دن شبهه ایتدیکنی و دعواسنک هانکی نقطه یه مستند بولوندوغنی آکلا به مادینی ایچون - کائنات ماده یه نک وجودنی اثبات ایتیمک غیرتیله - بدهات حسیه یه بالمراجعه استدلاله قالفیشه رق ، انده کی باستونی ره وورمش ، و : (بونی ، بوماده یی نصل انکار ایده بیلیرسک ؟) . دیه مقابله ایتمشدر . بو دلیل ، موجه دکلدر ؛ چونکه (بارقله) نک انکار ایتدیکی شی ، (جونسن) ک باستونیه اثبات ایتیمک ایسته دیکی شی دکلدر . ایسته بو منابته بو طرز استدلاله و امثاله بر اسم مخصوص طاقه رق (argum. Baculinarum) دیمشله . لاتینجه (baculum) باستون دیمکدر . بن درسلمده ، بوکار (مان عصائی) دیمشدم . لاتینجه تعبیرینک تماماً ترجمه سیدر .

بو طرزده بر برهان اقامه ایتیمک اساس بحثی و دعوانک ماهیتی بیلمه مکدن ایلری کلدیکی ایچون بوکار منطقده (ignoratio elenchi) دخی ده نیلیرکه معناسی (موضوع بحثی بیلمه مک) دیمکدر . بو تقدیرجه بو بر (برهان سفسطی argum. sophistique) در .

شو تعریفاته کوره (برهان عصائی) تعبیری پک خصوصی براسم اولمش اولور . زیرا تماماً عینی جنسندن برچوق سفسطه لر واردرکه باستونله هیچ مناسبتلری یوقدر . مثلاً (برهان آخیله فس) ک موجد و مرتبی اولان (زیتون Zénon d'Elée) حرکتی انکار ایتدیکی زمان مشهور (فیلسوف کلجی le philosophe cynique) (دییوژن Diogènes) ، هیچ بر جواب ایله مقابله ایتیمه رک آیاغه قالمش ، اوتیه بری یه بر قاج آدم کیدوب کلش ، و بو حرکتیه زینونک ادعاسنه قارشلی فعلاً بر دلیل ابراز ایله مک ایسته مشدر . باشنی و یاخود صاقالنی قاشیسه ده اولوردی ؛ طاقلاق آتسه ده اولوردی ! چونکه بو افعالک جمله سی حرکت امکانی اثبات ایدر . یعنی بونوع دلیل مطلقاً باستون ایسته مز . لکن نه یاپسه ، نه (ignoratio elenchi) یه مثال اولوردی ، چونکه زینونک انکاری حرکت محسوسه و مشهوده یه

قارشلی اولمایوب بالخاصه حرکت معقوله یه قارشلی ایدی . او حالده دییوژنه نک اوتیه بری یه حرکتی ، مسئله نک ماهیتی اکلاماش اولدوغنی اثبات ایدر . تیمورلنک مفتی سی (سعدالدین تفتازانی) نک شو فسطائیه ادعاسنه قارشلی : (اونلرک بر طرفنی آتله یا قالی در !) دیمه سی دخی عینی جنسندن بر دلیل صاییلیر و اولسه اولسه (لادریه) یه قارشلی - بر درجه یه قدر - موجه اوله بیلیر . فقط (عندییه) و (عنادییه) فرقه لرینه قارشلی معتبر بر دلیل اوله ماز ؛ حکمسزدر . چونکه بویکی فرقه اربابی کندی نفسندن واحوال نفسانیه سندن شبهه ایتمه مشدر .

[idéalisme, subjectivisme, scepticisme] تعبیرلرینه باقیکز !
بونلردن ماعدا (arg. cosmologique) ، (arg. téléologique) ، (arg. ontologique) ناملریله معروف برطاقم دلیللر واردرکه الهیاته مشهوردر .

[ontologique, téléologique, cosmologique] کله لرینه باقیکز ؛
ایضاحات مخصوصه ویرلمشدر .

بزده دخی بعضی نوع برهانلر واردرکه اوروپا حکما سنجه متعارف دکلدر و فرنک لسانلرنده معادللری یوقدر . (برهان مسامته) و (برهان سلمی) بوقیلدندر ، بویکی برهانک مشهور ابوعلی ابن سینا طرفندن تصور و ترتیب ایدلمش اولدوغنه دائر برظن قوی وار . اکثر حکمای اسلام ، عالمک منهای اولدوغنی بویکی برهان ایله اثباته چالیشیرلردی . فقط بو برهانلر هندسی معناسیله (نامنهای l'infini) تصویری حقنده اسلافک یا کلش دوشوندکلرینه برای مثال اولور . [بو خصوصده تفصیلات و ایضاحات ایچون (fini) کله سنده بویکی برهان عائد تنقیداته باقیکز !]

بزم اسلام منطقینو (دلیل preuve) ایله (برهان) آره سنی تفریق ایتمشله و دلیل تعبیرینی ده عام و شامل بر معنا ایله قبول ایله مشلردی . بومسئله ده تماماً ارسطویه اتباع ایدرک (اقسام حجت) ی بش نوعه آیرمشلردی که بونلر (برهان) ، (جدل) ، (خطابه) ، (شعر) ، (سفسطه) یاخود مغالطه (در .) (اثیرالدین الابهری) نک (پورفیریوس Porphyre)

دن ترجمه ایتش اولدوغی (ایساغوجی Isagogée) نام رساله منطقیه ده وسائر شرق کتابلرنده مشهور اولان تصنیف بودر. شوقدیرجه (برهان)، اقسام دلائله داخل برنوع حجتک اسمی اولوبور. بناء علیه حیثیت معناه (برهان)، (دلیل) دن اخص در.

بزم منطقیه کوره فی الحقیقه برهان دهنیلان دلیل، (مقدمات یقینیه prémisses certaines) دن مرکب اولان قیاسه دیرلرکه نتیجه سی (یقین certitude) افاده ایدر. حالبوکه دیکرلرنده بوقدرت اقناعیه یوقدر. دیمک که اک جلی حجت، برهاندر.

قواعد منطقیه بی مختصر وموجز برصورتده نظاماً تدوین ایتش اولان (سلم) نام رساله عربیه ده (مجتلرک اقسامی) فی تعریف وتعداد ایدرکن مؤلف شو بیتلری سویلوبور:

اجلها البرهان، والف من

مقدمات بالیقین تقترن

من اولیات، مشاهدات،

مخربات، متواترات

وحدسیات ومحسوسات؛

فتلك یقینیات ! ! .

دیور. یعنی برهانک سائر مجتلر میاننده اک واضح واک جلی بردلیل اولدوغنی وانجق مقدمات یقینیه مستند بولوندوغنی ایضاح ایدرکن صوکره بالجمله یقینیاتک انواعی ده تعداد ایدیور. (مواقف) ده وسائر کتب فلسفیه مزده دلیل بجئی اینجه دن اینجهیه تدقیق ایدلمشدر. علم کلامده موضوع بحث وموجب مناقشه اولان مسائل خطیره ده، مخالف فرقه لره مغلوب اولمامق غیرتیه، اهل سنت دلائلک انواعی و قیمت منطقیه سنی کمال اهمیتله تحقیق ایتیمکه مجبور بولونمشدی. منطق، اوزمانلر اصولده عمده واساس اتخاذا اولوندوغنی ایچون ذاتاً بودقت ضروری برشیدی. بوکون بویحث منطقه ترک ایدلمش، منطق دخی تجربه دن صوکره ده یعنی ایکنجی موقعه ارجاع ایدلمشدر.

زمانمزد تجربه ایله ثابت اولان اک دکرسز بروقعه اک جلی قیاسلردن

دها بلیغدر (la logique des faits منطق واقعات) هر مسئله ده بوکون معتبر اولان دلیلدر. هر دلیل برقیاس صورتنده در. معتبر وصاغلام دلیلک مقدماتی تجربهیه مستند اولور. (متعارفه axiomes) لرله حقایق ریاضیه بی بیه زمانمزد فلسفه سی محصول تجربه اولمق اوزره تلقی ایدیور، واونلرک حکمنی (مطلق) عد ایتیمور.

فاسد وسفسطی اولان دلائله (arguments fallacieux) ده نیلیرکه مفصل ومکمل منطق کتابلرنده بونلری تحقیق ایچون برباب مخصوص وارددر. فیلسوف معاصر (جون ستونث میل J. Stuart Mill) منطقنده دلائل سفسطیه بی پک عالمانه وپک معقول برصورتده تصنیف ایتمشدر. [sophisme کله سنه باقیکز !]

بزم اسلام حکما سنجه پک معروف ومعتبر اولان ایکی نوع دلیل دها واردرکه برینه (دلیل اتی)، دیکرینه (دلیل لمی) دیرلر. بو ایکی نوع دلیل، اوروپا سقولا ستیق فلسفه سنک (arg. apriori) و (arg. aposteriori) دیدیکی برهانلردرکه اصلاً ارسطودن آلمشدی.

بونلرک تعریفی بزم اسکی فلسفه واصول کتابلرینک همان هپسنده وارددر. (تعریفات) صاحبی سید شریف جرجانی، بودلیللر حقنده مختصر ومفید اوله رق بروجه آتی ایضاحات ویریور:

(... والحد الاوسط فی القیاس، لابد ان یكون علة لنسبة الاکبر الی الاصغر. فان کان مع ذلك علة توجد تلك النسبة فی الخارج ایضا، فهو [برهان لمی] الی آخره ! ...)

یعنی: (برقیاسده حد اوسط، او قیاسک صغراسی ایله کبراسی آره سنده ثبوت نسبتیه بهمه حال سبیدر. بونکله برابر اولیه برنسبتک خارجه ده دخی ثبوتیه برعلت حقیقیه بولونورسه، اوتقدیرده بویله برقیاسه برهان لمی دیرلر) دییور. (... وان لم یکن كذلك، بل لایکون علة الافی الذهن فهو [برهان اتی] الی آخره !)

یعنی: (اکر اولیه اولمایوبده انجق ذهنی برسبب اومتدن عبورت قالیرسه

اوکاده برهان آتی دیرلر (دیور) و بوندن اکلاشیلورکه برهان اوله رق ترتیب اولونان قیاسده حد اوسطی تشکیل ایدن قضیه نك مدلولی هم ذهنده معقول همدۀ خارجه موجود بر سبب کوستریورسه اوکا (دلیل ملی) ده نیلور . یوق ، اکر بو رابطه سببیت یالکز ذهنی و معقول اولمقدن عسارت قالیورسه اووقت (دلیلانی) اولویور . بوکا همان حکمانک اکثریت کلیه سی عینی مثالی تکرار تکرار ایراد ایتش اولدقلری ایچون عادتا (classique) اولمشدر . او مثالده شودر :

(بو شی متعفن الاخلاطدر . [یعنی مایعات عضویه سی تعفن ایتش بر جسمدر] : هر متعفن الاخلاط اولان شی محمومدر . بوده محمومدر .) شیمدی بو قیاسده (تعفن اخلاط) کیفیتی حمانک - هم خارجه حقیقی اوله رق ، همدۀ ذهنمزدۀ نظری اوله رق - سببی در ، یعنی بونی بویله دوشوندو کز کبی خارجه دخی عیناً بویله اولدوغنی تحقیق ایدوب کوره بیلیرز . مشاهده اولونماسی ممکندر . ایشته اونک ایچون بو قیاس بر (دلیل ملی) در . سقولاستیق فلسفه سنک (arg. aposteriori) سی تماماً بو ایدی .

برده بو قیاسی ترسنه ترتیب ایدلم :

(بو شی محمومدر . هر محموم اولان شی ، متعفن الاخلاطدر . او یله ایسه بوده متعفن الاخلاطدر) اولور .

بوراده حمانا یله تعفن اخلاط کیفیتی آره سنده کی نسبت عیناً باقی اولدوغنی حالده طرز استدلالده برده کیشکلک وار ؛ (تعفن اخلاط) ، سبب ؛ (حمانا) ، مسببدر . یوقاریکی قیاسده سببی اساس و مبدأ اتخاذ ایدرک ، (حمانا) یه یعنی مسببه انتقال صورتیله استدلال ایتشدک . ایکنجی قیاسده مسببی ، یعنی (حمانا) یی اساس اتخاذ ایدرک سببه ، یعنی (تعفن اخلاط) کیفیته انتقالاً حکم ایتش اولویورز . ایشته (ایتت apriorité) و (لیتت aposteriorité) فرقی بوتون بواساسه استناد ایدر . برنجیسی (مؤثر دن اثره استدلال argumentation de cause à effet) ، ایکنجیسی (اثر دن مؤثره argumentation de l'effet à la cause) دیمک اولور .

فرضا : (شوقارشیکی طاغده بر آتش کورو یورم ؛ او یله ایسه دومانی ده

اولمق لازمکیر !) دیه حکم ایدرسم ، یور قیاس اولورکه حد وسطی مخدوف بر (دلیل ملی) شکلنده در . چونکه آتشدن یعنی مؤثرک وجودندن دومانک یعنی اثرک وجودینه حکم ایتش اولویورم . اکر ، (شوقارشیکی طاغده بر دومان کورو یورم ؛ او یله ایسه اوراده آتش اولمق لازمکیر !) دیرسم بوقیاس - ینه حد اوسطی مطوی یعنی طی و خذف اولونمش - بر (دلیلانی) شکلنده در . چونکه دومانه باقوب آتسه استدلالاً حکم ایتش اولویورم . دومان آتشدن اثری در .

بوسیاق نظر سقولاستیق طرز ی در . بوکون (apriori) و (aposteriori) تعبیرلری ، حکمک اثر و مؤثره کوره دکل ، استدلال قبل التجربه و یا بعد التجربه اولدوغنه نظراً قوللانیلیر . [بو تعبیراته باقیکز !]

سقولاستیق اصولنده اساس ، فلسفه یی منطق معرفتیله آلهیات خدمتنده قوللانتق اولدوغنی ایچون قرون وسطاده بودلیلانی ملی پک بویوک بر قیمتی حائز کورو نوردی . زیرا ایکی باشند وجود الوهیتی اثبات ایچون استعمال ایدیلیدی . کائناتک وجودندن بر خالقک وجودینه انتقال ایدلیکی کبی ، خالقک کمال ذاتی سندن ده کائناتک مخلوق اولدوغنه استدلال اولونوردی . (preuve ontologique) ، (pr. cosmologique) ایشته بودر .

[تفصیلات ایچون بو کله لره باقیکز !]

Aristocratie	فرانسزجه (آریستو قراسی اوقونمالی در)	aristocratie
	والمانجه	Aristocratie
	انگلیزجه	Aristocracy
	ایتالیانجه	Aristocrazia

یونانی قدیمده (آریستون = ἀριστον) بر شیکک ای سی (اعلاسی) دیمکدر . (قراتوس = κράτος) دخی حکومت معناسنه کیر . (آریستو قراسی) تعبیری بو کله لردن مرکبدر و علوم اجتماعیه ده اصطلاحات مشهوره دندر . بر جماعتده اک آتی آدملر اداره سی دیمک اولور .

لسان اصطلاحده (زادکان حکومتی) معناسنه کیر ؛ بناء علیه معلوم بر طرز اداره نك اسمی در . (مختصر لغات فلسفه) نام کتابک مؤلفی (غوبلو

Goblot) ، بولكه نك تعريفده: (بو، اويله بر) (حالت اجتماعيه état social) دركه زمام اداره و قدرت سياسيه منحصر آ بر صنف النده در . (ديمككه اکتفا ايتمشدر . بوتعريف مجمل ، هم مبهم ، همده ناقصدر ؛ چونكه (حکم اقلیت oligarchie) ده نیلن طرز اداره دهده موافق کليز . حالبوکه بوايکی طرز حکومتک ارده سنده کی فرق مهمی یکر می درت عصر اول افلاطون واسطو حقیقه ادراک و تعریف ایدرک آریستو قراسی نی تصویب و (oligarchie) نی ذم و قدح ایتمشلردر . اوتهدنبری فلسوفلرجه مسلمدرکه هر هانکی بر مملکتده اداره نك منحصر آ بر صنف النده بولونماسی (آریستوقراسی) ديمك دکلدر . اوکا اک طوغرو معناسيله (oligarchie) دیرلرکه (حکم جمهور démocratie) ک یعنی (حکم اکثریت) ک ضدی صایلیز . بوفرق پک مهمدر . نصل که علی الاطلاق یونان قدیمده وهله افلاطون زماننده حکومت جباره (le gouvernement des tyrans) بویله ایدی ؛ زمام اداره مثلاً یکر می اوتوز کشی نك النده ایدی . بعضی احوال وظروفک موافقتی ، بعضی وقوعات اجتماعیه نك معاوتی سایه سنده برطاقم (هنکامه کیر aventurier) لر فرصت زمانه دن بالاستفاده ، اکثریت ناسه تحکم ایدرک اداره نی اللربینه الهیلیلر ؛ احتمال که (anarchie) یه نهایت ویردرک آز چوق تأمین آسایش و تأسیس انضباطه دخی خادم اوله بیلیرلر . یعنی اولرک تحکمی جمعیت بشریه ایچون بروجله خیرلی دخی اوله بیلیر . فقط هر نه اولورسه اولسون بونلره آریستو قرات ده نیله مز . مثلاً بوندن برقاج عصر اول مصرده اداره حکومت منحصر آ (مملوکلر) یعنی کوله منلر النده ایدی . نته کیم تقریباً بر عصر اول وقوعه کلن فرانسه اختلال کیرنده حکم و نفوذ بر مدت (ژاقوبه ن Jacobins) نامنی طاشیان برطاقم (بالدیری چپلاق لر les sans culotte) ه کچمشدی . واقعا (مملوکلر) منسوب اولدقلری جماعت ایچنده بر صنف مخصوص تشکیل ایدیورلردی ؛ (ژاقوبه ن) لرده بر فرقه سیاسیه اربانی ایدی ؛ فقط هیچ کیمسه ، علی الخصوص هیچ بر مورخ وفلسوف بونلره (زادکان) نظریله باقه مامشدر . اونک ایچون (غوبلو) نك تعریفی فنا حالده یا کلدشدر .



افلاطون وارسطونک (آریستو قراسی) دن مقصدی ، بوسبوتون باشقه ایدی . مدنی و حرملتلره نمونه امثال اوله بیلجهک (مکمل بر شکل اداره) تحیل ایدرک ، اونک شرائط اصلیه و خطوط اساسیه سنی تعیین ایدن بوفلسوفلر آریستو قراسی تعیری معنای لغویسی ايله تلقی ایدیورلر و (آریستون) یعنی جماعتده (اک ای) اولان افراد کامله نك اداره سنی مراد ایدیورلردی . واقعا حقیقی اصالتده بودر . بومعنا ، بوکون دخی معتبردر . (اصالت طبیعی aristocratie naturelle) بوکادیرلر .

هر کیمک اوغلی اولورسه اولسون علم وفلسفه یه ، هنر و صنعته ضبط و ربط امور و اداره مملکتده قابلیت خصوصنده مستقنا بر استعداد ، پارلاق بردها ايله طوغمش اولانلر ، اک طوغرو معناسيله آریستو قراتدرلر . بوکبی آملر جماعات بشریه ده بول بول یتیشه بیلیر و قالدیرملری طولدورور عوام طاقندن دکلدر . اندر طوغان بختیارلردندر . ایشته اصل (آریستون) یعنی افراد جماعتک (اک ای) لری بونلردر . حکمت اسلامیه نظرنده دخی (سادات قوم) بونلردر .

ارسطو و افلاطون ایشته بوکبی فطرتاً اصیل و قابلیتی طوغمش اولان افراد ممتازنک اللربینه زمام اداره نی تودیع و حواله ایتک صورتيله بر آریستو قراسی حکومتی تصور ایدیوردی ؛ بالخاصه افلاطونک (République) نام کتاب مشهوری بوتصور اوزربینه قورولمش ، خیالی بر اداره تصویر ایدر . بو اثر (کتاب السیاسه) عنوانیه - خیلی زمان اول - عربجه ترجمه ایدلمشدی . بونکله برابر (اجتماعیات) علمنه منسوب اولان بوتعیرک اک مشهور معناسی ، تاریخی اولان صورت تلقی سی در . بناء علیه ارسطو و افلاطون کی قدما نك تلقی ایتدیکی معنا اوزره بوکله نی لسانمزه ترجمه ایتک لازمکنجه (سادات قوم) و (اخیارامت) ترکیلری ده ازیاده موافق دوشر . ذاتاً بزم اسکی مؤلفاتمزه چوق کچن بوتعیرات معروفه (آریستون) لفظ یونانی سنک معنای لغویسنه نظرله تام ترجمه در . (آریستو قراسی) نك بوکونکی معنای سیاسی سنه کنجه (زادکان و یا خود اشراف حکومتی) دیه ترجمه ایدله لی در .

بوصوك زمانلرده علوم اجتماعيه متخصصينى (آريستو قراسى) نك منشأنى، حيثيت وقوتى لايقيه تدقيقه قويولمشلردر. نتيجة تدقيقات شورقاج سطرله تلخيص ايديله بيلير.

(آريستو قراسى)، جمعيت بشريده بالطبع وبالضروره ظهوره كليور. خصوصا (استبداد اداره ومراتب صنف Despotisme et régimes des castes) قيدندن بر درلو قورتوله مامش بولونان جمعيات قديمه ده عاداتا بر (مؤسسه اجتماعيه institution sociale) شكلنى بيله آليور. مدنيت قديمه ده (سلطه دينيه l'autorité religieuse) ادارهيه حاكم مطلق اولدوغى ايچون (شكل حكومت la forme du gouvernement)، دائما (حكومت دينيه théocratie) صورتنده تأسس ايديله بيلور. آريستو قراسى صنفى دخى - شورشراط اجتماعيه تحتند - (رهبان طاقى le clergé) تشكيل ايديلور، وجماعت ايچنده حكم ونفوذ، شرف تقدم، علم وحيثيت ايله ممتاز بر (صنف كبار) عد اولونويور. هند قديمه ده (برهان Brahmanes) اسكى ملت موسويه ده (لهوى يم = Léviim) و (قوه نيم Cohénim)، ايران قديمه دخى (مغان les Moghs) صنفلى كى كه بودرلوسنه (aristocratie sacerdotale) ده بيلير. (سيادت رهبانيه) تركيبي ايله بوتعيرى ترجمه ايديله بيليرز.

بوندن صوكره (عسكر) صنفى كليردى واوده (aristocratie militaire) صاييله بيليردى. ارتق بونى متعاقب (تجار) طاقى، (چفتجى) طاقى فلان كليردى. ايشته (régime des castes) ديدكلرى اصول اجتماعى بودر. آريستو قراسى نك منشأ حقيقى سى (اداره عسكريه militarisme) دره بونده اكثرث محققين متفق الرأيدر. هر حالده زادكان صنفك وتحكمك مديد محاربه لردن - بالضروره - تولد ايتش بر (حزب) و اوحزبه مخصوص برطرز اداره اولدوغنده شبه قلامشدر. نته كيم بوتون امتيازاتى ده (حق فتح droit de conquête) دن نشأت ايتش وحيثيتلى ده اودعوايه مستند بولونمشدر.

آسيانك اك قديم مدنيتلرني تمثيل ايدن ملل معظمه يي بوراده تدقيقه زمين مساعد دكلدر. فقط اوروپانك بوكونكى ملل متجذبه سنده آريستو قراسى صنفلرينك اك اصيلارى طور اراغه منسوبدرلر. عائله اسملى بونى صراحتاً كوسترييور. قرون وسطا حدودىي كچه مهن تاريخ حياتلى دخى اثبات ايديلور كه بونلر اسكى (تيار وزعامت fiefs) صاحبلىرينك يعنى فاتحلك اولاد واحفاديدر. نته كيم دولت عثمانيه نك حين تشككنده دخى فاتحلك مكفاتى بو ايدى. باشقه اصول بيلنميور ودوشونوله ميوردى. ديمك اولويور كه بوكونكى زادكانلق دونكى دره بلكلكك ياوروسى در. بناء عليه ترقيات اداريه ومدنيه ايله اسكى اصول زعامتك لغو اولونماسى، ويركولرك عموم صنف خلقه تشميل ايدلمه سى، محاكم عدليه وحقوقيه نك تأسسى، اردونك دائى ويكپاره بر كنه اوله رق تشكيلات جديده مظهر بولونماسى، (مركزيت = centralisation du pouvoir) ي تقويه ايتمكه برابر، زادكان صنفك قوت واهميتى - بك طبيعى بر صورتده - قيرمش و (كوچو جوك بر پادشاه roitelet) ديمك اولان دره بلكلرينك عسكرينى ونفوذىي آلوب اللرنده طور اراقدن باشقه برشى بر اقامشدر. حالوكه بر طرفدن حقوق طبيعى ومدنيه نك، حتى حقوق سياسيه نك - ترقيات اجتماعيه سايه سنده - بوتون افراد ملته شمولى وكتيدكجه تأيد وتشييد ايتمه سى؛ ديكر طرفدن ده سربستى صناعت وتجاركت بوتون بوتون تحقيق ايله فضولى بر طاقم امتيازات قديمه نك كندى كندينه قالمه سى يكي بر دور فعاليت فتح ايتش و - هانكى صنفدن اولورسه اولسون - بالجمله ارباب استعدادده كار وكسب ورفاه وسعادت قابولرني آچمشدر. آرتق بوندن صوكره هرچالیشان آدم ايچون، زنكين اولمق احتمالى وهرزنكين ايچون طور اراق وعقار آلمق حق وصلاحتى، - عنعنات تاريخيه مستند بولونان - موانعه تصادف ايتمه مشدر. بوجريان حريت وفعاليتك بر نتيجة طبيعى سى اوله رق - آحاد ناسدن - مليونلرجه افراد، ثروت وسامان اعتباريله اك اسكى زادكان عائله لرني كولكده بر اقمشدر. اوندن ماعدا، عمله صنفك تشكلى واستقلالى (آنغاريه) و (آبالاچى) اصول قديمك اسارتندن ده چفتجى يي، رنجپرى

وايشيجي اطلاق ايتديكي ايچون زادكان صنفك النده قالان اراضى وسيعه وچفتلكات ، اسكى سى كېي واردات ويره مز اولمشدر . بوكون هان آوروپانك هر طرفنده ايستانستيقار كوسترييوركه آريستو قراسى اركانك چوغى مديون وصرافلر ومحتكر مقررلر النده زبوندر . بوحاله چاره ساز اولمق اوزره بعضى يرلرده برطاقم قواعد خصوصيه بيله وضع ايدلمش ايسيهده ينه سى ورقابتك حكمنه غلبه چالينه مامشدر .

حيات اقتصاديه نك صوك دور مدنيتده آلايفنى شكل واهميت الجاسيله - بالضروره - تولد ايدن بانه وسائر مؤسسات ماليه هر مملكتده بر (زنكين صنفى) يتيشديرمش وپاره قوتيله ، معاملات ماليه طولاني سيله ، بوصف امور سياسيهده بك مهم بررول اويناغنه باشلايه رق (زنكينلر حكومتى Plutocratie) تعبيرينه وجود ويره مامشدر .

بوكونكى مدنيتك شرائط اجتماعيه سى ، [دره بلكلكن نشأت ايدن وشجره حسب ونسبى درتيوز سندن ايلرى كيده مين] تاريخى آريستو قراسى ني كلياً حكمدن اسقاط ايتمشدر . بالعكس ، عموم خلقك بالقوه نائل مساوات اولماسى واكثرىت ناسك بالفعل بونعمتن استفاده ايدم بيلمه سى (Bourgeoisie) صنفه وجود ويره مامشدر .

(ده موقراسى) نك بوكون قابل تطبيق وتحقق اولان اداره معلومه سى ده اك زياده (Bourgeoisie) صنفك نفوذ وتحكمينه يارديم ايدم جك ماهيته دره . اونك ايچوندركه دور استقبالك حاكملى اولمق ادعاسنده واميدنده بولونان عمله صنفى ، (Bourgeois) صنفى اك مدهش بر دشمن كېي تلقى ايدىيور . عمله طاقى (سوسايلزم) فلسفه سنك مبالغه كار وعدلرندن مدد اومدقلىرندن ناشى بالطبع (پلوتوقراسى) يه دخى - مدنيت وانسانيت ايچون - برفلاكت عظمى نظريه باقيورلر . فقط زادكان صنفه قارشى كين وغيظدن آزاده برطور لاقيدى كوسترييورلر . - كندى تعبيرلرنجه - قرون وسطادن يادكار قالمش اولان بوصفى ، جماعت بشريه ايچون (زيانسز برزنت) اولمق اوزره تلقى ايدم بيلورلر .

ايشته صوك دور مدنيتك شكل وطورى وعلى الخصوص ترقيات صنايعه وسرپستى تجارتك حيات اجتماعيه به بخش ايتديكى آسايش وكشايش ، معيشت انسانيه نك واداره حكومتك شكلنى كلياً ده كيشديره رك آريستو قراسى صنفى - بوسوتون ويره يده دكلسه بيله - چوق يرلرده آزچوق حكمدن اسقاط ايله مامشدر .

مع مافيه زمانمزه اصول اداره على العموم (démocratie) يه مبال اولدوغى كېي (ده موقراسى) ده دخى نفوذ حكومت اكثريتله (Bourgeoisie) صنفك النده بولونمقله برابر ينه بعضى مدنى مملكتلرده زادكان صنفى بالفعل امر ادارهده نافذالحكم دره . انكلتره بوكا مثال اوله بيلير . انكلتره نك اداره سى ايسه باشقه مملكتلر كندن قسا دكلدر . لكن انكلتره ده هر كيم اولورسه اولسون وهر هانكى وجهله اولورسه اولسون جېلى برفطرت نجيه وبرقابليت ممتازه اثبات ايدوبده مملكته برخدمت مشكوردهده بولوندىمى ؟ . او آدمى - شروط متخالفه اوزره - آريستو قراسى صنفه داخل ايتك مستحسن برقاعده متخذ دره . ديمك اولوبوركه انكلتره ملتى ، اساساً اصلته رعايت واعتماد ايتمكله برابر فطرتاً اصيل طوغان (اخيار امت) ي رسماً اشراف صنفه . ادخال ايدرك بوغناصر مهمه ايله اوصنفه تازه حيات ومعنوى برحيث بخش ايتمش اولوبور . ظن ايدرم كه اوملكتده اصلتك شرف وحيثيت وقدرت وصلاحيته دوامى تأمين ايدن عواملدىن برى ده بودر .

عوامل مدنيه واجتماعيه دن (دين la religion) دخى آريستو قراسى برنسيپلرينه مغايردر . زيرا هر درلر امتيازات تاريخيه واعتباريه ني رفع ومحو ايتمكه مائل برقوت معنويه وبرمؤسسه اجتماعيه دره . شبه يوقدركه هر (دين) ، (مساوات égalité) ، (اخوت fraternité) و (عدالت justice) اساسلى اوزرينه مستند اولمق كر كدر . دين ، هيچ برامتيار قبول ايدم مز . على الخصوص دين مين اسلام نظرندم هر كس ، حتى پيغمبران ديشان بيله (عبادالله) دن صاييلير ، وبوحيثيله بوتون خواص وعوام ايله متساويدر . اوندن ماعدا (بالجمله مؤمنلر قارداشدرلر) . بويه اولونجه ، يعنى بوتون

(امت محمد) حقوق و حیثیت انسانیه در مساوی برقرار داشت جماعتی اولونجه، حکم - بالطبع - اکثریتده بولونمق لازمکلیز . ایشته (آنا بالاسواد الاعظم) یعنی (بن قاره غلبه لکله برابریم؛ جمهور ناسه طرفدارم!) معناسنده وارد اولان قول شریف پیغمبری (ده موقراسی) نک بر مهم (اقنوم اساسی Principe essentiel) سنی ناطق در .

هر دینده روح عدالتی تشخیص و تمثیل ایدن قضیه، ایشته بواقنوم اساسی در .

حقیقت حال بویله اولقله برابر اوروباده همان هر مملکتده اریستوقراسی صنفی رسماً دین طرفدارلنی ایله نظر دقتی جلب ایتمش وعوام ناس اوزرنده دینک نفوذینی تقویه ایتک غیرتی بر مسلک سیاست اتخاذ ایله مشدر . بوغریبه نک سبب مغنویسنی بعضی علیهدار منقدرل شو وجهله ایضاح ایدیورلر: « کرک (autocratie) یعنی بر شخصک اداره کیفیه سی ایچون اولسون، ایچون اریستوقراسی و یا خود هر هانکی بر (oligarchie = حکم اقلیت) ایچون اولسون، جمهور ناسه انفاذ حکم ایده بیلیمک لزومنی تأمین خصوصنده انجیق بر (مقصد but) کوزه دیلیر؛ اوده (اطاعت obéissance) در . اداره اموره ادعای صلاحیت ایدنلرک خلقدن اک اول واک زیاده ایسته دیکی شی اوامر ونواهییه قارشی (اطاعت کامله) در . بوده (قوت) ایله تأمین اولونه بیلیر . مادی قوتلرک محظورلری وارددر . اولا اومادی قوتلرک منبعی ذاتاً جمهور ناسدر؛ امت در . خلقدن آلنان بر قوتله، خلقت ارادتی قیرمق و آرزولرینه رغماً اونی اداره ایتک چالشمق (سؤ اداره mauvaise administration) ایله تأمین موفقیته و جلب ممنویته چالشمق درک باطل بدیهی درجه سنده بر خطا عد اولونویور . مغنوی قوتلر بویله دکدر . چونکه انسانلر، هله جماعتلر، اعتقادلرینه کوره حرکت ایتک میالدرلر و بویله حرکت ایده بیلدکجه خوشحالدرلر . دین اک بویوک بر قوت مغنویه در، و (نصوص قاطعه dogmes décisifs) اوزرینه مستند بولوندوغی ایچون امر ونهی ایتدیکی خصوصات حیاتییه حقنده بحث و مناقشه

کوتورمز . بلا تنقید و محاکمه (امر اطاعت) ایستر . بناء علیه اک قوی و وجدانی (سلطه مغنویه autorité spirituelle) اعتقاددر . بوتون جماعت افرادینی شامل اولان اعتقاد عمومی، انجیق دین اوله بیلیر . کرک اداره کیفیه و مستبده ده، کرکسه (آریستوقراسی) و (حکم اقلیت) ده (مبدأ principe)، (حقوق امت) اولمایوب (سلطه حکومت) اولدوغی ایچون اداره کیفیه و مستبده و (آریستوقراسی) ایله (اولیغارشلی) دائماً بومبدأدن آیرلامغه چالیشیر؛ بناء علیه خلق اوزرینه دینک نفوذینی تقویه و اونلری اطاعت مطلقه آلیشدر مقله تربیه ایتک ایستر . بوندن ده اصل مقصد، بالواسطه (autorité) یی تقویه ایتک و خلقی کندی اعتقادیه ضبط و ربطه آلمق در . شوتقدیرجه، اوروپا زادکان صنفک الله دین، علی العموم، بر طرز سیاست، بر شکل اداره نک آلت اجرایشی اولویور . ینه اونک ایچوندرک پارلمنتولرده زادکان صنفه منسوب اولان فرقه اربابی - (قرال طرفدارلری les royalistes) ایله بر چوق اختلافاته رغماً - همان دائماً دین وعادت و عنعنیه تعلق ایدن خصوصاتده اتفاق ایدیورلر . ینه عینی سیله درک اختلال کیری ایقاع ایدن رؤسای عوام قراللق ایله برابر زادکانلغک و دینک علیه شتله قیام ایدرک بر چوق غلیظ و مدهش خطالره دوشمکدن کندیلرینی صاقینه مامشدرلر . دیورلر .

بومتناقض حرکتلر، بومتباين اعتقادلر امور انسانیه ده انجیق افراط و تفریط خطالرینه مثال اوله بیلیر . حالبوکه نه طرز سیاست اعلاسی بودر؛ نه ده دینک اصل معناسی بودر . هر دین، و هله دین اسلام بی آدمی تکریم ایله مش و بو حیثیه بوتون انسانلری بر برینه مساوی طوتمشدر . نته کیم (حقوق عباد) ی - اهمیتجه - هر حقه تقدیم ایتمشدر . فقط یالکز حقوق طبیعییه و حق حیاتده مساواته قائل اولمشدر . زیرا جمهور ناسدن حتی پیغمبران دیشانندن بعضلرینی بعضلرینه تفضیل ایله مشدر . امتک اصل کباری (ناسه نافع اولان خیرلو کشی لردر!) بناء علیه فضیلت باینده تفضیل وارددر، مساوات یوقدر . قرآن کریمده: [بیلنلر ایله بیلیمینلر، یعنی عالمر ایله جاهلر مساوی اوله بیلیرمی؟!]. بویورولویورک اک طوغر و سیده بودر .

انسانلرک علی العموم مکرم طوتولمش اولماسی حقوق ناسک قدسیتی اثبات ایدر . بوعتقاد - معلوم اولدوغی اوزره - (démocratie) نك مبدأ اساسی سی دره . بونکله برابر دیگر طرفدن بیلکیچ و خیری ، مقتدر و عقیف ، الحاصل فضیلتی کیمسه لرك عوام ناسه تفضیل بیورلش اولماسی دخی مساوات مطلقه دعواسنک باطل اولدوغی اثبات ایدرکه ، بوده - مشهور اولدوغی اوزره - زادکان صنفنک ، هیچ ده کیشمه یں ادعاسیدر . بناء علیه دین اسلام بومسئله لری الك طوغرو بر صورتده حل ایتشدیر . (سید القوم خادمهم) قول شریفی سیادتک یعنی (حقیقی مناسیله !) ، (آریستوقرات) لک شرطی - بزکله ایله - تعیین بیورمشدر . سیادت [فلان ابن فلان اولمق دکل ، خادم انسانیت اولمقدیر .] دیمشدر . ارسطو و افلاطون کبی فحول حکما تماماً بوفکرده ایدیلر .

علوم اجتماعیه اربابی و برجوق سیاسی فیلسوفلر ، اخیراً بومسئله یی کمال اهمیت وجدیتله نظر اعتباره آلوب اطرافیه تتبع ایتشلردر . آریستوقراسی اداره سنک له وعلینده پک چوق سوزلر سویلنمش وحتی بللی باشلی اثرلر یازلمشدر . بالخاصه (تکامل evolution) فلسفه سنک مؤسسی و معاصرین فلاسفه نك الك مشهورلرندن بری اولان متوفی (هربرت سپنسر) ، زادکانک حیثیتسزلکلرینی و ردائل تاریخیه سنی ابراز ایدرک بوصف حقنده نفرتی کیزله یه مامش و کندیسه قرال طرفندن تفویض اولونان (لوردلق) پایه سنی ده قبول تنزا ، اتمیه رك قطعاً رد ایله مشدی . مع مافیه ، اعتقادات سیاسییه سی و مزج شخصی سی اعتباریه (رادیکال - ایندیوید و آلیست Radical-individualiste) اولان بوفیلسوف - زادکانلق ادعاسنه قارشلی اظهار ایتدیکی بونفرت شسیدیه رغماً - جماعات بشریه ده بهمه حال یاواش یاواش برصنف ممتاز وجوده کلدیکنی و بونک پک طبیعی برشی اولدوغی ده اعترافه مجبور بولونمشدر . قطعاً (دموقراسی) طرفداری اولان آمریقای شمالی نك (نیویورک) شهرنده (الی یوزلر) جمعیتی بوکا مثال کتیریور . بوجمیت امریقا زنکیلرندن الی یوز کشیک برحزب خصوصی درکه ، اعضای اصلاً طبقه عوامدن نشأت ایتش اولمقله برابر ، خلقدن آیری کبار برصنف

افرادندن ایتشلر کبی طورلر طافیورلر و بویوک زنکیلردن باشقه کیمسه یی آره لرینه قبول ایتمورلر مش . . .

بومثال ، (پلوتوقراسی) نك یاواش یاواش آریستوقراسی شکله تحولاتی کوستریرکه اکثریا واقعه در . چونکه چوق یرده کبارلک حیثیت رسمییه سنی تشکیل ایدن رتبه و عنوان شرف پاره ایله - پک اعلا - صانون آله بیلور . حتی پک چوق مملکتلرده اعیان مجلسنه اعضا انتخاب اولونه بیلیمک ایچون خلیجه عقار و املاک صاحبی اولمق برنجی درجه ده ملتزم اولان شرطدر . بوشرط ، هر وجهله اصیل ، فقط فقیر بر آدمه اومجلسک قبوسی قاپادینی حالد ، نصل پاره قازاندینی مشکوک اولان بر آدمه دائماً آچیق بولوندورویور . بونک محظورلرینی تعریفه حاجت یوقدر . ثروتک اصالتله برطوتولماسی ، اصالت حقیقیه یی انکار دیمکدر . برجاعتک ، اصیلزادکان طرفندن اداره اولونماسنده خیر تصور ایدنلر وعلی اطلاق آریستو قراسی اداره سنه طرفدار اولوب اونی ترویج و تأسیسه چالیشانلر ، ملاحظه لرینی بر جمله اعتقاداته بنا ایدیورلرکه اواحکام اعتقادیه - طاقیله - بر فلسفه اجتماعیه تشکیل ایدر . اوفلسفه یی شورباق سوزله تلخیص ایتک ممکندر :

« انسانلری هر درلو ذلت ارتکابه مجبور ایدن احتیاجدر . پک چوق زمانلردن بری ایی کورمش ، ایی یاشامش ، ناز و نعم ایله رفاهت و سعادت ایچنده بویومش ، ذلت احتیاج چکمه مش ، برجوق کشیلره امر ایتکه آلیشمش بر آدمک البته عزت نفسی غالبدر . چونکه هیچ بروجهله رنجیده اولمامش و شرف انسانیتی دها قولای محافظه ایده بیلمشدر . بویله یاشامقده دوام ایتدکجه دخی بوفضائل جلیله تأید ایدرک ارثاً اولاده انتقال ایتش و بویله برعائله ممتاز افرادنده طبیعت ثانیه اولمشدر . بوکی کیمسه لرده (قید حیثیت) بالطبع اندیشه یه حاکمدر . برانسانده حس وقار و عزت نفس حس منفعته غالب کلنجه ، اوآدم تمایلات دنیه و اختراصات سفلیه یه هر زمان و هر حالده غلبه ایده بیلیر . رشوت آلاز ؛ حقسزلق ارتکاب ایتیز ؛ قورقو بیلمز ؛ یالان سویله مز ؛ هر درلو معامله سنده دائماً عائله سنک و کندی شخصنک شرف و ناموسنی کوزه دیر . خلاصه آریستو قرانلر ایچون ، اشغال ایتکده بولوندقلری

موقعك واوتهدنبری حائر اولدقلری حیثیتك كندیلرینه الهام ایتدیکی (حس وظیفه sentiment du devoir)، پك مبرم و بوتون معاملاته حاکم بر (عامل اخلاقى facteur moral) در. ایشته اصل (جنتلمن gentleman) بویه بر کیمسه یه دینیر. بویه بر آدم وظیفه سنی اقتضای اصلته یاپار. باشقه بر ملاحظه ایله متقید اولماز. (اصالت بونی اقتضای La noblesse oblige) قضیه سی اونلرجه دستور اعتقاد و عملدر. انسانلری اداره ایتك ایچونده بوکبی خصائل و قابلیاته مالک آدملر ایش باشنه کچمیلدر، چونکه امر اداره ده بو خصائل جمیله عقلدن مقدم و علمدن الزمدر.

آریستو قراسی طرفدارلرینك شوادعاسنه قارشى علیهدار اولانلر دخی تاریخ انسانیتی اشهاد ایدهرك زادكان صنفك شیمدی یه قدر دنیایی ناصل اداره ایتمش اولدیغی - شبه سز دلیللرله - کوستریورلر. (جانت وخیانتك درجه امکاتی آریستو قراسی تاریخنده کورمیلدر) دیورلر. یالکز زادكانلقد بر (ساخته وقار) بولویورلرکه - ادعالرنجه - باشقه بر تربیه ایله تألیفی ممتنع و باشقه بر صورتده تقلیدی ناقابلدر.

سپه نسره کلنجه، آریستو قراسی یه فضیلت اسنادی ادعاسنك نه منفور برریا کارلق ونه مضر برضالالت تشکیل ایتدیکنه دائر بر خیلی مناقشاته کیریشیور و تاریخی مثاللر ایراد ایدهرك زادكان صنفی شدیداً تنقید و مؤاخذه ایله یور.

مشهور شکسپیرك اثرلرندن ودها سائر بویوک محررلرک (فاجعه وهائله) لرندن پك چوغی سپه نسرك ادعاسنی تصدیق ایدر تابلولرله مالیدر. هر حالده جماعات انسانیه ده آریستو قراسی اداره سنه قارشى شدتلی برکین و غرض واردی و حالده اولانجه شدتیه موجوددر. (انکلتزه زادكانلخی The aristocracy of England) نام کتاب و امشالی بو حس غیظ و فترتله پك طرفدارانه یازلمش شیلردر. ایشك الك طوغروسى (سیدالقوم خادمهم) حدیث شریفك متضمن اولدیغی حکمدر. اصالت حقیقه وجدان اصلتیدر، بوده مطلقاً مشهور برعائله ایچنده طوغمقله تجلی ایتیه یور. بوبر (مزاج مسئله سی) در؛ اسم و رسم مسئله سی دکل! . . . حتی ایستاتستیکلر کوستریورکه انکلتزه ده

بیله الك خیرلی، الك بویوک واك علوی سجه یه مالک اولان مشاهیرك یوزده طقسائی برعائله تاریخیه منسوب اولمایان کیمسه لرنددر.

ینه تحقیقات تاریخیه کوستریورکه اکثریت ناس ایله، یعنی عوام طاقی ایله زادكان صنفی آراسنده امر اداره و طرز حکومت دولایسیله مجادله، محاربه اکسیك اولماشدر. الك قدیم حکومتلرده بورقابتی کوریورز. یونان قدیمك کوچوچك ده موقراسیلرنده ینه کوریورز. مثلاً (لزیوس Lesbos) یعنی بوکونکی مدلی آطه سنده بوندن ایکی بیك یدی یوز سنه اول شاعره مشهوره صافو زماننده عوام طاقی زادكان صنفه غلبه چالهرق اداره حکومتی اللرینه آلمش، (پی تاقوس Pittakos) نام دیکتاتور سرکاره کچمش واون سنه آطه یی پك کوزل اداره ایتشدر. او ائنده زادكان صنفه منسوب اولانلر صافو ایله برابر سچیا آطه سنه واوتیه بری یه قاقچشلردر. ینه همان اوتاریخلرده فیلسوف مشهور (فیناغور) ك ایتالیا ده بر آریستو قراسی اداره سی تشکیل ایتمه کچالشدیغی و عوام طاقنك بوجماعت کباری تارمار ایدهرك فیلسوفی ده او ائنده تلف ایله دیکنی تاریخلر روایت ایدیور.

اصل بزم منسوب اولدیغمز تورکلره کلنجه، اونلرک جماعتنده دخی بودغدغه حکومتك و بورقابت سیاسیه نك پك اسکیدن بری الك مهم بر مسئله اجتماعیه تشکیل ایتمش اولدیغنه شبهه قالمیور. بوکون محققدرکه حقیقی اجدادیمز اولان اورخون تورکلری سیریا ده (یه نیسه ی) نهری وادیسنده اولدجه مهم بر سلطنت تشکیل ایتمشلر و سائر اقوام تورانیه یی تحت اداره لرینه آلمشلردی. میلادك آلتنجی یدنجی عصرینه طوغرو تأسس ایدن بوتورک حکومتی چین ایله واقع اولان برچوق محاربه لرنده غلبه چالهرق نفوذ و حیثیتی طانتدیرمش و آنجق ایکی عصر دوام ایدمیلن بو پارلاق سلطنت ائناسنده او حوالیده مهم بعض آبدلرده رکز ایتشدی. قهرمان (کل تکیان) نامنه دیکلمش اولان بو طاشلرک یازیلری اوقونمشدر. اوراده کی دیکیلی طاشلردن برینك شرقه متوجه اولان کتاسنده شو مهم جمله لر یازیلی در:

[بکلی بودونلوق یونغشوردیغن ایچون، تورک بودون ایله دوک ایلن ایچکینو ایتش؛ قاغانلادوق قاغانن ییترو ایتش! . . .]

یعنی [بك طرفدارلری (آریستوقراتلر !) بودند طرفدارلری (ملت طرفدارلری ده موقراتلر !) ایله مجادله ایتدکلی ایچون، تورک ملتی ایله دیکی (ایل حاله کتیردیکی، بریویوک مملکت درجه سنه اصعاد ایتدیکی) خطه وسیعینی انحلال وانقسامه اوغراتمش؛ سلطنت مرتبه سنه اعلا ایتدیکی حکومتی غائب ایتمش] دیمکدرکه بك شایان دقت اولان بوسوزلر ادعای تمامیه تصدیق ایدر، بویکی فرقه سیاسییه نك ده نه قدر اسکی وعمومی اولدوغنی کوستیر.

بوکون بیله آریستوقراسی ویا ده موقراسی اداره سنه عائد اسکی دعوا کودولمکده وهرایکی طرف ایچون دخی اسباب رجحان بیان ایدلمکده در. بوندن بر ایکی سنه اول انگلتره پارلامنتوسنده بیله وسیله انکشاف بولمش و آریستوقراسی اداره سنی مدافعه ایدن (لورد کورزون Lord Curzon) زادکانلق حیثیتی فضائل موروثه ایله اثباته چالشمشیدی. وراثت بحقی بومسئله یی حل ایده مز، چونکه خصائل جمیله ده ارثاً انتقال ایدر، خصائل رذیله ده ...!

بوتون بومطالعادن آکلاشیلیورکه بومسئله اجتماعییه نك کندنجیه برامیتی واردر. هله شکل حکومته تعلق دوشونولورسه اوامیتک بویوککی تحقق ایدر. بناء علیه له وعلیهده سویله نیلن سوزلری سمع اعتباره آلمایه رق یالکز علوم اجتماعییه نك شهادتنه اعتماد ایتکدها طوغرودر. واقعا زادکان صنفک فضائلیه ده واردر، قصورلری ده ...! حتی بوصنفه عارض اولان امراض مغنویه ده واردر. (تردی dégenérescence) بوامراضک اک مهمنی تشکیل ایدر. فقط بویکی قصورلر یالکز آریستوقراسی صنفه مخصوص دکلدر.

علمک شهادت وروایتیه اینانیلیرسه هر اداره نك آری آری ادوار اجتماعییه وایجابات تاریخییه مطابقتی شرطدر. اوکا کورمه ده هر صنفدن آدملر ایش باشه کچه بیلیر. مسئله (adaptation) مسئله سیدر. قرون وسطاوندیک جمهوریتلرنده موفقیت اداره ایچون فصل آدملر ونه کی اوصاف لازم اولمش بولوندوغنی ایضاح ایدن (لورد ماقوله Lord Macauley)

بو حکمتی بك ایی اکلالمش واکلاتمشدر. قابلیت، آثاریه اولچولور. انحلال اجتماعی اسبابی تتبع ایتمش اولانلر بوخصوصده متفق الرایدلر.

ایشته هر دم متحول اولان وقوعات عالم ایچنده، تاریخنک بزه عرض ایتدیکی حقیقت ثابت بوندن عبارتدر. بونده ده خواصدن یاخود عوامدن اوله نك قطعاً دخلی یوقدر. هر زمان، بر دور اجتماعی نك شروط خصوصیه سنه کوره البق اولانلر اداره باشه کچر. اجتماعاتده بوبر مهم قانوندر.

اقوام تورانییه ده اداره تمامیه آریستوقرات ایدی. حتی عوام، انساندن معدود دکل ایدی. (قوداتقوبیلیک) نام کتاب مشهورده عوام خلق حقنده (ییلقی) تعیری قوللانلشدرکه، اویغورجه بوگله نك معناسی (خرکله یعنی حیوان سوروسی) دیمکدر.

افاضل عثمانیه دن کاتب چلبی وقینالی زاده کی بویوک مؤلفلرک آثارنده دخی بوطور وادا بك باردردر. (العوام کالهوام) تعیریغی بالالتزام ایراد ایدن کاتب چلبی احادناسه هیچ برحق وصلاحیت ویرمیور و (ظهر عوامدن عصایی اکسیک ایتهمک کرکدر) دییورکه ذاتاً قرون وسطی تربیه سنک دستورالعملی بوایدی.

عثمانلی دولتنده زادکانلق تاریخی مضبوط دکلدر. شوقدر وارکه دولتک حین تشککنده سلجوق حکومتک کلیاً اضمحلالی اوزرینه برسوری امارتلر بایر مش واستقلال کسب ایتشلردی. فتوحات ایله اطرافی استیلا ایدوب بویویه ن عثمانلی دولتی بودره بکلریله طول مدت اوغراشدی؛ نهایت نام ونشانلرینی اورطه دن قالدیردی ایدی. مع مافیه فاتحلره مکافات اوله رق تیمار وزعامت اصوله رعایتده دوام ایده کلدیکی ایچون دره بکلکک منشاتی کورله ته مدی؛ جودت تاریخنک، روایتیه کوره جتتمکان سلطان محمود ثانی، علمدار مصطفی پاشا معیتک زیب وزینته حیرت ایتمش وبوحشمت کندیسینی دوشوندرمشدر. اکلاشیلیورکه دونه قدر ازباب تیمارک اشپلری مملکتده متغلبه وجباریه صنفی تشکیل ایدیورلر مش لکن تربیه دن وکیاست اداره دن محروم بولوندقلری ایچون منقرض اولشلردر.

اوروپاده ، هله انكترده بويله دكلدر . غایت مضبوط وصیقى قوانین و تشریفات سایه سنده (آریستو قراسی) صنقى زار زور محافظه موجودیت ایتمکده در . خصوصا برده (majorat) قاعده سی واردرکه بونك حکمنجه ، آنحق بویوك اوغول ، بدرك عنوان شرف و حیثیتنه و املاک و اراضی سنه وارث اوله بیلیر . (droit d'aînesse) دیدکلى حق بوكا مبنی در . لکن انكترده اصل آریستو قراسی نك قوتی ، صحت و تربیه سنك مکملیتی در . (aristocratie) تعبیری توسیع معنی ایلده قوللانیلیر . (aris. intellectuelle) برمکلتك (کبار اذکیاسی) و (منورالفکر) اولان قسمی دیمکدر .

(La haute aristocratie) ، قرون وسطانك اسکی دره بکلرندن واک مشهور عالهلرندن نشأت ایدوب زمانمه قدر اصلتلیرى محافظه ایتمش و مملکتلرنده مهم موقعلرده بولونوب بویوك خدمتله موفق اولمش اولان کبار عالهلر جماعته ده نیلیر .

(Aristocratie de la lance) تعبیری دخی واردرکه اکاسکی کبار عالهلرینه وصف اولور . هنوز طوب تفنك ایجاد اولونمادن اول (یعنی میزراق قوللاندیغی زماندنبری) کبار طوغانلر دیمکدر . بوتعریفده (محدث) (créé) زادگانلقلر و زادگانلر داخل دكلدر .

تورکجه مزده احاد ناسك (سوت به سوت کشی زاده) تعبیری بوکاتقابل ایدر . آریستو قراسی بخی سوسیولوژیده پك مهمدر .

Arrêt وقفه

حرکتده بولونان برشیتك ، بردنبره طور و ویرمه سنه (وقفه) (arrêt) دیرلر . بوکله چوق یرده قوللانیلیر . مثلا : طبابت لساننده (arrêt du cœur) قلبك هر هانكى برسبيله طور و ویرمه سنه دیرلر . فرضا : (un coup très rude sur l'abdomen peut occasionner un arrêt de cœur subitement) جمله سنی ترجمه ایدرکن : (بطن اوزرینه وورولان شدتلی برضربه ، آنی اوله رق وقفه قلبه سببیت ویره بیلیر) دیرز . كذلك (le marché accuse un arrêt de transaction) جمله سنی : [پیاسه ده معاملات اعتباریله بروقفه (یعنی طور غونلق) کورولویور] دیه ترجمه ایدرز .

Arrêt

بالخاصه فلسفه ده (وقفه نمو) (arrêt de developpment) تعبیری مشهوردر ، و (تکامل نظریه سی) (théorie de l'évolution) نك ایجاد و نشر ایتمش اولدوغی بر ترکیب مهمدر . (بسیط و متجانس simple et homogène) بر حالدن دها (معضل complexe) (و غیر متجانس hétérogène) بر صفحه کاله ارتقا ایتك صورتیله واقع اولان حرکت مترقیده بر عضو مخصوص ، یا خود بر جسم عضوی - هر هانكى بر سبيله - بردنبره طور و طور دوغی شکل اوزره قاهره دها مکمل بر صورت باغلايه مازسه ، بوطور غونلغه (وقفه نمو) دیرلر . (غریبه خلقت anomalie) تعبیرنده ایضاح اولوندوغی اوزره هان اکثر عضوی قصورلرک بر (وقفه نمو) نتیجه سی اولدوغی تحقق ایتشددر . عالم مشهور (پروفیسور ره قکل Prof. Haeckel) بالخاصه بوعضوی قصورلری تدقیق ایدرک بر مهم کتاب یازمشدر .

تاریخ فلسفه ده (حسابانیون les sceptiques) فرقه سی فرط شبهه و ترددن طولانی هیچ بر مسئله ده بیان فکر ایده من و اوسواللر حضورنده توقف ایدردی . بوطورلری (époque) تعبیر اصطلاحیسی ايله مشهور اولوب قالمشدرکه یونانی ده (نه پوهی) لفظندن آلتشدر و لغت معناسیله (وقفه) دیمکدر . [فضله تفصیلات ایچون inhibition و époque کله لرینه باقیکر !]

Art

صنعت Art فرانسزجه وانکلزجه

Kunst آلمانجه
Arte ایتالیانجه

یونان قدیمده (آرته) (ἀρτε) لفظی واردرکه (قدرت و هنر) معناسنه کلیر . برده (آرو = ἄρω) کله سی واردرکه (برلشدریمک ، تألیف ایتك) دیمکدر . اوروپا لغویوننك ادعاسنه کوره لاتینلر (ars) تعبیری هر حالده بو اصللرک برندن آلتشدر و فرانسزجه ايله انکلزجه نك (art) ، ایتالیانجه نك (arte) لفظلری اوندن مشتق اولمشدر . یونانی ده برده (ته خنی = τέχνη) کله سی واردرکه اصل - بوکونکی

معنای اصطلاحی ایله - (art) مقابلی اولمق اوزره قوللانیله گئشدر .
بوده (مهارت و هنر) دیمکدر . ارسطو بونی بالخاصه (نه پستی می = ἐπιστήμη
یعنی علم = science) مقابله سنده ذکر ایدردی .

المانجه (Kunst = قونشت) دخی (قدرت) معناسنه کلیر .

بزده بوتعبیراتک جمله سی عربجه نك (صنع) ثلاثی سندن مشتقدر ؛ و بو
کله لرك هپسی ده - آز چوق معنا فرقلریله - اصطلاح اوله رق اوتهدنبری
استعمال اولونه کلمکده در . (صنع) لغتده (اجادة الفعل) دیه تعریف اولونویورکه
(برایشی حسن صورته یعنی هنرله یا بمق) دیمکدر . مع مافیه شرق مؤلفلری
وبالخاصه عثمانلی محررین سالفه سی (صنع) کله سنی اثر خلقنه تخصیصاً ذکر
ایدرلر . (صنع الهی) ، (صنع قدرت) ، (صنع کردگار) ترکیلرینه ادبیات
عثمانیه ده پک چوق تصادف اولونور . لکن (صنعت آلهیه) یا خود (صناعت
آلهیه) ده ین اولماشدر . صنعت و صناعت لفظلری همان دائماً آثار انسانیه
حقنده استعمال اولونه کلمشدر . تحقیقات لغویه و تاریخیه اثبات ایدیورکه
اسلاف ، (art) مقابلی اولمق اوزره (صناعت) لفظی قوللانیله ؛ (صنعت)
کله سنی انجیق (اسم فعل) اوله رق ، یعنی (صانعک ایش کورمه سی) معناسنده
استعمال ایتمشدر . شو تقدیرجه (کوزل بر ایش) ، (بر اثر هنر) معناسنی
(صنعت) دکل (صناعت) کله سی متضمن اولمش اولویور . نته کیم عوام
ناس دخی مصنوعات بشریه یی تقدیرده عینی تعبیری قوللانیله . مثلاً عینی
ماده دن معمول ایکی شیئک فیثائی آره سنده کی سبب تفاوت سوال اولونونجه :
(اقدام ! . بوباشقه ! . بونده چوق زه ناعت وار ! . . .) دیر . بدیهی درکه
بوراده کی (زه ناعت) ، (صناعت) لفظدن محرف بر غلط مشهوردر .

حالبوکه بوکون همان بالجمله محررین (صنعت) ی (art) مقابلی اوله رق
قوللانیورلر و تقریباً اوتوز سنهدنبری بوکله یی - تصرف اسلافه مخالف
اوله رق - بو حیثیت معنا ایلله او قدر استعمال ایتمشلردرکه ، ارتق بوده
معناً بر غلط مشهور اولوب قالمشدر . فرانسزجه نك (beaux-arts) ترکیبی
(صنایع نفیسه) دیه ترجمه ایدیله لرك لسانمزه انتقال ایتش بولوندوغی ایچون

(صنایع) کله سی (صنعت) ک جمعی ظن اولونمشدر . صناعتك جمعی اولدوغنی
ادعا ایدن ارباب صلاحیت واردر . دیمک اولویورکه عن جهل بزده (صناعت)
یرینه (صنعت) کله سی (art) مقابلی اولمق اوزره تلقی اولونوب تقرر
ایتمشدر . نته کیم (صناعت) (industrie) ؛ (صنیعه) ، (artifice) ؛
(حرفت) دخی (métier) قارشیلنی اوله رق بوکونکی لسانمزه رواج
بولمشدر . بوندن طولانی درکه بوراده تشویش اذهان ایتهمک ایچون (صنعت)
(art) معناسنده قوللانیلمشدر . یوقسه سکر یوز سنهدنبری در محررین اسلامیه
(صناعت) و (صناعات) کله لرینی بومعنایه تخصیصاً استعمال ایده کلمشدر .
(arts libéraux) تعبیرینه باقیکر !

فرانسزجه نك (arts industriels) ترکیبی (صنع) ثلاثی سندن مشتق
برکله ایلله عیناً ترجمه ایده میورز . (صنایع صناعیه) دیه مه یز ، حشومشوش
اولور . (feu d'artifice) تعبیرینک ترجمه سنده دخی (صنیعه) کله سی
بردرویا قیشق المیور . غزه جیلر مز بونی (صنایع ناریه) دیه ادا ایدیور مشلردی .
(حرف و صنایع) ده (arts industriels) ترجمه سی اولمق اوزره کچور .

علی الاطلاق صنعتک تعریفده فیلسوفلر - اوتهدنبری - پک چوق شیلر
سویه مشلردر . بوتعریفلرده متفق علیه اولان نقاط اساسیه یی تألیف و عرض
ایتمک لازمدر . اولاً ، صنعتک بر (هنر انسانی) اولدوغنده هر فیلسوف
متحد الفکردر . شو تقدیرجه بر اثر صنعتده همه حال بر فکر و نیت ، بناء علیه
برده (غایه مترقبه but visé) یعنی کوزه دیلش بر مقصد بولونمق ضروریدر .
دیمک که بر (از صنعت œuvre d'art) طبیعتده کندی کندینه موجود
اوله مایان (مصنوع و مرتب) برشی در ؛ فضله اوله رق ، بر مقصد و نیتله ترتیب
اولونمشدرکه بوده صانی اولان ذاتک صاحب عقل اولدوغنه دلالت ایدر .
برعادی دیکیش ماقاره سندن طوتوکرده اک کزیده هیکلره ، اک ظریف
تابلولره ، اک عالی مبانیه ، اک علوی و نزیه بسته لره و ارنجیه قدر بوتون
مصنوعات بشری ، بوتعریف عمومی نك دائرة شمولنده داخل نامعدود مثاللر
تشکیل ایدر . فقط ینه اونک ایچوندرکه ظریف و نظر قریب چیچکلر

وگوزل رنکارنك و پرنقش قوش تويلرى و ياخود بللورات و حتى فسونكار برلوحه سراب ، آثار صنعتدن معدود اوله ماز ، زيرا بونلرده (هنر بشر) ك دخلى يوقدر .

صنعتى بويله عمومى و غير معين بر معنا ايله تلقى ايدرسه ك (طبيعت (La Nature) . مقابل دوشر . چونكه بومبجده هيچ كيمسه طبيعته بويله بر عقل و نيت ، بويله بر غايه معرفت اسناد ايدمه مشدر . اونك ايچوندر كه (صنعى (artificiel) تعبيرى ، (طبيعى (Naturel) لفظنك ضدى اوله رق قوللا نيلير . حتى بوضدى تناقض درجه سنده بيله تلقى ايد بيليرز ؛ زيرا برشى ياطبيعى يا خود صنعى اوله بيلير . او حالده طبيعى اولان برشى صنعى اوله ماز ؛ هر نه قدر ماده اصليه سى خزانه طبيعتدن آلمش ايسده ... !

لكن اونو تاممالى كه بوفكر ، اساساً طوغر و اولقله برابر قطعياً اضافى در ؛ چونكه صنعتكار اولان انسان دخى طبيعت كليده داخل بر جزؤ در ؛ طبيعت خارجنده برشى دكلدر . بناء عليه (صنعى لك) و (طبيعى لك) فرقه بر قيمت مطلقه و يرمك ياكلش اولور . نته كيم قديمى متفكرين ا كثر يا بو خطايه دوشمكدن صاقينه مامشلا و بوسيله (صنعت) ايله (تصنع) عيى شيدر ظن اولونمشدر . [بوجحك تفصيلى ايچون esthétique سوزينه بايكرز !]

مع مافيه بوملاحظات ، منصحراً (بديعيات (esthétique) بحثده معتبردر . فلسفه عموميه يه كلنجه ، طبيعتده بر (نظام و آهنگ (ordre et harmonie) و بناء عليه (خلقتده بر علت غاييه (cause finale dans la création) كوره بيلن فيلسوفلر نادر دكلدر . فلاسفه (آلهيون و روحيون - les théologiens et les spiritualistes) كائتاده بويله بر انتظام كوردكلى ايچون اونده بر (غايه) تصور ايد يورلر و بو غايه طولاييسى ايله در كه (عاقل ، كامل و مختار (intelligent, parfait et libre) بر (فاعل مدبر) ك وجودينه استدلال ايچون بول بوله بيلورلر . بو (منظومه كائنات (cosmos) ي (كور بر تصادف (un hasard aveugle) ك نتيجه سى دكل ، بر (صانع حكيم) ك اثر كالى اولق اوزره تلقى ايد يورلر . اثبات الوهيت ايچون شمدى يه

قدر ترتيب اولونه بيلن براهين مشهوره نك بلكه اك مهمى بودر . 1 preuve كله سنه بايكرز !]

بو نقطه نظردن باقيلنجه (طبيعت) ايله بر هيكل و ياخود بر تابلو آره سنده حيثيات فرق قالميور . طبيعت دخى بر اثر صنعت عد ايدلمش اولويور ؛ شو قدر كه اونك صانعى انسان دكلدر .

بويله دوشونن فيلسوفلر ايچون بيله يوقاريده عرض اولونان تعريف عمومى طوغرودر . اونى تعديله حاجت يوقدر . زيرا طبيعت دخى (مصنوعات) مضموننده داخل اولونجه اونده ده بر صانع عاقل ايله بر نيت و بر غايه آرامق مجبور يتدن قورتوله مايز .

يالكرز شونى اونو تاممالى در كه (صنعت) ده نجه ارتق بو كون بهمه حال انسان ايله مصنوع اولان شيلرى مراد ايدرز . اوتقديرده طبيعت ، بهمه حال خارج قالىر و بالالتزام خارج طوتولور .

(art) كله سى بومعنا ايله منفهم اولونجه (مصنوعات بشريه) نك كافه سنى دخى شامل بر تعبير عمومى اولور ، و او حالده (صنعت) ايله (صناعت) ي ده احاطه ايدر . فى الحقيقه قرنك لساننده بو كله نك معناسى بوقدر كنش در . اوسيله در كه او كابعضى صفتلر تدريف ايدرك معناسى تخصيص و تعيين ايدرلر . (arts industriels) و (beaux arts) ديه آييرلر . بوده ضروريدر ؛ چونكه غايه لرينه نظراً (صنعت) باشقه ، (صناعت) بوسوتون باشقه در . (بديعيات (esthétique) انجق بر نخيصى ايله مشغول اولور ؛ صناعتله قطعاً علاقه دار دكلدر .

بو مهم نقطه يى تصريح ايچون عادى بر مثال ويره يم ؛ مثلاً :

مصنوعات بشريه دن بر عادى (حصير اسكمله) تصور ايد يكرز . بونده البت بر مقصد واردر . اودون پارچه لر يى ، سازلرى چيوبلرى بويله بر آرايه كتيرو بده (اسكمله) ياپان بر آدم ، بسببلى در كه اوزرينه اوطور ولسون و راحت اوطور ولسون ديه اونى اعمال ايتمشدر . شيمدى فرض ايد يكرز كه عيى اسكمله نك حصير قسمى رنكارنك سازلردن ثورولمش اولسون ؛ و قسم

حشبی سنده بعضی نقشار بولونسون ؛ یعنی اواسکمله (سوسلی) اولسون!..
 بوتزیناتک تأمین راحت ایچون فضلہ بر فائده سی اوله ماز . دگلی یا ؟ ینه اونی
 اوشکل اوزره انشا ایتمکدن اصل مقصد ، تأمین استراحتدر . بوکی مقاصدک
 دستور عمومی سنه (فائده utilité) دیرلر . بر ایشده یالکز بویله بر (مقصد
 فائده) کوزله یوبده اثر وجوده کتیرنلر انجق (صنعتکار artisan) درلر .
 ایشاریده (صنعت industrie) در؛ ایشته بو درلو ایشلرک بدیعیا تله هیچ
 مناسبتی یوقدر . لکن بر آذربویا سوردیمی ؟ . . . یعنی او اسکمله یی سوسله مک
 باشلادیمی ؟ . . . آرتیستلک ده باشلار . چونکه تریناتده کوزه دیلن مقصد ،
 مادی و عملی بر فائده تأمین ایتمک دکل ، ذوق و بر مکدر . مثلاً (اون بشنچی
 لوئی Louis XV) ، (دور انتباه Renaissance) و یا خود اسکی یونان
 طرزنده یاپلش بر صندالیه ده ایش او یله در . اکلاشیلرک بویله بر صندالیه
 یاپان آدم ، یالکز اوطور مق ایچون تأمین استراحت مقصدینه حصر همت
 و صرف معرفت ایتمه مشدر . (کوزل برشی یامق) ده ایسته مشدر . فی الحقیقه
 او ایشده بر ظرافت و نزاهت ، بر کوزلک کورورسکزکه بالخاصه بر اسلوب
 مخصوص اوزره تعین ایدر . واقعا بر عادی قهوه خانه اسکمله سنده کی
 پک قابا صابا ترینات ایله (ماری آنتوانه Marie Antoinette) ک
 (تریانون Trianon) کوشکنده کی صالونده کورولن صندالیه نک زینت
 واسلوبجه بیوک برفرقی واردر؛ فقط ماهیتجه هیچ فرقی یوقدر . ایکسی ده
 زینتدر . زینت نه درکده و یا نه درجه ده اولورسه اولسون ، اونده مقصد
 فائده دکل ذوقدر . نته کیم (زولو Zoulou) قبیله وحشیه سنک چاموردن
 یابوب کونشده قوروتدینی چیرکین و غلیظ هیکلرایله بر (ژوپتر Jupiter
 Olympien) ، بر (آپولون Apollon de Belvédère) هیکلی ماهیتاً عینی
 جنسندن شیلدر . یونان قدیم صنعتکارلرینک بو حیرت بخش اثرلری - شبه سز -
 خارق العاده بردهای شخصینک قدرت الهامی کوستریر و (ادا و تصور
 conception et expression) ده بو درجه کمال ، البته عالی و مکمل
 بر مدینتک جلوه معرفتی در . بو بویله اولقله برابر ، صنعتله صنعت بحثنده
 هر هانکی بر اثرک یالکز غایه سنه باقیله رق حکم ایدیلیر . اوده حیاته تأمین فائده

و یا خود بخش ذوق ایده بیله چکنه نظراً مصنوعات بشریه بر قیمت و بر مکدن
 عبارتدر . او مصنوعات ، نه قدر ابتدائی و بیچیمسز اولورسه اولسون ماهیته
 تأثیری یوقدر . بو خصوصده نظراً اعتباره آلان (درجه فرقی) ، (مدینت
 درجه سی) ندن عبارتدر . بناء علیه حقیقی معناسیله صنعتک فائده کی بر مقصدله
 هیچ مناسبتی یوقدر ، انجق (ذوق) ایله علاقہ سی واردر . حتی بر اثر ،
 برایش فائده و منفعت کی مقاصد انانیتکارانه دن نه قدر آریلیر و اوزاقلایرسه ،
 اونک ماهیت و قیمت صنعتکارانه سی ده اوقدر آرتار . اوسبیله درک بر تابلو ،
 بر بسته ، بر هیکل ، اک ظریف بر صندالیه دن ده ازیاده بر (اثر صنعت) در .
 چونکه بر صندالیه نه قدر صنعتکارانه یاپیلش اولورسه اولسون ، ینه اوزرینه
 اوطور اولسون دیه اعمال ایدلمشدر . حالبوکه بر تابلو یالکز اناسانه بر (هیجان
 بدیی émotion esthétique) ویره بیلیر . بو ذوق ، حظوظات نفسانیه نک
 اک علویسی واک تزییی در .

ایشته صنایع نفیسه نک فلسفه سی صاییلان (بدیعیات l'esthétique)
 انجق بو درلو اثرلره مشغول اولور . اونلره بر معیار قیمت تعیین ایتمک ایستر؛
 ذوق و هیجان بدیی نک منشأ و ماهیتی ، جلوملرینی تحقیق ایدر ؛ آرتیستک
 مزاجنک و قابلیاتنک (تحلیل روحیسی analyse psychologique) ایله
 اوغراشیر ، و بو استعداد مستثنایک (عوامل محیطه facteurs ambiants)
 و معنویه سی ، مدینت و تربیه ایله مناسباتی کشف و تعیین ایتمک اوغورنده
 تدقیقاتده بولور . آری بجه ده ماهیت حسنک نه اولدیفنی او کرمکه چالیشیر .
 شو مختصر ملاحظا تله اکلاشیله بیلیرک (صنایع مفیده arts utiles) ایله
 (صنایع نفیسه beaux arts) آره سنده کی فرق اساسی در و بو تقسیم ،
 ملاحظه صنعتده منظور اولان غایه مخصوصیه کوره ضروریدر .

صنایع مفیده نک فلسفه صنعته تعلق اولمادیغنی ایچون بوراده انجق صنایع
 نفیسه حقیقه معلومات اساسیه و یریه جکد . [ماهیت حسن ، هیجان بدیی ،
 الهام ، استعداد هنر ورانه ، اسلوب ادا مسئله لر یله منشأ صنعته ، مذاهب
 و مسالک مشهوریه عائد معلومات و باشلیجه نظریاتک مناقشه سی کاملاً

(esthétique) کله سنه ترك ایدلش ، اوراده لزومی قدر بسط و تنقید اولونمشد . بو بحثی اوقور اوقوماز همان اورایه باقوب توحید ملاحظات ایدیکز !

ماهیت صنعتی لایق له کلاویه بیلیمک ایچون تاریخنه نظر ایتمک الزمدر . صنعت ، پک اسکی در . یالکز تاریخ مدنی دکل ، حتی انسانیتک (ادوار قبل تاریخنه périodes préhistoriques) سنی بیله نه قدر تعقیب ایدرسهک ایده لم ، ماضیلره طوغرو نه قدر اوزاق کیدرسهک کیده لم ، انسانیت قدیمه نک متروکات باقیه سی آره سنده قابا صابا بعضی آثار صنعت و صناعته تصادف ایده بیلیورز . بو آثار ابتداییه دن مرکب اولمق اوزره بوکون پک مهم قولکسیونلرده واردرکه یوزلرجه متخصص طرفندن کمال دقت وجدیتله تتبع اولونمقده بولونویور .

بوخصوصده تدقیقات عمیقہ اجرا ایدلش وبوندن پک مهم نتیجه لر ترتب ایتمشد . (صنعتک منشأی و تکمیلی و l'origine et le develop pement de l'art) حقنده اک معتبر نظریات بوکی تحقیقاتدن استنباط اولونان معلومانه استناد ایدیور . بزه بومعلوماتی ویرن بر طاقم (علوم طبیعیہ sciences naturelles) درکه اونلرک طوغرو دن طوغرویه صنایع نفیسه ایله هیچ بر مناسبت و علاقہ سی یوقدر : (قبل تاریخ la préhistorique) کبی ، (تطبیقی علم اقوام l'ethnographie comparée) کبی ، (علم انسان l'anthropologie) کبی ! ...

نته کیم بومسئله صنعتی تنویره خادم اولان مستحاثات و مواد سائرہ دخی ، اکثریتله تصادفی اوله رق بولونمش شیلردر ؛ و پک چوغی اون طوقوزنجی عصر میلادیده واقع اولمشد . بر طرفدن معدن اوجاقلرینک فعالیت خارق العاده سی ، دیگر طرفدن شمند و فرك - بریمتلی واسطه ثقلیه اوله رق - کشف اولونماسی ، بویوک مقیاسده عملیات ترابیه میدان ویرمش و طاغیر اویولوب یوللر آچیلرکن برچوق آثار قبل تاریخنه بولونه بیلیمشد . (علم مستحاثات la paléontologie) و (طبقات الارض la géologie) دخی عینی زمانده بوکشفیاتدن مستفید اوله رق سرعته ترقی ایله مشدر .

بوتون بوعلوم متفقاً اثبات ایدیورکه انسانیتده آثار صنعت پک اسکی زمانلردنبری وارمش . بناء علیه استعداد صنعت دخی اودرجه قدیم و فطری اولمق لازمکیر . معلومات ایله ، تربیه ایله اولسه یدی بوقدر قدیم اوله مازدی .

ازمنه قبل تاریخنه یی ندقیق ایدن علما ادعا و اثبات ایدیورکه اودهر قدیمه (انسان ابتدائی l'homme primitif) ، عاداتا حیوان درکه سنده یاشیورمش : (بز طوقومق tissage) ، (ایسک نه کیرمک filage) ، (چوملکچیلک la poterie) ، (حرث اراضی culture de la terre) یعنی ایی کوتی زراعت ایتمک بیلیمورمش . (حیوانات اهلیه animaux domestiques) یی طانییمورمش . ابتدای تمدن علاماتی دیمک اولان بودرجه تکامل پک چوق عصرلر صوکره ممکن اوله بیلیمش و اغلب احتمالاته کوره (چوبانلق دوری) ایله باشلامش اولسه کرکدر .

اواسکی دورلرده اک بویوک مشغله آولایوب آولانماق ، اکمبرم ودائی اندیشه بریرتیجی دشمنک لقمه تجاویزی اولمایه رق کوننی کون ایتمک - ممکنسه - قارتی طویورمق ایشکه بوده پک طبیعی در . فقط هنوز معدنیاتک هیچ برینی بیلیمه دیکی ایچون وحشی انسان ، سرت (چاقاق طاشی silex) یی استعمال ایدرک آلات و ادوات معدوده سنی هپ اوندن اعمال ایتمشدی . آثار صنعت و صناعت - بالطبع - اک اوله اسلحه و بعضی آلات یایمق ایله باشلايه بیلیمشد .

اونک ایچون بوابتدائی زمانلره اصطلاح علمده (دور حجری قدیم Période paléolithique) دیرلر . بودورک یکانه نوع آتاری یونتولامش چاقاق طاشندن معمول برطاقم میزراق اوجی (pointe de lance) ، (اوق flèche) ، (بالطه hache) ، (قاشیق cuillère) ، (چکیچ marteau) ؛ (لوبوط massue) کبی اسلحه ابتداییه در و پک قابا صابا یایلمش شیلردر . اوندن طولانی درکه اوزمانلره (یونتولامش طاش دوری âge de la pierre brute) دخی ده نیلیر ؛ زیرا بونی متعاقب کن دورده عینی اسلحه والاکت مجلا طاشدن یایلمش اولدیفی کورولویور . حتی بومتروکات قدیمه میاننده

خیلی ظریف اولانلری ده وارد. ایشته (دورجری جدید (l'âge néolithique) ویاخود (یونتولش طاش دوری (l'âge de la pierre polie) دیدکری زمان ماضی دخی بود. [paléontologie کلمه سنده تفصیلاته باقیکنز !] منحصرأ محافظه نفس و تأمین معیشت ایچون اعمال ایدلش اولان بوادوات واسلحه ابتدایه ، قابا شیلر اولقله برابر مزین در . هله (کدیک بوینوزی (bois de Renne) ، (فیل دیشی (ivoire) ، (کمیک) استعمال اولونه بیلکه باشلاقدن سوکره بعضی سلاح قبضه لری اوزرنده . شایان حیرت بر موفقیته یاپیلش - رسملر کورولوبورکه سیوری برچاقاق طاشیله حک ایدلشدر .

محققدرکه بواسکی دورجریده (انسان ابتدائی) هنوز سفالت وحشتک ادنا درکه سنده بولونوبور و (طبیعی مغاره لر (grottes naturelles) ده حیوان کی چیرچیلاق یاشیوردی . ایکی دالی بر آرایه کتیروبده بر (بکچی قولوبه سی) چاتمهی عقل ایدمیوردی . او وقت (هیئت اجتماعی (état social) دکل (هیئت عائله (état de famille) یوقدی . احتمالکه انسانلر سوزسویله میورلر وانجق بعضی اصوات معینه ایله یکدیگرلرینه تبلیغ هیجان ایدمیورلردی . اوزمان بوانسانلرله معاصر اوله رق (ماموت) ، (اوج بوینوزلی کرکدان) ، (بویوک مغاره کدیس) ، (مغاره آتی سی) ، (یابان آتی) ، (صیرتلان) ، (فوق یعنی دکرز فیل) ، (دکرز آغیری) ودها برسوری مدهش حیوانات قدیمه واردی . بونلرک پک چوغی غایت اوزون توبلی جاناوارلر ایدی . دنیانک اکثر طرفلرنده ، حتی فرانسه نک جنوبنده وبحر سفیدک منطقه شمالیه سنده سورولرله یاشیورلر وبعضیلری دخی بالخاصه مغاره لرده انسانلری آولامقله کچنیورلردی . دیمک که اوروپا اوتارینده شدتله بارد بر منطقه داخنده ایدی .

فقط غریبدرکه اوابتدائی انسانلرده شایان حیرت بر استعداد صنعت وارمش . اواسکی دورک متروکات معموله و مصنوعه سی بونی پارلاق بر صورتده اثبات ایدیور . بو آثار قدیمه بالخاصه انکلتزه ، فرانسه ، بلجیقا و اوسویچرده بعضی مغاره لرده بولونه بیلور . احتمالکه اوروپانک سائر لرلری هنوز بویوک

ومهلک باطافقلر حالنده اولدوغی ایچون انجق غرب طرفلری بر درجهیه قدر انسانلرله مسکون بولونه بیلورمش !

اوزمانلر هنوز (جبل طارق (Gibraltar) بوغازی پیدا اولماش بولوندوغی ایچون اسپانیا فاس ایله متصل ایمش . نته کیم (قناریه (Canaries) اطهریده آفریقا قطعه سندن ایرلماش ایمش . امریقای شمالی نک اوروپایه بیتیشیک بولونمش اولدوغنده شبهه قالمیور .

بواسکی وضعیت جغرافیائی نک (صنایع قبل التاریخیه (arts préhistoriques) بحثنده نه درین معنای متضمن اولدوغی تفصیلات آتی نه پایتده آکلاشیله جقدر .

بوکی مستحاثات قدیمهی کشف وتبع ایدن علما ، وعلی الخصوص معاصریندن (نهدوار دولارته (Edouard de Lartet) و (قریستی (Christy) نامنده ایکی فرانسه ، کندی مملکتلرنده کشف اولونان بویله برچوق قیمتدار متروکاتی جمع ایدرک (Reliquiae Aquitanicae) آکتانیا اراضی سنک متروکات قدیمه سی) عنوانیه بر مجموعه مفیده نشر ایتشلردی .

بحشمزی تنویر ایچون ذکر ی لاید اولان مثاللرک پک چوغی بو اثردن نقل اولونمشدر . بنده بونلردن بر ایکیسنی ذکر ایدرک مثال ودلیل اتخاذ ایدیورم :

(لارته) و (قریستی) نک (مادلن مغاره سنده - Grotte de la Madeleine) بولقلری آثار عتیقه دن بری ، (مستحاثه حالنده - à l'état fossile) بر فیل دیشی صفیحه اوزرینه (چیزکی ایله رسم ایدلش = dessiné au trait) بر (ماموت فیل) تصویر ایدر . بورسم اوقدر طوغرو و اوقدر طبیعی درکه تماشایی یک نظرده حیرتله جلب تقدیر ایدمییلر .

بویوک موزه خانه لرده (ایلک فیل جنسی (Elephas primigenius) عنوانیه (قدید (squelette) نی - مستحاثه حالنده - کوره بیلدیکمز بومدهش حیوان ، بوکونکی فیللردن خیلی بویوک اولدقدن ماعدا برچوق وجهله ده فرقلی ایدی . ته سی پک یوکسک ، آلی کنیش و محدب ، قولقلری کوچوک فقط دیشلری پک بویوک و یوقاری به طوغرو - بردارته شکلنده - قیورلش

ایدی . وجودینک هر طرفی صیق قیویر جیق تویلی ، باشی و بونی (بیزون Bison یعنی یابانی آمریکا ماندایی) کبی صاچلی اولدوغی ایچون ا کسه سندن طاشان اوزون تویلر دیزلری آشاردی .

بر زمانلر (یعنی دور رابعده l'âge quaternaire) بو حیوان ویوقاریده اسملری ذکر ایتیش اولدوغم (انواع منطفیه espèces éteintes) دنیانک هان هر طرفنده کی اورمانلری استیلا ایتشدی . او قدر که ، مثلاً اوفیلک اسمنه نسبتله بر (ماموت دوری l'âge de Mamouth) واردر ؛ بناءً علیه (ماموت) ، اوزمانلرک (جنس مثلی faune) صاییلیر .

اودوردن بزه یادکار قالان آثار مصنوعه نك اکثری سنده او وقت انسانله معاصر بولونان و مجادله ایدن سباع وحشیه نك تصویرلری و بالخاصه یوقورقونج فیلک رسمی کورولویور .

اوتاریخده فرانسه طوپراغنده یاشایان و بو (ماموت) رسمی فیل دیشنه چاقاق طاشی ایله حک ایدن (انسان ابتدائی) هر کیم ایسه ، جداً - تعریفی ناقابل - بر استعداد جلی اثبات ایتیش ، والته بو حیوانی بالذات وبالذات تماشا ایدرک یوقدر طبیعی بر صورتده رسم ایده بیلمشدر ؛ چونکه بوتون اوصاف ممتازه سنی چیزکیلرله کوسترمشدر .

(ارضیات) و (مستحاثات) علماسی بو بایده بعضی تحقیقات اساسیه به بناءً دوشونوب حساب ایدیورلرده اورسملک تحمیناً لا اقل الی بیک سینه اول حک ایدلش اولدوغنه بیان قناعت ایلورلر . حتی غریب بر تصادف بومستحاثه صنعتک بوسبوتون قیمتی آرتدیرمشدر . باقیکنر نصل ! .

(۱۸۰۶) سنه میلادیه سنده (لهنه Léna) نهری منصبنده ، تام الاعضا بر ماموت فیل کشف اولونمشدی . نه کیم بر مدت صوکره (۱۸۶۴) ده سیریانک (یه نی سه ی Jénisseï) منصبنده بردانه سی دها بولوندی ایدی . دور حجریدن بری کشف بوز طبقه لری آلتنده مصون و محفوظ قالمش اولان بواکی جسد ، قطعاً تغیر و تفسخ ایتمه مش اولدقدن ماعدا تویلری بیله دوکولیه رک حال اصلینسی محافظه ایده بیلمشدی . سوق تصادفله واقع اولان

بو کشف مهم اثناسنده حاضر بولونان بر روس تاجری ، هان بو غریب حیوانک رسمی چیزمش و بروثیقه احتیاطیه اولق اوزره متخصصین علمایه کوندرمشدی . ذکری ده مین کچن (کدیک بوینوزی) اوزرنده کی ماموت رسمی - ارباب صلاحیت - تاجرک کوندردیکی رسم ایله قیاساً مطالعه ایتیش واسکی سنک دها طوغرو ، دها طبیی اولدوغی صراحتاً تحق و تین ایدرک روس تاجرینک چیزدیکی رسمه - هر وجهله - مرجح کورولمشدر . حتی تاجرده بعدالتدقیق بونی اعتراف ایتمشدر .

بو وقعه ، فلسفه صنعت نقطه نظرندن فوق العاده بر اهمیتی حائزدر . چونکه استعداد صنعتک (وهبی inné) اولماسی دعواسنه قوت و یرییور ، بناءً علیه (بدیعیات l'esthétique) ک اک مهم و غامض مسائلندن بر چوغنی یکیدن میدان بحث و مناقشه به دعوت ایدیور .

فی الحقیقه ، اسکی دور حجری ده یاشامش اولان بر انسان ابتدائی - عینی حیوانی - بر انسان مدنی دن دها ای و طوغرو رسم ایده بیلمش ایسه صنعتک - علی الاطلاق - بر قابلیت جلیه اولدوغنی قبول و تسلیم ایتکدن باشقه چاره فالماز . واقعا بوراده برشی خاطره کلیر : (اورسمی یاپان روس ، بر تاجردی رسام دکلدی . بلکه هیچ رسم درسی کورمه مشدی ؛ بناءً علیه معذوردر !) دیه دوشونوله بیلیر . فقط ایلك رسمی - الی التمش بیک سینه اول - یاپان وحشی ، روماده تحصیل ایدوب برنجی مکفاتی آلمش اولان مشهور صنعتکارلردن دکلدی یا ؟ ! .. احتمالکه ایکی یاشنده بر مدنی چوجوق قدر لاقیردی ایتمه سنی بیله ، بیلمزدی . فقط تقلید طبیعته نصل بودرجه موفقیت کوسترمش ؟ ! .. خصوصاً چاقاق طاشندن باشقه آلات و ادواتی یوق ایکن ! .. ایشه بوراسی حیرتفزادر ! .. هم بو بر استتاً تشکیل ایتیمور امثالی چوقدر و موزه لرده بوکون موجوددر . فضله اوله رق علمای متخصصینک بو بایده کی تحقیقاتی ینه کوسترییورکه (یونتولش طاش) دورنده قابلیت رسم عادتا منطقی اولمش و بوکا بدل (صنایع مفیده arts utiles) بالنسبه خیلی ترقی ایتمشدر . حالبوکه بومعنادار و طبیی رسملر ، هان کاملاً (یونتولامش طاش) دورینک متروکاتنددر . یعنی علی الاطلاق دور حجرینک ایلك صفحه سینه عائددر .

مدققینی بومعما حیرتده براقیور، علمانك کیمیی (صنعت نفیسه) و (صنعت مفیده) نك باشقه باشقه استعدادله تابع و مقتدر اولدوغنی اده ایدیور. کیمیی ده دور حجرینك ایکنجی صفحه سنده عرق بشرک کاملاً ده کیشمش بولوندوغنه ذاهب اولویور. هر حالده منشأ و استعداد صنعت و طولانیسیله تاریخ مدنیت بحثنده بوبرمهم و اساسلی مسئله تشکیل ایتکده در. [بومسئله نك مناقشه سی ایچون esthétique لفظنه مراجعت ایدیکنز!]

فرانسه نك (پریغور Périgord) طرفلرنده و (قرومانیون Cro Magnon) نواحیسنك طبیعی مغاره لرنده بولونان آثار قدیمه جنسنندن برچوق شیلر اسپانیانك بعضی یرلرنده و قناریه اطه لرنده ده کشف اولونویور. بالطبع بو آثاری وجوده کتیرمش اولان ابتدائی انسانلرک کیمیکری و یاخود بعضی اقسام قدیمه سی ده برابر بولونویور. حتی اللی قدر (قحف crâne) اقسامی یعنی قفا طاسی پارچهلری بولونمشدر، و اوصنعتکار وحشیلرک (طویل الرأس dolichocéphale) اولدوغنی کورولویور. شو تقدیرجه دوزججری قدیمده فرانسه ده بولونان انسان ابتدائی ایله قناریه اطه لرنده کیلرک عینی (عرق race) منسوب اولدقلری آکلاشیلیور. برآز یوقاریده سویله دیکم وجهله، او زمانلر اوروپانك افریقایه متصل اولماسی و قناریه نك ده شبه جزیره حالنده بولونماسی کیفیتدن، عما معنا چیقارییورلر: دییورلرک (شرائط اقلیمیه conditions climaterques) نك زیاده سیله تبدلی سببیه، حیوانات وحشیه نك بعضی اجناسی شماله، بعضیلری ده جنوبه هجرت ایتمشدر؛ اونلری آولامقله کچین انسان ابتدائی دخی بالضروره اونلری تعقیبه مجبور بولونمشدر. بلکه فرانسه نك (طویل الرأس) و صنعت نفیسه یه مستعد وحشیلری یاواش یاواش اسپانیایه اورادن فاسه و اورادن ده قناریه جهتلرینه انتقال ایتمشدر. بو — اولسه اولسه — بر فرضیه در؛ فقط هر حالده شو حقیقت مهمه تظاهر ایدیورک، ده اوزمانلر ایکی مهم عرق تعین ایتمش و بونلرک بری صنعت نفیسه یه دیکری ده ده زیاده صنعت مفیده یه استعداد جبللی ایله تمایز ایله مش ایتمش. (محقق درک عرقلرک آیریله بیلیم سی و استعدادات خصوصه نك تولد و تمایزی پک اوزون بر دورۀ تکاملک نتیجه سیدر؛ و شبه یوق که بوغریب قابلیت

صنعتکارانه — ولوکه عرقه مخصوص اولسون! — بر استعداد جبللی در. ده نیلیور. چونکه (ماموت) دورنده اوروپا وحشیلرینك رسمده کوستردکلری موفقیتی آثوریلر واسکی مصریلر، اک پارلاق دور مدینتلرنده کوستره مشلدر. بو، اوقدر بدیهی درک ایکیسنی برینه قیاس ایتکله فرق در حال کوزه چارپار. حالبوکه آثوریلرک واسکی مصریلرک مدینتی پک مهمدر: انسانیتک تاریخ ترقیسنده باشلی باشه بر (صفحه ممتازه phase distincte) تشکیل ایدر. بوملر، بویوک شهرلر بنا ایتمشلر، قوانین تأسیس ایله مشلر، صنایع مفیده ده پک ایلری کیتمشلر، حتی (صنعت تزین art décoratif) ده پک بویوک برآز ترقی کوستر مشلر، لکن رسم تقلیدی (dessin d'imitation) ده فرانسه نك، بلچقانك، اسویجره نك اللی آلتش بیک سنه اولکی وحشیلری قدر استعداد هنر اثبات ایده مه مشلر. آثار میدانده در.

ذکر ایتدیکم مثال بر استثنا تشکیل ایتز؛ موزه لرنده ده برچوق کوزل نمونه لر کورولور دیمشدم؛ فی الحقیقه اسویجره ده (تایوکن Thayugen) مغاره سنده کشف ایدلش اولان بر مستحاثه مشهوره واردرک (چایرده اوتلایان بر رهن که ییکی Renne au pâturage) تصویر ایدر. حیوانک وضعیت و سکون طبیعی سی، شکلی، بویوزلری، قیصه و دیک قویروغنی، بویونک اوزون توپلری، قارننک چکیک، وضعیف اولماسی یعنی آچ اولماسی، شایان حیرت بر موفقیته رسم ایدلشدر. هم برشی وارک، مجلا بر که ییک بویوزی اوزرینه سیوری چاقاق طاشی قلمیله حک ایدلش اولان بورسم، سلاح صابی فلان دکدر. ساده کیف و ذوق ایچون یاپیلمشدر. عادتاً اک آتقیقه بر (تابلو) عدایدیلر. (صنعتی صنعت اولسون دیه de l'art pour l'art) قبول واجرا ایدنلر بو اثر قدیمی — دعوالری ایچون — پک قوی بر دلیل اوله رق ابراز ایده ییلرلر.

[بودعوانک مناقشه سی esthétique کله سنده بسط اولونمشدر، باقیکنز!]
(نه دوار لارته) نك قیمتدار قولکسیونلری آرهنده بولونمش و اوغلی طرفدن شهر اولونمش بر مستحاثه ده وارک پک معناداردر: ایکی طرفی

مجالا بر (كليك صفيحه سى) ندى عبارت اولان بولوحه نك ، اولابر طرف بر (ماموت) رسمى (طاسلاغى esquisse) ياپيلمش؛ ديكى صفحه سنده عىنى حيوانك كوزل ايكي (شكل مجتب forme en profil) ى حك ايدلمشدر آكلاشيلوركه اولا حيوانك شكل حقيقسى و وضع طبيعيسى حقيله تعيين وادا ايدى بيلمك ايچون خيلى اوغراشلمش وبوطاسلاق ترك واهال ايدلدكن صوكره عىنى حيوانك آريجه ايكي رسمى موفقيته حك ايدلمشدر. حتى برنده خورطومى دومدوز، ايكنجيسنده كوده سنه طوغرو قيويرلمش كورونور. ظن اولونويوركه بورسملرى چيزن وحشى، امين بر يردن فيلى تماشا ايدىيورمش؛ واحتمالكه حيوان راحت طورمايوب قيميلدايغى ايچون وضع وشكلنى حقيله تعيين ايدىمه مش. فقط حيوان بر وضعيت نابتة آلدقن صوكره ايلك طاسلاغى براقوب آيرى آيرى ايكي رسمى چيزمشدرد. حس صنعت بوراده آشكاردر.

بونلردن ماعدا، (ماندا)، (طاغ كچيسى)، (صيفير)، (صيفين)، (يابان آنى) ودها برچوق رسملى حامل آثار واردر. فقط همان جمله سى ده دور حجرى نك ايلك صفحه سندن قالمدر.

بو آثار قديمه ده كورولن رسملر هپ بويوك حيوانات وحشى تصويرلريدرد. حشرات و نباتات رسمه هپچ تصادف ايديله مەمشدر. شايان دقت اولان بوكيفيته ده فيلسوفلر بر معناويرييورلر: اويله ظن ايدىيورلر و اويله آكلامق ايستيورلر كه، اولا طبيعى تقليد ايتمكه صنعتى ايجاد وبالفعل اجرا ايدن انسان ابتدائى (طبيعت جامده = nature morte) ى (مشق تقليد modèle d'imitation) اتخاذ ايتمه مش، بالعكس كندى حياتى تهديد ايدن مدهش ومهلك دشمنلرى رسم ايتمكه ايشه باشلايه رق - فطرنده مركوز اولان - استعداد هنرى ابراز و اظهار ايدى بيلمشدرد. ديمك اولويوركه استعداد صنعتك سبب موجي و وسيله تجليسى (هيجان emotion) ديديكمز (عامل معنوى facteur psychique) اولمقله برابر، او هيجان (بدىي) دكل ايمش؛ چونكه ذوق ونشاط حس سندن زياده (قورقو la peur) ايله علاقه دار

كورونويور. اكر اويله اولماسه يدى، يعنى: ادعا اولوندوغى و جمله صنعتك (سائق معنوى mobile psychique) سى مطلقا (ذوق بدىي) اولسه يدى ابتدائى انسانلر منحصر آ حيوانات وحشىه وسباع مدهشيه رسم ايتمكه قازلردى. طاغلى، آغاچلى ونظر فريب وحشى چيچكلى تصوير ايتمكه دها زياده مبال اولورلردى. حالوكه يابراق وچيچك رسملى بيكرجه وييكگرجه سنه صوكره كى اثرلرده آره صره كوروله بيليور. خلاصه: صنعتك هيجان ايله طوغمش اولدوغى محقق بولونمقله برابر، بو هيجانك نوع وطبيعتى تعيين ايتك لزومى، هر حالده حلى مطلوب بر مسئله شكلى آلوب قاليور. (مبدأ صنعت le principe de l'art) قورقو حسى مى اولمشدر؟ .. انسان ابتدائى تصوير حيواناته سوق ايدن هيجان، تهلكه ملاحظه سييله محافظه نفس انديشه سندن مى طوغمشدر؟ .. يوقسه تحصيل ذوق آرزوسندن (وياخود احتياجندن) مى طوغمشدر؟ ..

بوسواله ويريله بيله جك حوابلر - هر نه اولورسه اولسون - صنايع نفيسه ايله صنايع مفيده نك يكديكرينه نسبتله قدم واهيتى بحثى تازلر ويكيدن اويانديره بيلير. صنايع نفيسه نك (بقاى شخصى conservation individuelle) ايله مناسبتي ده تنوير ايدى بيلير. فقط غريبيدركه بوجهتى هنوز لايقيله تتبع ايدن اولامشدر. (esthétique كله سنده بن بعضى ملاحظات خصوصيه بيان ايتدم؛ اورايه باقيكز!) (arts décoratifs صنايع تزئينيه) نك بويشت ايله مناسبتي ينه (esthétique) تعبيرنده ايضاح اولومشدرد.

(arts plastiques) و (arts d'agrément) تعبيرلرى ايچونده (بدىيات) بابنده كى تفصيلات مخصوصيه مراجعت ايديكز.

بومباحثك يالكز صنعت مسئله ليله دكل (تاريخ مدنيت histoire de la civilisation) ايله ده طوغرودن طوغرويه علاقه سى اولدوغى ايچون اهميتى عظيمدر.

(علم انسان)، (علم مستحاثات) و (علم قبل التاريخ) ك ويرديكى معلومات ابتدائيه دن بالضروره استدلال اولونان بو (ملاحظات عموميه

ethnographie (considérations générales) ب (تطبیقی علم اقوام
comparée) پارلاق بر صورتده تصدیق و اثبات ایدیور:

(نه مپور یا لیزم و مستملکات پولتیقه سی Impérialisme et politique
de colonisation) سایه سنده پک چوق ترقی ایتیش اولان بویکی علم ،
فی الحقیقه بومبختده بر چوق مشکلاتی حل ایله مشدر . (آمریکا) ده ،
(اوسترالیا) ، (پولی نه زیا) اطه لرنده و (آفریقا) قطعه سنک کروان کچمز
یرلرنده بر چوق قبائل ابتدائی و اقوام وحشیه کشف اولونمشدر که بونلر
بزمه همزمان اولوق اعتباریله معاصر لریمزدر . حالوکه درجه مدینت - ده
طوغروسی در که وحشت - نقطه نظرندن اوقدر ابتدائی برسویه ده بولونویورلر که
بوندن آلتیش بیک سنه اولکی (دور حجری) بی تماماً تمثیل ایدنلری واردر .
بر قسمی ده بر برندن بالنسبه ده متری در . بناء علیه بونلرک جمله سی - علی
مراتبهم - مدینت انسانیه نک باشلیجه صفحات معینه سنه مثال تشکیل ایده بیلیر .
(تطبیقی علم اقوام) بو وحشیلری یکدیگرینه قیاساً مطالعه ایدرک صنایع ده -
ممکن اولدوغی قدر - تتبع ایله مشدر . بو کونکی اقوام وحشیه نک آثار
صناعیه سی همان عیناً و تماماً (اسکی دور حجری) نک کنه مشابه در . موزه
خانه لرده نک بولکینونلر بونی کوستریور . بناء علیه هیچ شبهه قالیور که
صنعت قدیمدر . شکل و مرتبه کمال اعتباریله دخی درجه تمدنله صمیمیاً علاقه دار
کورونویور .

اقوام وحشیه نک (عادات moeurs) نی ده تدقیق ایدن (نه تنوغرافی)
ادعا ایدیور که انسان ، احتیاجات طبیعیه سی تهوین و یا تأمین ایتک چاره لرینی
دوشونمزدن اول (زینت la parure) ی دوشونویور . مثلاً محققدر که تزیین
تلبسه تقدم ایدیور و ایتیش اولسه کر کدر . هر حالده بوده پک مهم بر کیفیتر ؛
چونکه میل ترین - هر نه وجهله اولورسه اولسون - ذوق بدیی بی اثبات
ایدر . اوندن سوکره صنایع نفیسه نک ، صنایع مفیده دن اول باشلامش
اولدوغنه دائر بر اعتقادی مستلزمدر . فیلسوف مشهور (هر برت سپنسر
H. Spencer) بومسئله لر حقنده پک مهم مقاله لر یازمش و بر نظریه معتبره
تأسیس ایتشدر .

[goût و esthétique کله رینه باقیکنز !]

بوتون شدو تدقیقاتک الهام ایده بیله جکی ملا ظاته کوره علی الاطلاق
صنعتک تعریفی ، بردستور شکله قویوب عرض ایده بیلیرز :
(صنعت ، جبلت انسانیه ده مرکوز بر قابلیت هنورانه در که همه حال
بر اثر مادی ایله غایه مخصوصه سنه صورت ویریر .)
(بوغایه فائده تأمینندن عبارت قایرسه (صنعت مفیده) در . بالعکس
یالکیز ذوق و هیجان ویرمک هنرینه معطوف ایسه (صنعت نفیسه) در .
دهیه بیلیرز .

صنایع نفیسه نک شعبات متنوعیه آیرماسی بر اثر ترقی در و تکامل نتیجه سیدر .
فقط عجبا زمان اعتباریله هانکیسی هانکیسنه تقدم ایتشدر ؟ . بوده بر مسئله در که
مناقشه سی (beaux arts) تعیرنده بسط اولونمشدر .
صنعتک علم ایله فرقی و مناسبتی حقنده کی مطالعات دخی عینی تعیرده دائر
ویریلن تفصیلاتده مندر جدر .

صنعتکار حقایق اشیا ایله دکل (صور اشیا les formes des choses)
ایله علاقه داردر . بومهم قضیه نک دلائل مخصوصه سی (esthétique)
کله سنده بولورسکنز .

[تنبیه و اشارت اولونان کله لرک جمله سنه باقیکنز !]

Articulaire (sens)

Articulaire (sens) مفصلیه (حاسه)

فیلسوفلر و (پسیقولوج Psychologie) لر ، یعنی علم روح علماسی
بزده بش (حاسه Sens) اولدوغنی - اوتهدنبری - ادما ایده طور مشملر
وبو حواسی آیری آیری تعریف ایله مشلردی . [Sens کله سنه باقیکنز !]
حالبوکه (حس لمس Sens du tact) دیدیکمز طویغونک پک بسیط
بر حس اولمایوب قاریشیق بر شی اولدوغنی ، خیلی زماندر ، نظر دقتی جلب
ایتمکده ایدی . بالاخره ، ده طوغروسی اون طوقوزنجی عصر میلادینک
نصف اخیرندنری (علم روح Psychologie) ترقی ایتمکه باشلانجه بر آزده
تحقیقات تجربیه یه مساعد بولوندی . حتی (حادثات روحیه Phénomènes

(Psychologiques) نك (حادثات غریزه Phénom. Physiologiques) ایله علاقه صمیمیه سی اولدینی تحقّق ایدرک بو حقیقت عادتاً بر (معارفه Axiome) کجی تلقی و تسلیم اولندی. بوسایه ده (Psycho-Physiologie) نامیه یکی بر (علم تجربی Science expérimentale) بیله تولد و تشکل ایتدی. (تشریح خردیه بینی Anatomie microscopique) نك ترقیاتی ده بر چوق کشفیات مهمیه موفقیته نتیجه ویردی. واقعا بو خصوصده تجربه رهبر اتخاذ ایدیه رک تحقیقاته کیریشلمزدن اقدم، حس لمسک بسیط بر طویغو اولدیغنه دائر ذهنه مسلط اولان شبه لر آرتمشدی. (لامسه Le tact) نك زه (متخالف الجنس Hétérogène) طویغولر احساس ایتکده اولدوغنی بر چوق فیلسوفلر ادعا ایدیورلردی. بونلراره سنده بالخاصه (احساسات لمسیه Sensations tactiles) تمیز ایدلدی. مثلاً (مقاومت حسی Sentation de résistance) نك (حرکت حسی Sensation du mouvement) ندن آیری بر طویغو اولدوغنی لایقوله آکلاشدیغنی کجی برنجیسنک (حس عضلی Sensation musculaire) ایله ایکنجیسنک دخی (حس مفصلی articulaire) ایله رابطه سی دوشونولدی. او زمان حرکات بدنیه یی حس ایتک قابلیتک لامسه وحواس سائرده دن بوسبوتون باشقه و مستقل بر حاسه اولدوغنه قناعت حاصل اولونجه (حاسه مفصلیه) تعیری لسان اصطلاحه کچدی. عین زمانلرده واقع اولان تدقیقات تشریحیه اثبات ایتدی که مفصللرک جوارینه موضوع بر چوق (جسمیات) وارددر؛ بونلری کشف ایدن عالمک اسمنه نسبتله (قراوزه نك جسمیاتی Corpuscules de Krause) دیه یاد ایدرلرکه بر طاقم (اعصاب وارده Nerfs afférents) نك (نقاط انتهایی Points terminaux) سیدر. اعصاب مذکورده دن کلن (سیاله عصبیه Flux nerveux) مفصللرده و او مفصللری بر برینه باغلایان (رباط Tendon) لرده بر نوع طویغو حاصل ایدیورکه ایشته اصل بوکا (حس مفصلی) و بو قابلیته دخی (حاسه مفصلیه) دیورلر. ادما اولونویورکه بزه (جهت) حسنی ویرن حاسه مفصلیه در؛ (سطوح مفصلیه Les surfaces articulaires) نك - اثنای حرکتده - یکدیگرینه صورت تماسنی حس ایدیشمزه کوره نه طرفه

انحنا ایدیکمزی ونه قدر ایدیکمزی ادراک ایدیورز یعنی بوسایه ده حرکات بدنیه مزک اختلافات و درج اتندن خبردار اوله بیلورز دیمکدر. معاصرینمزدن بر چوق عالملر و فیلسوفلر بو حاسه حقنده مهم مقاله لر یازمشلر و ملاحظات مخصوصه بیان ایتمشلر در. (Kinesthésique) کله سنده کی تفصیلاته مراجعت ایدیکز !

Ascétisme, ascète

زهدیه، زاهد Ascétisme, ascète فرانسزجه

Ascetism انکلیزجه

Asceticismus المانیجه

Ascetismo ایتالیانجه

یونانی ده (آسکی تیس = Ασκήτης) ریاضت بدنیه ایله اوغراشان آدملره دهنیر وحتی بوتعبیر، بالخاصه پهلوانلر حقنده قوللانیلیردی. برمدت صوکره بوکله یی فلسفه لساننه نقل ایدرک اوکا بر اصطلاح حیثیتی ویرن (رواقیون Les stoiciens) اولمشدر. معلومدرکه بومذهب اربابی فلسفه ده بالخاصه بر (مقصد عملی But pratique) کوزه دیر ایدی؛ بوده حیثیاً اخلاقی بر مسئله تشکیل ایدیوردی. بووقور فیلسوفلر نظرنده سعادت آزاده لک دن عبارتدی؛ حکمت عملیه دن ده یگانه مقصد نائل سعادت اوله بیلمک ایچون لازم کلن وسائطی تعیین ایدوب عزت نفسی محافظه اوغورنده مجاهده یه کیریشمک و مشتهیات نفسانییه قارشى فائز و غالب اولمقدی. رواقیون - بومظفریت معنویه یی قازانمق ایچون - کندی نفسی ایله اوغراشان بر حکیم کاملی، اسکی یونان پهلوانلرینه قیاس و تشبیه ایدرلردی. اونلر، فصل (اولمپیاد Olympiade) اویه نلرنده تأمین موفقیته ایچون مدت مدیده (جیمناستیک) یعنی ریاضات بدنیه ایله حاضر لانیر ايسه لر، بر حکیم دخی فضیلتده نائل فوز و ظفر اوله بیلمک ایچون اوزون اوزادییه اوغراشمالی درکه کندی نفسی یکه بیلسین!... تشبیهک اصلی ایشته بودر؛ بناء علیه بوکله صوکره صوکره مجاهدات معنویه یه تطبیق اولونمش وحتی اسکی معناسیله بوسبوتون استعمالدن ساقط 'وله رق انجق بر اصطلاح فلسفی حیثیه مشهور اولوب زمانمزه قدر یاشامقده دوام ایتمشدر. (اودر تودوقس = Odoxertho)

کلیسای پاپاسلری چوقدنبری بویکه یه بویوک بر قیمت ویره رک تصاحب ایتشلر، و - ذات وصفات الوهیه مسائلنه حصر ذهن ایدوب - درین درین دوشونه بیلیمک واستغراقه وارمق ایچون (خلقدن اعتزال) ایتک معناسنده قوللانیر اولمشلردی. بویله بر حیات معتزلانه و واجدانه کچیرمک ایچون اوراده بوراده بنسا وتأسيس ایتش اولدقلری زاویه لره (آسکی تی ریون Ασκητήριον) نامی ویرلدی و بوزاهدانه حیاته دخی آسکی تی قوس وی یوس (Ασκητικός βίος = ده نیلدی. بو (تارک دنیا) لق میلنک اسباب جدیدسی واردر:

طبیعت بشریه ده تمایلات علویه مشهود اولدوغی کبی (مشتیهات حیوانیه Appétits bestiaux) دخی موجوددر؛ چونکه آدم انسان اولمازدن اول حیواندر و حیات حیوانیه سنی محافظه وادامه ایدن مشتیهاتی در؛ اونک ایچون اونلر (غریزی Instinctif) بر حالدر. شبهه یوقدرکه بوتون قانقلر وطاشقینقلر بوساقتات غریزیه تماماً منقاد اوله رق حیوانجه حرکت ایتمکدن ایلری کلیور. بناء علیه هر دین ومذهبک اخلاقی (دستور عملی Principe de conduite) مشتیهات حیوانیه یه کم ووره رق نفسنه حاکم اوله بیلیمکدر. اوحالده منیهات، هر دین نظرندده ماهیتاً بر در. حتی ذوق عیشی مقصد سعادت بیلن بعضی مذاهب فلسفیه بیله، بو خصوصده کی میل فطری میزی حسن اداره وتحدید ایتک لزومندده هپ متفق درلر، و بالجله ادیانک نصوص قاطعه سنه موافقتله وصایای اخلاقیه ده بولونمشلردر. خلاصه مشتیهات حیوانیه مزک اسیری اولمایوب بالعکس اونلره غلبه چانق هر دین وهر فلسفه ده (مبدأ اخلاقی Principe moral) اوله رق قبول وتسليم ایدلمشدر. مع مافیه (اخلاق زاهدانه Morale ascétique) ایله سائر اخلاق سیستملری آره سنده ینه بر مهم فرق واردر: مشتیهات حیوانیه یی بعضی ادیان وبرچوق فیاسوفلر محافظه حیات ایچون الزم بیلیرلر؛ چونکه انسان لزومی قدریمز ایچمز وحفظ صحنه تقید ایتمزسه یاشایاماز، یاشاسه بیله علیل وسفیل یاشار. کذلک تأهل ایتمزسه عائله تشکیل ایده مز؛ عائله اولمازسه جماعت بشریه منقرض اولور. اونک ایچوندرکه میل معالی یه سد چک بیله جک موایی ده ویرمکه چالشمقلا

برابر، بو حیوانی غریزه لره دخی - حدنجه - اهمیت ویرمک ومسئله حیاده اونلری ده حسابیه قویق ایجاب ایدر. واقعا سقراطک دیدیکی کبی (بیگ ایچون یاشامامالی، یاشامق ایچون ییه لی در!)، فقط هر حالده لزومی قدر ییه لی درکه یاشامق ممکن اوله بیلسین. بناء علیه انسان ایچون (سعادت حقیقه Vrai bonheur) و (خیر اعلا Bien suprême) انحق طبیعت حیوانیه نک مفاسدعالیه قطعاً رام اولماسنده در. (امساک Abstinance) ایده بیلیرسه ک بو خصوصده اودرجه موفقیت کوسترمش اولورز.

ایشته بعضی ادیانک مبدأ اخلاقیسی بوسیاق نظره موافقدر وادیان بوامنیه اخلاقیه نک تحقیقی عبادات وطاعاتن بکمر. صوم وصلات کبی! پرهن کاران کبی!.

برچوق مذاهب فلسفیه دخی عینی مبدأ اخلاقی یی دستورالعمل اتخا ایتشددر. خصوصاً - ارباب تصوفی تماماً استننا ایتک شرطیله - اسلام عالمنده (جمهور حکما La majorité des philosophes) قطعاً بوفکرده در. دین اسلام حظوظات مشروعه یی هیچ بروقت منع ایتمه مشدر: (یه ییکز، ایچیکز، لکن اسراف ایتمه ییکز!) بویورولویور. (فانکحوا ما طاب لکم من النساء...) آیت جلیله سی ایله (لارهبانیه فی الدین) حدیث شریفی (Vie monastique یعنی راهب حیاتی) نک صراحتاً علینده قطعی امرلردر. سنن پیغمبری دخی - شبه سزدلیللرله - اثبات ایدیورکه کوزل البسه کییمک، نظیف وظریف یاشامق، محاسن طبیعتدن وتجملات صنعتدن ذوق آلمق، کوزل شیلری سومک، دین اسلام نظرندده مقدوح ومنوع دکل، بالعکس سنن سنیه ایله ثابت ومشروع برحرکتدر. یالکز منحصرأ اذواق ومشتیهات ابتلا، قنادر. بناء علیه انحق نفس حیوانیه یه اسیر اولماق ایچون تنیهات اکیده وار. چونکه (النفس لامارة بالسوء) یعنی نفس کوتولکه امر ایدر؛ فقط بالالتزام هرشیدن کندینی محروم ایتک معقول ومقبول برطرز حرکت دکدر.

حالبوکه (زهد)، همه حال انسانک فطرت حیوانیه سنی بوسبوتون محو

وازاله اتمك وانسانی شروط حیاتیہ سندن تنزیہ و تبریہ ایله مك غایہ سنی اخلاق و تربیہ ده اساس اتخاذ ایتشدرد . بو آز بر فرق دكدر .

طبیعی ، دین اولسون ، فلسفه اولسون ، تصوف اولسون — بومبختده — انسان ایچون (خیر اعلا Le bien suprême) مسئله سنی دوشونویور ، و (سعادت حقیقه Le vrai bonheur) یی بو مسئله ده تمثیل ایدیور . لکن (خیر اعلا) نك نه اولدوغنده تقدیرات مختلف ! . . .

[Bien و Morale کله سنده بو مسئله مناقشه اولونمشدر . باقیکنز !]

بزبوراده یالکنز (خیر اعلا) نك زهد نقطه نظرندن ماهیتی تدقیق اتمك ایچون اولو تصوفه و صوکره (بوددیزم = Bouddhisme) دیننه برنظر ایده جکزد . زیرا بری ادیان معلومه آراسنده ، دیگر ی ده بویوك فلسفه سیستم لری میاننده زهدی شدله امر و توصیه ایدیور و شرقك صمیم روخندن نبعان فیضان ایدن (حس دینی Sentiment religieux) یی لایقيله تمثیل ایلور؛

یونان قدیمده عینی اعتقاد ، بویله شرق روخنده اولدوغی کبی ، مابعد الطبیعی بر حس خشوع شکلنده تجلی ایتیور ؛ عزت نفس صورتنده کورونویور که عشق حریتله توأمدر . یعنی دیندارانه اولمقدن زیاده اخلاقی برحس و طوردر . بزبونك اك كوزل نمونه سنی (رواقیون Les stoïciens) ده ، اك غریبی ده (کلیون Les cyniques) كه اخلاقده کوروپورز . (بویکی) مذهب فلسفی (Ecole philosophique) حقنده کی ایضاحاتی او کله لره متعلق مباحثده آراییکنز ! . . .

تاریخ ادیان ایله بالخاصه مشغول اولان علما متفقاً ادعا ایدیور که ادیان شرقیه نك روحی (زهد) در . یالکنز دین موسوی بو خصوصده شایان دقت و مهم بر استئنا تشکیل ایدیور ؛ چونکه صرف قوانین اجتماعییه و قواعد معیشتیه اهمیت ویرمش اولان بودین قدیمك تعلیماتنده زهدیه همان هیچ محل بر اقیلاماش کبی در . انجق خرستیانلغك ظهورندن — تقریباً — بر عصر اول پیدا اولان (Esséniens = عبرانیجه سی) نه سی یم) در . فرقیهودیه سی زهدی پك زیاده سیله التزام ایتشدی که بوطور ، (فلسفه اسکندرانیه

Hétéro- (رفض) تأثیریه حاصل اولمش برنوع (Philos. alexandrine doxie) کبی تلقی اولونسه سزادر . موسویلرده رده (حاسی دیم) فرقه زهدیه سی واردر . (حاسید = زاهد) دیمکدر و (ascète) کله سینه مشابهتی شایان دقتدر .

فقط (بوددیزم) ، زهدیه هر دیندن زیاده اهمیت ویرمشدر . اوقدر که (اخلاق زاهدانه Morale ascétique) نك اك مفراط و مکمل سیستمی او دینك تعلیماتنده کوره بیلیرز . فی الحقیقه (بوددا Bouddha) یه کوره سعادت حقیقه (نیروان Nirwânâ) یعنی (فنا فی الله) مرتبه سینه واصل اولمقدرد ؛ ده طوغروسی یوق اولمقدرد ، چونکه بودینده بر الله مشخص (Dieu personifié) تصویری یوقدر . (نیروانا) عادتاً ، (هیچلک) دیمکدر . هیچ اولمق ایچون دخی یالکنز طبیعت بهیمییه غلبه چالمق — البته — کفایت ایتز . (شعور Conscience) بیله قالمالی ، کلیاً محو اولمالی در . هویت شخصییه بوسبوتون مضمحل اولمالی در . حس و عقلدن و (بنلاک) دن ذره قدر اثر قالمالی در . ایشته انجق اوزمان بر انسان سعادت حقیقییه نائل اوله بیلیر . بالطبع بو حاله کگذدن اول و بو حاله کله بیلیمك ایچون — اول امرده — مشتهیات نفسانییه قارشیه شدید بر مجاهده ایله ایشه باشلامالی در . بوددیزم اعتقادنجه — بو مجاهده ، حیات شخصییه مدتلك اقتضاسیله ده بیتمیور و انسان — مساسل متصل — بزسوری (ادوار تناسخ Périodes de métempsychose) کچیره ركه ، یاواش یاواش (ادناس وجود) دن ، یعنی (وارلق پیسلکری) ندن تمیزله نیور و عاقبت عقل و شعور ندزده بوسبوتون فارغ اولوب قور تولد قدن صوکره هیچلکه (یعنی سعادت عظمایه) نائل اوله بیلیر . بوددیزمدن زیاده سیله متأثر اولان مشهور آلمان فیلسوفی (بدیین Le pessimiste) (شوپنهاؤور A. Schopenhauer) بو اعتقادی عیناً بنسخه مش و عرض ایتشدرد . حتی بو ذاتك شدتله بدیین اولان فلسفه اخلاقیه سنده اساس ، (بوددیزم) ك او اعتقادیدر ؛ ده نیله بیلیر . زیرا شوپنهاؤور ك اك قوی ادعایی ، (شر Le mal) ك منحصر آ وارلقدن طوغمش اولماسی در . (Pessimisme) کله سنده ایضاحاته باقیکنز !]

(فلسفه نوافلاطونیه La philos. néo-platoniste) یعنی بزم شرق حکما سنک تعبیر نجه حکمت الاشراق (Philos. illuminative) دخی بوتون علائق دنیویه و تعشقات دنیه دن قطع علاقه ایدرک (وصال حق Communion avec Dieu) - عادتیه نائل اوله یی، انسان ایچون خیر اعلا و مطلب اقصی اوله رق تلقی ایتدیکی جهته (زهد) ی بالضروره بر دستور اخلاقی اولوق اوزره قبول و توصیه ایتشد. بومذهب دن قطعاً فرقلی اولمایان (تصوف) ده بویله در .

(حکمت صوفیه Théosophie) دخی خیر اعلا یی طبیعت بهیمیه مزک تمامیه خارجنده کورمش و بناء علیه انسان ایچون سعادت حقیقیه یی روحک علائق مادیه دن بوسبوتون آزاد اولماسنده آرامشدر. بویله اولونجه امر تربیه ده (زهد) ی باشلیجه مقصد ایدینوب کمال اهمیتله توصیه ایلهمش اولماسی هم ضروریدر، همده - کندی احکام اعتقادیه سنه نظراً - منطقی در . [Mysticisme و Coufisme کله لرینه باقیکنز !]

تصوف نظر نده انسان نور و ظلمت دن مرکب بر (نسخه کبرا) در . موجودیت مادیه سی (ظلمات الطبیعه) اولدوغی ایچون منبع شر و محل فساددر. بوتون قنالقاری، و علی الخصوص حرص و اشتها سی، هوس و هواسی هپ بو طبیعت جسمانیه سنندن نبعان ایدیور. زیرا بو طبیعتده، انسان - فی الحقیقه - بهایمه مشارکدر. حالبوکه معنوی اعتباریه نورددر. (ذهوتی الطبیعه de Nature divine) در . میل معالی، استعداد کمال هپ بوجبلت معنویه سنک اقتضاسی در . بناء علیه شو حالیه (جامع الاضداد) در، (برزخ جامع) در . او حالده موجودیت جسمانیه سنک مقتضاسنجه حرکت ایدوبده مشتهیات بهیمیه سنه اسیر اوله رق یاشارسه، انجق حیوان کی یاشار؛ وصال حق ذوقه هیچ بروقت نائل اوله ماز. بوذوقه فطرتاً آشنا و وصاله متحسر اولان روحی بو محبس جسمانیته دن آزاد ایتله یی؛ و بونک ایچون مشتهیات بهیمیه یی تولدورمه لی، ازمه لی، سوندورمه لی در . بوده آنجق (امساک Abstinence) ایلله اوله بیلیر . امساک، انسانده شیطانیته محو ایدر؛ رحمانیتی او یاندیریر .

زیرا طبیعت آلمیه، عرفای فرسک دیدیکی کی: (ازدیو واز فرشته سرشته است) یعنی (شیطان ایلله ملک دن یوغورولمش در) . او حالده سنک فطرتکده ملک ایلله شیطان دن بر حصه وار . شیطانلنی ترک ایت و فضیلتله ملکیت دن دخی کیچ ! . . .

« حصه از ملک هست و نصیبی از دیو »

« ترک دیوی کن و بگذر بفضیلت ز ملک ! »

قرون وسطا بومشتهیات (ارواح بهیمیه . esp . anim) دیر ایدی . [روح کله سنده ده قارتک ملاحظاته باقیکنز .]

اساساً (ثنائیه مزدکیه Dualisme mazdéique) اعتقادیه، یعنی (زردشت Zarathoushrâ) مذهبک احکامنه موافق اولان بو (عقیده حکمت Doctrine philosophique) ی، شعرای مشهوره دن فیضی هندی، (معرفت نفس) حقنده کی منظومه مهمه سنک ایتداسنده صوفیه لسانیه پک کوزل ادا ایتشد. بوشاعر، انسانه خطاباً بویله دیور :

(ای نقد اصل وفرع، ندانم چه کوهری !)

کز آسمان بزرگتر و از خاک کمتر ! .

دل بدمکن که تیرکی چار عنصری،

خودین مشو که آینه هفت کشوری !

.....

نقشیت از حدوث و قدم صفحه ترا :

مجموعه قدیم و کتاب مسطری .

.....

خاکی، اگر بظلمت هستی مقیدی

عرشی اگر بنور الهی منوری ! . . الخ .

یعنی :

(ای، هر شیئک اصل وفرعنه سرمایه اولان انسان ! . . بیلهم

نه کوهرسک، زیرا کوکلردن بویوک و طویراقدن ده کمترسک ! . . عناصر

اربعة قاراتی سی (یعنی ظلمت مادیت !) یم دیه مغموم اولوب کندینه
لوم ایتمه ! . یدی اقلیمک (یعنی کائناتک !) آینه سی یم ، دیه ده خودیین
اوله ! . . . واقعا سنک صورتک عینی زمانده حدوت و قدم اشیایی عرض
ایدر بر نقش در ؛ سن اسکی بر مجموعه سک ، عادتا یازیلی بر کتاب سک ! .
اگر موجودیت جسمانیه ظلمتیه مقید اولورسه ک طوپراق سک ، (کمتر و
سفیل سک !) نورالهی ایه منور اولورسه ک عرش سک ! . (یعنی الوهیت
سن ده استوا ایدر !) .

آشکاردر نه بوراده فیضی هندی ، طبیعت بشری یی بر (مجموعه اضداد)
اولق اوزره تصویر ایتدکن صوکره قید ظلماتیتدن آزاد اوله یی مطلب
اعلا اوله رق کوستریور ؛ بو مطلبه ایریشه بیلک ایچون دخی (زهد
وورع) ی توصیه ایدیور . زیر بوسلیس منظومه سنک نهایترینه طوغرو :

(زهد وورع بخدمت سلطان تقیصه نیست ،

دل را بحق ببند و میازا بجا کری .

نده بخاک فقر که اینست خسروی .

سرنه براه عجز که اینست سروری .

بر تربود زکوه اکیل سلطنت

خاک ره فنا بکلاه قلندری ! . . الخ

دیورکه معناسی بوجه آتی در :

(سلطانہ) یعنی سن ده کی روح الہیہ ! . [خدمت ایتک ایچون اولونجه
زهد وورع بر قصور دکدر . (بناء علیہ) حقه کوکل باغلا ، بلیکه ده
قولق کمرخی طاق ! . . . ویر کندیکی خضیض فقره که اصل سلطاناتق
بودر ! . . . عجز یولنه باش قوی که سرورلک اوراده در ! . . فانیک یولونک
توزی طوپراغی ایه قلندرلک کلاهی ، سلطنت تاجنک جواهرندن ده اعلادر ! .
الی اخره !)

بخمنز ایچون بو شعردن کوزل مثال واوندن قوی بر وثیقه اوله ماز .
چونکه قلندرلک و (Fakirisme) مذهبلرینک زهد ایه نه صبقی و منطقی

بر رابطه سی اولدوغی ده بو سوزلرله صراحتاً آ کلاشیلیور . ادبیات فارسیه
بو اعتقاداتی ناطق اشعار کزیده ایه مالا مالدر .

بالجمله عرفای صوفیه زهد ایچون امساکی توصیه ایتشلر و بونک شرطلری ده
اینجه دن اینجه یه تعیین ایچون بر چوق سوزلر سویله مشلردر . قاسم انوارک
شو ییتی زهدک باشلیجه شرائطی مختصر آ تعداد و بیان ایدر .

دوام ذکر و وضوء و سکوت و تنهائی ،

رضا و رطب دل و نفی خاطر و تقلیل (

یعنی : ذکر الله دوام ایتک ، آبدستلی بولونمق ، هیچ سوز سویله مه مک ،
یالکزلی اختیار ایتک ، هر قضایه ، هر حاله راضی اولمق ، کوکلنی یوموشاق
طونمق ، حرص و حدت کوسترمه مک ، ذهندنه وارسه طی ایتک و احتیاجات
حیاتی یی کیتدکجه آزالتمق زهدک شروط ریاضتی در . (تقلیل) تعیرینک
تفسیرنده دخی عرفا (قلت طعام ، قلت منام ، قلت کلام) دستورنده اتفاق
ایتشلردر .

خواجه محمد نیشابوری ، (نفس حیلہ کرک شرندن امین اولمق)
و (نار مشتهائی تسکین ایتک) ایچون بالذات نفسی ثلودورمه لی در ؛ دیور .
بونک ایچون ده درت نوع سلاح توصیه ایدیور :

نفس نتوان گشت الا چارچیز .

چون بگویم یاد دارش ، ای عزیز ! . .

خنجر خاموشی و شمشیر جوع ؛

نیزه تنهائی و ترک هجوع .

یعنی : (نفسی انحق درت شی ثلودورمه بیلیر . مادام که اونلرک نه اولدوغنی
سکا سویلو یورم ، خاطرکده طوت ، ای عزیز ! . سکوت خنجر یی ، آچلق
قیلیجی ، یالکزلق میزراغی ایه اویقوی ترک ایتک) در ، دیور .

مشهور شیخ عطار - که اوده نیشابورلی ایدی - (پند عطار) نام رساله
اخلاقیه سنده زهدی منبع خیر و سعادت اولمق اوزره توصیه ایتکدن باشقه
بر شی یامامش و بو اعتقاد صوفیانه یی مکتب چو جوقلرینک ذهتنه قدر
صوقشدر .

(حجة الاسلام) لقيمه ياد اولونان (امام غزالي Algazzali) - كه عالم اسلامده حكماي الهيونك الكويوكي اولدوغى متفق عليهدر ، - اواخر عمرنده حكمت الاشراقه طالمش ونهايت بوسبوتون زاهدانه بر عمر كچيرمى . يالكز بر لقمه قورى اكمله مدت مديده ياشايه بيلمش ودرت سنه هيچ بر حرف تلفظ ايمهرك دائمي بر سكوت اينجده دوشونه طورمش اولدوغنى بالذات نقل ايديور .

الحاصل بوتون شرق حكما وشعراسنك يوزده طوقسان طوقوزى زهدى توصيه وفضائل مدح و ثنا ايتلدر . يالكز ابن سينا وابن رشد وعمر خيام قطعاً زاهد دكل ايديلر . بالعكس ذوقپرست ايديلر .

خرستياناغل هنوز بدایت ظهور ومهد نشأتمده بر مایه زهد واردی . مع مافیه بوروح زاهدانه انجق ايكنجی عصر ميلادیده آنارفعلیه ايله تأثیرینی کوسترمکه باشلادی . اووقت تارك دنیائی اختیار ونکاحدن اجتناب ایدنلر ، مناسترلری طولوردی و حیات رهبانیه تأسس ایتدی . (عرفای نصرانیه Les gnostiques) واونلره تابع اولان برچوق محررلر ، اعتقادات ناسی (تجرد monasticisme) ، اماله ایدرك افکار عمومیه بی تارك دنیالغه حاضر لامشلردی . دردتجی عصر میلادیده (Rufinus روفی نوس) ، (Sulpicius severus سول پی جیوس سه وروس) ودها بعضی نفوذلی محررین ، اخلاق خرستیانیه ده (ترك دنیا وزهد) غایه سنی بوسبوتون ایلری سوردیلر .

نکاحدن اجتناب ، ذلت فقر ، کثرت صیام ، اعتزال وسکوت ، حتی عدم طهارت ونظافت بيله رهبر سعادت وهادی نجات اولان فضائل اصلیه دن صایله رق توصیه ایدلدی وقبول اولوندی . بالطبع خرستیانلرك قسم کلیسی بودرجه زهدایله یاشامیوردی ، فقط یاشایه بیانلر معزز ومحترم عد اولونویوردی . يالكز (تعذيب بدن Mortification de la chair) یوقدی . بوادیتی هند وعلی العموم شرق زاهدلرنده کوروپورز .

خرستیان عالمنده فساد اخلاق آرتدقه بر (عکس عمل Réaction) قوتيله ميل زهد دخی آرتدی وشدت ونفوذ کسب ایدرك نیجه نیجه فجیع

محاربات مذهبییه سببیت ویردی . (ذوقپرستك Hédonisme) ايله (زاهدك Ascétisme) اخلاقك فجیع وقانلی محاربات یاقین زمانلره قدر دوام ایدرك عاقبت زهدك مغلوبیتی ايله نتیجه پذیر اولدی .

(Sensualisme ، Utilitarisme ، Matérialisme) که لرینسه وبالخاصه ، Cyrénaïque تعیرنده Hédonisme تفصیلاتنه باقیکز !

بوکونکی مدنیت ، مقصد حیاتی ذوق مشروعه بولویور . حتی مناسترلرده بيله راحت یاشامق وبعض شیلردن امساک ایتمکه برابر لزومی قدر تمیز سیوب ایتمک قاعده ومطلب اولمشدر . بناء علیه : (نفسی هرشیدن محروم ایتمک ، وجودینی عذابه صوقق رضای الهییه موافقدر . بودنیاده ذلیل ، سفیل وعلیل یاشامق آخرتده ذوق ابدییه وسعدت قدسییه مستحق اوله بيلمک اینجون بشارتدر .) دین اخلاق صوفیه نصرانیه نك ، بالفعل هیچ حکمی قالمامشدر .

عصر مزك صاحب مسلك فیلسوفلرندن متوفی (هربرت اسپنسر) (تربیه) ناميله یازدینی کتایده (اخلاق زاهدانه) بی حقیله ذم وقدر ایتمش وبونك قرون وسطادن قالله برضالات اولدوغنی ادعا ایلشدر که طوغرودر . بوکتاب امر تربیه ده اعتقادی کلیاً ده کیشیدیردی وذوق مشروعك حیاته نافع بر مقصد اساسی اولدوغنی کوستردی . زمانه نك بو خصوصده اعتقادی بودر .

Aséité

فیرمیت Aséité

بوکله لایتیجه نك (Aséitas) لفظندن مشتقددر ؛ اونك ده اصلی : (A se esse) درکه معناسی (کندی کندینه وار اولمق) دیمکدر . قرون وسطی لسانندن بزه انتقال ایتش اولان بوتعبیر ، الهیات اصطلاحاتندندر . اللهك صفات Attributs ، ذاتیه سندن بری ده قیومیتدر . زیرا عالم وجودده هرشیک مبدای وخالق اولمق اوزره دوشونوله بیلن ذات الهیه کندی کندینه قائم والی الابد دائم اولمق کرکدر . اولیه اولماسه مخلوقاتدن فرقی اولمازدی . بناء علیه « قیوم » دیمک « بذاته قائم » ، یعنی وارلغنده باشقه بر سبیه محتاج اولمایان ذات دیمکدر . بزم لسان دین وتصوفزده بوتعبیر پك مشهوردر .

فقط صمدانیت کله سیده بومعناده وارد اولمشدر. نته کیم سورده توحیدده «الله الصمد» بویورولدینی کبی، «هو الحی القيوم»، کله لری ده جناب حقه وصف اوله رق چوق کره قرآن کریمده مذکوردر.

فلسفه ده، خصوصاً دور اخیر مناقشاتنده بوکله یه نادراً تصادف اولونور یالکز بعضی مذاهب فلسفه اربابی، الهی منکر اولقله برابر برمبدأ قیوم، بر اصل قدیم قبولده مضطر قالدقلری ایچون بوتعبیری او اصله وصف اوله رق اسناد ایتمیشدر. مثلاً (مادیون)، ماده نك غیر مخلوق اولدیغنی وهر دورلو تحولاتنه رغماً ازلی وابدی بولوندیغنی ادعا ایدیور. یعنی (ماده بذاتها موجوددر، قیومدر، یارادلامشدر) دیمك ایسته یورلر. كذلك صوك زمان فیلسوفلری آراسنده شدت الحادیه مشهور اولان (شوپنهاووه) بوتون موجوداتك مبدأ قدیمی اولمق اوزره (قوت Force) اعتقاد ایدردی؛ و بوکا کندی تعبیرنجه (ارادت Volonté) دیردی. ایسته بوفیلسوف (Aséité de la volonté قیومیت ارادت) ترکیبی بالالتزام قوللانمشدر. (اصطلاحاته آریجه مراجعت ایدیکنز)

Assentiment	تسلیم، قبول، تصدیق	فرانسجه
Assent	انکلیزجه	
Adezione	ایتالیانجه	
Zustimmung	آلمانجه	

ذهن، محسوسات و معقولاتدن برشینك، موافق حقیقت اولدوغنی؛ یاخود بر قضیه نك مطابق نفس الامر بولوندوغنی تسلیم و تصدیق ایلرسه، ذهنك بوقضاعنه (Assentiment) دیرلر. بوتعریفدن اکلاشیلیورکه (حكم Jugement) ده (تصدیق) بر شرط اصلی در. اگر ذهن بر قضیه نك موافق نفس الامر اولدوغنده تردد ایدرسه و یاخود بوموافقتی نظر اهمیته آمازسه (Assentiment) یوقدر؛ بناء علیه اوقضیه، منطق معناسیله، (قضیه) اوله ماز. اونك ایچوندرکه منطق ده (تصورات)، (تصدیقات) دن آیرلمشدر؛ تصدیقات دخی وجدانك قناعت و تسلیمیتنه مبنی، ذهنك قطعاً

حکمنه مقرون اولان قضایادر. كرك (ایجاباً Affirmativement) کرکسه (سلباً Négativement) ویردیکنز حکملر ذهنمك تصدیقه مقارن در. باشقه درلو اوله ماز. تصدیقه مقارن اولمایان دوشونجه لر (تصورات) دن عبارت قالیر. اونلرك (قیمت منطقیه Valeur logique) سی یوقدر. یعنی (دلیل و حجت Preuve, argument) اوله مازلر.

شو تقدیرجه (Assentiment) کله سنی منطق ده (تصدیق) لفظیله ترجمه ایتلی در. لسان عادی ده (موافقت)، (قبول)، حتی (رضا) معناسنه کلیر کچر. مثلاً: (Mon assentiment est gagné) جمله سنی: (بیم رضام استحصال ایدلمشدر!) دیه ترجمه ایدرز. (تصدیق) لفظی بورایه اویماز. (Son assentiment est acquis) دیمك (قبول ایدلمش) یاخود (موافقتی استحصال اولونمش) دیمکدر.

بوتعبیره، اسکی زمانلرده، بویوک براهمیت فلسفه ویرن (رواقیون Les stoïciens) ایدی. اوفیلسوفلر بو کیفیت وجدانییه (سین غائاته سیس = Συγκατάθεσις) دیرلردی. رواقیون، ادراك مسئله سنده - طبق (حسیون Sensualistes) کبی دوشونورلر، و (مدرکات حسیه Perceptions sensuelles) یه مقابل (فانتاسییه = Fantaisies = Φαντασμάτια) تعبیری قولانیرلردی که (کورونوشلر) یعنی ظواهر و حادثات معادلی در. فقط كرك رواقیون کرکسه حسیون منشأ علم اولمق اوزره حواسی قبول ایله مدرکات حسییه (فانتاسییه) دیمکده اتفاق ایتدکلی حاله، رواقیون یالکز مدرکاتمك بر (علم حقیقی Connaissance réelle) صاییله مایه جغنی ده ادعا ایدرلردی. حواس واسطه سیله عالم خارجی دن تلقی ایده بیلدیکنز بو (خیالات Images) ك بر علم حقیقی حیثیتی حائر اوله بیلمه سی ایچون ذهنك (Assentiment) ی نی دخی بر شرط اساسی اولمق اوزره تلقی ایدرلردی. شوتفصیلاته نظراً - رواقیون کوره - علمك منشأ عالم خارجی، واسطه تحصیلی حواس، سرمایه اصلی سی ده مدرکات حسییه ایدی، فقط بوقدری انحق (فانتاسیا) دن یعنی (خیالات محسوسه) دن عبارت قالیوردی؛ بونك بر علم قطعی و حقیقی حیثیتی قازانه بیلمه سی ایچون، روحك کندی

کنند بکنند بر حکم و قرار و یرمسی و خیالات محسوسه نك موافق حقیقت اولوب اولمادیغنی قبول ، تسلیم و تصدیق ایتمه سی شرط ایدی . ایشته (Assentiment) تعیرینك تاریخ فلسفه ده معنای مخصوصی بودر . بو حکم در واقعون اعتقاد نجه - حواسدن و محسوساتدن منبعث دکلدر . ذهنك کندیسندن صادر اولمشدر . خیالات محسوسه نك غلطات حسیه دن اولوب اولمادیغنی ذهن ، انجق بو (حکم ذاتی) سی ایله اکلایه بیلیر .

دیمك كه حصول علم مسئله سنده رواقیون یالکز عوامل حسیه و موجودات خارجیه ایله قناعت ایتبور ، صرف ذهنی بر (عنصر علمی élément de conmais) نك وجودنی دخی شرط اوله رق کوستریوردی . بویه ، حصول علمده (شی Object) ایله (نفس Sujet) ی همان عینی درجه ده ذیمدخل عد ایدن رواقیونه ، قانتك افکاری قیاس اولونه بیلیر . چونكه پك بکزر . زیرا بومشهور المان فیلسوف مجددی دخی - طبق رواقیون کبی - حصول علمده هم اشیای خارجیه نك همده روحك خدمتی اولدوغنی ادعا ایدیور . مثلاً « حسیون Les sensualistes » کبی یالکز اشیای خارجیه نك تأثیریه بزده علم حاصل اوله بیله حکنه قناعت ایده میور . کذلک اسکی (عقلیون Rationalistes) کبی ، « منشأ معلوماتز مبادی عقلیه در » دخی دیمبور . مدرکات حسیه یی ترتیب و اونلره بر معنا و یرمك ؛ تجربه یی اداره ایتك منحصرأ عقلك قابلیت ذاتیه سی و هنریدر . فقط « مواد علمیه » ، حواس واسطه سیله عالم خارجیدن ادراك والتقاط اولونور ؛ دیور .

(Raison ' Anticipation ' Apriori ' Analogie) کله لرنده بوبخه دأر اشارات و بعضی یرده دخی تفصیلات واردر .

تصدیق Assertion

Assertion

منطق اصطلاحاتسنددر . قطعياً بر حکمی متضمن اولان بر جمله ده بهمه حال (تصدیق) واردر . آنجق بویه بر جمله یه (قضیه Proposition) دیرلر . شو تقدیر جه قضیه ارکانندن معدود اولان (موضوع Sujet) حقنده بروصف اسنادیله بر حکم و یریلیرسه ایشته از حکمه (Assertion) دیرلر . بونی

« Affirmation » ایجاب تعیریه بر طوتمایدر . مثلاً [هر انسان فانیدر] قضیه سنده بالطبع تصدیق واردر . چونكه بوراده موضوع اولان انسانه فانيلك صفتی حمل اولونه رق حکم ایداش اولویور . کذلک [هیچ بر انسان لایخطی دکلدر] قضیه سنده عینی صورته تصدیق واردر . زیرا ینه قضیه ده موضوع اولان نسانه (لایخطی اولماق) صفتی حمل ایدله رك حکم و یریلیر . یالکز شو فرق وار که برنجی قضیه ده بو حکم ایجاب (Affirmation) شکنده در ؛ ایکنجی قضیه ده (سلب Négation) صورتسده در . آکلایه بیلیر که « Assertion » تعیری ، ایجاب و سلب صورتلری ده شامل ، علی الاطلاق بر تصدیق در . منطقده بویه بر حکمه مقارن اولمایان فکرلره (تصورات) دیرلر که بونلرده بر صفتی بر شیئه حمل ایتك یوقدر ؛ اگر بو حمل واقع اولورسه آنجق او وقت بویه سوزلره (تصدیقات) نامی و یریلیر . (قضیه لر) جمله تصدیقات صنفده داخلدر .

[اصطلاحاته وبالخاصه Assertorique تعیرینه باقیکنز]

صناعات سبعة Arts libéraux

Arts libéraux

بوتون قرون وسطانك مدرسه پروغرامنده یدی درس واردی . بوتلر سقولا ستیق تعلیماتك اساسنی تشکیل ایدردی . علی لاطلاق بودر سله (Arts libéraux) ده نیردی . مع مافیه بویدی (فن) جنسیت اعتباریه باشلیجه ایکی قسمه آبرلمشدی : برنجی قسم ، (صرف ونحو grammaire) (بلاغت Rhétorique) و (منطق logique) فسلرینی شاملدی . (ثالث Trivium) دیدکری طاقم بودر که اوج نوع فی جامع اولان قسم معناسنه کلیر . ایکنجی طاقه (ربوع Quadrivium) دیرلر ایدی که اونده ده (حساب arithmétique) ، (هندسه géométrie) ، (هیئت دهاطوغروسی فلکیات astronomie) و (موسیق musique) اولمق اوزره درت نوع فن واردی .

الهیات ، بوضایع سبعة ده داخل بولونمیوردی ؛ چونكه اونلر ك جمله سنه حاکم ایدی . نته کیم حکمت طبیعه دخی ذکر اولونمامشیدی . بودرس

پروغرامنده کورولن تقسیمات علومک مرتب و موجدلری (مارچیانوس قاپه‌لا Marcianus Capella) ایله (بوئس Boèce) نامنده ایکی معلم ایدی . بوذاتلر ، حکمای اسلافدن (فیثاغورس Phythagores) ک مذهب فلسفه‌سنی - بعضی تعدیلات ایله - قبول ایتمش اولدقلری ایچون بوتون (نوپیثاغوریلر Néo-pythagoriciens) کبی ، حکمت طبیعیه ایله ریاضیاتی برطوتوبورلر ، آیری غیری علملر عد ایتیمورلردی . بوسباق نظره کوره فلکیات ، حکمتک بوتون (مبصرات Optique) قسمی ، موسیقی‌ده تکمیل (مبحث صدا Accoustique) فصلنی تشکیل ایدیوردی .

ایشته سقولاستیق تعلیماتی بوپروغرام اساسانه مستند اوله‌رق تکمیل قرون وسطی امتدادنجه دوام ایتدی . حتی بزده شرق مدرسه‌لرنده بوپروغرام عیناً قیوا ، ایدلمش وحالا بوکونه قدرده دوام ایتکده بولومشدر . فی‌الحقیقه بزم مدرسه‌لریمزده اوتهدنبری درس‌لرک ترتیبی و اصول تعلیم ، ادعای تصدیق ایدر : اولاً (بنا و مقصود) یعنی (grammaire) الیه باشلامق ، برمدت صوکره « مطول » او قویوب « بدیع بیان و معانی » دن درس کورمک یعنی (Rhétorique) او کرمک ، اوندن صوکره « شمسیه » شرح مطالع ایله مشغول اولوب منطق تحصیل ایتک قاعده اساسیه ایدی . ایشته « trivium » ترتیبی بودر . حساب هندسه و فلکیات درس‌لری دخی - بدایت امرده مدرسه‌لریمزده تعلیم ایدلمکده ایکن - کاتب چلبی‌لک ، تعبیر ظرفنجه - « عاقبت سوق علمه کساد عارض اولماین » ، متخصص علمابولونه مازاولمش و بناء علیه بوسنایع سبعة پروغرامنک « quadrivium » قسمی یاواش یاواش معطل و - بالا خره - بوسبوتون متروک قالمشدر .

موسیقی‌یه کلنجه ، اروپا مدرسه‌لرینک تعلیماته نظراً بوسبوتون براستنا تشکیل ایدیوردی . موسیقی بزده دخی حقیقتاً اقسام حکمتدن عدا ایدیلوردی . نابی ، (خیریه) سند : « موسیقی فنی ده حکمتدن در! » دییور . فقط بوبوله اولدوغی حالده ، احکام شرعیه ، اونی ، تربیه اسلامییه یه پک موافق کورمه‌مش اولدوغی ایچون ، - هیچ اولمازسه دولت عثمانیه ده مؤسس اولان - مدارسده

اصلاً تعلیم ایدلمه‌مشدی . نته کیم موسیقی فنک حکمتدن اولدوغی تسلیم و اعتراف ایدن نابی ، اوغلنه نصیحت ویریرکن :

یا قیشیر سینّه جورجی‌یه کان ؛
چالمه اولیه دودوکی مولانا
دینه‌یه آدیکه نیزن منلا ! . . .

دیهرک موسیقی تحصیلندن اونی منع و تحذیر ایدیور . بوکبی سیبلره معطوف اولق کرکدرکه بزم مدرسه‌لریمزده صناعات سبعة پروغرامنک انجق الی فنی معتبر اولمش و موسیقی اوندن طی ایدلمشدی ؛ صوکره صوکره قسم رابوعده داخل اولان علوم ریاضیه و فلکیات دخی - اربابنک فقدانندن ناشی - معطل قانجه درس‌لر ، اسکی پروغرامنک « ثالث » قسمنه منحصر قالدی . موسیقی ایسه مدرسه‌لر خارجنده تعلیم ایدیلوردی .

بالخاصه فلسفه‌یه کلنجه ، وقتیه مدارس اسلامییه کال جدیتله تعلیم ایدیلیرکن و بغدادده نظامیه مدرسه‌سنده ، اصفهانده « والده » مدرسه‌سنده یک بویوک فیلسوفلر ، منطقچیلر و عالم‌لر یتیشیرکن ، ینه عینی رغبتسزک و کساد عرفان سببیه اهلی قالمش و نهایت فلسفیات و علم طبیعی نامنه « قاضی میر » ایله قناعت و اکتفایه مجبوریت الیرمشدی .

عثمانیلرک اک مشهور نحریری واک بویوک عالمی اولان « حاجی خلیفه » یعنی « کاتب چلبی » ، بزده مدرسه تعلیماتنک شایان نأسف اولان بودرکه تردیسندن - صمیمی برحس نأسفله - بحث ایدیور ؛ « میزان الحق فی اختیار - رالالحق » نام رساله معروفه‌سنده ، معنادار بر مقدمه مختصره‌ی متعاقب مدرسه‌لریمزک حالنی تصویر ایدیور ، و بعضی علومک ، هله حکمتک « یعنی فلسفه‌نک ! » اسکی پروغرامدن طی اولونماسی یوزندن استانبول مدرسه‌لرینک نه‌درک‌لره دوشدوکنی آکلاتیرکن عیناً شو سوزلری سویلیور : « . . . ابوالفتح سلطان محمد خان ، مدارس ثمانیه بنا ایدوب [قانون اوزره شغل اولونه !] دیو وقفیه‌سنده قید ، و « حاشیه تجرید » و « شرح مواقف » درس‌لرین تعیین ایله‌مشدی . صوکره کلنلر ، [بودرسلر فلسفیاندر !] دیو قالدیروب « هدایه » و « اکمل » درس‌لری او قومنی معقول کوردی . یالکز

اوکا اقتصار نامعقول اولغله، نه فلسفيات ونه هدايه واکمل قالدى. بونکله رومده «يعنى تور کياده!» سوق علمه کساد کلوب اهلى انقراضه قريپ اولغله بعض کنارده، اکراد ديارنده «يعنى کردستان طرفلرنده!» يرير قانون اوزره شغل ايدن طالبلرک مبتديلى رومه کلوب عظيم طفره ساتار اولديلر.... الى آخره!...


اکلاشيلورکه جتتمکان فاتح سلطان محمد مشهور «نصير الدين طوسى» نك «تجريد» نام اثر فلسفى سى ايله «قاضى عضد» ك معروف عالم اولان «مواقف» نام کتابى مدرسه پروغراملرينه داخل ايتمش ايکن، صوکره کلنلر اونلرى قالدير مشلر وسويه عرفان شدته تنزل ايتمش؛ اوکا بدل غايت سطحى ومختصر اولان «هدايه» وامثالى کتابلرله اکتفا ايتمشلرکه حالا بوکونه کلنجيه قدر، يعنى زمانمزد مدرسه تعليماتنک اصلاحنه تشبث اولوتجهيه قدر «قاضى مير» مدرسه لرمزك باشليجه حکمت کتابى ايدى. طبيعى درکه اسكى پروغرامك «رابوع quadrivium» قسمنى تشکيل ايدن هندسه، حساب، هيئت وموسيقى بک چوق زماندنبرى مطوى ومتروک ايدى. نالوث قسمنک مرجع قلماسنه سبب لسان وادبياته عائد قللى شامل بولونماسى وبوفنلرک عقايد متعلق مسائل مشوشه احداث ايدنه جک ماهيته اولماماسيدر.

مع مانیه حالا (صنایع سبعه) ترتيبدن، يعنى سقولاستيق پروغرامندن (مدرسه تعليماتى l'enseignement universitaire) نى بوسبوتون قورتاره مامش اولدوغمز صراحتاً تين ايدىيور.

[بوادعانک طوغرو اولدوغنى دها اى اکلامق ايجون acroamatique
تعبيرنده مدرسه لرمزه عائد اولان تفصيلاته دخى بايکيز!]

بوفنلره (arts) ده نيلمسنک سببى (esthétique, science) کله لرنده (علم ايله صنعتک مناسبتى la relation de la science et de l'art) يختدمه ايضاح اولونمشدر. اورايه بايکيز.





TÜRK TARİHİ KURUMU

Rıza Tevfik — Kamus u Felsefe

A

8459